

清代傳記叢刊·綜錄類 ⑦
周 駿 富 輯

國朝耆獻類徵初編

(五十)

卷三
三七九

(清)李桓輯



明文書局印行

W.C. 1/3

國朝耆獻類徵初編卷三百七十一目錄

忠義四十一

烏雲布 倭克金泰等 色明額 薩炳阿等 色布真布 郭仁等

慶祥 舒爾哈善 富隆阿 錫郎阿等

錫齡阿 蘇勒通阿等 景興 佟善等 阿爾布善 成貴等

富清阿 常順等 慶福 奈滿等 鶴松 特古斯等

色勒精阿 德克精額等 三音布 扎勒杭阿等

諾呢布 那當阿等 周吉圖 林鳳等 蘇超 李珍等

張之仁 劉得基等 張華 李登舜等 史可友 山望受等

盧煜 賀萬清等 袁登舜 張喜等 陳孝寬 陳天錫等

國朝耆獻類徵初編卷三百七十一 忠義四十一 目錄

國朝身自其英名不示示
卷三十一

蘇倫保

鍾虎翀

穆升

黃魁等

井美

王鴻儀

張國保

張大有

趙舉

岳振太

劉耀

張秦等

國朝耆獻類徵初編卷三百七十一

通奉大夫前署江西巡撫江西布政使司布政使湘陰李桓輯

忠義四十一

烏雲布 倭克金泰等

烏雲布白佳氏滿洲正黃旗人駐防伊犁嘉慶十九年由委前鋒校補驍騎校道光元年升防禦五年二月升佐領九月因逆裔張格爾入卡滋事調赴喀什噶爾出征六年四月設伏於雅滿山逆奇比勒迪突至我兵擊敗之六月張逆糾眾數萬由大河沿一帶直犯喀城參贊大臣慶祥偕領隊大臣烏凌阿穆克登布各率所部官兵分三營拒守爲賊所乘烏雲布與防禦倭克金泰驍騎校

達三布前鋒校圖們泰葉布鏗額同時力戰陣歿事 聞均 賜
卹如例 賞雲騎尉世職烏雲布世職未襲倭克金泰子果爾明
阿襲達三布子蘇勒通阿襲圖們泰子納勒本襲葉布鏗額子鄂
者狼襲倭克金泰李佳氏蒙古正黃旗人駐防伊犁惠遠城嘉慶
二十五年由委前鋒校補驍騎校道光二年升本職達三布李佳
氏滿洲正藍旗人駐防伊犁巴彥岱道光三年由催總補本職圖
們泰徐佳氏滿洲鑲白旗人道光三年由前鋒小旗升本職五年
出征喀城葉布鏗額擺雅刺氏滿洲鑲黃旗人道光五年由前鋒
小旗隨征喀城六年升本職

右 國史館本傳

色明額 薩炳阿等

色明額徐佳氏滿洲正黃旗人駐防伊犁惠遠城嘉慶三年由催
總補驍騎校十八年升防禦道光三年升佐領五年逆回張格爾
在喀什噶爾卡外滋事 上命伊犁將軍慶祥爲喀什噶爾參贊
大臣帶兵勦辦時色明額在佐領任內奉派隨征六年官軍圍張
格爾於阿爾圖什回莊會夜雷雨張逆潰圍逸去復由大河沿等
處聚眾數萬進犯喀城慶祥急令撤城外防兵回救而臺路已爲
賊斷色明額隨領隊大臣穆克登布督兵轉戰眾寡不敵與防禦
薩炳阿色布貞額驍騎校富克金布前鋒校伊仁布同時戰歿事
聞均 賜卹如例 賞雲騎尉世職色明額子智凌襲薩炳阿子

富興襲色布貞額子德林襲富克金布子納爾瑚善襲伊仁布子
西拉保襲薩炳阿伊蘇氏滿洲正紅旗人駐防伊犁巴彥岱道光
三年由委前鋒校補驍騎校五年升本職色布貞額吳佳氏蒙古
鑲白旗人駐防伊犁惠遠城道光四年由藍翎長補驍騎校五年
升本職富克金布瑚塔氏蒙古鑲藍旗人駐防伊犁惠遠城嘉慶
二十四年由催總授本職伊仁布固佳氏滿洲鑲黃旗人道光三
年由前鋒小旗補本職

右 國史館本傳

色布眞布 郭仁等

色布眞布舒穆魯氏滿州鑲紅旗人駐防伊犁由委前鋒校於嘉慶十九年補驍騎校二十年授防禦道光元年升佐領兼委前鋒章京事五年回部逆裔張格爾句結布魯特回眾潛入喀什噶爾卡倫伊犁將軍慶祥令領隊大臣穆克登布帶兵馳赴色布眞布時在佐領任內派往剿捕隨穆克登布至喀什噶爾遂赴圖舒克塔什一帶卡倫偵探賊蹤六年六月張格爾復潛結白帽回眾爲內應自率安集延布魯特數百人於呼爾特哈過河由阿克密依特至托雲山地方徑趨東北穆克登布帶領駐卡官兵抄至東北堵剿賊眾窮蹙於阿爾圖什回莊內拒守我兵四面攻圍會夜雷

兩張格爾濟圍逸去而喀城逆回紛紛響應張格爾復由大河沿庫森塔斯渾合眾數萬匪攻喀什噶爾慶祥令穆克登布等撤兵回救而臺路已爲賊斷色布真布隨穆克登布提兵轉戰眾寡不敵與防禦郭仁驍騎校德英額前鋒校富呢雅罕俱歿於陣事聞均 賜卹如例 賞雲騎尉世職色布真布子蘇明阿襲郭仁子蘇壽襲德英額子富祿保襲富呢雅罕子珠蘭布襲郭仁舒木里氏滿洲鑲紅旗人道光二年由委前鋒校補驍騎校五年升本職德英額鄂蘇里氏滿洲鑲黃旗人道光四年由領催授本職富呢雅罕章佳氏滿洲鑲藍旗人道光元年由前鋒授本職

右 國史館本傳

慶祥

慶祥圖博特氏蒙古正白旗人曾祖拉錫官領侍衛內大臣祖納
穆扎勒以靖逆將軍平回部盡節 贈三等義烈公父保凝武英
殿大學士俱有傳乾隆六十年由監生授藍翎侍衛嘉慶四年升
三等侍衛八年升二等侍衛十三年丁父憂襲三等義烈公在散
秩大臣上行走十四年授鑲白旗蒙古副都統十五年兼正藍旗
護軍統領十六年調鑲藍旗滿洲副都統旋調鑲紅旗滿洲副都
統 上校射所管副護軍參領人皆命中 上以其訓練有方交
部議敘旋授理藩院右侍郎十八年八月調工部右侍郎九月教
匪林清李文成等句結謀逆李文成及其黨分擾直隸長垣河南

滑濟山東曹定諸縣戕官據城 上命慶祥帶火器營官兵前赴軍營隨欽差大臣那彥成剿捕河南賊匪時賊據滑縣分屯道口等處爲犄角十月大兵分三路夾攻道口慶祥在南路策應擒殺千餘仍整兵進剿殺賊萬餘遂破道口捷入 命交部議敘十二月大兵復滑城河南平 上以慶祥在事有功交部議敘尋管帶京營官兵凱撤檻送賊目牛亮臣徐安國來京授正黃旗漢軍都統二十一年調熱河都統奏請勒限嚴催控案將屢提不解之知縣交部議處 上嘉其實心任事二十二年疏請熱河行營左近山場地畝禁止墾種並山場餘地賞給額魯特游牧 命如所請行是年調烏魯木齊都統二十五年四月授伊犁將軍九月回部

逆裔張格爾率眾潛入喀什噶爾卡倫殺傷官兵搶奪馬匹幫辦大臣色普徵額帶兵剿捕賊眾逃竄出卡經喀什噶爾參贊大臣斌靜奏入 命慶祥馳往剿辦並查斌靜有無激變情事尋奏言張格爾係薩木薩克次子因在浩罕窮苦無賴起意糾約眾逆搶奪喀地勢敗逃竄尚非由激變而成惟斌靜辦理草率且據眾伯克控告斌靜行止不端縱容家人凌辱回眾婪索多贓咎無可追色普徵額帶兵出卡毫無弋獲亦屬庸謬 命逮問斌靜等交慶祥嚴審定擬各坐罪如律慶祥旋奏張格爾遠竄無蹤又值天寒大雪卡外道路荒遠難以窮追請懸賞設法誘擒 上許之道光元年正月疏陳善後六事一驗放各城伯克請令參贊與幫辦大

臣公同察驗聯銜具奏一伯克專理回民事務應擇回民敬信之人請令阿奇木伯克秉公保送首選功績次稽家世次論資格於履歷內註明以便揀選一請寬向來例禁令喀城阿奇木伯克仍與浩罕伯克往來通信庶內地得知夷情且不使外夷疑慮一喀什噶爾防兵前於孜牙墩滋事案內調伊犁錫伯索倫滿洲兵三百名戍守奏定隨時察看停撤查喀城存兵甚少不敷彈壓驅遣所有防兵請永遠無庸裁撤一存城馬匹不敷徵調請增至一百五十匹常川餵養一喀城奸徒或代張逆斂錢或藉和卓之名斂錢肥已向來槩予駢誅未免不分輕重易致諱匿請分別定以斬遣枷責則案易破而人知儆又密疏言浩罕部落自乾隆二十七

年通中國以來屢經入 覲嗣伯克愛瑪爾兩次遣人求覲 天朝一因差人到喀什噶爾之時在年班伯克起程後一因所遞夷字不合體制均經奏明駁飭並裁汰供給將貨物全行抽稅伏思化外邊夷殊方異俗但宜羈縻綏撫不必盡以禮法相繩況該部落屢遣使入京非不通中國之人一旦絕其通好焉有不生疑慮之理臣愚昧之見以爲擒獲張格爾等諸逆其事輕收復浩罕數年未通之情其事重況張格爾等窮蹙餘生無人附和亦斷不能成事嗣後儻該伯克差額勒沁陳請入覲 天朝尙求 皇上恩施逾格准令進京則夷心旣安邊圉日靖矣 諭曰浩罕在乾隆年間曾經八次遣使入覲非未通中國者可比此時因朕登極初

元懇請朝覲則允其前來於事理俱順惟出於該伯克額懇則可慶祥斷不可稍露招致之意轉以示弱若該伯克果遣使懇求慶祥當查照乾隆年間舊例一體供給悉做成規一面先行奏聞該將軍酌定行期令與回城年班伯克一同來京以符體制若該使臣別有要求舊例所有者不妨准行舊例所無者卽行斥駁於羈縻撫馭之道庶兩得之其查辦善後事宜均著照所議辦理四月回伊犁將軍任五年九月張格爾復來犯卡參贊大臣永芹奏幫辦大臣巴彥巴圖出卡剿賊全軍陷歿 上革永芹職 命慶祥爲喀什噶爾參贊大臣速往剿辦時張逆已竄往托古斯托羅地方慶祥遣員查探路徑以備進兵並曉諭效順之布魯特許以重

賞令其設法擒獻六年四月張格爾遣其黨赫爾巴什潛赴綽勒薩雅克愛曼一帶糾合夷眾官兵擒斬之張格爾復因托古斯托羅糧缺令奇比勒迪至巴雅爾一帶開渠占地我兵設伏於雅滿山奇比勒迪至伏兵起斬之殲從逆數十人五月擒斬奇比勒迪之子胡達巴爾底與其姪伊斯瑪依爾及著名逆黨瑪呼里有旨嘉獎時張逆在卡外游奕日久白帽回眾潛與勾通六月官軍於阿爾圖回莊捕獲賊謀言張逆將於回子過節日進卡滋事方研訊聞張格爾已由開齊山突出入屯於阿爾圖什回莊慶祥急令幫辦大臣舒爾哈善及伊犁領隊大臣烏凌阿分帶官兵往剿會夜雷雨張格爾潰圍出走我兵分投追捕而河色爾布依罕愛

里克一帶白帽回眾紛起應賊張格爾復由大河沿等處合數萬人進犯喀城回眾亦多從亂慶祥急調戰兵及各卡防兵於城之西南分三營拒守賊氛益近領隊大臣烏凌阿穆克登布率三營之兵迎敵同時陣歿賊日夜攻偏城遂失守慶祥力竭自經死十月阿克蘇辦事大臣長清奏入 諭曰慶祥在伊犁將軍任內兩次派往喀什噶爾查辦逆裔張格爾滋擾之事前任參贊大臣等種種辦理不善俱未能徹底查明據實奏參其平日在伊犁辦事尚屬勤慎迨投爲喀什噶爾參贊大臣已逾半載並未將張格爾在卡外游奕實在情形探訪明確以致該逆勾結煽亂占據回城茲據長清查奏賊匪圍攻喀什噶爾漢城慶祥督率將士盡力抵

禦兩月有餘賊匪竄遁地道進城復經官兵巷戰拒殺多名因鎗
彈俱已用完慶祥力竭自盡該參贊就地固守爲國捐軀朕垂淚
覽之憫惜之至著加恩贈太子太保其應如何加賜卹典該部詳
查妥議具奏再降諭旨並著該旗俟伊子百日服滿後卽行帶領
引見其家屬回京甘肅陝西河南直隸各督撫派員妥爲照料並
加賞銀一千兩以示優卹尋晉一等義烈公加一雲騎尉世職
賜祭葬 于謚壯直入祀昭忠祠並於喀什噶爾建昭忠祠以慶
祥等入祀 御製憫忠詩勒石七年揚威將軍大學士長齡等克
復四城生擒張逆西陲蕩平八年俘張格爾至京廷訊罪狀畢
諭曰逆裔張格爾著卽寸磔梟示慶祥以喀什噶爾參贊大臣遭

國朝三才傳卷之三十一
變被困力竭捐軀皆由該逆倡亂以致傷我大臣殊堪髮指著慶
祥之子侍衛文輝同往市曹看視俾紓積憤並將該逆摘心交文
輝於伊父慶祥墓前致祭用慰忠魂長子文輝襲一等公爵散秩
大臣

右 國史館本傳

舒爾哈善

舒爾哈善葛哲勒氏滿洲鑲白旗人嘉慶二年川陝楚教匪滋事舒爾哈善由吉林前鋒委驍騎校隨署廣州將軍明亮等赴川剿辦逆匪姚之富齊王氏高均德等合眾西竄漢中屯於黃官嶺沿江窺伺欲乘閒北渡明亮等以兵扼北岸賊眾躡淺偷渡經官兵截擊舒爾哈善等衝入江心斬獲甚眾 賞戴藍翎四年隨參贊大臣德楞泰大破賊眾於八石坪先後擒獲逆首龔文玉卜三聘等奏入 賞換花翎五年補驍騎校六年復隨德楞泰追賊入陝大破首逆徐添德舒爾哈善以接戰奮勇 賞舒瑪該巴圖魯名號七年升盛京防禦八年升甯古塔佐領十一年升布特海烏拉

國朝通志卷之三十一
協領十八年河南逆匪李文成滋事陷滑縣大兵進討舒爾哈善
帶吉林兵赴營隨剿時官兵圍滑縣首逆李文成及其黨劉國明
等竄入輝縣之司寨舒爾哈善偕總兵楊芳等追剿攻破司寨殲
斃賊目劉國明等文成自焚死敘功 賞副都統銜二十三年布
特哈革職佐領世襲雲騎尉富敏挾舒爾哈善劾奏之嫌列十二
款控告經將軍松林訊明虛誣富敏坐罪如律舒爾哈善以統轄
地方卡座未能徧巡又私借用稅銀部議革職道光元年 命來
京 賞三等侍衛四年擢頭等侍衛充庫爾喀喇烏蘇領隊大臣
五年九月回部逆裔張格爾句結薩雅克部落布魯特入卡滋事
喀什噶爾幫辦大臣巴彥巴圖戰歿 上調舒爾哈善充喀什噶

爾幫辦大臣 命迅速馳赴新任十二月抵任六年六月張逆潛
結卡內各白帽回眾爲內應率眾自托雲山東北直趨伊斯里克
圖舒克塔什卡內屯於阿爾圖什回莊喀什噶爾參贊大臣慶祥
令舒爾哈善率滿漢官兵爲前隊以領隊大臣烏凌阿爲後應馳
往剿捕張格爾率眾千餘迎拒官兵奮勇進攻烏凌阿繞至賊後
由山梁下壓賊眾敗退舒爾哈善身先士卒乘勢偪戰已負槍傷
仍麾兵前進殺賊數百人餘匪竄回拒守舒爾哈善回城調養烏
凌阿率兵圍其莊會夜雷雨張格爾潰圍遁去復合眾進擾喀城
八月城破舒爾哈善被戕七年揚威將軍大學士長齡等奉 命
討逆克復四城張逆旋亦就獲西陲盪平 上加恩死事諸臣舒

爾哈善 命照都統例賜卹 予祭葬入祀昭忠祠並於喀什噶
爾建昭忠祠與慶祥等一體入祀 御製憫忠詩勒石廕騎都尉
世職子德成額襲騎都尉官佐領德平阿官驍騎校

右 國史館本傳

富隆阿 錫郎阿等

富隆阿固佳氏滿洲鑲黃旗人駐防伊犁由委前鋒校於嘉慶十八年補驍騎校十九年升防禦二十二年升佐領道光五年七月升協領九月回部逆裔薩木薩克之子張格爾在喀什噶爾卡外茲事 上命伊犁將軍慶祥爲喀什噶爾參贊大臣帶兵剿辦時富隆阿在協領任內奉派隨往軍營六年六月官軍圍張格爾於阿爾圖什回莊會夜雷雨張格爾潰圍遁去而喀什噶爾子紛紛從亂張格爾復由大河沿等處合眾數萬進犯喀什噶爾慶祥急召戰兵及各卡防兵於城之西南分三營拒守兩月有餘八月賊匪空通地道進城城陷富隆阿與佐領錫郎阿多克金泰多仁布額勒洪

額俱歿於陣事 聞均 賜卹如例 賞雲騎尉世職富隆阿子
舒們布襲錫郎阿子柯仁泰襲多克金泰子福珠禮襲多仁布子
格洪額襲額勒洪額子烏圖襲錫郎阿襲佳氏滿洲鑲黃旗人嘉
慶十九年由委前鋒校補驍騎校二十二年升防禦二十三年升
本職多克金泰拜兪特氏蒙古正紅旗人嘉慶十二年由委前鋒
校補驍騎校十五年升防禦十七年升本職多仁布伊爾根覺羅
氏滿洲正黃旗人嘉慶二十三年由委前鋒校補驍騎校二十四
年升防禦道光三年升本職額勒洪額兆佳氏滿洲正紅旗人嘉
慶十八年由催總授驍騎校十九年升防禦二十一年升本職

右 國史館本傳

錫齡阿 蘇勒通阿等

錫齡阿董佳氏滿洲鑲黃旗人駐防伊犁惠遠城嘉慶十一年由委前鋒校補驍騎校十二年升防禦十三年升佐領十九年升協領道光元年回部逆裔薩木薩克之子張格爾入卡滋擾隨參贊大臣慶祥出征喀什噶爾六年我兵圍賊於阿爾圖什回莊奮力兜剿賊勢窮蹙會夜雷雨賊潰圍出復由大河沿等處糾合回眾數萬進犯喀城城內回眾紛起應賊城陷錫齡阿與佐領蘇勒通阿前鋒校何楞額伊里布烏爾袞泰藍翎侍衛雙通同時擊賊陣歿事 聞均 賜卹如例 賞雲騎尉世職錫齡阿孫湍多太襲蘇勒通阿子倭新泰襲何楞額孫那勒春襲伊里布子德克登額

襲烏爾袞泰子壽住襲雙通世職未襲蘇勒通阿胡喜哈利氏錫伯營正黃旗人駐防伊犁由領催於嘉慶十年補藍翎長十九年升驍騎校洊升本職何楞額沙達喇氏滿洲鑲藍旗人駐防伊犁惠遠城嘉慶二十一年由前鋒補本職伊里布揚佳氏滿洲正藍旗人道光二年由前鋒小旗補本職烏爾袞泰趙佳氏滿洲鑲藍旗人駐防伊犁巴彥岱道光五年由前鋒小旗補本職雙通鄂穆綽氏滿洲鑲白旗人道光元年由護軍補本職

右 國史館本傳

景興 佟善等

景興李佳氏滿洲鑲紅旗人駐防伊犁嘉慶三年由委前鋒校補
驍騎校五年升防禦十年升佐領二十五年九月喀什噶爾卡倫
外布魯特滋事伊犁將軍慶祥奏言景興熟悉回情派令馳赴查
看旋經參贊大臣永芹奏畱暫署委協領事務道光六年六月逆
回張格爾復率布魯特等滋事慶祥以景興曉事又令馳往偵訪
幫同設法進剿旋與七品伯克帕塔爾生擒奇比勒迪之子胡達
巴爾底及其姪伊斯瑪依爾當卽帶同奇里克愛曼布魯特比伊
斯拉木伯克將二犯縛解來城伏誅繼又探得張格爾見隨同從
前滋事之汰劣克一處居住卽乘其未備剿殺逆回百餘名生擒

楚滿一名奏入得 旨佐領景興派令差探節次認真著加恩遇
有伊犁協領缺出儘先升補先換頂帶是年八月喀什噶爾城陷
景興與防禦佟善前鋒校雙順伊凌阿皆力戰陣亡事 聞均如
例 賜卹廕雲騎尉世職景興子托雲額襲佟善嗣子薩炳阿襲
雙順子吉忠襲伊凌阿子福明襲佟善托克托木特氏蒙古正黃
旗人嘉慶十七年補印房委筆帖式二十年回匪阿琿孜雅墩滋
事追捕奮勇數立戰功 大學士將軍松筠保奏奉 旨儘先升用
二十一年補本城驍騎校道光二年升授本城防禦雙順金佳氏
滿洲鑲黃旗人伊凌阿托克托墨特氏蒙古正黃旗人俱由前鋒

補本職

右 國史館本傳

國史館本傳 卷之十一 忠義四十一

阿爾布善 成貴等

阿爾布善莫爾達扎氏滿洲正黃旗人由黑龍江領催於嘉慶十八年出師河南勦辦教匪歷攻道口司寨克復滑城生擒賊首牛亮臣李文成在事出力十九年陝西岐郿匪徒滋事焚掠南山一帶村莊裹脅居民奉派殲除於棧東棧西賊匪竄逸之區堵禦搜捕奮勇爭先並同眾俘獲賊目麻大旗譚貴餘孽淨盡凱撤敘功得 旨賞藍翎侍衛在上駟院上虞備用處行走道光元年擢三等侍衛五年升副護軍參領六年派往喀什噶爾守卡逆裔張格爾句結煽亂擁眾薄城官兵盡力抵禦兩月有餘賊匪空通地道城陷與護軍校成貴法保同時戰歿事 聞均 賜卹如例 賞

雲騎尉世職阿爾布善子雅爾江阿襲成貴子常興襲法保世職未襲成貴克理特氏蒙古鑲黃旗人由護軍於道光元年擢護軍校四年派往喀什噶爾法保那木喀氏蒙古鑲黃旗人由謄錄議敘補授理藩院筆帖式道光元年擢藍翎侍衛以誤差降補護軍校四年派往喀什噶爾守邊均在卡防禦賊屢著戰功

右 國史館本傳

富清阿 常順等

富清阿瓜勒佳氏滿洲正白旗人由護軍於嘉慶二十年拔補護軍校二十二年授三等侍衛二十五年擢副護軍參領道光二年改授二等侍衛五年派往喀什噶爾換防六年回部逆裔薩木薩克之子張格爾句結白帽回眾進卡滋事參贊大臣慶祥令幫辦大臣穆克登布及伊犁領隊大臣烏凌阿帶兵追捕圍賊於阿爾圖什奮力兜剿賊勢窮蹙會夜雷雨張格爾潰圍遁去而河色爾依罕愛里克一帶白帽回部紛起應賊張格爾復聚眾數萬由大河沿等處薄喀城城陷富清阿與三等侍衛常順護軍校定德均在卡倫擊賊陣亡是年副護軍參領倭什洪額在葉爾羌卡倫陣

歿先後事 聞均 賜卹如例 賞雲騎尉世職富清阿子揚桑
阿襲常順子舒通阿襲定德子雙壽襲倭什洪額子達沖阿襲常
順顏扎氏滿洲正藍旗人由健銳營前鋒出師湖北疊次殺賊著
有戰功嘉慶二十四年升驍騎校道光元年升本職定德兆佳氏
滿洲正白旗人由護軍於嘉慶十六年授藍翎長二十一年升本
職倭什洪額瓜勒佳氏滿洲鑲藍旗人由護軍於嘉慶九年授藍
翎長十三年補護軍校二十一年擢委護軍參領道光元年升本
職

右 國史館本傳

慶福 奈滿等

慶福伊爾根覺羅氏滿洲正藍旗人嘉慶三年由監生捐納筆帖式九年捐升通判十六年援例分發籤掣山東試用十七年署青州府理事同知尋署濟南府同知十八年長垣教匪不靖延及豫東慶福督領青州駐防兵丁前赴軍營隨同勦捕疊有斬獲山東巡撫同興上其功請補泰安府通判 上以慶福辦事奮勉 允之十九年同興復保奏勦辦逆匪出力各員得 旨慶福著賞戴藍翎旋丁父憂回旗二十年授藍翎侍衛道光元年升三等待衛四年赴葉爾羌換防六年二月逆裔張格爾糾合各回莊入卡滋擾喀什噶爾參贊大臣慶祥率兵堵禦六月賊據阿爾圖什回莊

慶福隨領隊大臣烏凌阿等帶兵往剿會夜雷雨張逆潰圍出走
我兵分路追捕喀城回眾紛起援賊張逆復由大河沿等處脅眾
來拒進犯喀城慶祥急調戰兵及各卡防兵於城西南分三營拒
守賊晝夜攻偪八月空通地道進城城陷慶福率兵轉戰眾寡不
敵與伊犁額魯特營鑲藍旗副總管奈滿佐領車伯克俱歿於陣
先後事 聞均 賜卹如例 賞雲騎尉世職慶福子扎克丹襲
奈滿車伯克世職均未襲奈滿范佳氏滿洲正藍旗人駐防伊犁
嘉慶十四年由藍翎長升驍騎校十七年游升佐領道光四年升
本職車伯克舒佳氏滿洲鑲藍旗人駐防伊犁道光三年由委官
升驍騎校四年游升本職

右 國史館本傳

國史館本傳

國史館藏書
三三三三三三

三

鶴松 特古斯等

鶴松富察氏滿洲正白旗人駐防烏魯木齊由領催於嘉慶十八年補驍騎校道光元年升防禦五年派赴喀什噶爾換防六年二月佐領八月逆裔張格爾由大河沿等處糾合賊眾進犯喀城回眾亦紛紛從亂官兵於城之西南分三營拒守皆失利賊日夜攻偏官兵盡力抵禦兩月有餘賊匪窺通地道進城復經官兵巷戰拒殺多名因鉛彈俱盡城遂失守鶴松與佐領特古斯珠蘭布防禦努爾胡布同時歿於陣事 聞均 賜卹如例 賞雲騎尉世職鶴松子圖塔布襲特古斯子三音襲珠蘭布子烏章阿襲努爾胡布子蘇明阿襲特古斯和勒特氏蒙古鑲白旗人由委官於

嘉慶二十五年補驍騎校尋升本職珠蘭布那佳氏滿洲正紅
旗人由委前鋒校於嘉慶十九年補驍騎校二十一年升防禦道
光元年升本職努爾胡布鄂爾圖氏滿洲正紅旗人道光元年由
委前鋒校補驍騎校三年升本職

右 國史館本傳

色勒精阿 德克精額等

色勒精阿瓜爾佳氏伊犁錫伯營鑲白旗人由委前鋒校於道光二年補驍騎校洊升佐領五年派赴喀什噶爾出征六年逆回張格爾滋事由開齊山突入屯於阿爾圖什回莊參贊大臣慶祥令幫辦大臣舒爾哈善及領隊大臣烏凌阿帶兵往剿會河色爾依罕愛里克一帶白帽回眾紛起應賊張格爾復聚眾數萬由大河沿等處進薄喀城城陷色勒精阿與驍騎校德克精額湍東武前鋒校土瓦清阿吉拉素郭仁泰均擊賊陣歿先後事 聞均 賜卹如例 賞雲騎尉世職色勒精阿子薩綉阿襲德克精額子慶魁襲湍東武子西郎阿襲土瓦清阿子湍多里襲吉拉素弟西布

昌阿襲郭仁泰子阿昆布襲德克精額伊爾根覺羅氏滿洲鑲黃旗人由筆帖式於道光三年補本職湍東武沈佳氏滿洲正藍旗人由催總於道光六年補本職土瓦清阿民趙氏蒙古鑲紅旗人由前鋒小旗於道光四年補本職吉拉素赫葉爾氏伊犁錫伯營鑲白旗人由前鋒於道光六年補本職郭仁泰襲佳氏蒙古正紅旗人由委前鋒小旗於道光二年補本職

右 國史館本傳

三音布 扎勒杭阿等

三音布英土爾氏伊犁錫伯營鑲黃旗人由領催於嘉慶五年補藍翎長十三年拔補驍騎校洵升佐領道光五年逆裔張格爾遣其黨奇比勒迪帶領回眾於巴雅爾一帶意圖種地資糧藉以聲氣相通經參贊大臣慶祥密派三音布與協領科凌阿等帶兵相機擒捕至占帕拉特住處誘其前來隨設伏於雅滿山口險要之區奮力兜剿殲斃賊眾多名并梟賊目奇比勒迪捷入得 旨以應升之缺升用六年賊匪圍攻喀什噶爾漢城隨同慶祥等盡力抵禦兩月有餘賊匪窺通地道進城官兵猶復巷戰拒殺多名眾寡不敵三音布與前鋒校扎勒杭阿驍騎校達明阿藍翎侍衛德

普興阿俱歿 小陣事 聞均 賜卹如例 賞雲騎尉世職三晉
布子博爾果素襲扎勒杭阿子慶春襲達明阿子德清阿襲德普
興阿子訥摩布襲扎勒杭阿吳佳氏蒙古鑲黃旗人由前鋒於道
光三年拔補本職達明阿孔格利氏伊犁錫伯營正藍旗人由領
催於嘉慶十三年補藍翎長道光五年升本職德普興阿孔格利
氏伊犁錫伯營正藍旗人由領催於道光五年授本職

右 國史館本傳

諾呢布 那當阿等

諾呢布兆佳氏滿洲鑲白旗人由委前鋒校於嘉慶十七年補放
驍騎校二十年升防禦二十一年升佐領道光五年因逆裔張格
爾滋擾派赴喀什噶爾出征六年張格爾糾約回眾數萬突入卡
倫直薄喀什噶爾漢城攻圍兩月有餘官兵盡力守禦兵單城陷
參贊大臣慶祥力竭自經死諾呢布與佐領那當阿防禦壽凌那
爾胡善前鋒校穆隆阿均歿於陣事 聞均 賜卹如例 賞雲
騎尉世職諾呢布子伊勒哈春襲那當阿子蘇春阿襲壽凌子全
善襲那爾胡善子柯什克圖襲穆隆阿子扎勒罕布襲那當阿吳
佳氏滿洲正白旗人由委前鋒校於嘉慶十九年補驍騎校尋游

國朝通志卷之三十三
三
升本職壽凌博爾濟吉特氏蒙古鑲黃旗人由催總於嘉慶二十四年補驍騎校道光五年升本職那爾胡善蘇佳氏蒙古正紅旗人由筆帖式於道光二年補驍騎校五年升本職穆隆阿曹佳氏滿洲正紅旗人由前鋒小旗於嘉慶二十一年補本職

右 國史館本傳

周吉圖 林鳳等

周吉圖四川眉州人由武舉隸督標效力隨剿四川教匪徐添德等在事有功嘉慶四年拔安阜營把總進攻大竹縣黃泥壩疊次獲勝五年二月遷松潘鎮標右營千總十月督帶兵勇至開縣殲賊匪趙麻花湯劉等六年由南部縣進剿斬賊首徐萬幅於木蘭寺七年升甘肅西甯鎮標前營守備率鄉勇剿古佛洞賊匪生擒張子聰及餘黨張簡等 賞戴藍翎八年攻南部太平等處擒賊目李潮中進攻黑漆溝戮賊黨齊國典於石巖下十二年隨將軍興奎等按捕白塔一帶零匪十四年升西甯鎮標後營都司十八年升玉泉營遊擊二十五年升烏魯木齊提標中軍參將道光四

年升瑪納斯協副將六年正月回部逆裔張格爾滋事吉圖帶兵
赴喀什噶爾協勦其子永壽隨征軍前效力八月喀什噶爾城陷
吉圖率永壽力戰陣歿瑪納斯協右營把總林鳳白塔營把總李
得友瑪納斯協外委周永祿賈成伏額外外委張璞俱死之事聞
均 賜卹如例 賞雲騎尉世職襲次完時以恩騎尉世襲罔替
吉圖孫興越襲鳳子義忠襲永祿子興襲成伏弟成得襲得友世
職未襲璞照馬兵例 賞卹鳳甘肅迪化州人由武舉拔是職得
友西甯人由行伍隨勦川陝教匪有功拔西甯鎮標額外外委旋
補外委道光五年擢是職永祿綏來人成伏璞俱迪化州人均由
行伍拔是職

右 國史館本傳

國朝明倫彙編 家範典 忠義四十一

蘇超 李珍等

蘇超陝西韓城人寄籍廣西由武舉效力督標隨勦湖北教匪卓有戰績擢右營千總嘉慶五年遷梧州協右營守備七年升陝西甯波右營都司十年調高家堡都司十一年甯陝新兵滋事檄往勦事竣回任十八年岐山郿縣匪徒聚眾焚掠竄盤屋檄赴堵勦追擊至白石峽太白嶺地極險峻馬不能前超率兵勇徒步躡蹤敗之賊匪於地牢一帶逃匿超由廟溝窮追又敗之於古磜墩擒國富等十八人餘匪潰追至辛口峪螞蟻溝花石巖殲戮無算行抵甯陝廳四畝地分路搜勦首逆龔貴吳抓抓張占鼇以次殲擒凱撤敘功 賞升一等先換頂帶二十年升甘肅西甯鎮標右營

遊擊道光二年調俄卜嶺營遊擊五年赴喀什噶爾換防六年逆
回張格爾入卡滋事犯新疆各城超在防守禦借西甯鎮標右營
外委李珍沈友俱戰歿事 聞均 賜卹如例 賞雲騎尉世職
襲次完時以恩騎尉世襲罔替超子盛元襲珍弟芳襲友子廷甲
襲珍甘肅貴德廳人由行伍拔是職友大通人由行伍隨勦貴德
一帶番賊道光五年拔是職

右 國史館本傳

張之仁 劉得基等

張之仁貴州平越人由行伍拔平越營外委乾隆六十年隨剿黔楚苗匪嘉慶三年檄剿四川教匪擢清江協右營把總四年遷遵義協左營千總七年川境張添倫股匪句結魏家營餘黨肆行劫掠官兵躡蹤追擊至巴州之土地堡金子寺之仁帶兵勇抄截賊前殲斃甚眾入年升直隸插箭嶺守備九年三月偵知開縣大甯交界之鹿塘谿老林內有賊眾盤踞我兵分路進剿之仁由七里坪擊殲之生擒五名四月進剿望觀臺老林內賊匪道光二年升陝西延綏鎮標城守營都司三年赴喀什噶爾換防六年逆回張格爾句結安集延布魯特回眾入卡犯喀什噶爾城官兵嬰城固

守兩月有餘賊穴地道而進城中回匪內應遂至城陷之仁偕甘肅濟木薩營千總劉德基柴應祥巴暖營把總李發梅西甯鎮標右營外委陳世化俱以力戰歿於陣事 聞均 賜卹如例 賞雲騎尉世職襲次完時以恩騎尉世襲罔替之仁子傑襲德基子興襲應祥弟友珍襲發梅孫繼祖襲世化世職未襲德基甘肅綏來人得基由行伍歷拔提標中營外委把總道光六年升是職應祥甘肅皋蘭人由行伍歷拔濟木薩營外委瑪納斯協左營把總中營千總道光四年調是職發梅甘肅西甯人由行伍拔巴燕戎格營外委嘉慶十八年升是職世化陝西南鄭人由行伍於道光五年隨勦張格爾力戰受傷拔是職

右 國史館本傳

忠義四十一 1111

張華 李登 岑等

張華甘肅蘭州府皋蘭縣人嘉慶元年充食督標中營名糧八年雲南維西獐獐夷人恆仁綑等滋事維西一帶分布營卡隨同官兵於紅土關李子坪等處搜捕逆匪甚爲出力十一年甯陝中左兩營新兵滋事進城搶掠逃入甘家坪漸至川境官兵四面堵截賊匪潛竄洋縣詐稱官兵攻陷城池連擾數營奉調往勦追捕出力賊旋由穆家坪西至大峪口沿山一帶奔竄官軍兩路截殺追至良玉地方偕兵丁奮力撲賊殲斃甚眾十二年賊番竄伏卓尼勒他受二旋三扎灘恃其地險人多兇狡不馴官兵由貴德一路進勦賊匪依山抗拒我兵槍礮齊發賊且戰且走偕兵勇直前攻

國朝通志卷之三十一
擊追至賊巢擒馘無算十四年拔補甯夏鎮屬同心城營額外外
委十六年拔補督標前營經制外委十八年拔補前營把總十九
年拔補涼州鎮屬莊浪營千總道光元年補濟木薩營守備六年
喀什噶爾逆裔張格爾滋事奉派帶領綠營官兵五百前往借剿
數次與賊相拒城池失陷力戰陣亡同時把總李登舜經制外委
趙棟柴榮鞠夢蘭俱歿於陣事 聞均 賜卹如例華登舜棟榮
夢蘭俱廕雲騎尉世職華子萬泰襲登舜子春襲棟姪登雲襲榮
弟林襲夢蘭子兆榮襲登舜甘肅綏來縣人棟榮俱甘肅迪化州
人夢蘭甘肅武威縣人均由行伍歷本職

右 國史館本傳

史可友 山望受等

史可友甘肅皋蘭縣人由行伍於嘉慶十一年派往甯陝勦捕叛
匪十二年甘肅大通縣界連黑番賊番在魯木記塘祁家寺多洛
等堡分路搶掠牲畜蹂躪民人經甘肅提督百祥辦事大臣貢楚
克扎布調兵勦辦在事出力十八年岐山匪徒聚眾焚劫派赴陝
西搜捕二十二年拔補陝甘督標左營額外外委二十四年擢甯
夏鎮屬靈州營經制外委二十五年升河州鎮屬保安營把總道
光二年升大通營千總派往黃河以南緝捕滋事番匪五年赴喀
什噶爾換防六年逆裔張格爾犯卡窺伺喀什噶爾擁眾數萬薄
城官兵奮力抵禦城陷與西甯鎮城守營經制外委山望受大通

營經制外委王春瓦家堡經制外委祁永興同時戰歿事 聞均
賜卹如例 賞雲騎尉世職可友子清襲望受子清泰襲春弟廷
襲永興子維福襲望受甘肅西甯人由行伍於嘉慶十二年出師
循化貴德廳邊界剿捕番賊著有戰績二十二年派往喀什噶爾
換防二十五年逆回張格爾滋事隨幫辦大臣禦賊於霍爾罕殲
擒獲勝道光二年拔補本職春甘肅大通人由行伍於嘉慶十二
年派赴循化貴德一帶搜捕番賊二十一年派往喀什噶爾換防
二十五年逆匪蘇蘭奇滋事在事出力道光五年拔補本職永興
甘肅西甯人由行伍於嘉慶五年派赴鞏昌秦州一帶剿捕教匪
奮勇著績九年拔補貴德營額額外委十二年派赴循化貴德擒

捕賊番十九年拔補本職

右 國史館本傳

盧煜 賀萬清等

盧煜甘肅西甯人由行伍於嘉慶十二年隨甘肅提督百祥勦捕貴德循化等處番賊奮勇著績十五年拔補甘肅西甯鎮標左營額外外委十七年升本標右營經制外委十八年奉派出師河南勦辦教匪賊首牛亮臣據滑城其黨屯踞道口相爲聲援官兵圍攻克之復滑縣敘功升陝西西安鎮屬蒲城汛把總十九年陝西南山賊匪聚三才峽劫掠尋竄至太平河官兵痛加勦捕追首逆陳四並尹潮貴於手扳崖擒之餘匪全數殄滅煜皆與有戰功凱撤升甘肅西甯鎮標左營千總道光元年派往喀什噶爾換防時逆回張格爾滋事四年在防派赴烏魯克卡倫堵禦殺賊多名五

年調補鎮屬亦雜右營千總六年八月於防所擊賊喀什噶爾城陷煜與西甯鎮屬西大通堡千總賀萬清甘肅提標中營千總馬輔貴陝西漢中鎮屬城守營經制外委甘俸同時陣亡事 聞均賜卹如例 賞雲騎尉世職煜子銘績襲萬清子福襲輔貴姪永和襲俸子尙德襲萬清亦西甯人由恩騎尉入西甯鎮標右營學習期滿道光四年補投本職輔貴甘肅綏來人由行伍於嘉慶八年拔補烏魯木齊提屬瑪納斯協額外外委十二年升提屬城守營經制外委二十五年升喀喇巴爾噶遜營把總道光四年升補本職俸四川鄰水人寄籍陝西甯陝人由鄉勇於嘉慶七年投效軍營屢經打仗出力十三年拔補陝西漢中鎮屬甯陝營額外外

季十八年隨勦岐郿賊匪殺賊受傷 賞戴藍翎二十四年升補
本職

右 國史館本傳

袁登舜 張喜等

袁登舜原名陳先貴四川綏定府達縣人嘉慶六年由甯陝鎮中營步兵拔補馬兵十年奉派塔爾巴哈臺屯田十三年因叛匪蒲大芳等聚謀不軌糾約入夥不從隨經首告偕同官兵奮往捕獲甚屬出力奏入奉 諭馬兵陳先貴由甯陝遣戍前往一聞蒲大芳等逆謀卽指名首告實屬能知大義著以把總超用撥歸烏魯木齊提標當差十五年補城守營左哨二司把總因呈明改復袁登舜本姓名道光六年逆裔張格爾滋事派赴喀什噶爾偕勦城陷同濟木薩營把總張喜力戰歿於陣事 聞得 旨均加 恩賜卹廕雲騎尉世職袁登舜嗣無考張喜子松林襲喜甘肅河州

人由行伍歷本職

右 國史館本傳

陳孝寬 陳天錫等

陳孝寬河南祥符人由拔貢 朝考一等以七品小京官用分工部嘉慶二十三年順天鄉試中式舉人考取軍機章京行走六年期滿奏留工部升主事道光二年以估辦工程任書吏朦混支銷未經覈減並收受承辦官匠劉起隴銀兩鞠明屬實部議革職發伊犁效力贖罪五年奏准釋回尙未起程適逆回張格爾滋事投效喀什噶爾軍營六年以派辦文案出力經伊犁將軍長齡保奏復 賞七品小京官銜尋以張逆糾眾數萬圍攻喀什噶爾城兩月有餘城中回匪響應穴地道而進遂致城陷孝寬偕候補巡檢陳天錫未入流銜張德隆均死之是年從九品銜劉登科高建謨

未入流蔣成基俱以逆回入卡滋事被戕先後事 聞均 賜卹
如例 賞雲騎尉世職襲次完時以恩騎尉世襲罔替孝寬子敬
珍襲天錫子華襲德隆子鴻儒襲登科子泰襲建謨子希賢襲成
基世職未襲天錫甘肅武威人德隆陝西長安人俱由書吏議敘
是職登科固原州人建謨武威人成基西甯人俱由行伍議敘是
職

右 國史館本傳

蘇倫保

蘇倫保富察氏滿洲正黃旗人嘉慶二年川楚教匪滋事大兵進剿蘇倫保由吉林馬甲隨征在事七載累立戰功歷升三等侍衛凱撤旋京九年呈請回吉林終養十五年復授三等侍衛十八年九月逆匪林清李文成句結煽亂分擾直隸長垣河南濬縣滑縣蘇倫保隨護軍統領富蘭往剿十一月大兵圍滑城首逆李文成奔人輝縣之司寨西安鎮總兵楊芳等率兵由淇縣大廟口追截伏步騎於白土岡令蘇倫保率兵四百誘賊賊望見我兵少合三千餘人來犯蘇倫保佯敗誘至伏中我兵兩翼齊出蘇倫保等折回併擊賊大敗追至南山梁奪險直上復分兵夾攻殲斃無算乘

勝直抵司寨破其巢殲賊目劉國明等首逆李文成自焚死賊黨全數剿滅捷入 上加恩出力人員蘇倫保升二等侍衛 賞迅勇巴圖魯名號時陝西岐山三才峽木廂匪徒因饑煽亂分股滋擾十九年正月隨陝西提督楊遇春馳赴隴州剿辦麻大旗等股匪抵胡家堡偵知賊眾屯桃花坪乃乘夜進兵遇春先進令蘇倫保等在後策應追至柏楊嶺併力仰攻賊潰沿山追殺殲賊三千餘人陣斬首逆麻大旗及著名賊目數人隴州肅清各處股匪亦相次撲滅二月升頭等侍衛二十四年授德州城守尉道光三年升伯都訥副都統四年調正黃旗漢軍副都統五年七月 命督理火器營事務十月授英吉沙爾領隊大臣六年四月抵任時逆

裔張格爾句結布魯特等游奕喀什噶爾卡外復潛結各城白帽
回眾爲內應六月張格爾率眾入卡圍喀什噶爾焚掠臺站逆裔
巴布頂駐單板橋謀取英吉沙爾蘇倫保以賊眾兵單固守請援
會各城戰兵先爲參贊大臣慶祥調用道路梗塞援兵不至賊氛
愈熾城遂失守蘇倫保死之七年大兵克復四城張逆就擒 命
查卹死事諸臣 諭曰各城死事大臣官員或力竭自盡或臨陣
捐軀聞之實深憫惻至英吉沙爾領隊大臣蘇倫保著加恩照都
統例賜卹應得世職該旗奏明承襲尋 賜祭葬 予諡質毅入
祀昭忠祠並於死事地方建祠入祀廕騎都尉兼一雲騎尉世職
子富喜襲

皇朝通志卷之三十三

右 國史館本傳

三十三

鍾虎翀 黃魁等

鍾虎翀福建上杭人嘉慶七年武進士授藍翎侍衛十五年選陝西慶陽營守備十八年河南教匪李文成滋事檄赴滑縣軍營十九年陝西賊匪吳抓抓滋擾岐山郿縣南竄黃官嶺將由襄城沔縣入蜀官兵追至剪子河掘之賊竄越山澗直趨塘口虎翀設伏以待擒斬甚眾餘匪潰逸復邀擊於黑水峪遏其歸路是年擢鎮平營都司道光元年升甘肅玉泉營遊擊五年赴英吉沙爾換防六年逆匪張格爾犯卡官兵奮力守禦賊日邁馬特呢雅斯擁眾薄城城陷虎翀偕河州鎮標左營把總黃魁外委鄭國棟死之事聞均 賜卹如例 賞雲騎尉世職襲次完時以恩騎尉世襲罔

替虎狝子寶三襲魁子桂泉襲國棟子蘭襲魁皋蘭人由行伍隨
勦川陝楚教匪著有戰績身受重傷拔河州鎮標右營額外外委
嘉慶十一年甯陝營新兵鼓譟隨往勦捕十七年擢外委道光二
年赴英吉沙爾換防升是職國棟河州人由行伍於道光元年赴
英吉沙爾換防四年追勦逆回於喀拉他什山等處以功拔是職

右 國史館本傳

穆升 井美

穆升甘肅河州人由行伍於嘉慶七年拔補河州鎮標額外外委十四年遷經制外委十八年調鞏昌營漳縣汛經制外委尋出師河南剿捕教匪時道口桃源屯據之賊次第殲除餘孽占據滑城官兵穴地火攻震開西南城角分門擒剿滑城克復凱撤敘功得旨賞戴藍翎十九年陝西岐郿賊目萬五擁眾竄入南山逼近甘肅秦階界升奉調赴剿於唐藏太渠各隘口相機堵截偵賊於寬溝口擒獲萬五餘匪潰散擢臨洮鎮把總道光五年派往英吉沙爾換防六年逆回張格爾犯卡官兵奮力守禦賊目邁瑪特呢雅斯擁眾薄城城陷戰沒是年議敘從九品職銜井美在葉爾羌防

所陣歿事 聞均 賜卹如例并美 賞雲騎尉世職升子正德
襲美子法德襲美甘肅武威人由行伍派赴葉爾羌換防道光六
年期滿議敘本職

右 國史館本傳

王鴻儀 岳振大

王鴻儀直隸天津人嘉慶六年武進士授藍翎侍衛八年捐升遊擊十一年選四川提標右營遊擊二十一年遷越巒營參將二十五年升綏定協副將道光二年四川總督蔣攸銛以鴻儀年壯技優前在參將任尙無貽誤惟到綏定任年餘限於才識辦理未能周妥請降一等以參將用疏入得 旨王鴻儀著以參將歸部銓選三年選陝西宜君營參將四年檄往烏什換防五年調烏魯木齊提標中營參將時逆回張格爾犯卡滋事六年六月鴻儀率兵赴葉爾羌會剿七月行抵阿克蘇之都齊特軍臺偵知葉爾羌十臺有賊回布魯特殺斃臺兵該臺朵蘭回民亦乘閒作亂鴻儀卽

率換防應援官兵由阿克蘇草地繞道和闐馳赴葉爾羌救援適
逆回由巴爾楚克竄至阿克蘇之阿子湖木卡倫阿克蘇辦事大
臣長清以該處防堵緊要飛飭鴻儀帶兵仍赴都齊特臺截剿鴻
儀偕千總岳振太隔渠而營越日賊千餘人由伊勒堵大道橫山
經鴻儀營後鴻儀槍斃五十餘人賊退圍振太營時振太營兵僅
八十餘人皆被害賊乘勢復撲鴻儀營鴻儀率所部奮力鏖戰殲賊
六百餘旋以鉛丸火藥俱盡眾寡不敵全軍戰歿事 聞均 賜
卹如例 賞雲騎尉世職襲次完時以恩騎尉世襲罔替鴻儀子
恩向襲振太嗣無考

右 國史館本傳

張國保

張國保甘肅張掖人由行伍於嘉慶十年補甘肅提標額額外委
十五年遷經制外委二十二年升提標中營把總二十四年擢永
固營千總道光元年派赴烏什屯田六年逆回張格爾滋事賊黨
擁眾千餘竄入渾巴什逼近阿克蘇官兵禦於都齊特國保戰歿
次年陝西醴泉汛經制外委曹喜隨副將胡超追賊於瑪雜地方
力戰陣歿先後事 聞俱 賜卹如例 賞雲騎尉世職國保世
職未襲喜子生祿襲喜四川閬中人寄籍甘肅固原州由行伍於
嘉慶十八年出師豫省攻道口復滑城與有戰績 賞戴藍翎十
九年陝西岐郿賊日麻大旗股匪竄至隴州之桃花坪白楊嶺官

兵拒之復由東河橋逃往階州繞入川界官兵扼其入川之路盡殪之二十二年拔補秦州營額外外委道光元年遷馬營監營經制外委三年調提標經制外委五年調補本職六年隨征喀什噶爾七年禦賊於洋阿爾巴特勝之復追賊於沙布都爾莊七里河殲擒賊匪奪獲器械尋克復喀什噶爾英吉沙爾葉爾羌暨和闐之毘拉滿喜皆在事有功

右 國史館本傳

張大有 趙舉

張大有甘肅西甯人由行伍於嘉慶四年派赴黃河一帶堵禦番賊五年隨勦川省賊匪奮勇有功十二年西甯之黑番劫掠巴思洞一帶居民奉派勦捕十八年河南滑縣教匪滋事派往偕勦賊眾屯聚道口我兵四面迎擊殲斃無算餘賊竄入滑城槍石抗拒驟難攻擊我兵於城西南角用地雷轟開大有偕眾踊躍登城殲厥渠魁勦除餘黨十九年陝西南山一帶匪徒滋擾隨同官軍往勦勇敢出力拔補甘肅西甯鎮屬大通營額額外委二十年補西甯鎮標城守營經制外委道光四年回部逆裔張格爾滋事隨營往勦五年升陝西漢中鎮屬留壩營把總六年派赴都齊特臺堵

國朝通志卷之三十一
禦賊眾突至力不能支歿於陣同時固原提標右營把總趙舉亦
在防所擊賊陣亡事 聞均 賜卹如例蔭雲騎尉世職大有子
興祿承襲舉孫文炳承襲舉甘肅平涼人由行伍歷本職

右 國史館本傳

劉耀 張秦等

劉耀甘肅甯夏人由行伍於嘉慶元年調赴湖北剿捕教匪攻擊土門衝要隘賊首姚之富被追奔逸潛赴黃龍壩招納餘匪煽引襄陽棗陽兩縣邪教耀隨官兵追剿在事出力有功三年賊首王三槐徐添德由墊江一路焚掠分股滋擾官兵馳赴梁山堵截遇賊於四方碑斬獲無算四年由達州追賊至兩河口賊匪李淑等屯聚官渡官兵三面兜剿全獲勝仗十年拔補甯夏左營額外外委十一年甯陝中左兩營新兵滋事進城焚掠漸至川界官兵四面堵禦賊匪潛入洋縣詐稱官兵攻陷城池連擾數營耀奉調剿賊於黑水峪生擒逆賊三人奪獲器械無算凱撤回營任事遷甯

夏鎮經制外委道光三年五月調赴烏什換防五年升甯夏鎮標
右營把總六年喀什噶爾逆裔張格爾滋事隨綠營官兵出征遇
賊於都齊特軍臺力戰陣亡同時西安鎮標經制外委張秦馬營
監營經制外委楊彪俱歿於陣事 聞得 旨賞卹如例均廕雲
騎尉世職耀子志福承襲秦子應才承襲彪子作棟承襲秦陝西
甯羌州人彪四川儀隴縣人俱由行伍歷本職

右 國史館本傳

國朝書獻類徵初編卷三百七十二目錄

忠義四十二

音登額

多隆武

烏大魁

韓承澤等

蕭大寅

楊烈

張積福等

宗室奕湄

桂斌

李吉昌

曹喜

李如會

靳伏榮等

巴爾江阿

哲里善等

龍正貴

蔣成

蔡汝寅

海雲等

賴允貴

塔斯哈

海凌阿

馬翰

王國華

王鼎銘

鄭奇光

滕士禮等

王珍

謝國榮

史鶴

方振聲

沈志勇等

馬步衢

陳玉威

呂志恆

邵用之等

國朝詩林卷之三十一

楊延亮子法萬等

全福

陳連陞子舉鵬
張清齡等

國朝耆獻類徵初編卷三百七十二

通奉大夫前督江西巡撫江西布政使司布政使湘陰李桓輯

忠義四十二

音登額

音登額舒穆魯氏滿洲正黃旗人由藍翎長隨征川楚教匪有功
歷升副護軍參領嘉慶十年補護軍參領時陝西甯陝營新兵謀
叛命參贊大臣德楞額率剿捕音登額隨征事定旋京十三年揀
發直隸以副將用十四年補獨石口協副將十七年二月調督標
中軍副將九月擢宣化鎮總兵十八年九月河南教匪李文成倡
亂陷滑縣分擾直隸山東諸邊境音登額隨直隸總督溫承惠進

討十月兵至開州聞賊黨散屯諸村落分兵三路進剿音登額破賊於惡虎寨擒殺數百人十一月隨欽差大臣那彥成剿道口賊賊眾萬餘抗拒音登額攻其西面以巨礮轟擊賊大敗殲斃及焚死者不可勝計遂破賊巢捷入 命交部議敘大兵旋克復滑城音登額以首先登城超眾出力 賞戴花翎尋以失察所屬獨石口都司曹綸與知逆謀部議革職 上加恩改爲畱任二十一年上巡幸木蘭駐 蹕古北口閱兵以音登額訓練有方 恩予賞賚二十四年 上復於古北口校將士射音登額連中布靶 賞穿黃馬褂二十五年調臺灣鎮總兵道光元年調直隸天津鎮總兵五年八月丁母憂回京十二月 賞副都統銜爲葉爾羌辦事

大臣旋授正藍旗蒙古副都統六年六月回部逆裔張格爾糾約安集延布魯特等數百人由開齊山入卡攻圍喀什噶爾參贊大臣永芹咨調葉爾羌官兵三百名往援音登額派撥弁兵同伯克等防堵各要隘賊遂四出滋擾葉爾羌軍臺盡失參將吳亨佑等戰歿時援兵未集喀什噶爾英吉沙爾城俱陷於賊賊眾益萃於葉爾羌音登額嬰城固守力竭死之事 聞 命揚威將軍大學士長齡查明 賜卹十一月大兵敗賊於阿克蘇之阿爾坪擒獲賊黨訊得諸臣死事狀 諭曰各城死事大臣或力竭自盡或臨陣捐軀聞之實深憫惻葉爾羌辦事大臣音登額著加恩照都統例賜卹應得世職俟伊子百日孝滿後由該旗帶領引見尋 賜

祭葬 予諡剛節入祀昭忠祠並於死事地方建祠入祀廕騎都尉兼一雲騎尉世職子海洪阿襲陝西河州營遊擊哈密阿二品廕生

右 國史館本傳

葉爾克辦事大臣副都統音公登額字健齋滿洲鑲黃旗人初以侍衛討八卦教賊收復滑縣有功爲宣化總兵 賜黃馬褂花翎嘉慶二十五年調鎮臺灣舊制臺灣鎮道得奏事臺鎮爲挂印總兵 王命在焉每決囚皆道至鎮署會鞠行刑奏事列銜道居鎮後決囚坐次如之上元葉公爲臺道以爭坐次不洽又奏事由道主稟他鎮武人不諳律例悉聽之公則兼嫻吏事在宣化日奏稟

皆自爲之至是聞道中稟時有商改遂爲葉所銜道光元年葉公
方大用 陸見奏公有微詞 上猶念公功第改鎮天津而已四
年以副都統爲葉爾羌辦事大臣時西域承平久喀什噶爾參贊
大臣斌靜虐回部回民怨之潛奉故和卓木之孫張格爾謀作亂
上聞回疆不靖使宗室永公爲參贊偵緝張格爾不得切責之永
芹憂死更以伊犁將軍慶公往領隊大臣巴彥岱出卡逐張格爾
不遇聞別部回二百餘人殲之回人大恐張格爾遂自敖罕擁眾
至安集延助之諸城響應和闐烏什二城同時陷喀什噶爾被圍
葉爾羌守兵止五百人懸絕無援賊至公督兵出戰歿於軍喀什
噶爾亦陷慶公被難道光六年十一月也明年正月奏至 上震

怒以大學士伊犁將軍長公爲揚威將軍陝甘總督楊公遇春山
東巡撫武公隆阿爲參贊提督楊公芳爲前鋒率大兵討之三戰
皆捷遂復四城張格爾遁走 上方詰責諸將而張格爾復收餘
燼伯克誘之詐以內應除夜潛至卡倫有備不克入將遁楊芳與
總兵胡超追獲之西域平大臣以公及慶公死事上 聞 贈公
都統 賜卹蔭襲如制公二子長海洪阿爲古城營遊擊次哈當
阿尙幼隨公在軍城陷走失逾年乃至大軍 上聞而憐之命伊
犁將軍德英阿護之以歸

右識小錄姚瑩撰

多隆武

多隆武烏素爾氏滿洲鑲白旗人自涼州駐防移駐伊犁嘉慶八年由筆帖式補驍騎校十年升防禦十三年遷佐領二十五年升協領道光四年賞副都統銜充葉爾羌幫辦大臣並賞戴花翎六年回部逆裔張格爾入卡滋事犯喀什噶爾參贊大臣慶祥被圍急多隆武偕辦事大臣音登額飭佐領多鸞岱等帥師援之賊由河色爾布依岳坡爾湖而南多隆武等分兵防堵回民阿布都拉等潛通賊多隆武盡誅之會喀什噶爾英吉沙爾諸城相繼陷賊趨葉爾羌參將吳亨佑遇於單板橋戰歿賊由黑子爾鋪入防守庫爾鐵木里之都司伯克等皆遇害回兵脅從者半多隆武等

告急於伊犁將軍道路梗塞賊聚益眾揚威將軍長齡遣兵由和
闐赴援未至葉爾羌失守多隆武力竭陣亡 上深惜之 命長
齡等詳陳被害狀嗣大兵破賊訊囚得實得 旨多隆武照都統
例賜卹尋 命於葉爾羌建祠入祀 賞騎都尉兼一雲騎尉世職
襲次完時以恩騎尉世襲罔替子塔勒圖襲職官佐領卒孫木霍
禮襲

右 國史館本傳

烏大魁 韓承澤等

烏大魁陝西長安人由行伍於乾隆四十二年分駐伊犁屯種四十八年拔伊犁鎮標中營左哨額外外委五十三年補左營右哨外委五十七年擢右營左哨把總六十年遷塔爾奇營左哨千總嘉慶三年升伊犁鎮標右營守備五年署巴燕岱都司七年升惠甯城都司十三年遷伊犁鎮標中營遊擊十九年七月升霍爾果斯營參將十一月以逃兵哈萬銀百日限滿未獲部議奪俸半年二十四年軍政保列一等二十五年升甘肅永固協副將以屯糧倍收優敘加級道光元年檄赴葉爾羌換防六年回部逆裔張格爾入卡滋事糾合白帽回眾分犯各城喀什噶爾英吉沙爾二城

相繼陷時大魁駐守烏什都齊特臺卡倫偕副將王鴻儀等奮勇
截擊賊勢鴟張由大楊樹一帶進薄葉爾羌城大魁回軍固守眾
寡不敵城陷戰歿先是濟本薩營把總韓承澤外委焦生芳於都
齊特臺力戰陣亡至是甘肅俄卜嶺營千總康喜貴左營外委李
明均死之時和闐城亦陷甘肅蔡旗營千總楊世蘭莊浪協外委
陳士俊歿於陣事 聞均 賜卹如例 賞雲騎尉世職襲次完
時以恩騎尉世襲罔替大魁子承翎襲承澤孫六存襲生芳子萬
慶襲喜貴子義成襲明子作福襲世蘭子振元襲士俊子玉襲承
澤甘肅武威人以父白昌官副將勦川匪陣亡得 旨以把總用
嘉慶十年補是職生芳張掖人由行伍拔是職喜貴明俱固原州

人喜貴由行伍隨剿川陝教匪累戰有功嘉慶二十五年以張格爾與布魯特句結犯卡隨赴喀什噶爾進山偵探奮勉有功洊升是職明由行伍拔是職世蘭士俊俱永昌人世蘭由武舉揀選二等以千總用嘉慶五年隨剿秦州徽縣一帶賊匪十六年補是職士俊由行伍隨剿川陝教匪疊著戰功道光二年拔是職

右 國史館本傳

蕭大賓

蕭大賓湖南瀏陽人由武舉於乾隆六十年揀選兵部差官嘉慶五年效力期滿以營守備用六年選福建桐山營守備十二年因病請假解任十四年病痊赴部候選十五年選補陝西甯羌營守備是年輪赴烏什換防十九年班滿回任二十年以軍政卓異得旨蕭大賓准其豫保註冊二十一年升陝西靖邊營都司歷署雷壩營固原提標遊擊二十五年回任道光三年派赴葉爾羌換防六年逆回張格爾擁眾薄城官兵奮勇抵禦城陷戰歿奏聞賜卹如例 賞雲騎尉世職未襲

右 國史館本傳

楊烈 張積福等

楊烈甘肅靜甯州人由行伍於嘉慶五年調赴秦鞏要隘堵剿竄
匪六年十月從征巴蜀於廣元之流沙坡同眾追剿斬獲甚眾擒
首逆楊開甲之子麟生七年四月隨官兵躡賊至畱鳳交界之汪
家溝縛賊渠魏洪升八年自陝赴楚堵禦拔補陝西宜君營額外
外委四月於東湖縣之黃柏鋪協擒首逆張士虎八月回陝追剿
賊匪苟朝九於黃安壩大壩口九年三月竄平利縣之青龍尖我
兵追剿殲斃無算八月賊乘夜由山岔溪向鳳凰寨奔竄我兵趕
近平溪河沿河抄擊立斃執旗賊日並矛手十餘人十年拔補靜
甯營經制外委十一年攻賊於方柴關手刃七賊經陝西固原提

督楊遇春紀功居最二月凱撤回營十八年河南教匪滋事隨提督楊遇春剿賊於白土岡立斃三人生擒六人身受槍傷奏入賞戴藍翎並六品頂帶十二月同眾攻克滑城殲擒無數右臂被創事竣敘功得旨交部從優議敘二十年升會甯營把總二十一年調靖遠營把總道光元年赴葉爾羌換防三年升延綏鎮標左營千總六年逆回張格爾滋事葉爾羌失守烈歿於陣同時涼州鎮標後營把總張積福中營經制外委趙圮良俱力戰陣亡事聞均賜卹如例廕雲騎尉世職烈子濟川襲積福子振遠襲圮良子籠襲積福圮良俱甘肅武威縣人均由行伍歷本職

右 國史館本傳

宗室奕湄

宗室奕湄鑲藍旗人嘉慶五年由筆帖式升宗人府主事十四年擢右司副理事官十六年充南新倉監督十八年承襲奉恩將軍十九年調大通橋監督二十二年授顏料庫員外郎道光三年轉刑部郎中四年擢內閣侍讀學士 命以頭等待衛銜爲和闐辦事大臣六年七月回部逆裔張格爾入卡滋事句結喀什噶爾回眾爲內應 上以和闐附近喀什噶爾 命奕湄加意嚴防八月賊眾分擾葉爾羌 上命揚威將軍大學士長齡帶兵往剿取道和闐奕湄派綠營弁兵前往策應 諭曰奕湄隨時查探彼處實在情形如葉爾羌見在被圍當令迅速相機前進仍須嚴防後路

毋墮賊計儻已失守卽令畱兵和闐防堵以壯聲威不可冒昧輕
進旋以葉爾羌城失守賊勢鷓張四出滋擾奕湄仍回和闐駐守
賊偪城下援兵未至存城兵僅八十餘名奕湄晝夜嚴防力竭城
陷死之事 聞 上深惋惜 命長齡查明賜卹七年克復四城
逆裔張格爾旋就擒西陲蕩平 上命查卹死事諸臣 諭曰各
城死事大臣或力竭自盡或臨陣捐軀聞之實深憫惻和闐辦事
大臣奕湄著加恩照副都統例賜卹 命於死事處建祠入祀
授騎都尉世職俟襲次完時給恩騎尉世襲罔替子載奎襲職

右 國史館本傳

桂斌

桂斌薩爾圖克氏蒙古正白旗人祖納延泰理藩院尙書父惠齡
二等男爵陝甘總督均有傳嘉慶元年桂斌由閒散承廕六品廕
生九年襲二等男爵十一年授二等侍衛道光三年遷頭等侍衛
五年命以副都統銜作爲和闐幫辦大臣賞戴花翎六年回
部逆裔張格爾入卡滋事勾結喀什噶爾回眾爲內應上以和
闐附近喀什噶爾命桂斌偕和闐辦事大臣奕涓加意嚴防八
月賊攻葉爾羌揚威將軍大學士長齡撥兵援救取道和闐桂斌
派綠營弁兵前往策應上諭桂斌等隨時查探彼處實在情形
如葉爾羌見在被圍當令迅速相機前進仍須嚴防後路毋墮賊

計儻已失守卽將長齡撥往之兵畱駐和闐防堵以壯聲威不可
冒昧輕進尋葉爾羌城失守賊勢鴟張九月擾至和闐直逼城下
援兵未至存城兵卒僅八十餘人桂斌晝夜嚴防力竭城陷死之
事聞上深加惋惜七年長齡奉命進討克復四城逆裔旋
就獲西陲蕩平上命查卹死事諸臣諭曰各城死事大臣或
力竭自盡或臨陣捐軀聞之實深憫惻和闐幫辦大臣桂斌著加
恩照都統例賜卹尋命於死事處建祠入祀授騎都尉世職桂
斌本襲二等男爵照例併爲一等男爵兼一雲騎尉襲次完時給
子恩騎尉世襲罔替

右 國史館本傳

李吉昌 曹喜

李吉昌四川東鄉人由鄉勇於嘉慶四年隨剿川匪在事出力拔額外外委復於巴州何家院地方殲賊千餘人擒獲甚眾五年賊匪分竄陝西南山一帶焚掠官兵兼程馳赴分路攻擊殲戮無算吉昌身受矛傷 賞戴藍翎十年拔甘肅西甯鎮標後營外委旋擢威遠營把總十二年隨剿甘肅大通縣野番奮勇尤著 命以應升之缺儘先升用十四年遷陝西西固營千總道光四年升甘肅松山營守備六年回部逆裔張格爾入卡滋事檄往堵剿七年擊賊於七里河地方賊築土岡安大礮夾岸相持我兵奮力迎擊斬獲甚夥吉昌歿於陣是年陝西醴泉汛外委曹喜隨副將胡超

追擊於瑪雜地方力戰陣亡先後事 聞均 賜卹如例 賞雲
騎尉世職襲次完時以恩騎尉世襲罔替吉昌世職未襲喜子生
祿襲喜四川閬中人寄籍甘肅固原州由行伍於嘉慶十八年隨
勦河南滑縣教匪與有戰績 賞戴藍翎十九年隨勦陝西岐山
郿縣賊歷拔秦州營額外外委馬營監營外委調提標外委道光
五年升是職自六年至七年隨勦張格爾於洋阿爾巴特各回莊
及七里河屢有斬獲旋克復喀什噶爾等四城喜皆在事有功

右 國史館本傳

李如會 斬伏榮等

李如會湖北利川縣人由行伍於嘉慶十八年從征滑縣教匪攻克道口追及桃園縱橫衝突殺賊數十十一月進剿八里營賊復奔聚輝縣之司寨背山臨川溝深牆固以爲負隅之計官兵先於白土岡分兩翼圍剿斬獲無算十二月賊眾悉萃滑城廣積糧糗抵死抗拒我兵用地雷震開西南城角殄除餘黨生致渠魁如會身受矛傷是月拔補陝西東江口營額外外委十九年正月調赴寶雞剿捕股匪攻賊於柏陽嶺殲斃五人奪獲器械旗幟追至兜都河斬賊首苗小一奏入得 旨賞戴藍翎並六品頂帶二十一年六月調提標左營額外外委尋遷提標前營經制外委道光二

年升潼關營把總六年八月喀什噶爾逆回滋事奉派進剿七年
遇賊於排斯巴特同眾殺賊數十又戰於七里河斬俘甚眾奪獲
馬匹器械無數三月隨官兵渡河追殺逆匪中槍陣亡是年喀什
噶爾四城相繼克復甘肅迪化營額外外委斬伏榮於喀什噶爾
陣亡西把截堡經制外委楊著明議敘從九品銜馬兵劉佩於和
闐陣亡事 聞均 賜卹如例如會著明佩廕雲騎尉世職如會
子朝綱襲著明子聯甲襲佩子華齡襲伏榮甘肅迪化州人著明
甘肅永昌縣人佩甘肅武威縣人均由行伍歷本職

右 國史館本傳

巴爾江阿 哲里善等

巴爾江阿達呼爾蘇氏滿洲正黃旗人由領催於嘉慶十八年隨委營總哲保勦捕河南教匪李文成占踞滑縣兵勇奮力進攻轟地雷布雲梯全城克復巴爾江阿偕委參領哲里善與有功焉經欽差大臣那彥成保奏 賞戴藍翎道光四年授驍騎校六年逆裔張格爾入卡滋事調黑龍江兵巴爾江阿隨總管特松阿赴喀什噶爾攻擊投委參領七年逆回聚眾十餘萬在阿瓦巴特回莊負隅抗拒巴爾江阿偕哲里善奮勇殺賊奪獲馬匹器械無算追至洋達瑪河搜勦匪徒淨盡經揚威將軍長齡保奏奉 旨俱著賞換花翎是年七月賊匪由達巴罕下北山溝竄上山梁官兵分

路進勦並由賊後吶喊兜擊兩面夾攻賊腹背受敵拚命衝突下
山巴爾江阿與賊力戰奮不顧身受傷歿於陣哲里善暨委防禦
承善皆死之事 聞均 賜卹如例 賞雲騎尉世職巴爾江阿
子密濟特襲哲里善子塔勒呼爾岱襲承善子富明阿襲哲里善
索倫布氏滿洲正黃旗人由驍騎校升補本職承善達呼爾莫氏
滿洲正紅旗人由領催於嘉慶七年隨圍木蘭 賞戴藍翎尋授
本職

右 國史館本傳

龍正貴 蔣成

龍正貴陝西甯陝人由行伍於嘉慶八年出兵剿辦川楚陝三省
教匪躡賊至湖北之東湖縣賊首張士虎一股竄入興山屬之白
果園恃險抗拒官兵奮勇爭先搶上山梁槍箭齊發生擒藍號僞
元帥冉璠劉士貴僞先鋒高元方忠賢餘匪潰散奏入 賞戴藍
翎遇外委缺出卽補九年三月苟文明股匪逃向平利之馬溪客
僧河官兵由腰磨廠蝦基石前進追至陡巖尖賊於老林設伏官
兵左右策應生擒僞總兵賈燦僞元帥王振餘賊遁入吉山內之
天工堰官兵裹糧跟蹤力加追剿俘僞先鋒楊春壽復至平利縣
之馬鞍山獲勝殲斃僞元帥李如玉擒僞元帥羅思蘭敘功得上

賞十年補甘肅肅州鎮標中營額外外委調甯陝鎮標左營額外外委十二年派勦瓦石坪叛匪十五年擢青石關汛經制外委十八年岐山縣屬三才峽匪徒裹脅滋事隨漢中總兵勦辦於洋縣之袁家莊鳳縣之平木壘獲勝仗十九年賊竄盩厔縣之沙壩張老么股匪擁眾拒西河口官兵分投追勦擒首逆苗小一於月亮坪餘孽淨盡凱撤回任道光六年新疆逆回滋事派赴喀什噶爾七年五月升定遠營把總七月官兵駐劄阿賴夤夜賊眾率馬步由達巴罕下北山溝內突出官兵奮力痛擊正貴與西甯鎮後營經制外委蔣成同歿於陣事 聞均 賜卹如例 賞雲騎尉世職正貴子忠元襲成子生花襲成甘肅貴德人由行伍於道光元

年派赴喀什噶爾換防四年逆裔張格爾滋事窺伺烏魯克卡倫
馳往堵禦羣退賊匪奪獲器械又敗之於管孜雅爾殲斃數賊擒
獲賊目伊斯拉木敘功給外委銜五年拔補本職

右 國史館本傳

巴身音月英者不為二圖一免三三二二

三

蔡汝寅 海雲等

蔡汝寅四川營山人由吏員考授從九品嘉慶元年川匪徐添德等滋事汝寅以鄉勇隨勦節經殺賊出力陝甘總督宜縣保奏賞千總銜三年於雲陽縣安樂坪生擒首逆王三槐四年隨勦包正洪股匪於營山縣千佛巖又於廣安州殲首逆冷添祿五年於梓潼縣馬蹶岡擒首逆冉添元六年追勦首逆高二馬五於鐵鎖關又於通江縣獅子岡殲首逆王士虎七年進攻金子岡殲張添倫陳國珠等生擒賊首徐添德八年隨勦賊於廟梁子爭先搜捕擒賊首熊老八是年拔外委十三年馬邊廳番夷滋事汝寅身入夷巢擒獲首逆神仗烏卜進勦土魯村乞里河殲首逆葉貴等

賞戴藍翎十九年進攻咽喉巖夷匪於白熊峒首先出隊手刃二
賊官兵乘勢夾攻戮百餘匪奏入汝寅得旨著超升千總二十
年補四川松潘鎮標中營千總道光三年升太平營守備六年回
部逆裔張格爾滋事隨大兵往剿累戰有功賞翼勇巴圖魯名
號並以應升之缺儘先升用七年回匪糾約二千餘人由達巴罕
下北山溝內竄出我兵迎擊賊踞山梁汝寅等率綠營礮隊直上
仰攻殲二三百匪嗣以固原提督楊芳檄帶步兵躡看山後形勢
乘夜設伏賊營後次日前後兜剿殲擒殆盡汝寅力戰陣亡陝西
候補守備海雲四川太平營外委辛科馬伏榮俱歿於陣事聞
均賜卹如例賞雲騎尉世職襲次完時以恩騎尉世襲罔替

汝寅子世祥襲雲子小喜襲科子鳳岐襲伏榮姪在天襲雲甘肅
固原州人由世襲雲騎尉隸城守營學習期滿以守備用尋以差
操貽誤斥革嘉慶十八年投效河南滑縣軍營克司寨復滑城俱
在事有功奏准開復仍入固原城守營候補是職科迪化州人伏
榮昌吉人俱由行伍拔是職

右 國史館本傳

Vertical text on the right side of the page, possibly a title or header, written in a non-Latin script.

11

賴允貴

賴允貴四川華陽人嘉慶元年以鄉勇隸甘肅肅州鎮總兵索賈英阿軍營效用會川陝楚三省教匪滋事允貴隨赴紫陽西鄉一帶剿捕賊匪大兵由蒿坪河進攻取道汝河二河連克毛壩關牛頭寨等處賊卡允貴奮力衝殺手斃賊匪百餘名以功授七品軍功頂帶二年十一月隨陝甘總督宜縣前赴靜邊寺等處防堵十二月通江藍號首逆冉文儔巴州白號首逆羅其清俱由廣洲鄰水一路折竄營山因偵探賊蹤遇賊眾數千於崖峯尖我軍自上壓下奮力衝突俘馘千餘人允貴首先斬馘賊匪十餘名賊始潰敗敘功升六品頂帶三年正月駐守雞頭關五月賊匪竄擾略陽

我兵由鳳縣進發敗之於夾川溝四年七月襄陽藍號首逆張漢潮竄越秦嶺向樓里溝金竹溝一帶狂奔我師抄道瓦寨追擊之擒獲賊目徐學乾殲賊二百餘人八月賊走六里溝有直趨五郎江口之勢官兵三路進攻遇於洵陽壩克之斃賊無算九月改攻張家坪我軍併力奮擊斬級四百擒斬賊目李潮殲逆首張漢潮於陣五年五月擊賊於青龍關十月移師東發連克馬家坪麻柳坪鐵板溪等處賊寨殲擒千五六百人十一月賊奔石泉之銅卓壩官軍抄至白沔峽併力前進賊眾乘夜躡渡潛繞上游我兵迎頭截擊遇於茶鎮大敗之升五品頂帶六年十月隨大兵進攻流沙坡我軍併力攻剿槍石並發賊大潰生擒賊首楊麟生斬級二

百餘俘賊五百餘人十一月股匪辛聰劉泳受竄走鳳縣之銀門寺我兵進至大樹坪截之七年由高關洵陽壩進攻一路追躡賊蹤至景峪澗各口大敗其眾九年凱撤論功補陝甘督標右營把總十二年青海口外沙卜浪番賊不靖允貴隨陝甘總督長齡往討在事有功十三年升甘肅提標後營千總十九年調督標左營監營千總二十一年署甘肅督標中營守備二十四年升補陝西馬營監營石峯堡守備道光元年調安定營守備五年升靖遠協中軍都司六年逆裔張格爾糾合回眾入卡滋擾檄隨揚威將軍長齡征剿喀什噶爾七年二月師次大河拐賊匪負隅抗拒我兵奮擊直前連剿洋阿爾巴特沙布都爾阿瓦巴特各回莊三戰

三捷奏入敘功 賞趙勇巴圖魯名號五月升甘肅鞏昌營游擊
八年二月升陝西提標中軍參將十二月承修喀什噶爾城垣工
程督催採辦不辭勞瘁經欽差大臣那彥成奏請鼓勵疏入 命
以副將卽升先換頂帶九年七月擢甘肅涼州協副將尋參贊大
臣扎隆阿奏以允貴久歷軍營熟習邊地情形懇請暫畱藉資訓
練得 旨賴允貴准其暫畱一二年辦理營務十年三月逆匪高
連升勾結新兵羅新海等糾眾謀搶糧餉允貴偵知賊情先期密
卽捕獲奏入 諭曰此案高連升以釋罪遣犯起意搶劫糧餉副
將賴允貴一有風聞卽能嚴備密查就獲尤爲出力著交部從優
議敘八月塔什干愛曼布魯特別什噶爾各逆回糾同浩罕安集

延撲卡倡亂允貴率兵馳赴明約洛一帶接援賊勢鴟張允貴督
兵奮勇撲殺賊佯退設伏後路山口突爲所截力竭歿於陣事

聞 命照總兵例賜卹尋 賜祭葬 賞騎都尉世職子和玉襲

右 國史館本傳

國朝正史卷之...

三

塔斯哈

塔斯哈瓜爾佳氏滿洲正白旗人嘉慶五年由前鋒補印務筆帖式九年擢副前鋒校十四年遷前鋒校道光二年三月軍政卓異引見交軍機處記名五月擢委前鋒參領四年遷副前鋒參領五年升前鋒參領六年福建彰化縣匪徒分類械鬪乘機煽惑上命塔斯哈隨山東巡撫武隆阿赴閩剿辦尋臺灣軍事告蒞得旨毋庸前往適逆裔張格爾脅同安集延布魯特回眾五百餘人來犯卡倫復命武隆阿爲參贊大臣帥師進討塔斯哈仍隨往七年四月進剿阿瓦巴特回莊依岡背河樹林環堵賊十餘萬眾負隅抗拒我兵分爲兩翼一鼓齊進斬級三萬餘賊悉執俘擒塔

斯哈在事有功、賞副都統銜十二月授鑲紅旗蒙古副都統八年充伊犁領隊大臣十年正月調喀什噶爾幫辦大臣八月偵聞塔什干愛曼布魯特別什噶爾糾同浩罕安集延各回眾等撲卡倡亂塔斯哈禦之於喀浪圭副將賴允貴進兵明約洛一帶遇賊於首葑莊賊勢鴟張奮力鏖戰塔斯哈帶兵接勦克之賊以少誘眾塔斯哈乘勝追擊以後路山口爲賊所截力竭戰歿事、聞命照都統例賜卹予諡壯毅 賞騎都尉加一雲騎尉世職襲次完時以恩騎尉世襲罔替十一年 諭曰長齡奏上年喀什噶爾卡外賊匪滋擾伊薩克以馬隊太少不可輕出向塔斯哈勸阻塔斯哈告以六月內具奏卡外無事之摺尙未批回見已有賊當時

不聽我言致有今日等語可見塔斯哈從前並不敢捏稱卡外無賊具有天良其慷慨捐軀深堪憫惻前已降旨將塔斯哈照都統銜賜卹其子應襲世職本應今冬引見著加恩交該旗將伊子卽行帶領引見候朕施恩以酬忠盡子長瑞襲世職直隸天津鎮總兵長壽甘肅涼州鎮總兵長泰護軍校兼十五善射

右 國史館本傳

日本書紀卷之三十一

三

海凌阿

海凌阿舒穆魯氏滿洲鑲黃旗人嘉慶元年由健銳營前鋒補藍翎長六年二月升副前鋒校歷升委前鋒參領九年遷山東文登營都司十八年升河東河標右營游擊勦辦曹縣定陶逆匪殲除淨盡事平 上加恩在事出力各員 賞戴花翎二十年升左營參將道光元年四月升中軍副將引 見交軍機處記名七月遷山東兗州鎮總兵八月調直隸宣化鎮總兵六年署古北口提督十年授湖南提督十二年江華縣鴉匪趙金龍聚眾滋事海凌阿率寶慶協副將馬韜帶兵進剿行至池塘墟地方官兵殺賊無算馬韜中槍陣亡海凌阿奮力衝殺因山徑崎嶇雨水路滑墜馬被

四庫全書 卷三百一十二
三
害事 聞 諭曰湖南提督海凌阿因趙金龍聚眾滋事帶領官
兵進剿衝入賊羣剿殺墜馬戕害此次該提督等雖未探明賊情
遽行進剿不免輕進惟此等鬼蜮逆獠竟傷提督大員深堪髮指
海凌阿實係爲國捐軀盡心王事朕心實爲悼惜允宜立沛恩施
以酬忠藎海凌阿應得卹典著兵部查例具奏並查明該員子嗣
奏請恩施用示朕嘉獎忠貞至意尋兵部議上 諭曰海凌阿著
加恩賞給一等輕車都尉世職襲次完時給予恩騎尉世襲罔替
尋 賜祭葬予諡勇壯孫德昆世襲一等輕車都尉兼三等侍衛

右 國史館本傳

馬韜

馬韜貴州興義人由行伍於乾隆五十二年拔安義鎮標右營外委五十二年擢把總六十年隨雲貴總督福康安出師湖南勦辦苗匪石三保等屢戰有功遷雲南永昌協千總嘉慶二年正月隨雲貴總督勒保協勦仲苗二月進兵安南縣之安姑遇賊於排沙口韜奮力攻擊馳入賊隊殲執旗賊目一人餘匪驚竄大敗之四月升提標中營守備六月復由南籠進攻黃草壩山徑蜿蜒賊眾負隅抗守官兵四路繞擊焚其巢賊潰俘馘無算七月又敗之於普磨寨斬級三百八月又破賊於樓下河奪西固大小二寨執賊渠楊明九月埽平洞灑當丈賊巢擒賊渠王囊仙章七緒贊奪卡

四十殲賊萬餘韜皆在事有功奏入 賞戴藍翎尋由羊腸進取北鄉巴林韜統率兵練四面兜截俘賊渠王抱羊焚寨二十生擒餘匪九十人得 旨下部優敘十三年升貴州定廣協左營都司十九年擢荔波營游擊 賞換花翎二十五年升雲南順雲營參將道光元年護理騰越鎮總兵四年升廣西平樂協副將五年丁父憂七年丁母憂九年服闋十年授湖南寶慶協副將十二年江華搖匪趙金龍糾眾謀逆韜率兵進剿奮勇爭先衝入賊陣殲賊無數力竭墜馬被傷陣亡事 聞 賜卹如例 賞騎都尉世職襲次完時以恩騎尉世襲罔替孫鳴珂襲

右 國史館本傳

王國華

王國華貴州貴筑人總兵官王凱子凱自有傳嘉慶五年凱在湖北宜昌鎮總兵官任內勦辦楚省教匪於馬鞍山陣亡照提督例賜卹國華襲騎都尉世職八年發本省撫標學習十一年效力期滿以都司用十五年署大定協左營都司十八年署古州鎮標右營都司二十年五月補凱里營都司十一月調上江協左營都司二十三年署荔波營游擊二十四年調威甯鎮標右營都司道光六年升湖南提標右營游擊七年兼署提標中軍參將十二年江華縣猺匪趙金龍滋事糾集猺眾在兩河口等處焚掠我兵分道追捕殲獲甚眾猺匪竄至洪江寨黃竹寨等處兵勇奮力攻擊復

敗之於長塘寨趙逆由新田縣之楊家鋪一帶嘯聚意圖北竄國
華隨提督海凌阿督兵往剿遇賊於池塘墟地方海凌阿衝入賊
羣墜馬被害國華奮勇衝殺力竭戰歿事 聞 賜卹如例 賞
雲騎尉世職國華長子襲其祖父凱所遺世職國華世職次子臻
祿襲

右 國史館本傳

王鼎銘

邑侯王公諱鼎銘字新之彝軒其號也山東嶧縣人由廩貢官中書除新田縣知縣道光九年八月莅任自桂陽州微行至邑投城隍廟宿默禱神匡所不逮入署常坐堂後吏非召莫入民有屈則顛而進設帷坐榻上日夜披牘憊則伏案雖盛寒暑不少輟判決限以旬日有疑輒潛訪之得其情乃已勘驗簡廉從養餼自具市物悉依民價十年夏旱公周行田野無倦日禱於城隍不雨又禱於火神不雨乃自械跪暴烈日中自辰至午祝且泣是夕雲起東南竟西北雨徧人心大愜書院舊設文昌位於講堂公以師座未安別構講堂兩縣試公而明士咸服朔望讀法慮民難盡曉恭刊

聖諭及易犯條律竝諸格言徧布市村墟兩載餘邑人士頌其德
政將梓以行公曰毋君等曷指陳邑中利弊使我不至失誤若聲
聞過情余滋愧矣十二年正月公在省垣聞江華逆猺趙金龍之
亂慮煽邑猺二月初歸卽冒雪步歷猺棚諄諄譬諭賞賜其老幼
回署復召猺長曉以 國法賜酒食給身符以安其心是時邑千
總李英帶兵赴江華金龍犯藍山甯遠徧邑境公與教諭羅廷贊
訓導陳詩率紳士日練鄉勇以守突聞提督海凌阿副將馬韜被
害池塘墟公慮城庫且塌不可徒守語陳與羅曰君等守我督眾
禦諸境二十一日分領鄉勇百餘堵十字墟時賊勢愈張甯遠禾
亭墟及邑之南境橋下洞諸處連遭焚掠眾惶惑公曰爾怯乎可

退我將往以大義曉之居民泣阻乃還二十三日晡或報曰賊至矣城中驚竄不知所往公朝服北面拜坐堂皇以待書於几曰爾果伏我新田當殺我切勿傷我百姓是時隨公者鄭忠李政二僕爾典史丁禧至公指三尺練曰城亡吾亡於此矣羣吏至公曰爾亦不畏死耶俄而百姓哭拜於堂下公哭僕亦哭典史羣吏皆哭公口不能言麾以手而已正訣絕間外委莫亮策騎至曰賊駐查林鋪距城尙十五里前報者見其來未知其止也公乃定二十四日邑士民及甯遠桂陽境感公之誠心愛民也不謀而合者以萬計請勦賊公喜而義之乃徧告於神曰惟神有靈在天茲猶有罪將帥我師是殲是滅若獲勝神之力也不勝銘死矣恤將若蒼生

何惟神鑒之卽督眾行眾咸踊躍直抵高塘距查林鋪里許於是
邑東鄉勇由東路進邑南鄉勇由南路進邑西甯東鄉勇由西路
進邑北桂南鄉勇由北路進賊聞大驚乃前扛大礮後列鳥槍分
隊出眾有難色退守百餘步或登高呼曰此空礮也亟奪之賊舍
礮持槍刃併力齊赴眾奮擊之殺賊無算生擒十九人邑北鄉勇
胡文輝正與賊拒忽放槍輝仆賊刺輝輝隨起刃之身中賊傷其
弟文榮甫斃賊回顧輝負而逃是役也眾與賊相持至暮陣亡者
百有奇武生鄭奇光與焉二十五日邑之人合甯之人及桂之臨
泰大富諸鄉人眾約二萬公欲以身先百姓泣阻曰公自愛毋以
身試險公曰我不先則士心不一焉能制勝遂策馬率邑北桂南

鄉勇出城南經花涼亭至牯牛岡北距查林四里諸勇鱗次疊會
時賊數十在窩塘之野見眾至作奔竄狀眾遂追之賊復突出槍
礮聲如雷死者無算先是賊密約土獠供送藥丸邑之獠未肯負
公也備而未送先一夜賊入峒脇取之故槍礮復烈眾遂潰眾欲
擁公逸去公曰爾等先走我殿後可無虞眾躊躇河南王白者邑
流人也有膽力大呼曰不可走眾護公賊追至大肆擊殺公回顧
慟曰賊奴殺我百姓曷殺我遂中礮落馬猶罵賊不絕口李政掖
之白負走賊擊白傷腦遂舍公賊憤公剜兩目斷其項備極慘毒
二十七日城陷賊據之縱火焚廬舍火無燄每夕聞兵馬聲達旦
賊驚懼三十日黎明遂遁鄉民得公首於查林得公尸於牯牛岡

之桐子劫昇歸城隍廟焚香拜哭其門下士邑人王尙賓以禮斂焉公蒞邑三年未攜眷屬其出禦寇也授鄭忠印告之行曰若我生還則爾返不則持以投上官且歸告先靈諭我子來收我尸邑距嶧四千餘里往還在百日外未閉棺待公子來也公甥張繼載在河南聞變先公子來迎柩九十二日矣啟視之面貌如生公子

澤溥孫映庚映軫事 聞 贈卹如例

右傳略謝世元撰

鄭奇光 滕士禮等

鄭奇光湖南新田人武生偉幹修髯精騎射道光壬辰春趙金龍犯境縣令王某率鄉兵禦敵奇光與督隊戰賊窩塘眾敗潰令落馬馬逸賊追近奇光射殺一賊賊少卻卽以己所乘馬授令令不可奇光曰事急矣公且去圖後舉俱死無益也強扶而上鞭馬使疾馳回身舞刀捍賊受重創死而令得脫旋被戕同時滕士禮鳳凰廳人道標北關千總李之貴亦鳳凰廳人鎮標前營把總調征江華逆獠蝟蝟嶺之戰並以驍勇著名獠眾竄羊泉倚市廛爲柵自固士禮奮身登屋爲礮子洞胸而死之貴亦受槍傷同日死均卹蔭如例

國朝書目類後初編

卷三百七十二

三

石傳李元度撰

王珍

王珍山西靈邱人以父永清官大同鎮標千總出師陝西陣亡襲雲騎尉世職嘉慶十八年九月河南教匪李文成牛亮臣等倡亂珍隨欽差大臣那彥成攻克濬縣之道口燬賊巢屢獲勝仗奪旗械多件時逆首牛亮臣踞滑縣十二月固原提督楊遇春率師進攻珍奮勇先登殲賊甚眾遂復滑城餘匪屯民房珍隨官兵力戰三晝夜俘斬無算奏入得旨下部優敘十九年凱撤回本省撫標效用二十年補偏關營守備道光五年升廣東羅定協右營都司九年調肇慶協中軍都司十二年署連陽營遊擊時湖南江華縣獠匪趙金龍滋事竄入廣東連州境踞連山分三屯負嵎爲掎

角我兵亦分三路進攻署潮州鎮標中營遊擊謝國榮由東路高
州鎮標中營遊擊史鶴由西路珍隨廣東提督劉榮慶由中路至
雞公嶺奮力仰攻殲六百餘匪會日暮搆卡暫息突有賊撲卡珍
力戰戮數人賊自山頭擲火入營火藥轟發野草延燒珍被焚弁
兵五十餘人皆死之事 聞均 賜卹如例 賞雲騎尉世職襲
次完時以恩騎尉世襲罔替子攀桂襲

右 國史館本傳

謝國榮 史鶴

謝國榮湖北房縣人由行伍於嘉慶六年拔補鄖陽鎮標右營左哨外委七年升荆門營左哨把總九年擢竹山協右營千總二十一年二月升貴州撫標右營守備五月調松桃協左營石峴汛守備邊俸報滿於道光元年升廣東化石營都司三年調署高州鎮右營都司六年回化石營都司任尋署饒平營游擊九年擢廣東靖遠營游擊十年署潮州鎮中營游擊十二年三月湖南江華縣逆獠滋擾匪黨竄入廣東連州界國榮隨南韶連鎮總兵官得志督兵進剿節次打仗有功時獠匪屯聚連山踞險負嵎我兵分三路擊賊國榮由東路其路沿途山徑被賊窅斷無處通行國榮尋閒

道前進五月由鐵坑進勦至馬頭髮地方猝遇猺匪擲石抗拒國
榮奮力鏖戰被石傷陣歿同時高州鎮標中營游擊史鵠率師由
西路進擊亦於將軍岐地方遇賊以槍傷歿於陣事 聞均 賜
卹如例 賞雲騎尉世職國榮子鈞鴻襲鵠子雲章襲鵠直隸肥
鄉人嘉慶十九年武進士授二等待衛二十四年選本職

右 國史館本傳

方振聲 沈志勇等

方振聲順天大興人由兵部供事議敘從九品於嘉慶十六年選授福建閩縣閩安鎮巡檢二十年調同安縣灌口司巡檢道光元年調臺灣府嘉義縣佳興里巡檢七年臺俸期滿加主簿銜八年調署羅漢門巡檢兼署臺灣縣典史十年臺俸三年再滿以主簿升銜遇缺卽補十一年升嘉義縣斗六門縣丞十二年九月嘉義縣閩粵莊民因釁械鬪匪徒張丙乘機糾眾焚掠斗六門最爲倡近振聲樹柵濬渠督率兵勇防堵十一月賊首黃城率匪黨攻撲斗六門振聲與署守備馬步衢等協力守禦賊夤夜縱火遙擁入柵振聲持刀巷戰戮賊數人力竭遇害妻張氏罵賊不屈被剗割

鼻舌與其幼女皆死之幕友沈志勇志勇子聯輝及家丁江承惠曾大祥等四名亦皆遇害事 聞 上覽奏墮淚 諭曰該故員盡心守禦效節死綏其家屬幕友人等深明大義從難捐軀允宜特沛恩施以昭激勸尋振聲照陣亡知府例 賜卹 予謚義烈賞騎都尉世職世襲罔替張氏 予謚節烈贈淑人並 賞沈志勇六品職銜聯輝七品職銜卽照銜 賜卹振聲入祀京師昭忠祠張氏給帑建坊又 命於斗六門擇地建立專祠前楹祀振聲以沈志勇沈聯輝配後楹祀張氏以其幼女配家丁江承惠等附祀兩廡春秋致祭當振聲殉難時其子維善甫五歲僕婦攜之伏林莽中得免事平疆吏以 聞 命卽承襲騎都尉世職

右 國史館本傳

大正庚午年
忠義四十二
三

馬步衛 陳玉威

馬步衛福建臺灣人由行伍於嘉慶八年拔臺灣北路協左營外委十二年擢右哨頭司把總道光三年升臺灣鎮標左營千總六年臺灣莊民械鬪步衛擊獲首夥各犯在事出力 賞加守備銜九年軍政卓異十二年九月嘉義縣匪徒張丙等糾眾焚掠步衛奉檄於斗六門防堵十一月賊黨夤夜縱火攻陷斗六門步衛偕北路協左營把總陳玉威持刀巷戰殲賊無算以力竭被戕罵賊而死賊禱割之陳玉威及其妻唐氏同時遇害事 聞 諭曰臺灣逆匪張丙等戕官圍城屢肆滋擾馬步衛陳玉威及玉威妻唐氏同時殉難覽奏墮淚可嘉可憫因念該故員弁盡心守禦效節

死綏其家屬亦深明大義從難捐軀允宜特沛恩施以昭激勸馬步衛著照游擊例賜卹賜謚剛烈賞給騎都尉世職陳玉威著照都司例賜卹賜謚勇烈賞給雲騎尉世職伊妻唐氏賜謚節烈請贈恭人馬步衛陳玉威俱著入祀京師昭忠祠唐氏建坊旌表該故員等所賞世職俱著加恩世襲罔替並著於斗六門擇地建立專祠地方官春秋致祭以慰忠魂步衛子成金襲玉威世職未襲玉威福建臺灣人由行伍於嘉慶十八年拔臺灣城守營右軍左哨外委二十四年擢把總道光九年升千總十年經總兵劉廷斌以辦事顛預不謹奏參降補鎮標中營右哨外委十二年復是職

右 國史館本傳

呂志恆 邵用之等

呂志恆江蘇陽湖人由監生捐納縣丞分發福建嘉慶二十五年捐升鹽運使司運副道光元年經閩浙總督顏檢奏畱閩浙差遣委用二年借署噶瑪蘭通判六年因整頓地方辦事出力經閩浙總督孫爾準奏請鼓勵得旨呂志恆自到任以來築城開浦清釐積案並照內地章程編查保甲除暴安良民番悅服實屬經理得宜著遇有同知直隸州缺出儘先升用八年升福州府海防同知九年孫爾準飭志恆赴臺灣確查兵費報銷款項並各口積欠內地兵穀奏請俟辦竣後送部引見從之十年六月孫爾準奏請賞加升銜諭曰呂志恆承辦報銷始終奮勉著俟引見

後再降諭旨七月引見 賞加知府銜十一年升臺灣府知府
十二年嘉義縣賊匪陳丙等糾眾滋事焚劫各莊志恆率署知縣
邵用之分路勦捕用之行至店仔口地方遇賊被戕志恆復帶兵
擊賊於大排竹以眾寡不敵亦遇害事 聞下部議卹先是逆匪
滋事時輒以貪官汙吏妄殺無辜爲詞 上恐志恆等有激變情
事 命欽差大臣署福州將軍瑚松額閩浙總督程祖洛確查具
奏十三年四月奏入 諭曰據瑚松額等奏原任臺灣府知府呂
志恆居官尙屬能事而果於自用又因馭下苛刻遂至謠言四起
並無別項劣蹟署嘉義縣知縣邵用之不能約束家丁胥役民間
嘖有煩言亦無貪婪實據著依部議照陣亡例賞給雲騎尉世職

應得卹典該部照例辦理用示朕褒獎忠盡善善從長至意志恆
子金聲襲用之孫受禧襲六月復諭曰上年臺灣逆匪滋事原
任臺灣府知府呂志恆署嘉義縣知縣邵用之俱被戕害該二員
官聲甚屬平常姑念以死勤事是以加恩照例賜卹用之浙江餘
姚人由實錄館供事議敘府經歷分發福建道光六年補延平府
經歷七年大計卓異八年升南平縣知縣十二年署是職

右 國史館本傳

楊延亮

字滋萬等
楊成鼎等

楊延亮湖南長沙人嘉慶二十五年進士以知縣卽用籤分山西道光元年補趙城縣知縣七年縣民董得升以伊甥孟蘭鎖被賈月喜等謀殺致斃等詞赴都察院具控 命禮部尙書湯金釗刑部侍郎鍾昌馳往查辦因原讞傷痕不符將延亮解任質審尋訊明延亮實無徇縱別情飭令回任仍以勘驗不實請交部議處議篤二級准其抵銷十五年二月推升雲南南安州知州時趙城有奸民曹順以治病爲名傳習先天教妖言惑眾妄生逆志與其黨韓鑑韓奇等謀爲不軌斂錢打造軍器潛約是年八月分往平陽府霍州洪洞縣及趙城縣同時起事三月延亮尙未謝趙城縣任

偵得其狀卽飭差役查拏曹順等知其謀洩乃糾合匪黨潛入城內黃夜焚搶縣署劫放獄囚延亮死之其母妻四子二女暨幕友楊成鼎均同時遇害又殺斃家丁二婢女一事 聞 上憫延亮因訪拏教匪致全家被害並無激變情事命照強克捷例奏明給銜賜卹在該縣城建立專祠其母妻子女幕友家丁婢一併分別附祀並著查明延亮原籍有無子孫奏明候旨飭令嚴緝首逆曹順務獲訊明動手戕官之犯摘心致祭以慰忠魂尋經吏部查例具奏 諭曰楊延亮職膺民社訪聞習教匪徒立時查辦及賊起倉卒以身殉難閭署被害者十有三人深堪嘉憫著卽照知府例予卹在該縣城建立專祠並准入祀京師昭忠祠照例賜諡賞騎

都尉世職襲次完時以恩騎尉世襲罔替尋 賜諡昭節曹順等
既殺延亮擾及霍州洪洞官軍旋討平之訊明動手戕官之韓鑑
韓奇郭世杰摘心致祭曹順竄至山東觀城縣被獲伏誅七月山
西巡撫鄂順安奏言遵 旨查明楊延亮之父楊世懷見將延亮
胞姪楊澤萬繼爲延亮嗣疏入 命賞世懷四品頂帶澤萬年未
及歲 特准承襲騎都尉世職在籍食俸

右 國史館本傳

楊延亮字菊泉湖南長沙人嘉慶癸酉舉鄉試第一庚辰成進士
知趙城縣里民歲科驛費爲官利除之州符歲取瓜固請得免窳
子鎮瀕河灘地爭久不決歸官矣延亮還之民官軍征喀什噶爾

國朝通志卷之三十一
例協濟霍州車馬先期調集民重累乃自如州酌其多少緩急民
不知役莅官十五年凡所經畫士民立石頌之道光乙未部推南
安州知州未行匪徒曹順等假先天教惑眾謀逆延亮遣人往捕
眾遂反延亮及母吳氏妻傅氏子浚萬濬萬同萬匯萬女少嫻懿
嫻幕客楊成鼎家丁二婢女一皆遇害官軍至盡殲匪黨事 聞
贈知府諡昭節 敕趙城建專祠祀之

右傳李元度撰

全福

全福甘肅武威人由英吉沙爾典史議敘選授浙江定海縣典史
單身之官軀幹偉岸嗜酒任氣有膂力道光二十年六月八日英
吉利以粵東飭禁鴉片煙土絕其貿易遣頭目伯麥布耳利等聯
艘三十餘來窺潮洋定海孤懸海外夷船直抵舟山進泊道頭勢
甚狃猖總兵張朝發捍禦失利邑令姚懷祥閉城守兵民潰散福
見事不可爲作書敘出身履歷及城破必死狀以一紙寘諸懷時
隸役盡去僅一廝僕侍顧謂安所得酒乎僕覓巨罍之半以進福
具朝衣冠佩刀詣獄所令挈酒以從坐圍扉外諭獄囚我生爾曹
亦生死亦死毋妄動若有越出者血我刃少頃聞櫓聲囚徒則紛

紛穴牆踰屋而跳勢莫可止歎曰失城我當死況失囚耶死將安
逃遂詣縣路值難民素識者出懷中紙授之屬事平赴郡投此庶
知我死也民泣受去至縣則莫知同官及令所在遂坐堂皇以杓
斟酒而罵若曹猶不受 朝廷豢養恩不死賊甘死 國法乎詬
厲霑灑顏頰裂皆僕勸引避則訶之退未幾城陷夷眾突入縣門
見福坐堂皇狀逡巡錯愕福拔刀拍案曰我大清國典史也誓殺
賊何有汝等小醜耶夷狼顧稍稍進福下堂大呼斫賊殺黑夷一
人被賊藪攢遂死年三十八死後數日城居有未逃者爲其棺斂
聞受狀者亦爲之赴官如所屬焉姚令並同日投水死此段聞諸
我邑宰劉君秩劉君聞諸全之僕卽臨死所訶退者劉與全居同

縣且共事新疆知其人素審語當不誣於戲我 國家懷柔荒遠
震疊聲靈服法畏威亙古莫比英夷嗜利干禁自取擯棄乃敢逞
厥機巧窺伺邊陲定海島嶼孤懸卒被蹂躪福以末僚於蒼黃中
能守官就義其從容也如彼其勇決也如此豈猶尋常刀筆吏所
及乎福旣死疆吏以不屈被害奏 聞得 旨與姚懷祥俱加等
賜卹所以厲臣節而慰忠魂者典至渥矣昭忠列傳自有操管者
在不才敢據所聞竊附張中丞段太尉死事狀例或他時甄錄加
詳云

右狀黃安濤撰

陳連陞

子舉鵬
張清齡等

道光二十一年二月乙丑

諭琦善奏查明上年沙角大角礮臺

陣亡受傷及續卽因傷身死之水陸將弁兵丁懇恩分別賜卹一

摺覽奏實堪憫惻三江協副將陳連陞及其子陳舉鵬同時殉難

尤屬忠義可嘉著加恩加等賜卹餘著照例賜卹以慰忠魂

乙亥 予陣亡副將陳連陞祭葬世職如總兵例並其子舉鵬加

等賞卹均入祀昭忠祠

右東華續錄王先謙編

按陳公陣亡在道光二十一年十二月十五日

夷目義律以廣東和議久不定進攻沙角礮臺伏兵二千以竹梯

登後山副將陳公連陞預埋地雷夷至而雷發擊死百人夷怒知

國朝通志卷之三十三
我兵少麾眾前進連陞以數百兵當彼五倍自辰及申火藥告罄
夷人別遣勁兵繞出三江口燒毀我兵腳船與前所伏兵合力夾
攻連陞中銃仆沙角大角並陷夷人恨之人骨刀矛交下身被數
十創又執其子舉鵬斫之刳破其腹而死守備張清齡外委瞿殿
林從殉三江營喪兵最多

右筆記黃鈞宰撰

國朝耆獻類徵初編卷三百七十三目錄

忠義四十三

關天培

麥廷章

祥福 劉大忠

周枋

劉大慶 馬三元

江繼芸

凌志

張然

王世俊 蔣恩錫

葛雲飛

鄒國鴻

王錫朋

張玉衡 武英太

李躍淵 李雲龍等

謝朝恩

陳慶三 金遠等

裕謙

師長怡 王光宇等

古今圖書集成
家範典
卷之三十三

--	--	--	--	--	--	--	--	--	--

國朝耆獻類徵初編卷三百七十三

通奉大夫前署江西巡撫江西布政使司布政使湘陰李桓輯

忠義四十三

關天培

關天培江南山陽人嘉慶八年由行伍考取武生拔補外委歷升千總十七年遷揚州營守備二十五年調奇兵營守備道光三年超擢蘇松鎮標左營游擊四年升川沙營參將六年遷太湖營水師副將十月以督護海運出力下部優敘七年擢蘇松鎮總兵十三年署江南提督十四年投廣東水師提督十五年四月偕兩廣總督盧坤奏查虎門礮臺籌議增修請添鑄六千斤以上大礮四

十位酌派各臺應用並將南山礮臺前面餘地添築石基建設月臺礮位橫檔背面山麓及對岸盧灣山脚各建礮臺一座其少角大角兩處作爲瞭望探信之臺自南山礮臺起至大虎礮臺分作三股防堵一聞信礮即分上中下三路轟擊得旨允行閏六月復會奏整頓捕務並請增改營制一南雄州韶州府屬與湖南連界河道應添汛防一惠州府連平州宜移設員弁一廉州府屬臺汛兵丁應水陸互易並勻撥弁兵巡防一瓊州府屬之儋崖二州應添設巡洋兵船下部議行十六年四月偕總督鄧廷楨奏防夷經費請於每年二月杪八月初分飭本標將備率親兵五百餘名分赴威遠鎮遠橫檔大澆永安鞏固六處練習礮準其大角沙角

礮臺等處共兵六百四十名每次操演以十日爲度計每年需用正項及另加賞犒銀共六千七百餘兩均由抄產變價生息及裁撤巡船節省項下撥給 從之十八年英吉利目馬他倫私進澳門託言稽查夷商事務妄遞無稟字信函天培斥以不遵定制抗禮傳書親督將弁將馬他倫逐出銅鼓外洋十九年三月會同欽差大臣林則徐查禁英夷躉船鴉片煙土勒繳二萬二百八十三箱計二百餘萬斤取具各夷切結存案得 旨交部議敘六月督造排椿鐵鍊安置橫檔山前海面較狹之處並於威遠礮臺迤西添築大礮臺一座以資防禦奏入報 聞十一月夷船駛入省河踞官涌天培率兵擊走之時匪艇全數屯尖沙觜乘勝掩擊均退

出外洋 諭曰此次攻擊夷船提督關天培奮勇直前身先士卒
可嘉之至著賞給法福靈阿巴圖魯名號仍交部從優議敘以示
獎勵二十一年正月英夷攻占沙角等礮臺 諭曰逆夷到粵以
後日肆猖獗經朕嚴諭該省嚴密周防相機剿辦該文武大員宜
如何妥爲布置本日據琦善馳奏該處沙角礮臺竟爲逆夷占奪
大角礮臺亦爲攻破並有戕傷將弁搶奪師船之事關天培身任
提督統轄水師平時旣督率無方臨時又蒼黃失措著先行革去
頂帶仍令戴罪立功以觀後效二月夷船擁入三門口衝近排樁
斷其鍊樁盡拔以火箭燬官廠民房天培督兵擊退會南風作夷
船復以大隊圍橫檔永安兩礮臺先截援道乘風施礮風益猛礮

臺陷進攻虎門天培督兵據礮臺拒戰自己至酉兵潰天培親熬
大礮火門透水礮不得發逆夷自臺後上天培格殺數賊槍箭雨
至負創奮關力竭歿於陣事 聞 諭曰逆夷攻擊虎門礮臺及
烏涌卡座廣東水師提督關天培被害殊堪憫惻著加恩賜卹三
月 諭曰昨因虎門失守提督陣亡降旨令兵部議卹茲據該部議
奏關天培除照例賞給銀兩准予世職外著該督撫查明伊子孫
幾人均於服闋後送部帶領引見候朕施恩該員統領士卒爲國
捐軀著卽在遇害地方建立專祠以慰忠魂而彰節義尋 賜祭
葬入祀昭忠祠謚忠節七月復 諭曰關天培次子關從龍見年
已十八歲著於服闋後送部引見伊母吳氏年逾八十著地方官

每月酌量給予銀米以養餘年子從龍襲騎都尉安徽候補同知

右 國史館本傳

公名天培字仲因一字滋圃姓關氏山陽人也起家行伍歷淮安城守營守備揚州中營守備獲私鑄王國英等十八人署溧陽營都司獲逆嚴加烈等二十五人移兩江督標左營守備歷中軍都司外海水師奇營守備奇營游擊道光二年外洋獲盜最三年署吳淞營參將旋卽真後二年東南方議海運海運自明以來輟數百年議者紛錯大府舉公任其事六年二月督米船千百四十五艘米百二十四萬一千餘石自吳淞抵天津先期功最署太湖營副將明年署蘇淞鎮總兵官旋卽真十三年入朝 上御便殿召

見五軍機記名明年夷事萌芽先是西南諸夷暹羅真臘越南之屬皆恭順受職貢惟英吉利最遠強黠嘉慶間一入貢嚴衛出海至是夷日律勞卑來不如約兵船駛至黃埔河兩廣總督盧坤水師提督李增階坐疏防落職而以公爲廣東水師提督公至則親歷重洋觀阨塞建臺守排鐵索軍務肅然東南倚以爲重公容貌如常人悛悛畏謹而洞識機要口占應對悉中暇則習弓馬擊刺技絕精在廣著籌海集識者比之戚少保云公居虎門六年而禁煙事起當是時洋煙流毒徧天下前侍郎黃爵滋發其事 上命內外大臣雜議議定著爲令而英吉利躉船適至躉船者販煙船也公既習於海而前欽差大臣林公則徐威略素著與公尤協力

至則拘夷目錮其船船不得發獲煙土二萬二百餘箱焚之奏
聞上大悅敘功有差夷計不得逞明年四月驟師入浙江據定
海分船溯大洋上天津詭投書乞和而前直隸總督琦善馳傳赴
廣東林公以罪去於是和議興海防撤矣廣東邊海門戶曰香山
虎門香山奧衍易盤踞去省少紆遠虎門險狹海道曲折去省近
虎門外列十臺最外大角沙角二臺屹爲東南屏蔽是年十二月
夷攻大角沙角壞師船而大帥日以文書與夷往來冀得少遼緩
夷不報命而急戰戰方交則投書議和書報復戰晝夜攻掠不已
時諸軍集廣府者駐防滿兵督標撫標兵兵不下萬人又調集各
兵團練鄉勇民兵數萬而大帥所遣助守臺者撫標二百人駐東

莞提標兵二百人備策應由是一臺日益孤危相繼陷沒二十一年春正月夷進攻威遠靖遠諸臺守者羸兵數百公遣將慟哭請師無應者初公之以海運入都也時從故人飲酒肆中醉而言曰日者謂吾祿命生當揚威死當血食今吾年四十餘安有是哉已而歎曰丈夫受國恩有急死耳終不爲妻子計公老母年八十餘長子奎龍吳淞參將前卒幼子先遣歸及是乃緘一匣寄家人堅不可開公死後啟視則墮齒數枚舊衣數襲而已公旣自度眾寡不敵而援絕乃決自爲計駐靖遠臺晝夜督戰已而夷大鯨奄至公率游擊麥廷章奮勇登臺大呼督厲士卒士卒呼聲撼山海水沸揚杳冥晝晦自卯至未所殺傷過當而身亦受數十創血淋

濟衣甲盡溼事急呼其僕孫長慶使去長慶哭曰奴隨主數十年矣今有急義不使主死而已獨全手持公衣不可開公怒拔刀築之曰吾上負 皇上下負老母死猶晚汝不去吾斬汝矣投之印長慶號而走比及山半迴顧公隕絕於地時二月六日也長慶既去懸尸自縊下下負水多蘆根刺體如蝟卒負重創送印大府所而身復至臺求公尸夷人嚴兵守臺則乞通事吳某以情告吳某者嘗爲漢奸公得之宥弗殺給事左右恆思所以報公至是爲長慶說夷誠懇反復夷人義許之入求尸鉞交於胸長慶膝行前徧索不得卒詣公所立處舉他尸數十乃得之半體焦焉事 聞天子震悼予騎都尉世職謚忠節 賜葬如禮喪至之日士大夫

數百人縞衣迎送道旁觀者或痛哭失聲而長慶得公尸後復求得麥廷章之半體與公尸皆徒負以歸水陸七千里公葬後恆鬱鬱不樂言及公必泣下未幾卒

論曰甚矣虎門之敗也悲夫可爲流涕者矣方公之經營十臺累戰皆捷奏上公卿相賀主上爲之前席嘉嘆至於再三然而驟發於定海詐成於天津夷不爲無謀要豈夷人能死公哉詩曰誰生厲階至今爲梗厲有階矣長慶義士誠感犬羊吳某奸耳知感恩爲一日之報異哉

右家傳魯一同撰

廣東夷變提督關公天培守靖遠李潤堂守威遠馬辰多隆守定

遠皆不過數百兵進不能戰退不能守門戶藩籬全不足恃關公與諸提鎮請於欽差大臣琦善力訴礮臺危急坐以待斃狀不得兵慟哭不行琦善怒日不到礮臺是畏死卽以軍法從事諸將日礮臺何敢不往第兵則不發徒往何益是迫之死也 國家死數提鎮殊不足惜第恐大勢一壞喪師失地於國體有關耳不聽獵德以外各礮臺相繼失守關公天培暨總兵祥福遊擊麥廷章都司沈占鼇守備洪達科同時中礮陣亡關公身受數十創半體焦爛廷章亦祇存半體公僕孫長慶旣受公命送印大府所返而求公尸膝行入夷人營鉞交於胸歷舉他尸數十審視乃得之夷眾雖忌公而心敬其人獨琦善靜鎮如故由是英吉利進偪省垣矣

胡夏米甲利之初至吳淞也關公奉檄押護南行及浙江交替回蘇夷又揚帆北駛奉 旨嚴詰大吏將罪公公曰某送之浙人受之當時取有咨文非以空言塞責也由浙北駛責在浙人大吏無以絀乃止公在官訓練操防獨勤其職他營多廢弛因以尼公公曰水師與陸路異陸路居腹裏姦宄綫索易得不至一發無所制洋盜出沒剽劫動輒戕命我輩職司禁暴奈何聽盜賊白晝殺人而不預爲計哉初議海運督撫知公才檄委護送時洋盜羣聚山嶼間素敬關帝至是從山上望見糧艘纛旗大書關字破浪煙霧中似有人坐艄樓一人侍立持大刀如世所繪關帝象者羣盜竟羅拜不敢犯

關忠節公之喪歸自粵東時公長子早歿夫人請以長子之蔭蔭
次子長子婦不可姑婦成訟卒歸長孫而次子蔭典降一等或曰
難蔭 國恩也在家庭爲不幸祖父殺身而卹及子孫其又何爭
焉葬之日有老農扶杖而觀曰是亦人耳嚮者某尙書侍郎之生
榮之而弗思及其喪也哀之而弗敬今不知敬慕之何自生也君
子曰農乃微言

右筆記黃鈞宰撰

麥廷章

麥廷章廣東鶴山人道光十年由行伍拔補水師提標右營外委十一年升把總十二年四月連州徭匪糾黨遙應楚徭助勢煽亂官兵分路勦捕廷章首先奮勇入山殲賊甚眾十月隨提督李增階巡洋先後拏獲尖頭魚船及賊匪黃猛等數十名十三年三月升千總旋署中營守備十二月升海口營水師守備十五年護本營參將十六年升碣石鎮右營都司十九年署提標左營游擊時欽差大臣林則徐查辦英夷躉船鴉片煙土檄廷章偕參將賴恩爵帶領師船在九龍山口岸查禁接濟防護礮臺遇夷目義律乘船妄遞稟信廷章等曲爲開導夷匪輒肆鴟張礮火齊發我兵施

放大礮擊翻雙桅夷船夷匪紛紛落水嗣夷船蜂集我兵用網紗
避礮仍奮勇對擊轟斃逆夷多名義律潛約土密兵船前來協助
廷章率弁兵奮勦俾前後不能接應夷船悉遁出外洋二十年正
月升署左營游擊三月因籌辦夷務出力 賞戴花翎加參將銜
二十一年二月隨提督關天培防守靖遠礮臺夷船擁入三門口
衝近排椿斷其鍊椿盡拔以火箭燬官廠民房廷章隨天培擊退
會南風作夷船以大隊圍橫檔永安兩礮臺先截援道乘風施礮
風益猛礮臺陷進犯虎門廷章據礮臺奮勇轉戰力竭歿於陣事
聞 諭曰逆夷攻擊虎門礮臺及烏涌卡座游擊麥廷章被害殊
堪憫惻著加恩賜卹三月復奉 諭曰麥廷章著加恩照游擊例

賜卹該員統領士卒爲國捐軀著卽在遇害地方建立專祠以慰
忠魂而彰節義尋 賜祭葬 賞雲騎尉世職襲次完時以恩騎
尉世襲罔替子岐芳襲

右 國史館本傳

漢書卷之九十三

九

祥福劉大忠

祥福瑪佳氏滿洲正黃旗人由親軍於嘉慶十五年投鑾儀衛整儀尉十七年遷治儀正二十年擢雲麾使二十五年升冠軍使道光元年遷總理堂務章京二年保舉卓異三年授湖南寶慶協副將七年調永順協副將十二年十月湖廣總督盧坤以祥福年壯技嫻明白勤幹保奏堪勝陸路總兵之任得旨著送部引見四月湖南江華縣逆裔趙金龍滋事檄赴軍營時賊由新田縣楊家鋪竄桂陽州交界之白水洞提督羅思舉領兵由中路進扼其南與北路署總兵霍隆武聲勢連絡首尾相應並經盧坤飭祥福帶鎮草鎮兵一千二百名偕羅思舉兩路夾攻旋以賊匪竄聚羊泉

地方祥福隨羅思舉自街東進攻偕參將王錫朋奮勇爭先冒險
直入擒獲頭目唐發林等餘匪仍閉門抗拒我兵斫門焚之殲六
千餘人並生擒首逆之子趙幅金趙滿子及其弟趙金旺等捷
聞 賞大荷包一對五月隨羅思舉復由羊泉街東南進疊次攻
勦燬其巢俘誠無算首逆趙金龍殲焉七月敘平徭功 賞戴花
翎並克勇巴圖魯名號是月護理永州鎮總兵以粵西徭匪未靖
督兵駐江華藍山等處防堵八月徭匪盤金華等自廣西賀縣逸
出就擒奏入 諭曰前據祁墳奏稱廣西賀縣土徭滋事即時撲
滅並認明殲斃首匪盤金華茲據盧坤等奏盤金華被粵西官兵
打敗後竄至江華縣屬竹排界山嶺經護永州鎮祥福帶領弁兵

將盤金華及其妻女一併拏獲案關首逆要犯兩省供詞死生互異著盧坤卽親提根究不准含混遷就以成信讞尋奏前此廣西所奏實由賊匪妄指盤金華見係祥福拏獲報聞十三年署綏靖鎮總兵十四年丁父憂十五年命署甘肅甯夏鎮總兵十六年服闋實授十八年調湖南鎮筵鎮總兵二十年十一月署提督十二月以英夷滋擾調赴廣東防守二十一年二月英夷陷虎門礮臺及烏涌卡座祥福偕廣東水師提督關天培先後陣亡事聞得旨俱著加恩賜卹祥福照總兵例賜卹賞騎都尉世職襲次完時以恩騎尉世襲罔替尋賜祭葬入祀京師昭忠祠三月上復以關天培祥福等六員統領士卒爲國捐軀均堪憫

側 命在遇害地方建立專祠以慰忠魂而彰節義子喜瀛襲騎
都尉世職

右 國史館本傳

道光二十一年二月壬午琦善奏英人攻陷虎門礮臺及烏涌卡
座 諭琦善等奏虎門礮臺失守提督陣亡一摺廣東水師提督
關天培香山協副將劉大忠游擊麥廷章署湖南提督祥福游擊
沈占鰲守備洪達科先後被害殊堪憫惻俱著加恩照例賜卹以
慰忠魂其傷亡兵丁亦著查明照例辦理

右東華續錄王先謙編

按劉公大忠未見 國史本傳因補錄此條

周枋

周枋浙江鄞縣人由行伍考取武生嘉慶十三年拔補提標中營額外委十四年隨提督邱良功會剿逆匪蔡牽於漁山洋面有功十五年補後營外委二十二年遷紹興協左營把總二十三年升嘉興協右營千總二十四年調提標中營千總道光元年署中軍守備三年署甯波城守營中軍守備四年題升象山協右營守備因籍隸本府調紹興協右營守備六年兼署都司九年以餘姚沿海沙塗產鹵最旺輒有私煎私販侵銷官引紳商請於勝山增添駐巡枋偕印委各員勘明勝山爲居中扼要之區舊設駐兵五名不足以資巡緝請增建營房二十間由紹興協添撥汛兵四十

五名派委營弁一員由餘姚縣添募丁役二十名協力巡防每閱五日與附近汛兵會哨責令駐劄餘姚之右營都司親督巡察以靖私匪經閩浙總督孫爾準奏入從之十一年升廣西左江鎮標右營都司十二年調署龍憑營都司會猺匪滋事枋帶兵赴賀縣懷集縣堵禦十三年越南國內訌廣西太平府屬之龍州各關隘與夷境接壤龍憑墟蘇二營地廣兵單枋偕署太平府知府慶吉團練保甲修築木柵率兵防堵晝夜罔懈時有七泉夷州知州阮克和與其黨百餘詭作內地民人將由水口關偷越柵牆潛圖竄入枋詰得其情曉以大義毋許越境克和等乃竄回十四年調新太協中軍都司十五年越南綏靖枋以防堵功經兩廣總督盧

坤奏請鼓勵得 旨優敘十六年升右江鎮右營遊擊十八年署
鎮安協副將十九年護右江鎮總兵二十年八月英夷滋擾廣州
內洋兩廣總督林則徐檄枋赴廣東差委差旋署梧州協副將十
二月擢提標中軍參將二十一年正月兩廣總督琦善仍檄調廣
東軍營帶領湖南官兵禦英夷於烏涌二月逆夷糾眾撲營枋奮
力拒戰歿於陣事 聞 賜祭葬如例 賞雲騎尉世職子堯襲

右 國史館本傳

按周公枋東華續錄作芳並存待考

國書目録

三

劉大慶馬三元

劉大慶甘肅武威人由行伍於道光二年隨剿西甯番賊有功三年拔補涼州鎮標後營額外外委四年補經制外委六年四月升涼州鎮標前營左哨頭司把總七月逆回張格爾入卡滋擾檄調回疆軍營十月隨陝西固原提督楊芳剿賊於柯爾坪殲獲淨盡七年正月揚威將軍長齡派大慶赴和闐確探賊蹤馳報大營二月協剿賊於洋阿爾巴特殺獲甚眾三月克復喀什噶爾城大慶首先撲入奮勇力戰斃賊多名又敗賊於和闐之昆拉滿 賞戴藍翎五月赴色勒庫圖分剿賊黨殲斃甚夥十二月芳擒首逆張格爾於喀爾鐵蓋山大慶隨眾出力九年五月遷右營右哨千總

九月安集延餘匪滋事檄赴喀什噶爾十月敗賊於英吉沙爾之蘇里克斬獲無算乘勝直抵喀城賊聞風逃遁事竣彙保奉旨以守備儘先升用十二年補前營守備十三年調甘肅提標前營守備十五年派往察漢托洛亥巡防十六年回營十七年派往野馬川防堵十八年回營十九年正月升西甯鎮南川營都司二月署甘肅提標右營游擊二十一年二月署察漢俄博營都司五月賊番突至香溝河大慶率兵禦賊力戰陣亡察漢俄博營把總馬三元亦同時戰歿事 聞均 賜卹如例 賞雲騎尉世職襲次完時以恩騎尉世襲罔替大慶子明襲三元子登龍襲三元甘肅山丹人由馬兵考取武生拔補山丹營額額外委道光五年派赴

察漢托洛亥巡防在所屬各處剿捕賊匪六年張格爾滋事三元
隨營協剿屢立戰功十七年補察漢俄博營經制外委十八年升
大馬營把總旋調是職

右 國史館本傳

江繼芸

道光二十一年八月戊子 于廈門陣亡金門鎮總兵江繼芸世

職卹典

右東華續錄王先謙編

按江公陣亡在是年七月

凌志

凌志富察氏滿洲鑲黃旗人道光六年回疆逆裔張格爾入卡滋
攝凌志由藍翎長隨參贊大臣武隆阿帶兵往勦屢次接仗擒斬
其眾七年二月賊在沙布都爾莊屯聚我兵用連環槍礮擊之凌
志從淺渠抄出殺賊無算三月張逆復遣賊眾在洋阿爾巴特抗
拒官兵排列沙岡意圖阻滯進勦之路武隆阿督率弁兵攻擊槍
礮齊發刀矛競進殲賊數百大敗之凌志在事有功九年補驍騎
校十年升步軍校十四年游升福建督標中營都司二十一年題
升福甯鎮右營游擊會英夷犯閩洋調赴廈門防堵護理延平協
副將廈門失守凌志力戰陣亡事 聞 賜卹如例尋兵部奏言

准升游擊凌志係都司題補游擊尙未具題應否照游擊陣亡例
卹銀四百兩給雲騎尉世職襲次完時給予恩騎尉世襲罔替得
旨凌志著照游擊陣亡例賜卹 賞雲騎尉世職繼子雙喜襲

右 國史館本傳

張然

張然福建晉江人嘉慶十五年出行伍檄隨出洋巡緝擊賊於烏
坵洋擊沈盜船四獲盜百餘名敘功補金門鎮標左營額外外委
十六年三月隨金門鎮總兵朱天奇擊賊於則仔澳外洋五月遇
盜船於祥芝洋奮勇圍攻獲賊船一擒盜七十餘名十月在平海
洋獲盜船一生擒賊匪十名十一月補銅山營外委十七年四月
擊賊於甘吉洋獲船一生擒賊渠劉貴等八十餘名五月擊賊於
東旋洋首先過船生擒盜首柯渠等七名殲斃賊匪二十八名奪
獲礮械無算六月擊賊於天河洋獲盜船二生擒賊匪六十四名
敘功補福建水師提標中營把總八月擊盜於南旋洋擊沈賊船

一焚燬賊船二生擒盜匪四十三名經閩浙總督汪志伊奏請記
功十一月在日湖獲濟匪奸徒郭夏一名十八年緝盜於蚶江前
保鄉及雷塘埔迭有俘獲二十一年擊盜於南日外洋道光六年
升前營千總十二年十月臺灣逆匪張丙滋事奉檄帶兵勦捕十
二月署前營守備十四年補海壇鎮標右營守備十五年署本營
游擊十六年獲盜首陳蛟於惠屬峯尾鄉並搜獲火藥礮械等件
十七年四月擊賊於澄港村五月在小蚱洋獲盜船一擒盜犯九
七月擢閩安協左營都司仍署海壇鎮標右營游擊二十年五月
署水師提標左營游擊七月署右營游擊十一月署後營游擊二
十一年二月以攻擊夷船奮勇出力經巡撫吳文鎔保奏得旨

以應升之缺升用三月奉檄在水操臺一帶防堵七月英夷犯內洋逆船駛入廈港然率兵堵剿攻斃夷匪多名會日暮夷船大進猶復奮力直前衝突烽火親戮夷匪十餘名連受槍刀傷力竭陣亡事 聞議卹如例並給雲騎尉世職子慶雲襲

右 國史館本傳

同享三ノ月ノ...

王世俊 蔣思錫

王世俊直隸宣化人嘉慶十四年由行伍拔補宣化鎮標右營額
外外委十六年遷中營外委十七年升中營把總十八年九月河
南教匪李文成滋事據滑縣城世俊隨宣化鎮總兵音登額赴剿
十月擊賊於畱固村惡虎寨等處迭有斬獲尋升獨石協多倫營
千總隨眾攻克道口十二月官兵克復滑縣世俊受槍傷仍奮勇
登城十九年調宣化鎮標中營千總道光七年升山東登州鎮標
右營守備十三年署撫標左營守備十四年擢膠州營都司十七
年山東巡撫經額布閱兵奏參世俊弓馬生疏降守備十八年遷
福建汀州鎮標中營守備二十一年奉檄赴廈門防堵英夷會夷

船闖入內港世俊偕署提標中營守備蔣恩錫迎勦世俊力戰陣
亡恩錫身受槍傷回營旋歿均 賜卹如例 賞雲騎尉世職恩
錫襲次完時毋庸給予恩騎尉世襲罔替世俊子國正襲恩錫子
清白襲恩錫福建晉江人道光四年由行伍拔補陸路提標前營
額外外委五年升右營外委八年調中營外委九年遷中營把總
十年署前營千總旋調署右營千總十一年升右營千總十二年
臺灣奸民張丙等滋事恩錫隨提督馬濟勝赴臺剿辦擊賊於茅
港尾二喃溝等處殲獲賊匪甚眾十三年賊平經欽差大臣福州
將軍瑚松額上其功得 旨遇有該省營缺酌量奏請升拔旋署
漳州鎮標左營守備二十年調福甯鎮標右營守備旋調署本職

右 國史館本傳

國朝書款類數初編 卷三十三 忠義四十三

三

葛雲飛

葛雲飛浙江山陰人道光癸未科武進士以營守備用改外海水師發浙江試用七年署黃巖鎮中營守備七月巡海至北澤外洋時夜昏晦突遇盜船雲飛滅燈息鼓令軍士持短兵作商船呼權聲以誘賊賊至一一手縛之遂獲大盜陳兆龍等九人十月護理中營游擊八年補温州鎮標中營守備九年署提標右營游擊十一年回温州任署定海鎮標中營游擊八月升黃巖鎮標右營游擊十三年正月署乍浦營參將四月獲劇盜鴻金等於澚山洋面十四年四月獲劇盜程興龍等於大羊山洋面十五年六月閩浙總督程祖洛以雲飛熟悉閩浙洋面情形疏請升補福建烽火門

參將閏六月署浙江瑞安協副將七月獲鹽匪陳起韞等於兩頭洞洋面瑞安外洋有山曰南麂周十五里距內地一百五十里游民雜處名爲種地實則通盜銷贓屢致巨案雲飛嚴行驅逐燬除庵廟盜藪一清十六年升瑞安協副將十七年閩浙總督鍾祥以雲飛年壯才勇練習水務獲盜著績不染虛浮習氣保舉堪勝總兵十八年三月署定海鎮總兵官八月回瑞安協任十九年三月授定海鎮總兵官丁憂回籍二十年六月英夷突至定海失守巡撫烏爾恭額以書邀雲飛至鎮海會商戰守策旋以雲飛精明曉暢實可協同出力入奏閩浙總督鄧廷楨奏言當此需才孔殷之際鎮臣葛雲飛精明強幹見在雖未服闋而軍務爲重覈與古人

墨經從戎金革無避之義相符請令署定海鎮總兵先後皆奉
旨俞允雲飛訪知逆夷中僞軍師安突得狡黠善謀到處輒圖其
山川險阻密投計於壯士包祖才遂擒之二十一年正月因廣東
已給英夷地貿易議將安突得等交還卽收回定海城池欽差大
臣伊里布令雲飛前往交割雲飛帶兵至定海傳諭先退定海後
交還賊目該夷則欲我先交賊目雲飛堅持前議整軍以待該夷
如期交割而去四月服闋實授定海鎮總兵八月夷酋樸鼎查再
犯定海十二日巳刻夷船二十九隻突入竹山門雲飛時在土城
防守手然大礮擊斷頭桅夷人膽落竄出吉祥門闖入大渠門窺
東港浦雲飛已先令游擊張紹廷迎頭截擊夷艘驚遁奏入得

旨嘉獎 賞加提督銜十三日丑刻夷船復闖入小竹山直撲土城雲飛開礮轟擊夷幫退去時鄭國鴻王錫朋兩鎮駐城內雲飛以本鎮駐城外至是事急兩鎮亦出城王錫朋領壽春兵守曉峯嶺鄭國鴻領處州兵守竹山門雲飛駐半塘土城之中當敵衝十四日巳刻夷船連檣駛至竹山門我兵用擡礮屢擊之自己至戌全幫竄去逆夷以五奎山正對土城於十五日上山爲營雲飛乘其未集親開大礮擊燬帳房船隻時有紅衣酋執旗指麾以礮仰擊斃之夷船遂蒼黃逸去十六日賊匿五奎山後以礮仰天隔山而擊雲飛亦隔山擊之十七日子刻大霧人面不相見賊出不意結陣直逼土城以兩大船載火藥聯以鐵索雲飛從暗中飛礮擊

之藥發船燬船中五六百人殲焉已刻賊肉薄攻曉峯嶺曉峯橫
失連攻竹山門亦失王錫朋鄭國鴻皆力戰死之賊遂萃於土城
時土城兵調守各地麾下僅二百人雲飛知事不可爲出敕印付
營弁手刀入賊中轉關二里許格殺無算不防竹山之麓有逆目
從高阜以長刀斫雲飛劈去頭面之右半雲飛戴血擊賊賊皆辟
易乃以火槍圍攻被四十餘創復中礮礮彈巨如碗自背洞胸雲
飛植立竹山門巖石而死定海義勇徐保夜得雲飛屍於十八日
辰刻負至鎮海奏入於苦戰六晝夜旬奉 硃批揮淚覽之又
諭曰據裕謙奏此次轉戰六晝夜擊焚逆船惟葛雲飛所練親兵
最爲得力陸路殺賊之壽春處州官兵均極勇敢勦殺逆夷一千

數百名該逆驅使閩粵漢奸捨死登岸眾寡不敵以致失事該總兵等奮勇殺賊效命疆場深堪憫惻除照例賜卹外加恩各賞銀五百兩由各原籍藩庫給發並著該省督撫查明該故員子孫幾人據實具奏葛雲飛鄭國鴻王錫朋俟定海收復後建立專祠靈柩回籍著地方官妥爲照料復以雲飛前經 賞加提督銜 命卽照提督例賜卹 子謚壯節入祀昭忠祠二十二年 命賞給葛雲飛長子以簡文舉人次子以敦武舉人二十四年四月奉 旨葛以簡准其兼襲騎都尉又一雲騎尉以直隸州知州儘先補用葛以敦以營守備儘先補用以簡見官甘肅階州直隸州知州

右 國史館本傳

公姓葛氏諱雲飛生時大雲如霧立庭中故名自英吉利豨突東
南海上數破陷城邑濱海將吏覩巨舶利礮輒懼縮所至潰靡坐
失律逮治者數十人獨陳忠愍吳淞之戰及定海三鎮苦戰六晝
夜殺傷過當稱效死用命而忠愍及三鎮死事爲尤烈云三鎮者
壽春總兵王公錫朋處州總兵鄭公國鴻及公以本鎮將皆守定
海先是公嘗以副將攝定海總兵矣尋憂歸歸不逾年而定海破
大府稔公材以書招公方督僮奴治田山陰令持書見公隴上公
慨然白母立馳之鎮海畫守禦具甚悉服除補定海總兵受事於
鎮海樹旗集散亡旬月教練一軍復振會節相伊里布視浙事議
以前夷艘膠餘姚海塗民所捕獲虜中貴女子及他酋數人易定

海既成說命公率所部渡海收復其地而以二鎮師從時道光二十一年正月也既而江督裕謙代伊公一反前議議戰守其秋夷酋樸鼎查遂以兵船二十九再犯定海定海故海嶼三面皆山其陰曰曉峯嶺陡絕臨海有閒道俯瞰縣城其左山叢疊去海遠右曰竹山門濱海其南曰衙頭尤曠無蔽爲海步往來所由公曰二鎮客將也俾王公守曉峯嶺鄭公守竹山門而已駐所築衙頭土城中當敵衝八月癸巳夷艘募入甌土城公自然發大礮擊斷其頭桅賊懼而退翼日自丑至午擊之退又翼日自巳至戌復擊之退衙頭南小島曰五奎山丙申賊營其巔將舉礮遙擊我以礮仰擊殲其紅衣酋一人翼日賊匿五奎山後以礮仰天隔山而擊我

我兵亦隔山擊之當是時天大霪雨連旬將士往來泥淖中衣甲
濡溼日暮絞振常出水數斗我兵合三鎮僅四千賊每艘五六百
人可二萬人分番迭進我兵乘崖踞守晝夜不得息主客勞逸適
相反餉給不時益飢疲而曉峯嶺竹山門皆無礮臺所恃火槍擡
礮不利遠擊戊戌晨大霧賊肉薄登曉峯嶺遂失王公死之下攻
縣城立破攻竹山門竹山門亦破鄭公死之乃萃於衙頭公顧視
賊眾瀰漫南下命移礮內向礮陷淤泥不可轉公力拔四千斤礮
向賊纔一發而賊羣盡至公出懷中敕印付小校手刀大呼跳盪
入賊中轉鬪二里許格殺無算浸及竹山麓一酋自高阜以長刀
力斫去公首之半公半面血淋漓躍追之酋愕避去賊以火槍攢

擊被四十餘創一酋以擡礮逆擊鉛丸洞公背自胸出穴亘如盤
公遂立竹山門崖石而卒尸植不仆手擎刀作般狀左目炯如生
久之賊乃敢諦視歎詫時公衣上下黑色青巾鐵齒鞞召土人辨
之哭且拜乃我定海總兵葛大人也大白板者定海民徐保慎市
竊趨捷如飛是夜四鼓至竹山拜負公尸祝曰不念太夫人乎乃
輕可負並求得王公尸疾趨內渡而鄭公尸不可得公先以自然
礮擊夷奏入加提督銜 卹典視提督世蔭騎都尉兼一雲騎尉
賜長子以簡舉人次子以敦武舉既又授以簡直隸州牧以敦營
守備並卽用而 于公謚壯節附昭忠祠且立專祠祀焉公字鵬
起世浙江山陰人父諱承陞武舉官衛千總母張太夫人公中嘉

慶二十四年武舉道光三年成進士授營守備尋改就水師四轉而至總兵皆在浙海先後捕海盜甚眾賊中語曰莫逢葛必不活所撰名將錄製械製藥要言水師緝捕管見浙海險要圖說及詩文凡數十卷授命時年五十三娶金氏子二人某年月日以簡等葬公某鄉某原始公攝定海鎮時命工製佩刀二爲寶刀歌以見志且銘其鐔一曰昭勇一曰成忠卽臨陣所佩沒猶握不釋者也

右墓表邵懿辰撰

葛壯節公雲飛爲水師名將嘗僞作商舟以誘賊東南海盜擒刈極多賊中爲之謠曰莫逢葛必不活公子以敦征粵寇有功能以匹馬出入賊陣賊屢披靡呼之曰銀槍小葛後亦殉難

右紀聞陳康祺撰

鄭國鴻

鄭國鴻字雪堂湖南鳳凰廳人父朝柱貴州上江協副將素與漵浦嚴如煜善國鴻少穎異師事如煜講求經世學嘉慶初伯父廷松以鎮筸千總征苗陣亡無子以國鴻爲嗣承襲雲騎尉時鳳凰廳同知傅爾督兵防邊引國鴻參籌畫積功擢永綬屯守備累升竹山協副將以事鐫級旋起湖州協副將調任湖南總督裕泰識其才力薦之道光二十年由寶慶協副將遷處州鎮總兵時海寇起閩浙總督林則徐統諸軍進剿國鴻充翼長方收復定海而則徐被譴解官去後總督某至則舉所部署盡更易之令壽春鎮總兵王錫朋守曉峯嶺定海鎮總兵葛雲飛防半塘土城而國鴻獨

壁竹山門俱當敵衝所謂同時三鎮者也二十一年八月賊攻竹山水陸並進日久營中矢礮皆竭勢岌岌或勸退保曉峯與葛軍合力國鴻不從曰竹山不守曉峯烏能自存武臣致命疆場分也越十餘日營陷國鴻身被重創猶揮刀力戰手刃悍賊數人而死年六十五中軍游擊托克布與士卒千二百人殉定海曉峯胥陷葛雲飛王錫朋相繼死事 聞 上震悼照提督例議卹 賜祭葬建立專祠事蹟宣付史館 予諡忠節子鐸銛均 恩賞舉人七品小京官分部學習孫鼎臣歲貢軍功花翎運同銜候補批驗所大使曾孫肇百襲騎都尉世職

右傳李元度撰

王錫朋

英夷擾海疆廣東福建死事者數人惟浙江定海王剛節公與兩
總兵皆力戰殺賊過當以無救遂敗人咸惜之公諱錫朋字樵慵
順天府甯河縣人少雄武有俠氣以武舉補兵部差官援例得固
原城守營游擊遷慶陽營參將道光六年從大軍征張格爾自大
河拐至回莊戰疾力矢殫其酋 賞戴花翎進戰至阿瓦巴特陷
堅賊阻渾河沿從大軍閒道渡河入喀什噶爾城進收英吉沙葉
爾羌和闐皆有功別將獲賊目玉努斯十二年苗民趙金龍亂湖
南殘常甯新田公以臨武參將從提督羅思舉破賊羊泉街首逆
誅別將逐賊高家坪大捷回就大軍楊家園圍賊殲之 賞銳勇

巴圖魯名號擢寶慶協副將時廣東徭亦煽動趙仔青進擾湖南
兩廣總督檄以兵控兩省中地殺賊背江口至濠江口又破賊銀
匠衝獲其酋旗仔青反走追獲之及其孥湖南平赴廣東大軍戰
連州大洪橋乘勝入火燒排之蛇兒嶺奪馬鞍山遂平五排徭又
從定蓮花汛冷水衝金竹根桃花衝紅泥田各徭及排後徭亦就
擒服遷福建汀州鎮總兵服闋改壽春鎮總兵公自游擊從楊忠
武公定回疆知名及平徭功居最嘗戒諭士卒曰戰利呼人共之
獲倍多卽人不利趨救之可兩全故戰比有功而定海事竟以無
救敗先是英夷陷定海去之公以壽春兵鎮其地二十一年八月
夷再至出守九安門鄭國鴻駐竹山門葛雲飛駐曉峯嶺相去十

餘里賊先犯九安門不利退攻竹山曉峯及馳往兩營已先敗賊
爭鬪公眾且盡所親卒及身自盪殺數十百人賊至益多揮短兵
陷陣死是役也賊可三萬我兵計五千公檄請益兵大府不應戰
且五六日勢足以待救亦坐不救曰吾守鎮海者也鎮海急則又
走入家賊至門守室者不出鬪於庭門焉者亦不知但走告主人
賊至某所過某所是擁大軍爲偵候而已三總兵皆坐是敗死公
殺賊獨多死尤烈事 聞 天子震悼以提督禮 賜謚卹建專
祠子承泗襲騎都尉

梅曾亮曰余讀公家書及祭所親文詞旨溫雅不知其爲武人鄉
人言待兄弟交友皆有至性歸省親更衣結鞵履身盡子職可謂

儒者風矣夫逃兵多悍卒不知義也知義雖懦者立焉況公之武勇者哉

右家傳梅曾亮撰

英吉利重犯定海城亡之日王剛節公錫朋及定海鎮總兵葛公雲飛處州鎮總兵鄭公國鴻同日殉余嘗讀葛公年譜而爲之志今讀上元梅先生爲王公家傳言二公當日事大略同獨葛公年譜言公守曉峯葛公守土城此言公守土城而葛公守曉峯余志與梅先生傳皆據兩公家狀以書而有此牴牾何哉考城之陷實自曉峯兩家子弟豈心有惡乎是而故爲舛謬者歟抑皆不親目當日事而傳聞失實歟當二公之殉大臣奏章言葛公死東嶽宮

乃據當日謀報所言東嶽宮在土城葛公死實轉戰至竹山門定海縣民徐保求屍以歸其言宜信而謀者第知城危時葛公在東嶽宮則以爲城陷戰亡必死其處耳然則葛公之守土城於此乃益有徵且以定海本鎮兵而當土城之衝於事理亦宜然此皆不足論論其大者則二公皆非所謂折衝疆場有死難不可奪之節者哉且曉峯之陷徒以未得礮耳持飢疲數千之卒捍懸海之危城當敵大隊譬猶徒手以搏豺虎久必力盡而自斃世豈有咎其爲豺虎所爪噬之一臂指而以爲不力者乎夫何足諱而爲之掩也始定海旣復夷船寄泊海壩夷人登岸雜市賈貿易欵差大臣裕謙執謀者二人憤割剝焉而張其皮城門夷聞大恨聞人言

公力戰時中賊破傷一足乃陷於賊賊效裕公所爲而糜其屍嗚呼豈不尤慘烈哉三鎮同戰歿而公屍未歸則或此言其可信也司馬遷曰人皆有一死而或輕於鴻毛或重於泰山彼輕重得矣則或一決而死或菹醢而死等死耳乃吾觀古忠臣烈士當其被禍尤烈則後之人尤感激焉抑獨何歟夫人之心必有所之彼之於利祿名位者日顛倒於膏粱文繡酣豢怡悅人見之者且將厭焉而彼方泰然自以爲得也忠臣烈士崎嶇險難或展轉刀鋸鼎鑊之間淺夫陋人攢眉惑額以謂大蹙至相悲涕亦安知夫受之者不心甘焉如人奔走於塵囂倏然而乘清風出浮雲以遊乎壑壑之表猶夫利祿名位之徒之泰然方自以爲得耶孔子曰求仁

而得仁人能各得其所欲得而又何憾焉公任壽春尤得軍士心壽春天下雄師驍勇善戰公所將數百人至定海多從戰歿罕生歸者吾故因讀公傳論傳所不及而並著之以備史官採錄云

右家傳跋尾王拯撰

定海自道光二十年六月陷於英夷賊既退流亡稍稍旋集升縣爲廳改設同知駐兵守之二十一年八月初夷復連艘來犯時總兵葛雲飛守東山礮臺處州鎮鄭國鴻守雙峯嶺壽春鎮王錫朋守竹山門分扼要隘相犄角每處兵不過千餘人初九日晡夷船駛近竹山門錫朋擊退之次日復悉眾來攻我兵捍禦兩晝夜焚其大桅十二十三日大風雨罷戰及霧相持三日待鎮海運礮未

至也十七日竹山門陷錫朋死之國鴻之守曉峯嶺也每戰多所
擊殺夷人憚之十七日曉夷以小三板船載衣紅衣者約千餘人
自鹽倉海塗登岸卽揚帆去以示置死地意國鴻麾兵抵禦身中
兩槍猶持纛督戰復受重傷倒地死同日夷之火輪船於東江浦
游奕分攻東山礮臺以守禦嚴整而退雲飛聞曉峰危急地最扼
要遂酌帶弁兵赴救猶未知國鴻之亡也時有一酋最驍悍我兵
先多被殺傷者適上嶺將占據石寨雲飛與之遇手刃之復殺紅
黑夷數十而夷眾全涌勢寡不敵且守東山時已身傷鱗次矣至
是復中火器死雲飛軀狀雄偉兼嫺文藝筆札頗短峭明達性愛
書畫謙抑下士士流多樂與之交國鴻恂恂雅飭並好吟詠錫朋

善書筆意頗近柳誠懸蓋皆儒將也三鎮中國鴻稍長死年約六十餘雲飛錫朋齒相若皆及艾云是年秋嘉興秦秀才光第就館同知署得脫於難越一年來魏塘見訪酒次欷歔及三鎮死事能排日鑿鑿言之且曾識葛鎮並知鄭王之爲人當有異於塗說者爰秉筆以紀其略至其籍貫出身他日自具列傳不及詳也

舊史氏曰自逆夷犯順軍興以戰聞者如我浙江惟定海一役而已惜乎其敗也夫豈無棄城失地而並未嘗以敗聞者彼徒知擁兵持重訥謀四出懾先聲張虛警賊所距尙遠已拔帳在途如鋒鏑之及背去之唯恐不速往往皆是又曷嘗以戰聞乎於是三鎮之死爲難得矣且當其危急時設有繼其後而應援之或未必遽

敗果孰聽其死也不重可惜歟

右紀略黃安濤撰

英吉利既定廣東之議餽夷銀帑無所出使洋商伍怡和貸金足之夷人索廈門甯波上海益堅治粵者了粵事不暇恤他省秋八月英夷再至廈門陷之其赴浙酋目曰郭僕僕義子曰陳祿浙人也深悉沿海地利導之深入方是時總兵葛公雲飛王公錫朋鄭公國鴻守定海而大帥統重兵駐鎮海城夷攻定海之竹山門三鎮且戰且守飛書請兵大帥不應戒死守毋望援於是三鎮合兵四千當夷人二萬餘死傷既多繼以敗潰錫朋憤甚獨揮短刀陷陣所親卒及身自盪殺數十百人力竭被刺死國鴻別領一隊衝

入夷兵中縱橫盪決當者披靡會夷兵大至圍之數重竟以中銃
亡於陣而葛公雲飛死尤烈雲飛駐守南路土城手掇四千斤礮
擊夷復帥部卒持械步鬪夷酋安突得執大綠旗麾兵進公罵曰
逆賊終污吾刃斬之刀折急拔所佩劍仰登竹山門賊飛刀劈公
面去其右半血淋漓徑登賊駭迸聞忽有礮背擊公洞胸如盃而
沒安突得者上年被擒於浙罽夷人歸我定海請釋還國者也先
是天雨浹旬公青布帕首麻袍著鐵齒鞞日拊循士卒霪潦中屢
戰卻敵行營有藥桶二公密納火線其中而朱書封面曰餉銀賊
至取之盡焚死義勇徐保者夜跡公尸走竹山門雨霽月微明見
公半面立崖石下兩手握刀不釋左目猶睽睽如生欲負之行不

能起蹠而祝曰盍歸見太夫人乎遂乘夜浮舟內渡三鎮既坐少
兵同日殉難夷人乘勝陷鎮海諸帥或移節他所獨欽使裕謙公
自投泮池死初廣東譌言公得虜必剝其皮公曰虜謂我不能爾
耶遂擒兩夷目剝其皮以故夷人怨公次骨以十萬金購公尸甚
急千總馬瑞鵬泅水出公載以小舟送至省垣斂之方事之殷林
公在浙奉 命削職戍伊犁論者追咎公督兩粵繳煙激變故也
南中諸君子有贖鍰之請公致函宛謝怡然而行鉢池山農曰三
鎮之殉行略謂請兵大帥不應而裕公幕客陳時謂海風大作文
報斷絕所致傳聞異詞然所繫於大帥者是非得失相去遠矣

右筆記黃鈞宰撰

張玉衡 武英太

張玉衡浙江黃巖人嘉慶十年由行伍奉派巡洋十三年捕盜外洋屢著勞績十四年追賊於旗頭洋面躍過盜船殲擒賊匪無數左右手連受槍刃傷又隨提督邱良功在漁山外洋擊沈逆首蔡牽賊船十五年復於大俞山洋面協獲盜匪多名十七年隨署黃巖鎮總兵林孫在東涌外洋追捕盜匪斬獲甚眾右顛受槍傷經閩浙總督汪志伊保奏得旨遇有外委缺出先行拔補十八年補鎮標中營額額外委二十一年補右營外委二十二年調左營外委二十三年署中營把總二十四年升定海鎮標中營把總二十五年調左營把總迭次出洋捕盜有功道光二年升署瑞安協

左營千總三年四月升右營千總九月署温州鎮標中營守備七年署鎮海營中軍守備十年署温州鎮標左營守備十三年升補右營守備十四年署左營都司十五年四月因所屬炎亭洋面有盜船行劫承緝未獲經閩浙總督程祖洛劾奏革職畱任七月回温州鎮標右營守備任尋奉 恩詔開復革職處分十七年七月調鎮海營中軍守備尋護理黃巖鎮標中營遊擊十二月升温州鎮標中營遊擊旋以前任遊擊張君昌有疏防盜案例不准升飭令回任緝捕玉衡仍畱守備任二十年五月署黃巖鎮標中營遊擊六月英夷滋事陷定海浙江提督祝廷彪檄玉衡急回鎮海防守十二月欽差大臣伊里布檄令署定海鎮標中營遊擊二十一

年二月收復定海玉衡帶兵前往守禦四月升補定海鎮標右營
遊擊仍署中營遊擊八月英夷復犯定海定海鎮總兵葛雲飛等
分兵督戰六晝夜力盡殉節玉衡同時率兵禦賊城陷死之定海
鎮標右營外委武英太隨葛雲飛在曉峯嶺協勦逆夷奮勇力戰
爲礮彈擊斃棄其屍海中英太定海人在行伍二十年屢出外洋
巡防閩浙界各海口捕獲盜匪無算道光十五年署定海鎮標右
營額外外委又在佘山對洋擊沈盜船殲擒行劫賊匪十六年補
中營外委旋調左營外委十七年署中營把總十八年回外委任
玉衡英太殉節時鎮海鄞縣相繼陷失後皆收復二十二年經浙
江巡撫劉韻珂察知陣亡將備姓名開列具奏均 賜卹如例

賞雲騎尉世職襲次完時以恩騎尉世襲罔替玉衡子大業襲英
太子慶偉襲

右 國史館本傳

李躍淵 李雲龍等

李躍淵山西平定州人道光十二年武進士引 見以營守備用
十八年補浙江處州鎮標左營守備十九年護本營遊擊二十年
署麗水營都司是年英夷犯浙洋調赴鎮海防守二十一年隨處
州鎮總兵鄭國鴻防守定海八月勦夷匪於曉峯嶺鏖戰六晝夜
身先士卒與處州鎮標中營把總胡大純右營把總洪式琮左營
外委金釗俱力戰陣亡同時台州協左營守備李雲龍亦戰歿於
金雞山事 聞均 賜卹如例 賞雲騎尉世職躍淵子體仁襲
雲龍子國標襲大純子來雖襲式琮子作謀襲釗子式琪襲雲龍
浙江鄞縣人由行伍歷拔提標後營千總道光十九年補是職大

純浙江東陽人道光二年武舉揀選發往本省效力署金華協左營千總九年補衢州鎮標右營千總十二年調金華協左營千總十四年署本營守備俸滿考驗以弓馬生疏降調是職式琮浙江甯海人嘉慶十一年武舉揀選發往本省效力道光十八年補是職釗浙江麗水人道光十年由行伍拔補處州鎮標左營額外委二十年補是職

右 國史館本傳

謝朝恩

謝朝恩四川華陽人由行伍隨征三省教匪有功拔補外委嘉慶七年隨參贊大臣德楞泰敗襄陽黃號首逆樊人傑於馬鹿坪追至黃嶺賊憑高抗拒官兵冒石仰攻直上山頂賊潰走平河口蹙而擊之樊逆赴水死敘功 賞戴藍翎十一年升四川建昌右營把總十二年升越嶲營千總十三年隨提督豐紳勦馬邊夷匪在事出力得 旨以守備卽用先換頂帶尋隨豐紳馳赴松潘查辦果洛克賊匪十四年補順慶營守備十六年調城守右營守備十九年總督常明檄赴保甯防堵陝匪事竣調撫邊營守備二十四年擢福建興化城守右營都司道光四年遷平和營遊擊六年彰

化匪徒李通等與粵民黃文潤械鬪餘匪乘勢竄入三灣句串番割脇同番眾出山肆擾經水師提督陳化成督率官兵入山搜捕賊以山勢險峻負嵎拒鬪朝恩偕參將黃其漢遊擊謝得彰率兵勇攀援而上生擒賊首黃斗乃鄒阿王林阿成槍斃兇番七名拆毀內山番割寮舍並奪獲鏢槍番刀無算逸匪黃武二等以次就擒奏入 命遇缺儘先升用七年升閩浙督標左營參將八年署興化協副將十一年升浙江象山協副將十二年四月調督標中軍副將十月嘉義逆匪張丙陳辦等滋事連劫下加冬八槩溪營汛進佔縣城同時北路彰化賊黃城攻陷嘉義縣屬斗六門汛與張丙合而南路鳳山賊許成張沈明等亦乘機擾羅漢門一帶郡

城戒嚴朝恩先帶兵渡虎門提督馬濟勝以大軍繼進張丙等據險設伏官兵連擊之茅港尾鐵綫橋焚燬賊巢賊眾大潰先後獲張丙陳辦黃城等北路肅清朝恩進勦鳳山賊連戰皆勝殲賊目王就復還兵擊許成張沈明於二南溝擒之南路平捷入 賞換花翎並 賞加總兵銜十三年署福建漳州鎮總兵十四年補江南狼山鎮總兵二十年英夷不靖經欽差大臣伊里布檄赴浙江甯波奏充翼長防堵鎮海二十一年復隨欽差大臣裕謙巡查江蘇上海各隘口尋回鎮海防堵八月與逆夷戰於金雞山死之諭曰江南狼山鎮總兵謝朝恩臨陣捐軀屍骸未獲殊堪憫惻著加恩交部賜卹以慰忠魂尋 賞騎都尉世職子釗襲騎都尉見

國史館本傳

任四川松潘中營守備

右 國史館本傳

陳慶三 金壺等

陳慶三浙江臨海人道光元年武舉效力台州協標三年期滿以把總補用六年巡緝海洋拏獲盜犯賀宗標七年署右營千總八年補左營把總尋調平陽協左營把總十年遷本營千總十一年調甯海右營千總十九年俸滿畱任二十一年閏三月英夷犯浙江內洋檄赴鎮海軍營八月偕鎮海營把總金壺甯海左營水師外委吳定江禦賊於金雞山同時力戰陣亡二十二年逆夷犯慈谿甘肅肅州鎮標前營經制外委楊福增奉檄來浙防堵與逆夷接仗於大寶山死之事 聞均 賜卹如例 賞雲騎尉世職慶三弟慶恩襲壺子成甫襲定江子茂華襲壺浙江仁和人由行伍

補浙江提標右營額外外委道光十三年補外委二十一年升補
是職定江浙江黃巖人道光九年由行伍巡洋協獲盜匪金龍三
等五名十年拔補鎮標中營額外外委十一年署右營外委十二
年署中營外委十五年三月擊賊於大港門洋面擒獲盜犯胡老
彭等十月復擒洋匪林民等擊毀盜船並搜獲礮械十六年補是
職福增甘肅西林人嘉慶二十五年由行伍隨赴青海緝捕番賊
道光二十年以獲盜功拔補西甯鎮標後營額外外委二十一年
升補是職

右 國史館本傳

裕謙

裕謙原名裕泰博羅武氏蒙古鑲黃旗人曾祖班第官兵部尙書定北將軍一等誠勇公祖巴祿官察哈爾都統綏遠城將軍均有傳父慶麟官京口副都統裕泰嘉慶二十二年進士改翰林院庶吉士二十四年散館以主事用籤分禮部道光三年補官四年四月實錄館告成議敘以本部滿洲蒙古員外郎用閏七月補員外郎五年京察一等引 見記名以道府用六年三月授湖北武昌府遺缺知府六月補荊州府以與湖南布政使裕泰同名經湖廣總督耑孚奏改今名九年調武昌府十四年四月擢荆宜施道七月升江蘇按察使十六年丁母憂旋告病服闋病痊十八年署江

蘇按察使十九年二月實授六月遷江蘇布政使兼署巡撫十一月疏言安民必先息訟而刁衿劣監每多恃符狡飾應令將執照隨詞黏驗做國子監之例於執照上蓋用戳記而健訟之風可以息冒充之輩無所容卽有假照等弊亦可隨時勘破矣下部議行十二月授江蘇巡撫二十年正月偕署總督麟慶奏江淮等五府州屬熟田舊欠錢糧未能同時並納請緩其賦其豐縣贛榆縣秋收減色之區應一併查辦又以蘇松鎮等處所轄洋面疊次失事劫備弁等緝捕懈弛請摘頂勒緝並將督巡不力之總兵官交部議處從之三月奏參高淳縣知縣許心源捏填年歲請褫職以杜取巧規避之漸並劾藩司知府不爲覈實辦理請一併分別議

處又奏訪獲儀徵縣在籍捐納通判秦開甲倚恃土豪欺壓鄉里請斥革提省嚴訊又奏訪聞瓜洲司巡檢趙景星吸食鴉片煙按驗得實均如律五月借總督伊里布奏參相驗含混及刪改供詞之知縣朱勃鄭敦五等請奪職又因淮安徐州各府秋收款薄請將新賦舊欠分別展緩均蒙 俞允七月署兩江總督及鹽政事務先是鴻臚寺卿金應麟奏請飭禁漕務積弊並將漕運事宜量爲變通 諭兩江總督及有漕督撫議奏卽據林則徐烏爾恭額臚款陳奏 上更命伊里布裕謙妥議至是覆奏略言江蘇漕務固屬疲敝然二百年來成法具在所以日壞一日者實由議論太多之故一切積弊向所諱言一經上達 宸聰無不恃有奏案視

爲分所應爲臣惟有和衷其濟恪守舊章去其太甚以期漸革積弊較之空言似有裨益所有金應麟林則徐等條陳各款應毋庸議 上可其奏時英夷在浙省定海登岸滋事 上申諭沿海將軍督撫分飭將弁加意巡防裕謙接督篆後卽赴寶山督辦防務八月夷船駛至海門廳糖鹽沙洋面游奕遙放槍礮經我兵擊退裕謙奏請暫緩撤退前調兵丁 許之是月許乃安陳奏浙事並稱蘇州一帶居民因畏夷氛亦多遷徙丹陽縣因勘議加賦致激成毆官劫獄得 旨著裕謙加意撫綏居民示以鎮靜勿令惶恐逃亡以安眾志尋奏言六月間江蘇霪雨成災兼值夷氛不靖民情不無惶惑嗣經調兵防堵夷船不敢深入並奏蒙 聖恩寬免

關稅招徠商販得以采買米石接濟兵糧民食而被災較重之所
又蒙 恩發帑撫卹以是民皆安帖如故委無逃亡之事至丹陽
縣一案查係刁民吳章行與糧差計較錢串起衅並非由加賦激
變見已將該知縣呂湘撤任飭拏全案人等嚴行審辦臣惟有欽
遵 訓諭鎮之以靜撫之以恩庶刁徒知警而良善得所矣疏入
報 聞會英夷船隻赴天津海口投遞呈詞乞 恩並願回粵省
聽候查辦復 諭沿海各處仍認真防範但以守禦爲重勿以攻
擊爲先九月裕謙由寶山赴上海尋 諭裕謙等將前調防守各
官兵分別應留應撤妥爲辦理十月以江蘇獄囚擁擠援案請加
變通下部議行又奏言前署京口副都統張仙保因辦理防堵奏

奉 恩准所有防禦官兵口糧每日每員給銀一錢臣查京口旗營官兵卽在本營汛地巡防若遠議加給口糧則外調之如皋江陰等處兵丁亦應一體辦理而預接仗之兵更應加增厥費甚鉅實與大局有礙況旗兵世受 國恩凡事應身先作則爲綠營表率未便首開糜費之端所有該副都統原奏應毋庸議 上是之又奏查明江蘇沿海口岸舊存礮位不足以資防禦請添鑄自三千斤起至八千斤止大礮數十位建造礮臺分口排立如所請行十一月奏勘明江甯蘇州等府屬被水成災請新舊錢糧分別展緩又奏查閱京口一帶江防情形請將年力就衰之遊擊黃琴及歷練不深之守備孟兆蘭分別勒休撤任又奏當塗銅陵等縣江

面商船被劫其巡防不力之備弁按照舊章止應記過惟該員既未能與文職會哨復捏具並無失事鈐結實屬溺職請斥革示懲又疏陳軍營莫利於槍礮可助大礮之用者惟擡礮最爲得力請在江甯省製造盤螺螭擡礮一千桿分發水陸各營選精壯兵丁勤加練習所需銀兩及每年操演應用火藥鉛丸應由撫臣衙門辦公案內按年捐辦無庸另請帑項奏入 上以辦理甚好務收實效十二月奏據伊里布咨會知夷情反覆不測江蘇洋面與定海毗連崇明旣孤懸海外上海乃通商馬頭而寶山又爲出入門戶在在皆關緊要不敢因該夷並未蠢動且有天險可恃遂形鬆懈見已飛咨提臣陳化成酌量情形妥爲辦理惟上海地方所駐

徐州鎮標官兵見係護理之員管帶恐不足以資彈壓請 敕下
新任徐州鎮總兵王志元迅速前來庶可專責成而昭慎重先是
御史蔡家珩奏籌制英夷事宜 命將原摺交裕謙閱看裕謙因
奏言蔡家珩所陳各條原爲兵家要訣本年夏秋閒曾經預備試
行然皆使其不敢侵犯之計而非驅除醜類之謀也臣愚以爲兵
資神速必先收復定海使之容身無地水米無資而後以剋制之
法相機堵禦則該夷欲進不能欲守無藉雖船堅礮利無能爲役
矣查定海有嶼名岑港形勢險要可戰可守但得精兵數千乘夜
渡海先據岑港聲東擊西使之晝夜不得休息不出旬日彼必棄
城而遁且官兵移駐定海趁勢進剿有可以無慮者四有不可緩

待者六臣請更詳言之定海縣城之後眾山環峙不但岑港如楸
欖采和諸嶼東西北三面皆可結營屯兵我既居高臨下易於擊
刺而被竇不能仰攻此可無慮者一也該夷大礮不能登山施放
夷刀不能刺遠夷人腰硬駁直一擊而蹶我兵矛矢擊刺趨捷如
飛用我所長攻彼所短此可無慮者二也定海山外港汊有淺有
礁夷船不能盡到而我之漁船處處可入故文報不至難通此可
無慮者三也內地昆亭大汪新碛嶼浦等處漁船之往來定海者
向皆繞山斜渡由山後各口登岸若官兵乘夜潛渡一潮可達不
至阻礙此可無慮者四也見在西北風司令我之口岸悉占上風
夷人既畏天寒又虞水淺是以不敢蠢動若至春夏之交東南風

發潮水充盈彼勢既張我則失利此不可緩待者一也定海各畧
收割未久有糧可就不患其阻我饒道以我官兵駐我土地遲則
地利人和兩失所恃此不可緩待者二也各畧民苦夷人之騷擾
望官兵如雲霓果其從民所望則勇氣百倍不獨未逃者恃以無
恐卽已逃者亦可復歸故土旣壯軍威又免難民之踵去此不可
緩待者三也該夷在定海出示定價買糧勒令送入城中設我遲
久不願則民人被其迫脅儲蓄皆爲彼有此不可緩待者四也見
在各渡口漁船照常往來易於渡兵如再遲延恐漁船被脅從逆
則我兵無船可渡此不可緩待者五也定海兵丁之散在各畧者
雖經陸續招集而自懷疑懼不敢投回者聞尙不少我兵旣渡下

令招安此等散兵一呼可集使功不若使過未有不感恩思奮者較之徵調客兵更爲得力遲則該兵等別無恆產若不從逆必將流而爲盜此不可緩待者六也臣從事半年揆時度勢審思熟慮竊謂各省皆可議守而浙江必應議戰且必應速戰蓋浙江不戰而定海不復則該處米穀牲畜恣其擄掠供其用度定海不復彼旣據爲飲食之源我卽無斷其接濟之法又況荼毒良民誘集奸匪耽延愈久夷勢愈眾迨至潮汐旺盛彼更時出兵船游奕於沿海各省乘閒滋擾反客爲主轉勞爲逸益寡爲眾我則處處防堵時時戒嚴商賈阻滯士民驚擾勞師糜餼似非長久之計至該夷均係貿易圖利之人原無略地爭城之志不過逞其誦詐要求通

商若於我軍旣振彼氣已懾之後投誠乞命再行仰懇 天恩網
開一面庶該夷知感知畏不敢復萌故智而海疆永靖矣 上以
裕謙所奏不爲無見 命伊里布體察情形按照摺內所指相機
妥辦又奏言江蘇營員習於安逸以致營伍廢弛必應先就督標
各營實力整頓庶期咸知儆畏請將違例坐轎之中軍副將沙序
元及年力就衰之城守協副將張明召分別褫職勒休以肅營規
上是之二十一年正月 上以伊里布誤信琦善疊次知會因逆
夷有繳還海口之說遷延觀望並不迅速進兵實屬畏葸 命伊
里布折回兩江總督本任以裕謙爲欽差大臣伊里布又奏稱接
到廣東來信並義律呈遞文件願將定海繳還 諭裕謙於馳抵

鎮海後察看情形如定海業已繳還著卽撫卹難民修理城濠一切善後防守事宜妥爲經理儻詭言獻地仍復負隅卽遵照前旨相度事機痛加剋洗斷不可因有繳地之說爲其所愚仍蹈伊里布覆轍所有前調赴浙之皖楚等省官兵不可中止仍著裕謙催令前進二月伊里布馳奏遣將帶兵收取定海並密籌攻剿又奏定海業經收復夷船全數起旋 上諭裕謙到浙後將伊里布見辦情形確切查明據實具奏旋以馳抵鎮海接受關防并籌辦大槩情形奏 聞 上以善後事宜責成裕謙並 申誠裕謙曰該夷行蹤詭譎難保不駛回滋擾務當督飭總兵鄭國鴻王錫朋葛雲飛等加意偵察是月裕謙以接奉 廷寄不能慎密遵辦下部

議處議以鑄一級調用得 旨改為革職畱任時浙江按察使用
 開麒升任甘肅布政使裕謙以定海善後事重擬奏畱周開麒襄
 辦一切開麒託故推諉裕謙疏劾浙江吏治營伍習於驕惰畏葸
 已非一日該司心存畛域冀圖脫身事外若不嚴行指參以起頽
 廢將來善後事宜必致徒法不行應請將該員交部嚴議仍扣畱
 浙江差委以觀後效 允之方逆夷之初退定海也副都統海齡
 請將沿海通商各馬頭港口一律封閉不准一人一船出入以防
 偷漏之弊 上以海齡所奏自係未知收回定海一節 命裕謙
 體察目前情形悉心妥議尋覆奏略言濱海之區民無恆產而性
 習於水其仰食於海者難以數計一經封港小民頓失所天必將

流而爲盜且上年幫助官兵擊退夷船以及救護難民濟渡糧餉皆此商漁船隻是其船爲我之所必用卽斷無用其船而不准其謀生之理聞有不法之徒勾通接濟必停泊於人跡不到之偏僻海汊何敢出入於眾目昭彰之通商馬頭是封港之議徒有礙於安分漁商而於杜絕接濟之法仍未得其首領再查漁戶冒險採捕終歲勤動僅能餬口竟有終其身未見洋銀一圓者接濟夷匪不過貪獲厚利而其所得究屬有限若有許以重賞激勸而用之斷不肯舍無窮之富貴而冒死接濟以求有限之錢財當此用人用船之際所有該副都統奏請封港之處應毋庸議又奏查探夷船二十餘隻停泊定海外洋見在廣東不准通商難保不竄回定

海已撥兵四千八百餘名添礮五十位豫籌防守又奏請懸賞招募水勇以散漢奸並准各國夷人一體殺賊請賞又奏言接奉

廷寄知參贊大臣楊芳有改水師爲陸路之議臣愚以爲此議斷不可行臣前在軍營亦曾將巡洋官兵撤回防守口岸因逆夷船堅礮利不值與之海洋接仗然止可爲一時權宜之計一俟夷務平定必應簡練水師講求船械以爲久安長治之圖若竟將水師改爲陸路則海中島嶼巡哨無人幾同棄置非徒示弱外夷任其占據更慮沿海盜匪結聚成幫肆無忌憚爲患更甚矣疏入上并嘉納之三月奏陳東渡定海日期并擒獲夷匪正法又奏俟定海善後議定仍回鎮海軍營以禦爲勦以守爲攻杜絕接濟嚴防

要隘儻駛近口岸度量礮力能及卽行轟擊或誘令登岸勦洗得旨嘉勉閏三月 上召伊里布來京聽候諭旨以裕謙補兩江總督并 諭裕謙接奉此旨卽將定海應辦事宜交劉韻珂余步雲等妥爲經理該督卽赴兩江總督新任如有未了之事必須親身督辦者或於到任後再行赴浙查辦四月奏言接奉 廷寄擬卽起程並將欽差大臣關防暫行封貯 上諭裕謙到兩江任後將各海口善後防堵事宜辦理妥協卽折回鎮海調度將弁不時查訪定海情形軍民果否相安夷船有無窺探欽差關防仍著裕謙管帶以專責成又 命裕謙酌量江浙兩省適中之地在彼駐劄以便策應尋疏陳定海善後事宜十六條一添設陸路營汛以專

賁成一定海鎮標左右二營應移駐城外以資戍守一建復衙署
兵房以資棲止一添撥礮位以資防禦一製補軍裝器械以資操
練一戰哨船隻應分別改造以資緝捕一被賊焚拆戰哨船隻應
專設一廠卽行補造一浙江巡撫應節制各鎮以資整頓一浙江
提督應按年巡閱定海以資考覈一每年夏秋二季提督應駐劄
鎮海以資控制一提標左營遊擊應移駐穿山以資策應一定海
縣知縣應請升爲直隸同知以資彈壓一新築土城應隨時修葺
以資保障一定海土城之外應永禁搭棚棲止以杜弊源一應增
廣學額酌減錢糧以昭激勸一應豁免舊欠新賦以蘇民困均下
部議行又奏審明上年定海失守時退走各員弁治如律五月浙

江巡撫劉韻珂馳奏浙洋有夷船游奕 諭裕謙仍往浙江或駐
劄嘉興或徑赴鎮海酌量情形自行妥辦六月奏馳抵鎮海查明
夷船洋面防堵各情形又借署江蘇巡撫程喬采奏請將勘明積
歉之江甯各府州縣新舊錢糧分別緩徵以紓民力又請將部撥
兩淮運庫解閩軍需銀七十萬改撥浙江以備急需均 從之七
月奏帶兵赴浙江防剿並請緩撤江浙防兵時因靖逆將軍奕山
等轟擊夷船逆夷退出虎門議令各省酌撤防兵尋以福建廈門
失守 諭裕謙等嚴密防範如兵力不敷准其酌量調撥務須妥
爲布置毋稍疎虞至逆夷習於水戰向來議者皆以彼登陸後卽
無能爲患乃今占踞廈門是陸路不可不加嚴備務須相度機宜

詳加籌畫八月奏鎮海定海交界之青龍港洋面有夷船五隻火輪船一隻大佛頭洋面有夷船三隻情形叵測又奏擒斬登岸逆夷并將原定賞格及逆夷供詞開單恭呈 御覽夷船旋分口滋擾駛放三板小船從盛嶼地方登岸經太平營弁擊傷而逃又石浦夷船亦爲防兵擊退嗣夷船大幫闖入內洋裕謙奏言見於各隘口分布兵勇設法守禦并躬率文武官弁誓於神前城存俱存以盡臣職斷不肖以退守爲辭離卻鎮海縣城一步尤不肖以保全民命爲辭接受逆夷片紙此非敢效匹夫之勇甘爲孤注之投蓋因鎮海地方疏虞則逆餒愈張兵心愈怯沿海一帶必將全行震動非此不能固結兵心滅此朝食更非此不能挽回徘徊瞻顧

之積習故保鎮海卽所以全大局也九月逆夷又陷鎮海縣城裕謙死之事 聞 諭曰兩江總督裕謙功臣後裔世篤忠貞經朕擢任封圻適當逆夷滋事特派爲欽差大臣辦理浙江軍務該督銳意圖功方資倚畀茲以鎮海縣城失陷投水盡節深堪憫惻著加恩贈太子太保銜照尙書例賜卹任內一切處分悉予開復伊祖班第於乾隆年間在伊犁殉節入祀昭忠祠今該督臨危致命不忝前人著附祀昭忠祠並俟軍務完竣後再於鎮海縣城建立專祠以彰盡節其靈柩回京時著沿途地方官妥爲照料並著伊弟裕恆前赴江蘇迎接到京時准其入城治喪應得卹典該部察例具奏尋 賜祭葬 予諡靖節十一月裕謙靈柩到京 特遣

成郡王載銳前往賜奠裕謙無子奉 旨以其弟世襲誠勇公裕恆之子兵部筆帖式德峻爲子承嗣兩房二十二年十二月德峻承襲騎都尉兼雲騎尉世職奉 旨以六部主事用

右 國史館本傳

道光二十三年四月朔晨起發篋得吳人陳時上誠勇公書論裕靖節公死節事陳故靖節客親見公死狀甚覈獨恨其文弱又不載舟山戰事公既死頗有異論故謹次其事明公非智窮數極蒼黃一決而處心積慮成於死者蓋久公起家兩司巡撫江南所至有威東南事起公駐節寶山夷不敢犯屬伊相以罪廢 天子命公督兩江充欽差大臣屬以東事公聞 命赴嘉興調度而廣東

和議屢敗最後以銀大萬千餘爲城下之盟飽而去公知不足恃
守益嚴二十一年七月廈門失守得報集兵鎮海躬率文武僚屬
刑牲醴酒誓於眾曰逆虜恃天寒盟得氣於廣閩爲不備罹茲瘡
毒今聞其乃揚颿起旋捲眾北趨鎮軍葛鎮軍王鎮軍鄭先帥偏
師急趨定海幕府總統大眾相機援應且虜數和以要我今日之
事有死靡貳幕府四世上公勳烈不沫受 命專討義在必克文
武將佐敢有受夷一紙書去鎮海一步者明正典刑幽遭神殛音
詞慷慨聞者震奮當是時鎮海守兵數千隸麾下者惟親兵及徐
州兵而提標兵隸提督提督者余步雲也公與步雲約分險而駐
軍公遣知府黃冕守金雞山而步雲守招寶自夷入中國戰則懸

紅旗利則白旗變易耳目以猜我師至是公巡師登城見招寶山之旗有異懷而未發而步雲果稱疾不行意怏怏懷兩端步雲者用鄉勇起家勦川楚等賊積功爲大將趙金龍之牧步雲功最自以久歷行陣頗易公公治軍嚴夷在廣東時謠言公得虜必剝其皮公聞之曰虜謂我不能爾邪遂捉兩夷目剝其皮以故夷人怨公次骨而誑步雲以牽制公公之誓師也道經學宮頽池旁石刻巨字甚偉而心動私念脫不測尸我於此矣歸則以語左右已而夷分兵寇盛輿石浦遣將擊走之八月十二日夷犯定海先登自竹山門總兵葛雲飛禦之於半塘土城破其巨艦明日復進竹山門明日攻曉峰嶺處州鎮總兵鄭國鴻卻之是晚虜據五奎山十

六日入吉祥門夜戟火其舟十七日夷三道並進壽春鎮總兵王錫朋首當其鋒眾皆殊死戰頗有所摧敗而大鯨掩至我軍連戰六晝夜士卒饑疲虜持皮梯登岸越嶺勢如風雨於是海風大作濤奔山涌文報斷絕三帥同時畢命軍中奪氣公以定海既陷虜必揚鯨深入益激厲將士憑城固守而鎮海單弱援兵未集公知不濟嘆曰昔先義烈公以乾隆二十一年八月死於難今二十一年八月謙在此命也夫謂其客曰明日將戰戰則不及言今欲有言凡軍中 諭旨奏疏及他文簿置行館中又曰余無子妻弱一女在襁褓可以德峻承祧喪葬之費取給而已又曰吾所草諸疏藏之家祠 朝廷有所推問以此進將戰又曰公等皆去西城數

里外觀吾破賊急草露布不者與家人會於餘姚勿顧我我死提督必以我說於夷夷雖得鎮海不能有也 朝廷復命大將斷曹娥江而西東南尚可爲勉之二十六日夷凌晨而軍公登城督戰親援枹鼓戰方交而步雲單騎上城有所謁公不荅去旋復來曰我死固當如百口何且步雲有息女今日嫁何如哉公曰兒女情君故不免然忠義事大旣語步雲而急戰自辰至未所殺傷過當而招寶山兵遽潰散威遠城失守金雞之卒擾亂公所遣黃冕不能軍麾而退夷乘勝蠶午礮火雨下延燒民屋守兵皆散公徒步下城西北面叩頭奮身入頽池有呼救公者聲未絕而逃于總馬瑞鵬曰公之奴凌喜之聲也泗水而出公公昏頓縛一小肩輿健

卒負之步而從於是夷人以十萬金購公尸甚急薄暮奔甯波明日易舟奔餘姚而息尚屬僕余升者追及舟登而號少頃目微眴猶述城上語一二不可辨舟行五里而公死矣後五日渡江貌如生劉中丞斂之而瞑見者莫不悲異而余步雲以二十六日晡退保甯波果以公死說於夷夷繇是益輕中國明年五月遂寇寶山掠上海據京口以犯金陵 朝廷始歸咎步雲逮捕至京斬於西市

論曰公可謂從容就義者矣或曰公爲大言多易駐劄經年不能止鴟張之寇窮蹙而死耳烏乎心跡未易明明者亦不易當兇燄豕突沿海七八千里壁壘相望也老謀宿將起家而推轂重臣懿

親擁節而臨戎虜以鳥翔蛇竄貪亂數千之眾橫行溟渤之表擇
利而食曾無門關之限中朝自一二武夫免胄喪元僅乃不辱其
他奔息唾涕望影驚風或乃交通談讌坐魍魎於堂皇揖猥獮於
壇坫公嘗謂事夷如父母其亦有所憤而然也廣州之盟未寒廈
門之師旋辱齧舌齧指剝膚擢筋少存顧畏義不出於此觀其忼
慨誓神從容遺命此豈匹夫賊獲激烈一時者哉而成敗之論引
繩排根成人之美固如是乎方之朝衣就市身首異門又爽然失
矣

右事略魯一同撰

師長治 王光宇等

道光二十二年二月庚子 諭裕奏請將殉節之知縣等分別
賜卹一摺湖北崇陽縣知縣師長治到任甫及百日倉卒遇難典
史王光宇及該縣師長治之妾吳氏姪女師氏同時自盡並被殺
之家人曹斌均堪矜憫應如何分別賜卹之處著該部查議具奏
尋 予師長治王光宇世職

右東華續錄王允謙編

按師公王公殉崇陽縣城
在道光二十一年十一月

國朝耆獻類徵初編卷三百七十四目錄

忠義四十四

朱貴 子昭南

黃泰 林懷玉等

徐宦 張化鵬等

陳芝蘭 魏啟明等

田錫 顧德等

邱法德 王保元

何海 毛玉貴等

英登佈 隆福等

張淮泗 馬成功

李廷貴 王榮等

馬致榮 朱朝貴

韋逢甲 顏履敬等

陳化成

韋印福

海齡

景星 愛新布等

祥雲 哈豐阿等

羅必魁 趙連璧等

李長善

干貴

張士秀

朱曰恭

繆志林 趙發元等

張奉明

國朝詩人集卷之三十一

馬興魁

蔡耀宗等

吳喜

尚清

花富

魏進宦

李廷揚

彭文志等

段丙南

萬鼎恩

陳佳保

劉炳南

鄧樹堃

陳洪興

毛三元

郭顯等

伊克坦布

國朝耆獻類徵初編卷三百七十四

通奉大夫前署江西巡撫江西布政使司布政使湘陰李桓輯

忠義四十四

朱貴子昭甫

朱貴甘肅河州人由武生入伍循化營嘉慶五年川陝楚三省邪
匪不靖隨經略大臣額勒登保出征秦州徽縣等處以功拔補榆
林右營額外外委六年隨四川總督勒保勦藍號股匪於盧家灣
擒賊渠冉學勝九年調補河州定羌汛額外外委十一年陝西新
兵滋事貴以檄往協助補河州鎮標右營經制外委十二年五月
青海野番滋擾檄赴軍營差遣六月隨總兵游棟雲截勦賊匪於

三札灘七月賊屯什葛干我軍由左面山梁抄上分路夾攻賊竄
甘壩乘勝尾擊之俘馘甚眾八月截擊於什尖里幹九月克沙卜
浪焚燬賊巢勦捕殆盡貴俱在事有功十七年拔補右營把總十
八年河南滑縣教匪李文成嘯聚蔓延道口隨河北鎮總兵楊芳
進勦奮力截殺受槍傷升右營千總十九年正月陝西三才峽廂
匪聚眾滋擾賊黨尤九陳四東竄商州貴隨河州鎮總兵馬元截
勦迭有斬獲道光二年四月青海賊番復出劫掠隨河州鎮總兵
多隆武由烏化圖進攻遇賊於博格洛貢殲賊百餘奪獲牛羊無
算仍跟蹤追躡及之烏蘭哈達大敗其眾事平敘功 賞戴藍翎
旋補涼州左營守備六年逆裔張格爾入卡倡亂調貴往回疆隨

同揚威將軍長齡勦辦七年三月敗之於沙布都爾回莊四月進兵阿瓦巴特克之閏五月張逆向拉克沙逃遁我兵偵蹤追至色勒庫爾有馬步賊數百人從溝內突出撲營搶占沙山貴領步隊從右抄截殲賊匪二百餘捷入 賞換花翎尋升峽口營都司八年逆酋張格爾成擒西陲底定 命以遊擊升用九年補玉泉營遊擊十年調左營遊擊十二年軍需報銷完竣經陝甘總督楊遇春保奏得 旨朱貴著以參將遇缺儘先卽補十五年補陝西西安城守營參將十八年署察漢托洛亥駐防副將二十一年授浙江金華協副將二十二年英夷內犯浙洋貴率領陝甘官兵禦賊於慈谿大寶山身先士卒奮勇直前力戰死之其子朱昭南同時

戰歿事 聞 諭曰浙江金華協副將朱貴身受三處槍傷臨陣
 戰歿其子武生朱昭南隨同打仗身受兩槍同時殉難實屬忠勇
 可嘉朱貴著照總兵例賜卹朱昭南著一併議卹仍著該將軍等
 查明朱貴見尙有子幾人及朱昭南有無子嗣之處卽行具奏候
 朕施恩奏入又 諭曰朱昭南隨同伊父朱貴同時陣亡忠勇可
 嘉茲據奕經等遵旨查明朱昭南之子朱綱年甫四歲見在原籍
 著俟及歲時由該原籍督撫送部帶領引見候朕施恩貴昭南均
 賜卹如例 賞騎都尉世職貴子廷瑞襲

右 國史館本傳 按朱公陣亡在是年二月

黃泰 林懷玉等

黃泰陝西榆林人以祖大勇任保甯堡把總勦捕陝西賊匪陣亡
得廢雲騎尉世職道光元年效力鎮標四年學習期滿五年兵部
帶領引 見得 旨以守備題補六年署鎮羌堡都司時逆回張
格爾滋事揚威將軍長齡督兵勦辦泰以經管驛站馳遞摺奏並
無貽誤下部議敘八年派領延綏各營官兵至葉爾羌換防九年
署葉爾羌左營守備十年八月署延綏鎮標中營守備隨辦事大
臣璧昌勦捕回莊賊匪九月擊賊於奎里鐵星木賊眾萬餘奮力
抵拒泰設伏敗賊斃二百餘擒三十人奏入 賞戴花翎十月賊
復糾眾撲葉爾羌城泰領兵迎勦身負槍傷追賊至北岸俘賊無

算捷入 命以守備儘先卽補十一年補甘肅永安堡守備十二年修建葉爾羌城垣兵房各工完竣經參贊大臣誠端保奏得旨以應升之缺儘先卽補十三年擢安遠營都司十六年卓異引見得 旨回任候升十八年升西甯鎮標左營遊擊二十一年署平羅營參將時英夷擾浙江內洋調赴軍營協剿二十二年禦賊於慈谿大寶山與漢中左營把總林懷玉同歿於陣事 聞均賜祭葬如例 賞雲騎尉世職泰子萬良襲懷玉世職未襲懷玉浙江江山人嘉慶十八年由陝西漢中營行伍隨總兵楊芳勦辦河南教匪十一月敗賊於輝縣白土岡十二月攻破司寨首逆李文成等自焚死事平敘功 賞戴藍翎並六品頂帶十九年復隨

楊芳赴陝勦三才峽廂匪賊走黃官嶺官軍邀擊獲賊目吳奇捷
入命以把總拔補尋補是職

右 國史館本傳

四庫全書

徐宦 張化鵬等

徐宦甘肅固原州人由行伍拔補陝甘固原提標外委嘉慶十八年河南教匪李文成等滋事據滑縣隨陝甘固原提督楊遇春勦賊攻克道口司寨等處師偪滑城令掘隧道於城東南隅實地雷其中地雷發城破賊殲焉事平以功拔補把總時陝之南山岐郿開廂匪竊發復隨遇春還陝協勦至秦州之白楊村大捷搜餘匪於黑河斜峪間均有斬獲二十五年調防哈密班滿回營道光六年隨陝甘固原提督楊芳馳至阿克蘇討逆回張格爾七年二月在洋阿爾巴特沙布都爾回莊阿瓦巴特莊等處屢戰有功 賞戴藍翎三月克復喀什噶爾張格爾遁賊目噶爾勒尙據和闐復

從楊芳馳勦行至毘拉滿擊賊擒噶爾勒復和闐城五月隨參贊大臣楊芳出卡躡賊後連戰及之於噶爾鐵蓋山賊勢蹙芳所部遂擒張格爾以獻經揚威將軍長齡列宦功奏入 諭以千總遇缺卽補 賞換花翎九年補甯夏鎮標左營千總歷署前營後營花馬池營守備十七年升陝甘督標右營守備旋署高台營都司十八年署隆海營守備二十一年英夷犯浙江內洋隨大軍協勦二十二年戰於慈谿之大寶山力戰陣亡事 聞 諭曰徐宦著照例賜卹以慰忠魂該部知道經部議遵定例 賜祭葬 賞雲騎尉世職同時死事者陝西靜甯協外委張化鵬化鵬秦州人寄籍靜甯由行伍出兵西甯口外拔補是職至是陣亡議卹如宦宦

孫霑襲化鵬子宏業襲

右 國史館本傳

陳芝蘭 魏啟明等

陳芝蘭甘肅皋蘭人道光六年由行伍隨固原提督楊芳征剿回疆逆裔張格爾十一月擊賊於柯爾坪七年三月賊竄渾河岸我兵用大礮轟擊斃賊無數四月敗賊於阿瓦巴特搜剿回莊餘匪斬獲淨盡芝蘭在事有功 賞戴藍翎九年拔補陝甘督標前營外委十三年升督標中營把總十五年五月遷甘肅涼州鎮標右營千總十九年升甘肅西甯鎮標右營守備二十年調陝西下馬關守備二十一年英夷犯浙江內洋隨大軍協剿二十二年禦賊於慈谿縣之大寶山力戰陣亡同時死事者又有西甯鎮標左營千總魏啟明右營把總盧炳事 聞均 賜卹如例 賞雲騎尉

世職芝蘭子作安尙未承襲啟明子芳襲炳子銘恭襲啟明甘肅西甯人道光六年由行伍隨固原提督楊芳至阿克蘇討逆回張格爾七年二月在沙布都爾回莊阿瓦巴特均累戰有功 賞戴藍翎十年四月授赤金營額外委時浩罕安集延夷匪糾眾圍喀什噶爾城啟明隨參贊大臣扎隆阿守城禦賊九月賊於城西徧掘阬陷潛入濠內啟明首先堵禦殺賊目數人賊復加築礮臺俯瞰城中啟明從暗門突出登臺殺賊指揮官兵力將礮臺拆毀城賴以全事平敘功 命以千總超補 賞換花翎十二年補甘肅提標前營千總十三年調補是職炳甘肅西甯人由行伍中式武舉十三年分發西甯鎮標前營效力期滿以千總用二十年補

前營把總尋調補是職

右 國史館本傳

田錫 顧德等

田錫甘肅固原州人由世襲雲騎尉效力提標道光六年逆回張格爾據喀什噶爾錫隨陝甘固原提督楊芳往剿敗賊於柯爾坪排子巴特七里河等處屢著戰績旋迎擊拔達克山賊匪斬獲甚眾七年十二月張格爾率眾潛入卡倫官軍偵知之追躡於喀爾鐵蓋山殲其從騎殆盡遂擒首逆錫以在事出力 賞戴藍翎凱旋引 見以守備候補署利橋營千總旋署督標千總十五年十月署秦州營千總以捐資修城垣得 旨議敘二十一年署靜甯協千總時英夷擾浙江定海隨大軍協剿二十二年禦賊於慈谿縣之大寶山與陝西馬藍營把總顧德涇州營經制外委馬龍圖

同時陣亡 賜卹如例均 賞雲騎尉世職錫子萬積襲德子永
珍襲龍圖子智襲德龍圖俱固原人德由行伍於嘉慶十八年隨
征河南教匪以戰功 賞戴藍翎二十二年補提標額外外委道
光二年補經制外委六年調赴喀什噶爾剿捕逆回屢經接仗出
力十年升補是職龍圖亦以行伍於嘉慶十八年隨征河南教匪
敘功 賞戴藍翎二十二年補利橋營額外外委道光六年調赴
喀什噶爾協剿逆回事竣回營九年補是職

右 國史館本傳

邱法德 王保元

邱法德甘肅皋蘭人道光二年由行伍隨西甯鎮總兵穆蘭岱剿捕西甯番賊六年逆裔張格爾在回疆滋事法德調赴軍營隨眾剿賊於洋阿爾巴特七年二月又剿賊於阿瓦巴特迭著戰績五月拔補陝甘督標後營額外外委十二月補洮岷協經制外委是月張逆潛入卡倫我兵偵知之追躡於喀爾鐵蓋山張逆就擒法德在事出力十年復赴喀什噶爾搜捕餘賊旋經凱撤十五年升督標左營把總二十一年英夷滋擾浙江內洋隨大兵赴剿二十二年禦賊於慈谿大寶山借隆德營經制外委王保元力戰陣亡事聞 賜卹如例均 賞雲騎尉世職法德子兆祥襲保元子

讀龔保元甘肅靜甯州人嘉慶六年三省教匪不靖由行伍出征四川陝西迭次殺賊十八年河南教匪占據輝縣山內司寨保元隨河北鎮總兵楊芳由淇縣大廟口迎頭截擊復伺賊於白土岡中賊至伏發保元奮力擒賊並奪獲器械無算身受矛石傷敘功賞戴藍翎道光二十年補隆德營額額外委二十一年補是職

右 國史館本傳

何海毛玉貴等

何海甘肅靜甯州人道光二年由行伍隨甘肅西甯鎮總兵勦青海野番擊賊於克克烏蘇殲擒三百餘名奪獲牛羊器械無算賊平敘功拔補靜甯營額額外委六年八月隨參贊大臣楊遇春赴回疆勦逆裔張格爾在七里河等處打仗奮勇隨大兵克復喀什噶爾英吉沙爾葉爾羌三城七年三月隨陝甘固原提督楊芳復和闐城又在昆拉滿協擒賊目噶爾勒十二月張逆率眾潛入卡倫官軍偵知追躡於喀爾鐵蓋山殲其從騎殆盡遂擒首逆海以在事出力 賞戴藍翎二十一年英夷犯浙江定海隨大軍赴討二十二年禦賊於慈谿縣之大寶山與本營額額外委毛玉貴同

歿於陣事 聞均 賜祭葬如例 賞雲騎尉世職海子文蔚襲
玉貴子步雲襲玉貴靜甯州人道光二年由行伍出兵西甯剿賊
於克克烏蘇一帶迭有斬獲六年隨征逆回在洋阿爾巴特沙布
都爾回莊殺賊甚多又擊賊於渾河屢著戰績大兵克復喀什噶
爾城玉貴隨眾圍攻擒賊阿布都拉等敘功 賞戴藍翎七年四
月隨提督楊芳出卡追捕張逆遇各城擊散零匪殲斃二千餘名
十二月張逆就擒錄玉貴協勦功以額外外委拔補十年補是職

右 國史館本傳

英登佈 隆福等

英登佈香達禪氏滿洲正黃旗人京口駐防道光十一年由領催補乍浦左營驍騎校十四年升防禦十七年升佐領二十一年委署前鋒翼領二十二年英夷寇浙江犯乍浦副都統長喜禦之於西山嘴礮臺英登佈率眾堵截與防禦貴順額特赫委署前鋒校佛印等力竭死之賊勢益張同時佐領隆福驍騎校伊勒哈奮駐天尊廟驍騎校根順駐軍工廠皆以格鬪歿於陣賊遂攻乍浦城北門陷驍騎校該杭阿亦歿事 聞均 賜卹如例 賞雲騎尉世職英登佈子榮坤襲隆福子德克津額襲貴順子增鏘襲額特赫子德克德克襲伊勒哈奮子仁厚襲根順子經貴襲該杭阿子

魁德襲佛印子勒爾經圖襲隆福許和爾氏滿洲正藍旗人嘉慶二十四年武舉道光七年挑取領催十八年升防禦二十年升是職貴順托柯魯氏滿洲正白旗人道光十八年由右營驍騎校升是職額特赫圖克基孛氏蒙古正藍旗人道光二十年由左營驍騎校升是職伊勒哈奮伊爾根覺羅氏滿洲鑲藍旗人道光十九年由委署前鋒校升是職根順伊喇哩氏滿洲鑲紅旗人道光二十一年由領催升是職該杭阿噶努氏滿洲正白旗人道光十五年由領催升是職佛印杭依特氏蒙古鑲白旗人道光七年由領催委署是職

右 國史館本傳

張淮泗 馬成功

張淮泗甘肅皋蘭人嘉慶十八年由行伍隨固原提督楊遇春剿捕河南教匪歷戰有功十九年復隨遇春赴陝西隴州剿賊遇賊於柏陽嶺大敗之道光六年回部逆裔張格爾潛入卡內滋擾地方淮泗調赴軍營隨從進剿時賊眾盤踞柯爾坪官兵會合夾攻淮泗奮勇爭先斬獲甚夥七年二月進攻沙布都爾回莊斃賊無算復隨大兵進剿至阿瓦巴特等處與賊接仗迭有斬擒以功賞戴藍翎四月進至渾河賊匪憑河列陣以拒官兵併力衝突槍礮齊施鏖戰兩晝夜克復喀什噶爾淮泗奮力剿殺生擒賊目二人連刃二十餘賊並奪獲旗幟器械無算敘功列超等迭邀 賞

賚尋補西甯鎮標右營經制外委十年三月署冰溝堡把總十月
復赴喀什噶爾搜捕餘賊旋經凱撤十一年升涼州鎮標前營把
總十二年署督標左營千總十三年署涼州鎮標前營千總十六
年升蔡旗堡千總二十一年署涼州鎮標前營守備值英夷犯浙
江逆船駛入內洋淮泗隨大軍赴剿二十二年禦逆夷於乍浦偕
土門堡額外外委馬成功奮力衝擊同時戰歿事 聞均 賜卹
如例並 賞雲騎尉世職襲次完時以恩騎尉世襲罔替淮泗子
延齡襲成功世職未襲

右 國史館本傳

李廷貴 王榮等

李廷貴甘肅固原州人道光六年由行伍拔補涼州鎮永昌營額
外外委時逆裔張格爾滋擾回疆陷西四城陝甘總督楊遇春奉
命赴阿克蘇勦辦廷貴隨征張逆遣賊目伊喃等掘柯爾坪以抗
阻我師廷貴隨大兵攻克之七年隨遇春勦賊於洋阿爾巴特又
追賊於排子巴特又擊賊於阿瓦巴特屢戰皆捷遂克喀什噶爾
並擒獲張格爾之兄子薩木汗及從逆伯克阿布都坦扎薩克敦
布敘功 賞戴藍翎尋補提標後營經制外委九年升中營把總
二十一年升固原城守營左哨千總值英夷滋事竄入內洋擾及
浙江各海口廷貴奉檄赴軍營隨漢中鎮總兵德坤馳往乍浦防

堵二十二年英夷犯乍浦廷貴率兵禦之奮勇衝擊力竭歿於陣
永昌協新城營把總王榮莊浪營把總孫登霄與廷貴同時俱力
戰陣亡事 聞均 賜卹如例 賞雲騎尉世職廷貴子暄襲榮
子茂華襲登霄子廷莢襲榮甘肅皋蘭人道光元年投效督標二
年二月補中營馬兵三月赴陝甘總督長齡赴西甯剿野番追賊
於碩敦納木山殲斃賊匪三百餘名六年隨總督楊遇春攻剿回
疆張格爾在洋阿爾巴特等處殲賊出力 賞戴藍翎九年補肅
州鎮清水營額外外委十年補督標前營經制外委時張逆餘黨不
靖檄調官兵榮仍隨征登霄甘肅皋蘭人由行伍於道光四年補
督標後營額外外委五年補提標前營經制外委六年隨固原提

督齊慎赴阿克蘇征勦逆回八年調莊浪營外委二十一年升是
職

右 國史館本傳

三十一日

三

馬致榮 朱朝貴

馬致榮甘肅玉門人道光六年西陲逆裔張格爾糾眾入卡滋擾致榮由行伍派赴喀什噶爾隨固原提督楊芳進剿遇賊於柯爾坪俘馘甚眾七年二月追躡賊匪於洋阿爾巴特官兵分路進剿殲賊目邁曼底愛擒獲賊黨無算三月由沙布都爾回莊進攻阿瓦巴特中隔七里河回莊鱗列賊燄甚熾致榮奮勇同眾渡河克復喀什噶爾城擒獲賊目託哩和卓等殲賊數百人十二月進攻伊斯里克及之於鐵蓋山逆酋張格爾就擒殺賊五百餘人八年揚威將軍大學士長齡上其功 賞戴藍翎十年補甘肅肅州鎮鹽池堡額外外委隨甘肅提督胡超出征阿克蘇由木蘇里克薩

漢莊一帶搜捕餘匪迭有斬獲拔補提標前營額外外委二十年
升前營把總二十二年英夷犯浙洋檄赴乍浦海口堵禦賊勢鴟
張致榮奮力轉戰歿於陣署西安營外委藍翎馬兵朱朝貴亦同
時戰歿事 聞均 賜卹如例 賞雲騎尉世職致榮子振威襲
朝貴子玉襲朝貴陝西長安人道光十二年由行伍隨兩湖總督
盧坤剿辦逆裔趙金龍進兵羊泉鎮合力兜剿焚燬賊巢擒其渠
餘黨悉就殲除凱撤敘功 賞戴藍翎十九年署本職

右 國史館本傳

韋逢甲 顏履敬等

韋逢甲山東齊河人道光十六年進士以知縣用分發浙江歷署
宣平餘杭浦江等縣知縣二十年英夷犯浙江據定海擾及沿海
各州縣二十一年正月逢甲調赴鎮海督鑄大礮九月赴乍浦團
練鄉勇十一月署乍浦同知辦理支應局務雇募商船並驗收各
路募船以備堵剿十二月逆夷擾乍浦洋面二十二年逆夷陷乍
浦逢甲率鄉勇禦於西行汛死之先是賊窺慈谿卽用知縣顏履
敬以辦糧臺赴軍營遇賊於大寶山歿於陣賊犯定海總兵張朝
發懷諫撤守署知縣姚懷祥與典史全福分募鄉勇爲死守計朝
發敗賊大至礮圮南門懷祥帶傷仗劍立城上呼召兵勇無應者

乃投城外成仁塘死全福亦死賊據定海延擾鎮海縣丞李向陽
自經死事 聞均 賜卹如例 賞雲騎尉世職逢甲子預襲履
敬無子嗣子學優襲懷祥子廷璋襲向陽子章襲福子毓英襲履
敬甘肅皋蘭人道光二十年進士浙江卽用知縣懷祥福建侯官
人嘉慶二十三年舉人道光十五年大挑一等浙江試用知縣歷
署象山龍游嵯縣定海等縣知縣向陽雲南趙州人捐納縣丞道
光二十一年選補是職福甘肅武威人由涼州後營字識換防英
吉沙爾道光十年安集延流寓逆回滋事以隨同官兵守城出力
給六品頂帶嗣以修理城垣勞績議敘未入流十七年選是職

右 國史館本傳

道光二十二年夏四月英吉利將寇吳淞先以戈船三十艘進攻乍浦爲都統駐防之城並調各兵助守輪船一至發礮數聲屯卒八千同時解甲同知韋逢甲千總韓大榮死之滿營被難尤慘

右筆記黃鈞宰撰

同治十三年五月二十三日

天

陳化成

嘉慶道光間名將最盛者稱楊忠武羅壯勇皆蜀人水師則李忠毅王果毅皆閩人也忠武壯勇忠毅三公余未及見惟交果毅二十年其義勇能軍洵有過人者其後則爲陳烈愨公名化成福建金門人少從忠毅果毅歷戰功洵至臺灣水師副將馭軍有紀律約己尤嚴時稱廉將及鎮金門益勵其麾下余聞久矣道光十八年余過廈門公方提督水師亦素重余延飲劇談公時已近七十年言軍事慷慨激發踰於壯夫及至臺壘人皆頌公巡閱臺灣時文武供應餽遺一無所受隨行將卒雖眾所過如未嘗有兵者其約己律下之嚴如此故賞罰無閒言焉臺灣歲運軍穀十萬給水師

諸營自蔡逆不靖商艘日少穀常絀運每至三四年則奏委文武
雇運費鉅而時有風濤之失道光四年余爲臺府上議請積穀改
給折色以疏新穀趙文恪下其議眾皆便之而水提某有所覬沮
之及十六年公巡臺眾舉以請公曰此兵商兩便之計也令如議
行一無所私二十年粵中夷警游奕閩洋公自出擊之足受礮傷
猶鼓勇督師進夷舟遁旋調江南江南水師素怯非閩比也公選
閩中親軍往教練之始皆奮力海防嚴密夷聞而畏之二十二年
甯波失守夷破乍浦數窺吳淞不敢入潛購奸民焚公火藥公怒
方擒斬之而夷舟數進公數拒卻之夷榜徨海上將退總督聞公
卻夷師喜自出督戰與公分守海口甯登山夷舟突進飛礮及山

總督失色退走諸軍皆潰夷乘勢大進公親軍不及百人手自燃礮擊賊猶破一舟賊連飛大礮中公傷而歿事聞上震悼焉贈卹如典諡烈愍

論曰公始爲偏裨素有戰功而獨以廉著蓋武人所尤難也觀其馭軍紀律森然庶幾臨淮之風矣老猶勇邁雖跋扈之夷亦憚焉乃卒敗於懦帥致以身殉惜哉

右小傳姚瑩撰

按陳公陣亡在是年五月公子廷芳襲世職廷棻賜文舉人

道光二十二年春傳言浙軍議和有成約英吉利將就撫廣東獨江南提督陳公化成駐守吳淞謂夷情反覆未可深恃請留所部兵弗去增築海口礮臺當冬雪方盛時平地積數尺公乘小舟出

入風濤中或踴雪按行部曲嫗姁如家人軍中呼爲陳佛故人樂
爲用守禦特嚴云是時蒙古吉林及京師火器健銳營兵由揚威
將軍帥領南來者命翼長等統之分布江浙資策應而將軍駐節
蘇州往來於杭紹之間營帳中器皿珍羞窮極瑰異又幕客知州
鄂君者濫支軍餉費用無度以博將軍歡會天寒風雪簾幕壁衣
之屬皆以貂狐洋鼠爲之圍鑪擁酒侑以管絃論者謂有緩帶輕
裘雅歌投壺之意時夷人要求不已參佐或請進兵將軍酒半啟
帷探望曰寒哉氣也

吳淞以東西礮臺爲犄角某將守東臺而提督陳公化成扼其西
夷船將至公執紅旗登臺麾戰戒左右海洋飄忽火器毋浪發度

敵船稍近擊之則發無不中且以靜待動勞逸迥殊勿爲所震自
亂則敗矣撫參將周世榮背語之曰吾與若福皆不薄世榮不解
公曰戰勝膺上賞卽不勝得名非福而何已而夷人據船檣繫
礮而上乘風鼓浪頃刻至前公遽命礮擊敵船銃礮連發雷轟電
掣聲震百餘里煙燄蔽空自卯及巳擊毀夷人大艦一小輪船五
賊沮欲退我軍譟而奮方事之殷東臺將士稍卻公聞之遣將馳
斬先退者一人以徇於眾親帥世榮等憑高瞭望指揮弁兵銃礮
子錯落如雨簌簌從冠側過公行所無事屹立不少動夷眾疑其
非人及偵知公相與大驚是時牛制軍鑑駐節寶山聞勝趨出將
及西臺夷人以遠鏡窺見其燾駕巨礮狙擊之制軍跳而免督標

兵遽呼曰制軍傷矣師遂潰斬之弗能止東臺兵亦棄臺走賊併力攻公急世榮曰事不可爲矣請公速行公拔劍叱之曰庸奴誤識汝世榮徑去親兵存者數十人賊登岸礮中公顛復強起手獲巨銃創重歎血死夷人旣入寶山犒飲鎮海樓酒酣或作華言曰此行良險使有兩陳公在安能至此其一蓋謂廣東九江協副將連陞也

右筆記黃鈞宰撰

韋印福

韋印福江蘇上元人嘉慶十八年九月由行伍隨參將馬濟勝征
剿河南滑匪十月抵山東曹縣獲首逆一名及匪徒多名又於劉
家樓接仗燬其寨賊眾殲焉並搜獲賊目三名旋以曹縣一帶搜
捕事竣移營河南舊考城大寨集尋復駐石家樓防守十二月凱
撤回營十九年八月拏獲造播逆詞首犯嚴士龍經兩江總督百
齡賞給外委頂帶九月拔補左營外委道光元年署督標右營把
總三年補中營把總六年調左營把總七年升右營千總歷次考
驗均得獎賞十二年署中軍守備兩江總督陶澍以印福騎射優
嫻辦事勤能保奏得旨送部引見十三年七月署江甯城守右

營守備十二月補提標中營守備十六年署後營遊擊十八年署
金山營遊擊二十年英夷不靖攻犯舟山調赴吳松海口防堵二
十二年逆夷竄入江境印福隨提督陳化成添設礮位嚴密防剿
夷船乘風駛入陳化成率弁兵在塘岸力戰受礮傷印福救護不
及俱歿於陣事 聞 賜卹如例 賞雲騎尉世職子長貴襲

右 國史館本傳

陳公化成之薨也麾下弁兵從殉者八十人守備韋印福龔增齡
千總錢金玉把總許攀桂外委許林徐太華爲最著印福於嘉慶
中獲盜方榮升又屢擒紅鬍教匪擢官每曰武官臨陣斯爲奉職
死生固度外事若畏死不作武官矣金玉臨危或勸避去答曰我

年十六卽食國饑今焉避害遂及於難太華多力陳公守西臺時
倣斃夷兵多名皆太華手擊之也左右轉移無不如志當東臺卻
走時眾志搖動陳公益拊循之以忠義相激勸攀桂大言曰主將
與某等共飲食同風露所爭祇此一時公受 國恩某等受公恩
欲去者眾其誅之由是士心始固公卒旣潰攀桂不行飲劍而死
安徽武進士劉國標者初任兵部差官因事落職書制軍奏復其
官至是獨負公尸匿蘆葦中越十二日斂於嘉定面如生背膂及
胸受銃礮創者八百姓罷市哭奠繪像二一貽其子一畱吳淞公
之在臺也凡三閱寒暑欽使裕謙公嘗以風雨夜偵公見公危坐
帳中鈴柝聲琅琅也先事語制軍曰公第坐鎮毋輕出入及出

而債事而制軍去之蘇州再去之江甯

右筆記黃鈞宰撰

海齡

英夷既破上海由黃浦入泖澱窺伺蘇州慮淺隘道梗而返時總兵尤渤營於大漲涇夷船不敢深入內河松江幸無恙乃別由福山口入犯鎮江圖山守兵新鑄萬八千斤礮發之聲震江南北然夷船游奕而過不備亦不懼事後詢之士人則我兵以無彈之礮無子之銃虛張聲勢相率而逃矣夷人初到之地恃其財利蠱惑窮民至以洋錢一枚市胡椒數粒鄉僻百姓願效奔走者所在有之某寺僧密白於夷曰城北依山爲垣故有塞門其虛可搆也夷登金山覘之礮發而城破淫掠搜括埒於甯波京口副都統海齡與妻孫同時殉節驍騎校祥雲投水死其父馬甲長松先一日登

陣斃於礮妻鄔琅罕濟勒們氏懼遭污辱掩面以利刃刺殺二女
然後自戕時六月十九日也鎮江故殷富西關外爲一郡精華所
萃夷梳之兵勇篋之土寇又薙之富民遷徙者背負肩擔悉被劫
掠江甯常州聞警皆震已而潰兵跳集於蘇勢洶洶且內訌時李
公星沅官蘇藩請於中丞斬剽劫者以徇人心少安

右筆記黃鈞宰撰

景星 愛新布等

景星齊默特氏蒙古正藍旗人京口駐防嘉慶二十一年考取筆帖式二十二年補九品筆帖式道光二年升鑲黃旗蒙古驍騎校八年保舉引 見奉 旨記名以守備用九年升正白旗蒙古防禦十三年升鑲黃旗蒙古佐領二十二年逆夷英吉利由海沂江犯鎮江府景星率兵守北門力戰死是時守鎮江城西門者爲正黃旗蒙古佐領愛新布鑲紅旗蒙古佐領恆明正黃旗蒙古防禦恆山正紅旗蒙古防禦委署前鋒章京尙德正紅旗蒙古防禦福正紅旗蒙古驍騎尉吉成守東門者爲正藍旗蒙古驍騎校伊克濟訥候補七品京官文舉人噶喇鑲黃旗蒙古九品筆帖式恩

喜委署前鋒校文魁阿勒金圖喜興賊至慶戰愛新布尙德恆福
吉成伊克濟訥噶拉恩喜文魁阿勒金圖喜興等死之恆明恆山
被創甚踰月卒事 聞景星等議卹有差均 賞雪騎尉世職景
星子春明襲愛新布子白山襲恆明子崑山襲恆山子應魁襲尙
德子積昌襲恆福子廣泰襲吉成子春華襲伊克濟訥子魁志襲
噶喇子善運襲恩喜弟雙喜襲文魁子容安襲阿勒金圖子壽齡
襲喜興子尼克坦襲愛新布德木楚克氏蒙古正紅旗人京口駐
防道光八年由前鋒升正紅旗蒙古驍騎校十二年升鑲藍旗蒙
古防禦十七年升授是職恆明哈濟納克氏蒙古口黃旗人京口
駐防道光三年由前鋒委署前鋒校八年升驍騎校十二年升防

樂十七年升授是職恆山德木楚克氏蒙古正紅旗人京口駐防
道光十三年由領催升正黃旗蒙古驍騎校十七年升授是職恆
山德木楚克氏蒙古正紅旗人京口駐防道光十三年由領催升
正黃旗蒙古驍騎校十七年升授是職尙德穆特爾氏蒙古鑲紅
旗人京口駐防道光十二年由前鋒升正紅旗蒙古驍騎校十四
年升防禦二十年委署是職恆福卓特氏蒙古正紅旗人京口駐
防道光十五年由前鋒升鑲紅旗蒙古驍騎校二十年升授是職
吉成卓特氏蒙古鑲藍旗人京口駐防道光十四年由前鋒升授
是職伊克濟訥哈爾努特氏蒙古正白旗人京口駐防道光十二
年由領催升授是職噶喇鄂克多羅爾氏蒙古鑲白旗人京口駐

防由文生中嘉慶二十四年舉人道光十五年大挑二等以七品
京官用恩喜巴爾特氏蒙古鑲黃旗人京口駐防道光十年考取
筆帖式二十一年補授是職文魁馬佳氏滿洲鑲黃旗人道光十
八年由前鋒咨署是職阿勒金圖薩克達氏滿洲鑲藍旗人道光
元年由前鋒咨署是職喜興韓楚瑄氏滿洲正紅旗人道光二十
一年由前鋒咨署是職文魁阿勒金圖喜興皆青州駐防二十二
年調赴京口帶兵防堵

右 國史館本傳

祥雲 哈豐阿等

祥雲翁鈕特氏蒙古鑲白旗人京口駐防由武生考取筆帖式尋充披甲拔前鋒道光二十一年授蒙古正白旗驍騎校二十二年六月英夷犯鎮江城陷京口副都統海齡殉難祥雲奉副都統印投井中遂赴水死欽差大臣耆英奏入 諭曰據奏驍騎校祥雲投水殊堪憫惻著耆英於查明確實後咨部加等賜卹並著於該副都統祠內一併附祀九月耆英查明具奏 諭曰驍騎校祥雲先將副都統印信投入井中旋亦投水自盡其父馬甲長松業已陣亡其妻鄔琅罕濟勒們氏慮遭污辱先將二女刺死復自戕盡節伊母卜氏懷抱伊幼子廷耀投塘遇救不知下落等情闔門殉

難忠節兼全可嘉可憫祥雲前已有旨附祀海齡祠內伊父馬甲
長松除歸入陣亡兵丁案內照例賜卹外並著將祥雲妻子一併
附祀以慰忠貞其母卜氏其子廷耀仍著耆英等確切訪查務得
實在下落毋任流離失所兵部遵 旨加等照防禦陣亡例議卹
給雲騎尉世職旋據訪得卜氏所在廷耀先已病死卜氏呈請以
祥雲從兄故馬甲格圖青額之次子閒散安慧爲嗣咨送京旗引
見並准其承襲當鎮江城陷時隨海齡接戰陣亡之候補筆帖式
哈豐阿在北門拒戰陣亡之武舉哈達海委署前鋒校松寶經書
英奎明員奏均 賜卹如例 賞雲騎尉世職哈豐阿子廷秀襲
哈達海子彭年襲松寶子春祥襲哈豐阿綽多木氏蒙古鑲黃旗

人京口駐防由閒散考取筆帖式充披甲道光十七年補領催哈
達海扎嚕特氏蒙古鑲黃旗人京口駐防由閒散充披甲拔前鋒
嘉慶二十四年江南鄉試中式武舉松寶巴嚕特氏蒙古正白旗
人京口駐防由閒散充披甲拔前鋒道光六年委署是職

右 國史館本傳

國朝書目類編初編

卷三十四

三

羅必魁 趙連璧等

羅必魁福建閩縣人由撫標外委歷升守備道光十二年十月臺
灣匪徒張丙等滋事派赴軍營調遣十二月提督馬濟勝檄往南
路剿賊屢敗賊眾尋擊傷賊目柯姓奪獲馬匹礮位火藥器械無
算賊大潰南北道路以通十三年回任十九年升江西南贛鎮標
後營都司二十年署建昌營遊擊二十一年英夷犯浙江內洋必
魁奉檄赴浙防堵二十二年英夷由海沂江犯江蘇鎮江府城必
魁由浙赴援在鎮江西門外與賊接仗身受重傷旋卒同日湖北
提標前營左哨把總趙連璧禦賊於丹徒縣屬桃花山亦以礮傷
卒連璧湖北穀城人以七品廕監生入提標前營學習畱營以把

總候補旋補左哨把總道光二十一年崇陽逆匪鍾人傑據城戕官隨提督劉允孝馳赴咸甯防堵事平 賞換六品頂帶儘先升用二十二年復隨劉允孝赴鎮江剿夷陣亡先是逆夷率眾窺上海縣五月陷之入北門典史楊慶恩出小東門召閩勇入援既至則城閉矣是晚投城外黃浦江死慶恩浙江山陰人由監生捐未入流二十年補是職事 聞均 賜卹如例 賞雲騎尉世職必魁子紹勳襲連璧子士紳襲慶恩嗣子佳英襲

右 國史館本傳

楊慶恩

上海城東臨黃浦北枕吳淞西北接壤寶山爲海疆要地 朝廷

慎重邊防以縣令微員不足資控馭故蘇松太道駐劄上海鎮之
英夷由寶山進至上海巡道託言晉省請兵扁舟預遁優游於峯
泖之間縣令曰道且不守我何能爲亦棄城去典史楊慶恩畱之
不可頓足歎曰大事去矣呼渡船棹至中流探百錢于舟子躍入
黃浦死松江武生頗永剛少隸兵籍分汛上海能詩以氣節自負
妻瞿氏明敏有才識上海城破夫婦以帶自縛投於泮池見者拯
之頗死妻甦乘間歸松江卒以不食死海疆城池失守未有如滬
上之易者也曹部一空而兵士無責已相傳吳淞被陷之前有游
魚千萬浮於黃浦西入泖澱又戰前數日有巨鼉長蛇出於礮臺
外東西分隊而行時以爲避災徙去蓋事後一二日海水猶熱當

時焚灼可知保身之明魚鼈有焉斯楊公頗生瞿氏之所以異也

右筆記黃鈞宰撰

李長善

李長善湖北穀城人由行伍於道光十二年隨湖南提督羅思舉
勦捕逆獠趙金龍三月敗賊於李家院四月攻羊泉燬賊巢殲斃
賊匪三千餘人首逆趙金龍自焚死擒其子趙幅金等長善均在
事出力給八品頂帶五月搜捕餘黨悉數殲除凱撤回營十三年
拔補提標前營額外外委十四年補前營外委十五年升提標右
營把總十七年升左營千總二十年羅思舉以提標所轄錢家岡
汛毗連豫省潞私由豫入楚該汛路路可通緝捕最爲緊要調長
善補錢家岡汛千總是年總督周天爵巡閱營伍奏獎以守備用
二十一年派赴浙江堵勦英夷未抵浙復調赴粵協勦二十二年

五月撤回八月河南泌陽縣擒匪鄧韓玉等糾眾滋事竄入錢家岡汛長善聞信卽帶汛兵勦捕斃匪二人追至泌陽縣交界之竹園地方匪徒負嵎抗拒長善指揮兵勇四面攻圍突被賊匪槍傷歿於陣事 聞得 旨從優議卹尋 賜卹如守備例 賞雲騎尉世職長善無子以其弟元善襲

右 國史館本傳

干貴

干貴甘肅隆德人寄籍通渭嘉慶四年川陝楚三省教匪滋事貴由鄉勇投效軍營八年入伍靜甯協於十八年九月隨欽差大臣那彥成勦捕河南逆匪十一月敗賊於輝縣白土岡進攻司寨大破之逆首李文成自焚死貴奮勇殺賊首負石傷得 旨給六品頂帶並賞戴藍翎十二月大兵恢復滑縣貴爭先登城殺賊無算迭受矛石傷十九年拔補隆德營額外外委二十年補靜甯協馬營監營經制外委道光二年赴西甯口外協勦野番五年升把總六年調赴回疆軍營在洋阿爾巴特等處接仗身負重傷七年升干總十六年升涼州鎮土門堡守備二十四年總督富呢揚阿檄

赴上方寨防堵番賊有涼州鎮屬營馬在青木溝牧放突遇番賊二百人劫掠馬匹而遁貴聞信飭卡兵分投追捕並自帶兵六十人躡賊行至雙圈灣賊見官兵較少乃據險抗拒貴奮力直前忽遇賊伏短刀接戰身受數十創力竭陣亡事 聞 諭曰甘肅土門堡守備干貴追賊被戕應得卹賞世職著照例辦理尋 賜卹如例 賞雲騎尉世職子大臣襲

右 國史館本傳

張士秀

張士秀甘肅西甯人由行伍迭次派往青海緝捕番賊於道光二年補大通營額外外委十五年遷提標右營經制外委二十一年擢巴暖三川營把總二十三年西甯野番經官兵於上年捕逐出卡仍潛匿近柯柯烏蘇等處往來滋擾四月士秀隨總兵徐華清督隊行抵柯柯烏蘇偵知賊眾所踞黑底俄博地方懸崖陡壁惟折由河沿乃得進徐華清佯令軍中備皮筏明日渡河先於是夜四更簡精銳兵丁四百名取道河沿直搗賊巢賊番始猶恃險抗拒我兵撲近山梁賊乃紛紛逃竄追各路兵集奮力合追悉殲之惟時柯柯烏蘇山腦尙有賊番數百人盤踞五月徐華清率張士

秀等由東南石峽兼程前進賊據山梁以待自辰至午相持良久我兵勇氣百倍直衝而上賊不能支乃大潰殲賊二百餘人餘皆墮崖而斃奪獲牛馬器械無數士秀屢次在事有功奏入 賞戴藍翎尋署鎮標前營千總二十五年署西甯鎮總兵慶和於夏季出卡會哨距察漢俄博三十餘里突有野番抗拒慶和率士秀等奮擊賊眾四面合圍我兵寡不敵眾士秀隨慶和同歿於陣奏入諭曰慶和在金羊嶺打仗被圍張士秀竭力救護扎斃數賊因勢孤俱被戕害可嘉可憫著照千總例議卹尋 賜祭葬 賞雲騎尉世職子鵬襲

右 國史館本傳

朱曰恭

朱曰恭雲南昆明人由行伍洊擢武定營千總嘉慶二十二年以雲貴總督伯麟檄隨維西協副將李國棟等勦辦臨安江外夷匪身先陷陣殲賊甚夥並於觀音山擒獲首逆高羅衣等二十三年於打雀山擒獲首逆高五事平敘功列頭等道光元年以總督慶保檄復隨臨沅鎮總兵李國棟等勦辦大姚一路夷匪攻克拉古賊巢並於鴿子山搜獲首逆陳添培功列超等七年升騰越鎮標右營守備十二年護送南掌貢象十三年委辦思茅邊務俱紀勞績十四年總督阮元等以曰恭巡歷瘴鄉軍威嚴整曉諭詳明奏請以都司升補 允之十八年補龍陵協中軍都司二十四年檄

辦騰越南甸逆匪刀承緒案二十五年二月升貴州普安營遊擊尋署雲南騰越鎮標中軍遊擊時永昌府保山縣猛庭寨回匪滋事曰恭以提督張必祿檄帶兵五百名赴羊邑堵剿七月以丙麻地方軍營被匪衝陷其地距永昌府城僅六十里守兵甚單曰恭由羊邑回城協守九月夷匪撲金雞村軍營曰恭率兵出城援應被匪槍傷左目猶能手刃之旋以奮勇迎擊力竭歿於陣總督賀長齡奏聞諭曰遊擊朱曰恭首先迎敵奮勇捐軀可嘉可憫著照副將例賜卹尋賜祭葬賞雲騎尉世職襲次完時以恩騎尉世襲罔替子楷襲

右 國史館本傳

繆志林 趙發元等

繆志林雲南昆明人嘉慶二十三年由行伍隨征臨安賊匪在芭蕉嶺龍岔河等處迭有斬獲二十五年拔補撫標右營額外外委道光二年授外委尋調督標右營外委十一年遷中營右哨二司把總十七年升右營千總二十二年雲貴總督桂良以志林緝捕出力保舉以守備升用二十三年閏七月護送緬甸貢使入京十二月引見奉旨回任候升二十四年署龍陵協右營守備二十五年正月補順雲營右軍守備十一月署龍陵協中軍都司二十六年二月永昌回匪滋事志林赴軍營協勦三月攻賊於官坡進至長灣力戰陣亡同時署鶴麗鎮標中營守備趙發元勦賊於

飛石口永昌協左營千總趙得和勦賊於大力哨俱力戰陣亡十
二月署騰越鎮標中營千總廣西營外委陸春在象山菜園等處
勦賊永昌協右營千總毛文元在鐵茄山等處勦賊俱受礮傷陣
亡先後事 聞均 賜卹如例 賞雲騎尉世職襲次完時以恩
騎尉世襲罔替志林子承勳襲發元子生員以文襲得和子佑忠
襲文元子飛鵬襲春子安邦襲發元趙州人嘉慶十五年武舉效
力提標道光三年補鶴麗鎮標中營把總二十五年署中營守備
得和太和人道光十七年由行伍拔補提標右營額外外委十八
年授左營外委二十一年升中營把總二十五年正月檄赴雲龍
州堵截猓匪八月赴永昌軍營九月帶領練兵在金雞村禦賊殲

斃多名並奪獲旗幟敘功拔補是職文元維西廳人父齡維西協外委以勦捕獠匪受傷病歿照三等軍功例廕八品監生嘉慶十八年文元以廕生入行伍學習二十五年期滿補維西協右營外委道光十三年署左營左哨二司把總十八年補鶴麗鎮標左營右哨頭司把總二十六年二月隨征永昌逆匪追賊於牛角關奪獲器械無算尋攻克大力山梁進剿烏鴉河施放槍礮斃賊多名經雲南提督張必祿以打仗奮勇委署中營千總五月進攻猛庭寨燬賊巢旋凱撤九月擢賓州汛千總十月調補永昌協右營千總尋署騰越鎮標中營千總復赴永昌軍營協勦回匪擊賊於觀音閣河壩等處迭著勞績春開化人道光二十六年三月由行伍

隨開化鎮總兵李能臣勦辦永昌逆匪以打仗出力拔補廣西營外委二十七年調署騰越鎮標中營千總

右 國史館本傳

張奉明

張奉明甘肅河州人嘉慶十一年由行伍檄赴甯陝軍營勦捕番賊十八年九月河南教匪李文成煽亂據滑縣城陝甘總督那彥成調河州兵五百名赴勦賊時分屯道口我兵三路進攻奉明奮勇殺賊左臂兩被矛傷猶復裹創前進追賊至輝縣之柏林橋又追至白土岡司寨等處殲獲甚眾十二月克復滑城敘功列超等賞戴藍翎十九年拔補河州城守營額外外委二十三年升階州營把總道光三年升河州鎮標右營千總六年回疆逆裔張格爾滋事經陝甘總督楊遇春檄赴軍營由洋阿爾巴特進剿多有斬獲七年二月分擊沙布都爾回莊阿瓦巴特諸賊克之大兵進逼

渾河沿賊據南岸相持復分遣弁兵潛赴上游躡渡擊之賊潰十
二月擒張逆於喀爾鐵蓋山奉明均在事有功經揚威將軍長齡
保奏得旨准以守備遇缺升用十四年升涼州鎮西把截堡守
備十五年調南古城營守備十八年升陝西鎮羌營都司十九年
調察漢俄博營都司二十一年檄赴浙江會剿英夷以甯波鎮海
兩次戰功奏入賞換花翎二十二年升補甘肅西甯鎮標左營
遊擊二十六年五月署洮岷協副將閏五月巡化廳卡外黑錯寺
番賊不靖奉明帶兵剿捕遇賊於果岔地方奮力鏖戰額被槍傷
昇回旋卒事聞諭曰張奉明奮勇爭先以致頭額被槍殞命
臨陣捐軀殊堪憫惻著加恩照副將陣亡例賜卹尋賜祭葬

賞雲騎尉世職襲次完時以恩騎尉世襲罔替子秀襲

右 國史館本傳

馬興魁 蔡耀宗等

馬興魁甘肅張掖人嘉慶九年武舉十一年效力提標二十四年
補黑城堡把總道光三年調馬營墩營把總八年赴喀什噶爾換
防十年喀什噶爾逆回滋事興魁防禦有功 賞戴藍翎十二年
修理喀什噶爾城垣工竣保舉出力人員得 旨馬興魁著以應
升之缺儘先升用十三年升補惠回堡千總十五年調沙州營千
總二十五年升涼州鎮標左營守備二十七年四月復赴喀什噶
爾換防七月喀什噶爾口外安集延布魯特回匪聚眾煽亂興魁
率兵援剿遇賊於葉爾羌所屬之賴里克偕俄卜嶺營千總蔡耀
宗力戰陣亡又賊圍英吉沙爾城陝西利橋營經制外委柴大安

赴援遇賊黑孜滾拜斯地方歿於陣事 聞均 賜卹如例 賞
 雲騎尉世職興魁孫起蛟襲耀宗世職未襲大安子存襲耀宗甘
 肅固原州人嘉慶十八年由行伍隨固原提督楊遇春剿河南教
 匪復赴陝西剿南山三才峽木廂匪徒擒賊目龔貴在事出力道
 光八年赴葉爾羌換防十年喀什噶爾逆回滋事耀宗奮勇禦賊
 有功 賞戴藍翎旋派修喀什噶爾城垣事竣以經制外委儘先
 升用十三年補庫爾喀喇烏蘇營經制外委十七年升涼州鎮標
 左營把總二十一年英夷犯浙江內洋調赴乍浦防堵旋撤回二
 十四年升是職大安甘肅會甯人嘉慶十八年十月由行伍隨西
 甯鎮總兵特依順保剿捕河南教匪敗賊於道口進攻司寨首逆

李文成自焚死十二月克復滑縣旋又隨剿陝西南山三才峽木
廂匪徒十九年擒賊目龔貴敘功拔補會甯營額外外委道光六
年檄赴喀什噶爾軍營七年二月敗賊沙布都爾回莊追至渾河
南岸殲斃賊眾遂復喀什噶爾城大安在事有功 賞戴藍翎十
二月追賊喀爾鐵蓋山首逆張格爾就擒餘匪淨盡大安以奮勇
殺賊經揚威將軍長齡保奏遇有經制外委缺出儘先拔補八年
解送張格爾來京事竣回營九年補是職二十七年赴葉爾羌換
防

右 國史館本傳

四庫全書

四

吳喜 尙清

吳喜甘肅固原州人由武生入伍道光二年勦捕西甯野番左骹受槍傷六年回部逆裔張格爾不靖喜隨赴軍營擊賊沙布都爾回莊阿瓦巴特莊等處在事有功 賞戴藍翎十年復隨勦喀什噶爾逆匪十二年中式武舉效力陝西提標期滿以把總候補二十一年署右營千總赴葉爾羌換防二十七年九月喀什噶爾口外安集延布魯特糾約回匪滋事喜由防所赴勦在科科熱依瓦特地方力戰陣亡同時涼州鎮標經制外委尙清亦死之事 聞均賜卹如例 賞雲騎尉世職喜世職未襲清姪建績襲清甘肅靜甯州人道光十年由行伍隨征喀什噶爾逆匪十二年回營十

七年赴烏什換防二十二年補隆德營額外委二十四年赴葉爾羌換防二十六年補是職

右 國史館本傳

花富 魏進宦

花富甘肅張掖人父花郎保由外委於嘉慶四年出征川陝陣亡
子雲騎尉世職十七年富襲發提標左營學習二十三年期滿引
見奉 旨以守備題補道光七年署前營把總八年署左營把總
十年署永固營把總二十二年四月署南古城堡守備六月酥油
口番賊滋事帶兵堵截二十六年署後營把總二十七年三月派
往英吉沙爾換防八月至葉爾羌所屬黑孜滾拜斯地方突遇番
賊力戰受傷十月卒是年九月署貴德營把總魏進宦於劉屯寨
要隘防堵遇賊接仗歿於陣事 聞均 賜卹如例 賞雲騎尉
世職富子生貴襲進宦子永興襲進宦甘肅貴德廳人嘉慶二十

四年由行伍隨剿泥馬隴番賊有功道光元年四月考取武生五月調赴河北剿捕番賊六月遇賊於巴燕腦爾生擒二名殲斃一名四年派往察漢托洛亥駐防五年追剿番賊於桑什干尋復赴河北松樹坪防堵屢有擒獲七年赴河南捕賊生擒六名八年派往英吉沙爾換防十年八月逆回滋事圍英吉沙爾城進宦隨大兵堵剿獲布魯特賊首一名十二月事平經揚威將軍長齡保奏賞戴藍翎十三年署西甯營額外外委十四年署貴德營額外外委十五年署經制外委二十六年補西甯左營經制外委二十七年署是職

右 國史館本傳

李廷揚

彭文志等

李廷揚江南句容人道光十八年武進士以營守備用二十年充
漕河駐京提塘二十四年任滿選補廣西桂林營守備二十六年
兩廣總督宗室耆英以廷揚曉暢營務弓馬出眾奏調融懷營守
備未抵任二十七年九月湖南新甯土匪雷再浩勾結廣西會匪
李世德分立青紅兩教糾眾滋事李世德旋經官兵槍斃雷再浩
退竄鄧家衝其地阻山臨水右通瓜里塘左通咸水口與新甯毗
連之梅溪口相近廷揚以提督馬殿甲檄隨副將伊農阿署遊擊
何廷標帶兵進剿十月偵知賊匪由香草坪分竄伊農阿一軍由
椒子水旁徑抄入廷揚隨何廷標領兵由瓜里塘進攻行抵把火

市距梅溪口五里賊匪恃險負嶠以待因山壁峭立路徑分歧我兵槍礮仰攻未克廷揚氣益厲冒險先登士卒繼之直撲賊營短兵相接殺賊多名賊分股蜂擁而出左右合圍廷揚奮勇力戰復殺賊數十名因眾寡不敵身受槍傷力竭歿於陣經巡撫鄭祖琛奏聞諭曰李廷揚身先士卒奮勇殺賊力竭捐軀情殊可憫著交部議卹尋賜卹如例賞雲騎尉世職襲次完時以恩騎尉世襲罔替子福厚襲

右 國史館本傳

庚戌春唐子魯泉攜一冊示予曰此吾友李君丁未粵西梅溪死難錄也子不可以無文因命呼酒酒半掀髯爲余言李君事甚詳

醉而去予故驚李君勇烈近世所希而又歎魯泉不負死友爲不可及因爲立傳曰李廷揚字步墀江南句容人也祖服賈京師頗以貲雄然好行善事父以武舉起家嫻弓馬廷揚少多氣力手可開五石弓父奇之益令習武事遂中武舉非其好也常善讀史至忠孝大節鬢髮戟指繞案大呼乍見疑若有狂疾者又論古人事必抉極隱微與友辨難至詞窮意服乃罷道光十八年成進士以守備待銓爲京提塘官數年當是時海疆不靖粵閩之濱氛祲昌熾調遣四集兵不用命提鎮之臣相繼陷沒羽檄兵符望於道路皇帝勤勞宵旰有南顧之憂閭臣疆吏日思所以勦撫之計廷揚每私歎曰天下事竟如是哉然使武臣能率士卒同甘苦皆懷有

死不貳之心以捍衛疆場或不若是之甚也於是慷慨有請纓之志越數年醜夷就撫而廷揚始以提塘任滿出爲廣西桂林營守備桂林去京數千里煙瘴交侵江南人多不習提塘又俗號美缺他人謀此惴惴惟恐其不得而廷揚竟舍之去或有尼其行者慨然曰吾兩世習弓馬不能有所表見今海疆無事計可以爲國家效力者惟邊徼耳若鮮衣美食老死牖下吾雖不能讀書談道襲吾祖服賈業足矣而願棲遲於此哉世徒病武夫不足用亦視其人之所爲何如豈一致也於是獨身赴任至則操習營伍簡閱軍器中丞鄭公甚異之奏調懷融未及赴會楚匪雷再浩糾數千人爲亂延入粵西界中丞檄營將率兵往拒同官皆有難色廷揚獨

請以右營兵三百行抵梅溪亂山深阻溪洞險巖又水漲梁斷兵不敢進廷揚於馬上手刃一人卻者無不勉前明日與賊遇戰數合卒半逃竄廷揚獨奮刀大呼直衝賊隊時天陰月墨矢礮俱盡救援不至賊集益眾廷揚身中數矛猶戮一賊遂遇害後數日大帥平賊得屍於崖下面目如生年僅四十不竟其用嗚呼惜哉同死爲外委彭文志馬端春麻學謙三人事 聞皆 賜卹典廷揚死於道光丁未十月十二日明年戊申某月喪始歸初廷揚赴粵西時出皖江魯泉需次省門畱小住相偕登城西大觀亭亭下有元余忠宣祠墓廷揚獨徘徊墓下若有所思既而昂首曰忠臣果不畏死耶與魯泉至亭上道忠宣守城死難本末欷歔感歎日暮

始去未二年卽得殉難耗竟成語讖異哉魯泉曰君好交游重然諾雙瞳炯炯光燭人與之語寒氣偏毛髮固早知其有異也與魯泉同里最善欲締兒女姻未果至是魯泉決意以女歸之曰吾不負吾死友也古云患難之交不以死生易魯泉有焉予故得並紀之

舒燾曰國家承平日久武備久弛閭外率以訓練爲故事突遇變輒相顧不知所措或巧避去李君一偏裨耳位卑分淺卽使逗畱不避亦孰有罪其後者犯難殲身其所蓄積者異也而或有議者曰賊微耳李君貪功輕進故至此嗚呼自十數年以來高牙大纛擁重兵遷延卻退者相環也此固可議而不之議若李君乃忍議

之哉

右傳舒燾撰

道光二十七年十月湖南賊起新甯擾廣西界巡撫鄭公檄守備李廷揚往覘賊時賊已連土賊據西延勢張甚而廷揚卒僅三百人或謂廷揚君奉命覘賊耳宜視可否進退廷揚不顧進戰死其所殺賊獨多賊創之殊甚鄭公哭之以詩嗚呼小敵之堅大敵之禽也使鄭公知其能以死自效者必多與兵或使合他軍進必不死且殲賊而以英烈之夫爲鼠子餌也此鄭公所以悲悼深悔者也廷揚字步墀句容人先以武進士畱京師會亮與同郡數喜過之獨見其重然諾恤貧交守身廉儉而已安知其終若此哉悲夫

賢豪不遇事而見者蓋自古難之矣

右書事梅曾亮撰

段丙南

段丙南河南陝州人道光十五年武進士授藍翎侍衛二十二年選補廣西全州營守備二十四年署提標左營守備二十七年湖南會匪不靖丙南奉派赴西延防堵二十八年撤回適灌陽會匪滋事平樂陽朔匪徒乘機響應計將薄平樂郡城丙南復帶兵隨副將周濟成等赴平樂迎勦窮巖僻嶺不避艱險首逆夥匪悉就殲除巡撫鄭祖琛上其功得旨以都司升用並賞戴花翎是年七月護理提標中營遊擊先是南甯府屬之上思州橫州與廣東欽州靈山接壤其邊龍土岡有盜匪竄踞屢經勦辦至二十九年七月餘匪竊發復擾及上思州等處丙南奉派赴靈山一帶協

勦屢戰屢捷敗賊於武利龍門樂民等墟賊竄橫州復敗之於平福墟殲斃無數九月餘匪竄撲賓州丙南帶兵追擊遇賊於程村賊負嵎抗拒丙南親然大礮斃賊多名復直前衝擊猝被礮傷賊匪蜂擁而至丙南仍奪矛殲賊二人旋以傷重力竭陣亡事聞諭曰廣西護理提標遊擊全州營守備段丙南奮勇殺賊受傷殞命可嘉可憫著照參將例賜卹尋賜祭葬賞雲騎尉世職子玉林襲

右 國史館本傳

萬鼎恩 陳佳保

道光二十九年十二月甲戌 諭馮德馨奏查明匪徒滋事根由
一摺湖南署新甯知縣岳州府經歷萬鼎恩經該匪等偏從不允
致被戕害前署令李博之妻楊氏及該縣書院掌教舉人陳佳保
先後被賊偏令自盡義烈可嘉均堪憫惻並著該部從優議卹

右東華續錄王先謙編

劉炳南

炳南少讀書有大志年十五隨仲兄奮南赴直隸山海關通判任
閱四年回粵應童試不售遂遵籌備例捐未入流丁外艱道光辛
丑英夷滋事擾及省垣大憲檄飭各屬招募鄉勇應援炳南聞命
卽自行捐貲雇拖船二十隻召募水勇五百人星夜赴省奉檄防
堵要處守禦有方大帥深器之事平奉 旨賞戴藍翎壬寅督脩
香山縣城工竣交部優敘丁內艱服闋加捐府經歷分發湖南丁
未冬抵長沙己酉楚南大饑大府議賑廉其才委攝長沙縣丞辦
理賑務省垣設粥廠四處輪流散給并施藥餌如是者兩月全活
者眾值逆匪李沅發肆亂據新甯縣城楚撫委鹽道楊督兵勦辦

以炳南有膽略特命與守備熊釗帶兵四百在縣屬之狼山村遇賊出路奈兵少賊潰圍出卽與熊釗領兵奮力追截焚燬賊巢無算到貝子岡賊伏發炳南猶力戰身受數十創遂遇害年三十六事聞奉 旨議卹炳南生平好吟詠磊落不羈之氣時見於詩燕趙吳楚足跡所至著有壯遊草置行篋中歿後散失無存僅檢得其挹桐書屋遺詩若干首

右事略張維屏錄

鄧樹莖 陳洪興

鄧樹莖字哲卿湖南新甯人廩生道光戊申雷再浩反時承平久人不知兵守土吏無所措縣人江忠源與樹莖建議練民兵討賊遂擒再浩誅之敘訓導明年雷逆黨李沅發復反從逆者如歸時江忠源入都樹莖詣縣陳狀不省乃自部勒一軍夜率壯士入賊巢捕沅發未獲賊黨益恨之及踞城戕縣官卽分黨六十人入樹莖家樹莖與弟履山手長矛格鬪良久跳而免則走東鄉號召民兵得萬餘人攻縣城先官軍入其郛賊抵死拒樹莖掘隧道實火藥轟城城圯奮力先登賊棄城走遂復新甯樹莖率民兵窮追五六百里抵廣西懷遠境賊結犴獍勢復熾樹莖以三百人及之於

古泥自卯汜申殊死戰會大雨賊益厲至鄉兵潰樹塋負重創轉
至野毛坪力竭死之時道光三十年正月二十六日也年三十有
二逾兩月親卒得其尸面如生及易衣殮血涔涔出口鼻卒慮遠
道扶櫬歸費無所出忽尸袖中有物墮啟其函得朱提數笏遂克
返葬知縣戚天保上狀請 優卹時主兵者獲咎事遂寢江忠源
擬奏立專祠尋亦死綏不果光緒二年子在鏞官貴州上其事於
雲貴督撫轉牒南撫會疏請卹如典例 詔曰可乃 賜祭葬
予世職距死事時二十有六年矣樹塋與江忠源倡議殺賊首先
出境追勦力戰死綏實軍興來湖南死事之冠云在鏞貴州候補
知府升用道加鹽運使銜 贈樹塋二品階又陳洪興鳳凰廳人

鎮守鎮標千總新甯李沅發起事自薊國戰勝後勢張甚各軍會
勦於廣西水口及貴州空洞皆捷沅發遂由摩天嶺復竄廣西懷
遠並擾融縣三月洪興隨大軍追勦至四排嶺與賊戰死焉越月
提督向榮擒沅發於新甯金峯嶺事平

右傳李元度撰

毛三元 郭顯等

毛三元四川鹽亭人道光十二年武進士授藍翎侍衛十六年效力期滿引見以守備用十九年補雲南景蒙營守備二十二年署維西協中軍都司二十三年調元江營中軍守備二十五年署騰越鎮標左營都司二十六年十一月緬匪滋事檄赴順甯勦捕十二月攻賊於洛黨克之焚燬其寨卡餘匪竄遁雲州三元復駐把邊關堵禦二十七年四月事平旋改駐永昌五月署右營都司二十八年署普洱鎮標中營守備三十年思茅邊外游匪滋擾延及近甲猛地三元統帶弁兵堵勦遇賊於金家灣偕署鎮標中營千總郭顯右營外委王永壽力戰陣亡事聞諭曰毛三元郭

顯王永壽均因擊賊捐軀殊堪憫惻著該部照例賜卹尋 賜祭葬 賞雲騎尉世職三元子志信襲顯子汝林襲永壽世職未襲顯雲南甯洱人由行伍於道光十三年隨征思茅車里賊匪二十一年補鎮標右營外委二十六年三月擢右營把總尋赴順甯堵剿回匪擒首犯趙扛扛等五月敗賊於猛庭寨俱在事有功二十八年署是職永壽雲南甯洱人由行伍於道光二十六年赴順甯堵剿回匪擊賊於周家坡擒首從各犯並攻猛庭寨燬其巢二十七年補是職

右 國史館本傳

伊克坦布

伊克坦布依爾根覺羅氏滿洲正藍旗人由護軍於嘉慶十八年隨勦河南滑縣教匪迭次接仗有功二十一年授驍騎校二十三年升步軍校道光十一年四月揀發閩浙以都司用九月署浙江象山協右營都司十一月實授十五年於五家壩五獅山等處緝獲洋盜十二名十六年拏獲越獄斬犯一名二十年升雲南景蒙營遊擊二十一年正月英吉利夷船突入廣東虎門以雲貴總督桂良檄率兵五百名赴粵隨勦四月英逆自大黃滄二沙尾兩路犯省河靖逆將軍宗室奕山豫飭將弁率水勇伏各要隘大兵沿岸迎擊分隊襲其後路環攻左右同時火發水勇復由水底鉤住

逆船拋擲火器其兩路船隻均被燬溺斃無算餘匪登岸悉殲之
嗣夷船後援駛至我兵奮勇擊退伊克坦布均在事有功奏入
賞戴花翎二十二年事平回任二十三年正月騰越廳南甸土目
刀承緒滋事以總督桂良檄赴勦俘賊多名十月升提標中軍參
將二十五年署曲靖協副將二十六年二月永昌府回匪滋事隨
提督張必祿赴勦俘賊多名十月調貴州朗洞營參將二十八年
正月雲貴總督林則徐以伊克坦布歷練勤明出師著績保升清
江協副將時服尙未闕先請署理 允之十一月實授三十年正
月台拱營苗匪出巢劫掠捕獲多名九月湖南耒陽縣匪徒李沅
發滋事貴州與楚接壤伊克坦布率兵防堵有功下部議敘嗣廣

西會匪起隨鎮遠鎮總兵周鳳岐赴粵協勦十二月賊屯桂平縣
金田村被勦竄平南縣思旺崖我兵追奔失利賊復撲回金田伊
克坦布奮勇率兵進攻殲戮甚夥旋以賊援蠶擁合圍往來衝突
力竭歿於陣經廣西巡撫勞崇光等奏 聞 諭曰貴州清江協
副將伊克坦布奮不顧身殊堪憫惻著照總兵例賜卹 賜祭
葬 予諡威壯 賞騎都尉世職襲次完時以恩騎尉世襲罔替
子桂齡襲

右 國史館本傳

國朝耆獻類徵初編卷三百七十五目錄

孝友一

耿燿

弟炳 耿權

從子於彝 耿極

耿輔

李長茂

黃成富 譙衿

陳福

王詢

費大受

吳威克

徐守質

唐紹光

夏汝英

李志善志勃 蕭露洽

黃簡 唐大純

華世燿

楊嘉禎

任遇亨

從子裕德

陳嘉謨

賀上林 何士閔

李澄

李芳燦

秦鏡

弟銳

陸國安

梁孝子

易貞言

危階

湛會桂舒心忠
曾學傑

鄭熙齊
范克襄

邱之登
胡開椿

鄭江吳國擊
李盛山

何履旭
林開登

國朝會獻類徵初編卷三百七十五

通奉大夫前署江西巡撫江西布政使司布政使湘陰李桓輯

孝友一

耿燿

弟炳

從子於彝

耿權

耿極

耿輔

耿孝子名燿河南太康人邑諸生少從兄光學事之如父凡出入起居必諮稟而後行光嘗與之財孝子曰家有長兄我無用此爲也崇禎壬午李自成陷太康孝子率弟炳肩輿昇母避河朔買布以供甘旨母病孝子朝出經營暮歸侍疾衣不解帶者累月母歿扶柩渡河將殯於祖塋會鎮帥高傑兵作亂道梗塞孝子從刀山血海中挽車以葬不恤也時定興耿權與弟極以孝友稱炳嘗慕

其爲人訂爲兄弟分宅以居且贈田四頃其義譜有二云性地成宗
心源爲譜孫夏峯徵君聞而義之爲作三耿合傳云光字伯明邑
諸生事繼母孝教諸弟嚴家世業農父應科好施與七世同居子
姓百餘口置園几二外則男子以次其食內則婦女以次其食額
其堂曰效藝嘗赴省試拾遺金數百於旅舍俟其人歸之嘗言行
事當以聖賢爲法始無悔事立心嘗神可鑒始無愧心其刻
志勵行如此子於葬有學行光卒未葬值流賊屠太康居民逃竄
於葬獨抱父柩號泣不去賊大至愬之曰汝獨不畏死耶推墮城
下傷腰脅幾死越三日賊退踉蹌歸家以土掩柩而後去時歲大
稔人相食邑令餽穀四十斛悉推其餘以振貧人督家僮廣種菜

明春榮發任人刈取所全活無算年八十二無疾而終耿氏以孝友名世子姓守其家法中州稱禮讓者以耿氏稱首又有耿孝子輔者虞城人邑諸生早喪父奉母避亂開封會流寇決河灌城輔倚浮木負母渡水逃獲免後居母喪哀毀骨立縞衣粗食終其身以子惇貴 贈給事中與於彝並祀鄉賢

右事略李元度撰

耿於彝

歲庚午太康耿亦夔先生攜其尊人舜中公行狀來求誌墓之文於予且曰微子一言無以光幽壤噫舜中公行詣願藉子言重哉公家學淵源至亦夔益以聖賢自期待公之教子有成垂名行且

不朽予言願足重哉雖然子與亦夔道義切劇嘗登堂辨質至一
至再暇則請謁公親接其容貌杖履質之古有道者殆不異也予
卽欲已於言烏能已諸謹按狀公諱於彝彝中其字也邑庠生原
籍山西洪洞人自祖征遷太康遂家焉征生釗釗生偉偉生志志
生裕裕生萬是爲公之曾大父舉鄉耆好善樂施家道之昌實肇
於此萬生應科應科生光字藜照增廣生是爲公之父公行三長
兄曰於世次日秉彝庠生弟曰鐫彝曰在彝庠生藜照公事祖父
惟謹處兄弟友愛教子孫循循有法一堂之上瓜瓞縣縣禮義交
飭天倫樂聚罕見其匹嘗以效藝名堂邑人有七世同居之稱公
於家庭薰陶旣久孝弟之行履如平常事繼母能得懽心扶持仲

兄卻瘍病他如會族崇先祀糾諸生葺先賢陳子祠皆表表於眾
至恤人之急解人之厄又義形於色不避艱阻戚黨有劉姓胡姓
拖官稅公慨然出其人於獄雖胡姓相負不之計仍爲其母治棺
劉至無嗣更爲收葬里人歎厚德云壬午逆闖陷太康公避亂縮
城傷其骨賊見之無加害曰吾知耿氏善人也尋避難甯陵桑氏
家聞警攜與行桑遇仇害更繫其幼弟禍將慘公紿爲子已得釋
盡出囊資爲營葬甯人義之相率納費致館穀得免於餓辛卯亦
夔應舉其城時孫徵君先生講學於家公倡道命執贄受學及徵
君先生一見相得甚贈以詩癸卯亦夔膺鄉薦更以學未歷練爲
勉益公惟見理明故不惑於陰陽家言葬法準昭穆世次不別開

兆域與人言惟重父母兄弟之倫示孝慈友愛之義以爲福田在心豈其在地家愈貧守禮愈嚴無事不敢造官府官長特重之以故饋粟延飲賓代輸官租前後邑令致敬如一嗣後春秋高亦夔思以祿養因禮闈罷留京廷試七年秉鐸商城克振宗風公以迎養居一載餘喜曰吾向誨師嚴道尊之旨今果力行吾志慰矣比歸日與親知聚樂油油然導人爲善不倦也嘗託興於酒多不至亂旁及書法亦臻精妙戊辰八月寢疾病十日而卒享年八十有二男五長帝德癸卯科舉人署商城縣教諭次帝采次珽次懋德庠生次惟德女七孫男二存訥存誠女孫六銘曰

猗歟公德大經是程七世一堂效藝垂名人皆慕爵希心寵榮公

獨嗜道終寔怡情慶餘積善賢嗣挺生夏峯立雪實茂厥聲維公
有子維公履成我銘片石永誌佳城

右墓誌銘實克勤撰

耿於彝字舜中太康人自上世至其父黎照公光家嘗七世共食
闢效藝堂居族眾焉於彝爲黎照公中子漸濡於耳目者深少游
庠序事繼母孝處兄弟友兄秉彝嘗病疫家人畏避弗敢近於彝
坐臥榻側伺飲食藥餌之候至兄病已而已卒無恙崇禎十三年
天下大祲饑民往往圍聚剽掠知縣梁公以樟督人入保公性苛
暴少違約立置之法於彝是時無甌石粟枵腹登陴無弱容亦無
怨色梁公察知之以十斛饋焉十五年李自成攻屠太康於彝墜

城傷足賊中有掖以渡濠者傍一人就視曰觀若狀固當爲善人
因共保護迨移營深匿之而後去於彝雖脫自賊中無資不能避
亂他方轉徙廢壘殘墟間艱苦備至踰年叔父祿炤公炳中鄉試
遣僕來迎始渡河然猶屢困乃得濟於彝當大亂之後食指數繁
衣食既無所出且兩歲之間三遭大喪然去就辭受一裁於義而
不苟十七年於彝與叔謀扶輓而南是時陳許之交五砦蜂起念
家不可歸暫如甯陵倚桑氏以居桑氏有怨家率眾欲攻之於彝
道之去以避禍眾追之及於彝挺身欲排解之其中一人曰是可
以口舌釋耶去勿俱死於是分別桑耿之屬使左右立於彝顧桑
幼弟曰吾子也卒詭而免之比招桑之徒結兵往救而桑已橫尸

道周矣於彝哭而瘞之然後去聞者服其義爭致家塾效束脯焉
順治丙戌始歸舍顧井邑蕭條終日行不見故人乃語所親曰吾
鄉昔日蓋幾萬家經亂以來千無一存我輩幸生還不可不原其
故也乃相與卹族敦鄰型仁講讓勸樹藝興廢墜迄今土地日闕
風俗日美蔚然得見太平景象者實於彝有以倡之於彝嘗謂學
之不明於世也久矣古之爲學者其進爲有敘其見用有方窮年
占畢而非希世之謂焉殆必有所主矣及于帝德旣壯爲諸生聞
孫鍾元先生講道夏峯乃使從其叔祿炤公耀往問學焉時當鄉
試期送帝德於門而戒之曰小子勉乎哉吾以若得齒於有道爲
榮不以見收於有司爲榮也及帝德歸述所聞則躍然曰吾固疑

有是也一皆反而體之於身其後先生游泮於彝就謁先生贈之以詩稱爲得所心期云癸卯帝德舉於鄉於彝一敦素履閉戶不關外事或屢至空乏泊如也知縣蘇公楫汝求一識面不可得張公信欲有所進而不敢言久之蘇公行鄉飲酒禮必致之以爲賓張公代輸其力所終不能辦之賦時人以爲兩得也乙丑帝德奉教諭商城之命捧檄入以告於彝教曰汝今爲師矣師嚴則道尊所謂嚴者立身行事可畏可象如是則人知敬學人知敬學則善人斯多庶稱朝廷立官意也帝德拜受於彝嘗一至商見士皆彬彬喜曰汝能是可謂不負夙昔矣何久溷汝爲也遂歸年八十二卒於彝性敦樸終身取義不回故於日用人倫之際誠孚上

下且能格及異類屢脫於阨論者謂皆所自操非倖致也亦嘗脫人之阨而不自伐人卽背焉卒爲之德弗衰尤不信形家言曰族葬古也別而藏何異生人父子離居乎色笑無以相親急難無以相赴以此爲求未有獲福者也此理甚明世何惑焉卒葬其父於祖兆之中其明於取舍類如此

論曰亦夔嘗兩來顧余見其純質無華疑所從來必有本也今詳舜中所爲然後知余向者之言非誣焉不嘗見世之教子者耶甫學則誘以速化之方人仕則勉以居潤之術求其輕榮名重實德後利祿先官守者無有也使天下之爲人父者皆如舜中則鄉黨無澆俗國家多善治矣雖在田也而已德施普焉余之傳之也有

國朝詩林卷之三十一

以哉有以哉

右傳田蘭芳撰

六

李長茂 黃成富 陳福 譙衿

李君長茂字齡侯福建海澄人四世同居男女千指共爨而食無
間言建大小宗祠置烝嘗田以奉祭祀著家規十法十戒以示子
孫立義學以訓族人之貧不能延師者每歲必捐居積以助族人
之不能婚娶者子五福順治己丑進士官刑部侍郎兄弟八人備
極友愛暇輒以詩歌吟諷相勸誠人以爲有江州陳氏風時有黃
君成富者連江農家子也六世同居男女六十餘口雍睦無間子
弟各執其業每出作田間眾婦俱往畱一婦視家臥兒於筐飢則
乳之不問其爲誰兒也懸衣於桁出則衣之入則脫之垢則澣之
不問其誰衣也遇客至供具飲食家長主之家中不聞一言又永

春陳福者世居西溪以耕讀爲業兄弟同居至福已十二世家建
二堂以別男女飲食家範整肅簡儉世立一人督家政婚娶葬祭
量力辦治子孫世守醇樸未嘗一至有司之庭地方吏禮獎並免
其徭役焉譙君名衿湖南沅江人邑諸生自明正德時至衿凡七
世同居積二百餘年喪祭無失禮親支百十九人衿以祖命主家
政每食男女異席終事無譁會鄰家火起衿兄弟先入祠堂抱神
主避火火隨息家蓄耕牛每出入亦以齒先後在牧地行列不亂
作家訓二十條子孫咸遵守之雍正十年 詔旌其門 御書世
篤仁風額 賜之

右事略李元度撰

王岫

孝子王氏諱逢吉字汝從後更名岫別字石林世爲長洲荻扁人移家郡城前明光祿霖蒼公孫文學仲美公子也仲美公歿時孝子纔六歲擗踊哭泣如成人未幾季父叔逸公歿王父光祿公相繼卒母張夫人暨叔母張並守苦節家食貧孝子艱難困苦中刻意向學年十八爲邑諸生有聲於時當是時值思陵末葉寇賊蟻聚歲荒旱內外臣無救時策惟分門戶重報復孝子曰時事至此我能隨燕雀處堂者競科名得失乎偕從弟茂林隱於醫可活人兼收微直供堂上甘旨且亦兩節母意也歲甲申流寇陷京師又明年大兵渡江天下始鼎定人服其先見云方明祚之旣覆也江

以南未定土寇四起孝子蒼黃中負母避難踰垣出破面折足棲
隱村舍一夕數驚全家幾瀕於危賴王師下江南迄以無恙時父
棺未葬鄰人火將延及孝子負母出復冒火入無計舁父棺撫棺
慟誓與俱焚適反風迴火棺與孝子俱得保全後奉母徙居尊莊
不入城市以醫業終吳中業醫者率視貴賤貧富而緩急之孝子
請卽赴風雨無間晝攜囊出夜負米歸一室中融融藹藹天倫之
樂不以三公換也母老病未臥不起孝子殫心力侍疾恨不以身
代母歿哀毀過情旣葬廬於墓側每天寒月黑淒風苦雨孝子拊
膺慟哭聞者悲感曰王孝子哭聲也三年有如一日記曰父母之
喪仁者可以觀愛焉知者可以觀理焉彊者可以觀志焉今於孝

子益信弟茂林歿經理其喪事叔母如母撫姪如子至既老不衰
年八十二歿子三人長子亦以孝聞

右傳沈德潛撰

日本書紀卷之三十一

ノ

費大受

子之致孝於親自盡其職而已初非欲有聞於人也自世有察舉孝廉之典旌表門閭之制而名利之塗啟於是有飾情矯行以干譽者然剖股廬墓諸事庸可勉強而爲若夫變起蒼黃死生分於俄頃而能奮身扞父蹈白刃而不辭則非至性天植莫克爲之矣若吾邑費孝子之事可紀焉孝子名大受字任寓世居西操里父九湖母陳氏少有至性長而孺子之慕不衰孝事二親起居膳脩之節扶將抑搔之宜未嘗倣古禮爲之而事事合禮先意承志可以博親之歡者無不爲也甲申乙酉間盜寇蜂起盜入人家輒執其主加楚毒焉以求資或縛去施酷刑要重賂乃免賊至西操孝

子扶其父母以避而父老憊爲賊所得孝子匿其母而奮身詣賊
曰此吾父也老不任事請釋之而以我代賊不聽劫其父求藏金
父無以應將兵之孝子以身蔽父賊怒將刃孝子孝子延頸受刃
賊脅之數四終不舍父賊亦感動曰眞孝子也難得難得并其父
免之聞其事者莫不嘉歎後十餘年邑令霍勳以棹楔旌其門將
白之上官聞於 朝孝子堅讓乃已孝子竟老田間以壽終有子
文衡亦善士篤於行誼能世其家

贊曰吾宗吳興潘氏自司空季馴公貴顯其族今大盛所居曰全
孝里全孝者謂遠祖綜也綜在劉宋時與父驃避孫恩之難父被
賊斫綜抱父置腹下頸面被四創有一賊謂眾曰殺孝子不祥乃

舍去父子俱免今觀費孝子頗相類夫盜賊至暴悍也猶可以誠
感則知至信格豚魚至孝通神明有必然者宜天之降祥常在其
家也歷考前史若此者漢有劉平晉有司馬芝宋有東崇芳嚴冕
元有樊淵賴祿孫等數人而唐則絕無豈果無其人歟殆紀載者
之闕漏也故既爲費氏表其墓而復著此傳以備志乘之採擇焉

右傳潘耒撰

田家... 卷三十三

十一

吳威克

吳隱居威克者孝子也父華元以誠慤交於士大夫崇禎末有丁員外郎奉詔采銅黔蜀與華元善挈俱往病卒於黔凶聞至威克年甫十八麻衣芒屨辭家遠奔行次潯陽值左良玉敗於賊舫艘相銜沿江殺掠威克不得進甲申六月南都李博士頒詔往蜀威克從之張獻忠既屠楚犯蜀黔粵滇雲皆震動督師李若星駐偏橋衛扼五省要害將軍方國安屯常德府殘破後涉江乏渡一翁拏小舟至熟視曰子何爲者抑似重有哀者子將何之威克泣曰僕歛人籍居儀真將求父柩於黔失路恐客死不得與父柩相見翁曰毋悲老夫方將軍幕客也可隨吾行至常德以屬副將王某

抵偏橋距黔尙六七百里王曰前此不能相伴矣地險多苗其慎之威克泣別所過萬山矗立有狢無雞犴狢乘亂截劫遇棺輒疑藏金必破之威克叩頭流血得免掠衣糧繫錮夜逸去跣走十五日抵貴陽見親柩擗踊氣絕經日始蘇徐乞募昇夫跪而告曰吾曹遭斯亂姑同寸進覓食眾曰吾曹感君誠孝忍不助力於是取道義山中間道無煙火拾櫬粟充食晝則同眾舁棺夜則相與擁肩露坐達旦二十晝夜至漢陽乙酉三月抵金陵以世亂不用銜家言竟渴葬焉嗚呼吳君可謂孝矣江甯史君代爲其子孝廉募文以紀予感史君言節錄大端嗚呼其亦可以傳矣夫

贊曰嗚呼隱君吳氏之孝直其然乎求櫬萬里返葬九京丁鶴年

之求黃沙之骨馬伯康之卻青烏之經智足以達理勇足以輔仁
跡厥生平義亦足稱可以焚焚君雲之券散折伯式之財而亦不
諱夫操術之奇處懿軌善行詳載於諸公之文吾蓋未識其子而
樂聞夫吾友云

右傳顧景星撰

徐守質

徐守質字野玉海虞人父曰濟忠爲諸生讀書有一時名君嗣之能世其業短小下聲弱如不勝衣遇是非所在輒奮發無所顧兵下金陵奉母避地母年長悒悒草閒不樂思歸兵至母病遂不能去謂兄基曰不可俱死斷徐氏世兄長宜行守質當侍母基曰弟賢不可徒死我無益於時當侍母死生以之相讓且久兵勢益急煙火漲天起吹脣挾弓矢者馳而過其門君愠曰兄一家都在此奈何併命弟孥累幸在婦家若婦無他而母死是守質全妻而棄母也何以見天下士人基遂挾孤甥棄妻子而逃甥姓袁氏其妹婿字君從死時以兒託君兄弟噫君兄弟之義鄧伯道不過也事

定基歸母與袁氏妹俱沈井中君被一創仆於地而死妻子俱免
登天畱之以報善人耶

右傳馮班撰

唐紹光

唐孝子者諱紹光字伯奮固始人明鳳翔郡守時明子也少具至性及長常隨父任崇禎辛巳唐公自南民部出守鳳翔畱孝子白下肄業孝子號泣請從唐公以義斷之孝子不敢違然心疑焉嗟夫孰知唐公計國步方艱分殉封疆以江左爲遺種處也旣而逆關陷長安全陝瓦解唐公抗節死事越數月訃音始達孝子一痛僵仆及甦淚盡繼血骨立柱不能起有以父櫬未歸母弟流離相賣者孝子始瞿然爲一啜粥方是時乾坤板蕩南北阻塞孝子奮袂與家人訣曰濟則生還不濟則以死繼之矣於是提襆被徒走時竄伏於青燐白骨間貌枯毀踵流血久乃抵秦隴求得父櫬及

母弟焉幸王師已定關中因泣詣軍門謁闕帥乞路引扶輿闕帥
嘉其純孝欲畱委任孝子以歸葬終制力辭帥愈禮愛之迨抵里
營葬畢卽廬墓養母三年人未有見其舒容茹葷者於是邑令廉
嚴上其事各憲獎異以爲忠臣孝子出於一門將從優議敘孝子
復力辭所親或勸之孝子曰夫隱鱗藏羽網羅莫加矧余菲薄敢
因父死以自利乎卒不應其後子允安以武闈雋孝子優游里社
享中壽而卒鄉黨高之

右傳祝期撰

夏汝英

李志善志勃

黃簡

蕭露治

唐大純

夏汝英字百魁湖南安化人順治初遊兵竄境掠至汝英家汝英方九歲挺身衛母不離左右賊捨其母而擄汝英至中途汝英以母孤苦無依哀告賊首情詞悻惻賊憐之釋歸同邑李志善志勃諸生李步武之子流寇入境縛步武勒賄志善年十六志勃年十四號泣求釋賊索賄無以應轉詰富室步武大罵被殺兄弟奮不顧身奪賊刃殺賊均被害人稱雙孝子又黃簡字敬之祁陽庠生父用中遇流賊於竹山爲賊所執簡於山脊望見賊以刃向其父卽馳下至賊所請以身代眾釋父去執簡索資不得被刺死簡妻張奉姑曾氏匿深箐中棄其數月子已兩日矣賊去亟尋之氣尙

未絕抱歸救甦祖爲命名達孝後用中壽八十有七達孝生二子長諸生端後具狀請旌建坊入祀忠義孝弟祠族人更建專祠於迎恩門內蕭露洽字適生沅陵諸生兵亂率母攜弟避山谷間一日因母飢出乞食忽賊入山谷劫其母與弟去露洽尋至武陵得其母弟所在乃徒跣呼號徧告諸軍請鬻身以贖有中軍孫某憐其孝爲捐金贖歸雍正中祀孝弟祠唐大純黔陽人生子新居弟大緝蚤卒遺一女明季流寇入境時新居及大緝女俱七歲並爲賊擄去勒金以贖大純力窘度不能兩全乃舍己子而贖弟女後大純復生子有瑞聰穎過人年十二補諸生人以爲友愛之報

右傳李元度撰

華世燿

華世燿字公聚無錫人少孤又失母庶母金撫之世燿事之極誠
敬兄歿覆露其遺孤周貧窮鄉里稱善人時值鼎革鄉盜橫甚戒
毋入世燿門

右傳秦瀛撰

臣等謹將所奏各款
分列三十一二三

二

楊嘉禎

楊孝子嘉禎宜春諸生有學行順治丙戌春父文盛避兵山塘兵將至孝子從間道渡水報父水湍急被溺流至深處滅頂矣猶躍出水面曰速走速走遂溺死

右事略李元度撰

任遇亨 從子裕德

任孝子遇亨字華宇江蘇崑山人居千墩里生有至性膂力過人國初澱湖盜錢大起四出擄掠爲害孝子負父逃避盜劫其父去孝子呼天竟一夕至黎明忽奮躍持刀突入盜藪負父出身被重創腸出腹旋遇神醫得不死乃扶父至嘉定羅店以老時稱任孝子云從子裕德亦以孝行被旌裕德字厚齋幼有至性篤於孝弟垂髫時其兄裕章失父意將予大杖孝子號泣求解得免兄亦感悔焉有土惡某積怨於其父乘間突持刃刺之孝子年十一急以身蔽父兩手直奪其刃厲氣正辭曉以禍福惡亦感動擲刃去父患瘡三冬弗痊孝子晝夜扶掖中幫廁臉皆躬滌濯之冰肌裂

膚血淋漓弗恤也父歿哀毀骨立三年如一日事母能色養病劇
孝子籲天禱願以身代母病尋瘳兄老無精凡養生送死皆躬自
任之又析己產畀其子與己子均乾隆十九年巡撫莊公有恭題
旌得 旨建孝子坊入祀縣學忠孝祠

右事略李元度撰

陳嘉謨 賀上林 何士閣

陳孝子名嘉謨字我師江蘇興化人邑諸生順治初父宏道爲怨家所誣繫府獄獄卒絕其橐篋孝子乞一見父不許知羣小計必殺之乃痛哭於城隍神作血書懷之出自沈於河是夜蒼頭守舍候孝子不歸忽聞哭聲自外至扣門甚急啟視無人心怪之及明兩淮運使白某得一函啟視則嘉謨訟冤血書也運使大驚適蒼頭亦來訴求其尸七日出自鈔關河屹立風浪中髮皆上指遂出宏道於獄收葬孝子而抵誣告者罪後十餘年有賀孝子事賀孝子上林丹陽人父天敘以事忤令繫獄將殺之孝子年十八謀脫父不得聞巡撫將至涉江湖淮迎舟大呼囑從訶之不得前憤極

遂投河髮歿數寸復躍起大呼巡撫令急救之已死檢其衣得一
紙則白父冤狀也巡撫按部具得令不法狀黜之釋天敘於獄鄉
人爲立賀孝子祠又何君士閔者安徽南陵人也有族人滿盜破
其祖母冢以葬親孝子訟之官三年不得直會巡撫檄兩縣令會
勘滿健訟事仍未白士閔大慟觸碑腦裂而死令義之勒滿起棺
治其罪葬士閔題曰義士何士閔之墓

右事略李元度撰

李澄

自史傳列孝義以敦本勵俗公卿大夫宜皆此其選也顧不少槩見而閭巷之士或卑冗小官行修於家者多有或湮沒而不彰余故及所見聞而覈其不誣者頗論著之若昆陽李君蓋可述焉君諱澄字仲瀾雲南昆陽州人貢生候選知縣父兆旂明末廬江縣訓導流賊攻城急分守北門城陷被執不屈與幼子滔俱死君奔喪匍匐宵晝行數千里數經賊中幾死得收骨以歸葬訖白州府父死狀以聞於朝崇祀鄉賢更特祠曰靖忠君每晨謁祠必泣如初喪者終身順治丁亥滇亂君奉母洪氏避山谷箐篁中母疾革囑曰我不欲終於斯可移置我乾淨地君負母行數十里至匍

頭之香雲寺而絕時四壁無煙哀號復負以行至祖塋去寺四十里矣母故藏棺城北慈照寺復奔寺猝遇賊爭欲殺哭告之故賊義之不殺也時兄源淮已先死於賊君益慟遂發病嘔血君兄弟八人晚惟存兄演事之如嚴君事必告而服其勞召之必在側飲食必共至今州中美其家法君有德於鄉歲戊子州多故山獮乘間入城劫官舍有告幕府民反者遣總兵往兵之君道行猝被執總兵者訶曰亂民耶趨斬之君力言山獮飢寒跳梁不關平民不惟民不可殺獮亦不可勦撫之便會州守來如君言罪止魁而撫其餘一州以完至今德之私諡之曰孝穆嗚呼君之事止此矣無他奇行也然如是亦足矣滇於古百濮近六詔地非三代之教所

加然使家隰戶曉率如君豈出鄉傳下哉余又聞君之先有尙文者以滇處天未少書籍來江南購萬餘卷以歸而君之高祖資坤以南京刑部郎守銅仁課第一訖罷官亦購書萬卷自號一齋居士後訓導死於忠而孝穆繼以孝母其亦讀書之助耶然以余所聞見士大夫家有擁卷軸至多而子弟一無稱焉抑又何也君之子從綱方以舉人上春官汲汲乎惟懼其父之不傳亦可謂孝余既得其事甚審爲之傳俾藏於家以待史之徵孝義者且語從綱子故藏書家其再盡焉可乎

右傳韓棻撰

仲瀾名澄昆陽人明季拔貢候選縣令游膠庠以行舉高祖愛

嚴公諱資坤以明正德癸酉鄉榜任南京刑部郎性嚴介寡合出
守黔之銅仁府考天下廉吏第一嗜書購萬餘卷自號一蠹居士
著有風教錄仲瀾讀其書兢兢惟高曾矩矱是守父三辰仕廬江
訓導乙亥流寇圍城分守北門城陷被執不屈挈幼子瀄同死之
仲瀾聞憂哀毀逾禮奔收遺骨而葬之抱終天之恨紳士以父忠
節請於當事崇祀鄉賢更建祠以祀顏曰靖忠每晨詣焚香泣拜
如一日丁亥流寇入滇奉母洪氏避山谷母疾囑曰我不願終於
斯可移我於淨地仲瀾背負母行力竭哀乞村人助之移至甸頭
之香雲寺遽逝時四野無煙復乞前人含號負骸至祖塋直至城
北之慈照寺掘藏棺賊見欲殺之哭告以故賊感而義之始得取

棺收母骸權厝及平乃治喪事遠近悲之戊子流氛擾滇野賊烏
合入州城劫官舍搜糧將官某星馳往報稱民變請勦民盡逃果
遣總兵崔副將王領兵至公同壻行至清水河被執將殺幸王副
將識公面釋而訊之因痛陳地方情形實因山獠飢寒兼爲徵糧
迫故變非關百姓今日之事不惟玉石宜分卽獠人亦不宜輕勦
否則反不可測撫之最善適州守鮑公來迎泣陳與公論合遂招
撫殲其渠首餘悉保全公之力也兄弟八人卒於兵燹者四蚤殤
者二止仲長相依兄弟友恭周公爰訪旌其門曰孝友并賦其事
生平無疾言遽色與人和御下寬周人急能排解里黨婚喪倡義
助之壽七十卒此其大略也

論曰傳云事親孝故忠可移於君事兄悌故順可移於長居家理
故治可移於官仲瀾公值倥傯仕難言矣卽其事親也當寇氛擾
攘之秋父與弟死於難數千里奔赴負骨返葬母避亂邁疾出萬
死一生負骸并葬噫苦矣論孝於承平易論孝於亂離難若公者
可謂處人倫之極變而當勢事之艱危此非常之厄而能成其孝
於古今未見之遭全友愛於莫可如何之際故曰難也此其事親
事兄兩無愧至於歸家之理使得一官吾知召杜匪難再比干可
同烈也令嗣從網登丙子賢書公車至都下請予傳故書之

右傳趙士麟撰

李孝子澄字仲瀾號果峯私諡孝穆先世浙之蘭谿人元末宦於

滇爲巨橋萬戶丞巨橋今之昆陽州也明初三將軍平滇始祖慶以歸誠功世襲武德將軍遂隸今籍傳至父兆旂明季歲貢授廬江訓導會張獻忠急攻廬江北旂固守北門七晝夜城陷不屈與幼子溘死之澄聞難奔赴孤行數千里匍匐鋒鏑間瀕於危者數數矣卒能收父骨歸葬復以父死事狀白有司上告得祀典特祠曰靖忠澄痛父之死每晨必詣祠哭拜慘動路人丁亥流賊入滇奉母洪避山谷中母疾革曰我不欲終於此可移我淨地澄負母行數十里至甸頭之香雲寺而絕母早藏棺城北慈照寺復奔寺取棺遇賊欲殺哭告之故賊義之舍去乃得棺厝母兄弟八人涿源淮演清溘匯一卽澄也行六瀆同父死義至是源淮又死於戰

澄益痛遂發病嘔血晚惟兄演存事之如父事必咨召必側立飲食必先奉必豐必潔兄亦友愛先是戊子賊氛未息山獮乘閒入劫有以民變告賊渠帥者遣兵往屠之民遁澄走至城南清水河被執將殺澄色不改力言山獮飢寒且苦征索非關平民爲今日計不獨民宜撫卽獮亦宜撫迫則反戈未可測也適州牧至如公言罪止其魁一州獲免及本朝關滇滇使者以賦籍散軼將履畝定其額澄慨然曰西南故瘠土況在逃亡後乎不辨是遺吾鄉累且未已也剴切開陳事得寬平其有造於州類如此澄以選拔例得爲令而痛父死王事絕意仕進日徜徉山水閒手一經教子若孫又性忠恕與物無忤積行敦義族里咸引重焉

太史氏曰余嘗過巨橋之石齋椿有唐河東州刺史王仁求及其子善寶墓桓碑在焉仁求忠於唐善寶繼之至今滇中人猶有能道者而史不傳又城西有靖忠祠蓋州人李兆旂官廬江死朝廷從其子澄之所請也兆旂忠澄孝與王氏父子後先爭烈矣史冊有能紀其軼事者乎嗟乎南中義烈以荒遠而滅沒弗彰者可勝道哉

右傳王思訓撰

--	--	--	--	--	--	--	--	--	--

李芳燦

孝子李君芳燦者小字葵生湘鄉人生有至性免乳後卽知親愛
依依膝下如成人每食必後長者其兄弟偶因故橫加訶撻則遜
不與競亦不以訴故其親尤鍾愛之少長就傳受書遇談忠義孝
友事則敬聽無倦容有非禮之言輒掩耳不聽而琅琅雜誦宛若
以詩書滌其穢者時值明季流賊竄擾縣西天王寺賊亦作亂頗
猖獗後雖殄滅而市境時有竊發每聞警則舉家走避縣人遂倡
議捍禦君家亦集鄉人結砦自衛歲癸未流賊張獻忠破長沙并
陷縣地迨長沙克後而李自成餘孽復自湖北來竄大吏招降仍
擁眾劫掠如故湘故爲長寶孔道自是兵來寇往三復三陷蹂躪

尤甚雖堅砦巨堡莫不殘破丁亥大兵定湖南時故明將猶率眾來戰勝則據敗則遁縣人死於鋒鏑者莫可勝紀君時年猶未冠侍親亂離中亦瀕於死亡者數矣不意軍潰而西而君父與母竟被掠而去其兄弟亦先後死於兵者三人君痛且憤既收葬其兄弟遂屬兄子於所親棄家尋親並語人曰親不生還吾亦誓不還矣由是出藍田道新化過靖州踰山涉水出入兵戈中數月竟不得親蹤跡但微聞其母似在寶慶然君時已入貴州境矣遂直行越清浪衛而進抵貴陽府城府爲黔之首都有大帥駐此遇同鄉人輒述其狀問之一日有人謂之曰某營有某其狀頗如子言子盍往視急往見之果其父也遂趨跪抱父痛哭已而爲父泣訴避

兵後母亦避難他所微聞母在寶慶未知確否若兄與弟皆遇難死矣言已又哭既促父脫軍中籍遂奉父歸既歸又辭父尋母環寶慶之窮鄉僻壤周歷殆徧而竟無耗最後至一處遙見山坳中微逗炊煙爰繞道迹之則見茅屋數間已就傾頽時已漸暮因往投宿藉以詢訪入戶見二姬操作方理晚炊其一頗似其母急縷述尋母衷曲以詢之其母遽呼曰汝葵生耶吾卽汝母也因相泣如見父時旣而其母語之曰吾至此已數易其所蓋不知去家幾許矣幸遇此姆吾爲彼傭彼與吾食不索值也方謂老死於此不復能見汝矣今汝來吾猶存竟可以歸見汝父豈夢想所能到耶明日其居停沽酒餞之遂奉母歸君家計頗豐自罹兵亂貲財已

罄洎父歸稍爲經理差可自給及母歸又值歲饑常負米數十里外以供食君以勤儉支持門戶善治生家復裕於是事親不離後其親均以壽終其他懿行若建宗祠捐學田設義冢還遺金以及捐賑施粥諸善舉殆不可勝書云乾隆七年以孝旌並祀鄉賢余嘗聞君尋親事苦不得其詳昨於鄉塾中得見李孝子尋親記鈔本一帙字跡譌謬殊甚且多殘蝕反覆數過乃可辨識爰假歸敘次其事以傳之惟其年月未詳地名亦間有缺甚可惜也論曰明季兵難父母妻子離散者多矣卒能一家團聚如李君者益亦僅耳當其時若沈君學黃之給賊釋父劉君邦璽之乞身代父以及陳君其見之負親脫難雖皆傳諸父老究未能詳其行義

卽志乘所載亦祇存其崖略甚可慨也然較諸湮沒無傳者爲差
幸耳余因傳李君事不禁爲之歎息不置也

右傳黃楷盛撰

秦鏡弟欽

秦鏡無錫人廷珪長子順治四年鏡省父長沙既至見父已殉節死撫棺號慟亦死之康熙三年鏡幼弟欽開關往訪始得御父兄柩以歸

右傳秦瀛撰

按孝子父廷珪字廷喜以歲貢生福王時除長沙縣丞江南亡唐王稱號福州督師何騰

蛟檄署善化縣事順治四年長沙破湖湘悉平廷珪與其二女屏居關山衝赴水死僕鄒義為衣冠殯之

皇朝通志卷之三十三

三

陸國安

故明山陰陸孝子尙質父一中渡口遇風舟幾覆質從隄上望見躍入怒濤中擬拉父舟倏舟逆上若有緯之者一中遂濟質竟歿越數日其屍亦逆流際岸鄉人孝之名其渡口陸郎渡質聘妻李氏年十七未于歸聞夫死孝遂孤守終其身年七十而卒孝子旌於隆慶時建坊崇祀今士民並祠貞女於安昌東市孝子立後華字有孫國安者順治五年戊子白寇聚眾劫掠鄉村被賊索餉縛華字入砦國安自海上還拌命闖賊營斬葉伯惠陳玉環兩賊首身負重傷救父以歸乾隆八年余告友人陸君金輪曰孝子之後復有奇孝國安公當配饗孝貞祠使耳而目之者知忠孝節義之

事之實可為而所為事之奇者當其為之皆常事也

右記晏斯盛撰

梁孝子

孝子梁其姓未名武康民家子江南陷其二年羣盜轉入天目西北諸山率夜出城市繫民之富者幽山中爲質視其家之等而上下其贖焉不足則殺之孝子之父被執父故有怨於其黨孝子持金因謀入見賊賊曰若來以百金全若父否則毋污吾刃也指所殺者示之曰骨如是庸可數乎孝子遽歸則鬻產息又益之於撤宅得百金以進賊之客私其三焉賊大怒遂殺其父明年賊敗出降縣縣利賊厚賂令民毋得仇賊孝子聞之仰天大呼曰嗟乎賊今乃得出探懷中刀手磨之卽走至縣遇賊於門呼之曰賊汝今乃得出汝利吾財而執吾父吾財盡而父不見來汝今出而吾父

安在願還吾父賊曰已殺之矣曰願還吾骨賊笑曰吾殺人骨已
多矣若前入山而不能數何有於若父孝子則曠日疾起左手把
其胸而右手自袖間出刀刀入脅一寸衣三襲間之賊不意猝至
大叫仆地門者疾共持之賊得脫入至堂縣大怒謂敢違吾令不
殺汝無以勸降者重鞭之八十閤絕良久復蘇觀者數百人咸驚
歎有泣下者孝子自痛而已左右既曳出復下獄其鄰之程姓者
藥之得不死既出獄復置刀於懷晝夜視之曰汝知吾心賊遁去
孝子時年十八或曰孝子死而成名乃愈於生孝子生民家年尙
幼目不覩詩書奮不顧利害決一舉其心固欲以得父仇也豈復
知有名哉使仇得而身死奚愛乎方賊未遇時志固未嘗須臾忘

也幸而遇賊事不濟而死死安也雖死是其仇將誰報乎幸而不
死賊終必不生是天所以全孝子之身而成其志也雖不死其無
名乎嗚呼若孝子者不其難乎

右傳唐靖撰

易貞言

易貞言字內美湘鄉諸生九歲失怙哀毀如成人廬墓三年不忘
憂戚戊子馬賊寇湘祖老病難行貞言棄幼子負祖入密篠中獲
免父遺產悉讓諸弟婚配諸姪如己子建宗祠修族譜置義田捐
義冢振荒焚券善行尤多前後三舉鄉賓年逾八十猶手不釋卷
鐙下能作細字箬有周易講義五經精義續史易氏家訓愛日堂
集松堂詩集康熙五十一年以孝 旌雍正二年入祀鄉賢四年
入忠義孝弟祠子宗瀛宗澗宗瀛字公仙號愚民幼工詩文年十
二受知於姚學使旋食餼屢躋棘闈雍正己酉以優行貢成均大
司成薦入慎郡王藩邸甚見禮遇乾隆丙辰舉博學鴻詞尋選浙

江曹娥場鹽大使調東江場卒於官性孝友母病齧指瀝血爲文
額以身代遂愈與兄弟白首無尤著有翠濤書屋昨非集詩文各
二卷宗浚字公申號實庵監生行敦孝友族黨無閒言親歿哀毀
逾常廬墓三年哭奠如初喪自少好學博極羣書乾隆元年舉博
學鴻詞名譟京師充慎郡王府教習七載歸書世孝二字贈之箸
有五經辨疑四書釋註趙恭毅公實政錄十二卷性理精義岸亭
偶談歷代名賢名媛齒譜十三卷半霞樓詩文集其廬墓一圖名
流題詠成帙十四年奉 旨旌表建坊生平疏於財捐置義田義
冢年逾九十手不釋卷卒祀孝子祠

右傳黃楷盛撰

危階

危階黔陽諸生順治戊子餘寇潰入邑境階急封父墓負母走避
會同深山中市米百里外道遇虎祝曰吾母當生天佑我虎竟去
後返居柳溪兄弟耕養缺牛嘗以身代出則秉耒入則橫經復因
寇亂逃竄風坡母受驚病疫思肉食不可得階刲股以進迄母歿
廬墓三年胞兄台因亂失散亂定後跋涉追尋苦無音耗於黃州
得遇堂弟接歸撫愛兄子周恤親鄰邑令張四教爲作錫類詞十
首今錄其三新家別云一坏土猶然溼賊之來何其急去去不能
畱回首潛焉泣死者寄黃泉生者走原隰奠酌如有期歲暮賊當
戢三虎祝云於菟於菟胡爲乎中衢少者爾之子乎老者爾之母

乎爾有母隨爾趨我有母待我哺我不履爾尾爾勿啞我軀緊我
來時釜中虛垂白於今正倚閭風坡竄云昔聞有亂者實惟王與
馬焚殺恣猖狂衝巷血流赭死者骨如山奔者哭聲啞老母已難
行嬰兒須暫舍性命寄深林飢寒忍曠野吁嗟寇亂何時平夜月
晨風淒淚下

按危孝子之孝至今萬口爭傳舊通志僅載遇虎一節而遺其割股故爲作紀事

右紀事陳昌材撰

湛會桂

舒心忠
胡問椿

鄭熙齊

邱之登

曾學傑

范克襄

湛會桂字蘭友湖南激浦諸生順治五年賊牛萬才掠龍潭鄉刃創其弟會極會桂憤恨夜率壯士襲其營殺傷甚眾賊遁去會桂知必復來也益集眾嚴防越數日賊果至鄉勇齊起奮擊賊不支仍遁去自是不敢犯龍潭同時有舒心忠字若訥邵陽貢生博綜多通所著古文詞蒼莽佶屈讀者驚歎父有翼官兩浙運同清介不妄取歸後家貧心忠殫力營養潰兵之亂有翼年九十心忠負避山中賊至有翼坐未起心忠侍側不動賊環視異之舍去明日賊大至心忠負父他走十數武力不能支賊縱火延燒林莽有翼罹於難心忠殉焉鄭熙齊靖州人年九歲其祖母爲王進才兵所

執照齊涕泣請以身代賊義而釋之嘗割股療父疾得愈邱之登
黔陽貢生流寇馬進忠擾縣境其父被擄去之登蒙險間行卒尋
以歸兄弟析產讓腴取瘠族里稱貸不責償貧乏者多所調卹家
世素封而被服如寒賤宅前有五松日攜冊坐誦其下其高致如
此何學傑字綱宇衡陽人事父母不離左右 國初縣內附尙爲
亂兵蹂躪學傑詞逃兵將至匿其母他所而負父以逃父不從乃
與僕朝夕圍守防衛甚密一日兵至學傑號泣哀懇全父命兵索
多金欲加刃父驚仆學傑覆父體以背受刃雷復大震狂飈轉地
起兵懼棄刃逃父子俱得免范克襄字日章桂陽人歲貢生紅寇
犯縣掠其弟及子去索重金以贖克襄謂妻李曰寇索貨重雖罄

產不能兩全姑舍子贖弟可乎妻泣而從之弟獲免其後李無別
出再娶胡氏生子奇少有文名由歲貢任常寧訓導胡開椿字茂
生桂東人有膂力讀書曉大義亦以紅寇犯縣掠其父母及家屬
去開椿與同母異父兄張景行中道奪還圖所以報賊會除夕乘
賊不備與景行夜半潛詣賊砦火其柵殺數十人賊驚遁有被虜
少婦七拜且哭願委身從開椿戒景行曰吾親屬初被虜亦猶若
輩也謹視之悉訪還其家卒年九十九

右傳李元度撰

國朝文獻通考卷之三百三十五

三

鄭江 吳國華 何履旭 李盛山 林開登

鄭孝子江字若庵福建侯官人慷慨有至性母葉病將革孝子割股和羹以進母霍然起曰兒創無恙乎適神告我病將立瘳順治五年大饑穀數斛可易田十數畝孝子謂其妻陳氏曰美田宅易得也乘人之急而利之不義擁餘粟而坐視無告不仁且遠計子孫何如近憐兄弟氏曰善乃以穀分贖宗族塾師劉慶開妻歿爲翼其孤里中有周九者重困官役父子三人將仰藥孝子排戶入贖金力救其死有販豕者被竊喪其資窘甚走投河孝子資以金如其亡數得不死聞者義之又吳孝子國華何孝子履旭皆閩籍並割股療親病而李孝子盛山林孝子開登則並以割肝救母聞

國華福清人父鼎臣官永定訓導病篤孝子割左股作羹以進未
愈羹右股遂痊越三年父沒海寇偪城孝子負母竄母病孝子自
割如前病亦愈履旭字君章福清人父其達早世奉節母葉氏竭
力色養母疾篤蒼黃籲禱一夕夢神授藥手按其股乃焚香告天
割股和藥以進母尋愈待兄弟極友愛著有心鳴集盛山姓李氏
羅源人也母鄭蓮重疾孝子禱於神割肝作羹以進母竟卒孝子
亦卒雍正六年事 聞得 旨割肝療疾事雖不經而其迫切救
母之心實難得而可憫其子旌而同時林孝子割肝救母年纔十
四其事爲尤奇林字亮中名開登福清人

右事略李元度撰

李盛山

雍正六年三月壬子諭內閣覽福建巡撫常賚奏稱羅源縣孝子李盛山割肝救其母病傷重身故請加旌表部議以割肝乃小民輕生愚孝向無旌表之例應不准行朕思我世祖章皇帝

聖祖仁皇帝臨御萬方立教明倫與人爲善而於例慎予旌表者誠天地好生之盛心聖人覺世之至道視人命爲至重不可以愚昧而誤戕念孝道爲至宏不可以毀傷爲正理立法垂訓實有深意但向來地方有司未嘗以聖賢經常之道與國家愛養之心明白曉諭開導編氓是以愚夫愚婦救親而捐軀殉夫而殞命者往往有之既有其事若不予以旌表恐無以彰其苦志而慰其幽魂

所以數十年來雖定不予旌表之例而仍許其奏聞且有邀恩於常格之外者仰見 聖祖仁皇帝哀矜下民之 聖心如是之周詳而委曲也孝經曰身體髮膚受之父母不敢毀傷孝之始也孟子曰事孰爲大事親爲大守孰爲大守身爲大此皆言人子一身乃父母之遺體雖一髮一指不可偶有虧損以傷父母之所貽也孔子曰父母惟其疾之憂蓋父母之心無所不至偶有疾病尙以爲憂設有不肖忤逆之子父母怒而矜之若純孝之子則父母之憐愛又當何如也若以己身患病之故致其子割肝肉以充飲饌和湯藥縱其子無恙父母之心斷無不驚憂慘惕不安之理況因此而致傷生又豈父母所忍聞者乎夫父母有疾固人子所當盡

心竭力之時而孝道多端實不容致命捐軀於一節孔子曰生事之以禮死葬之以禮祭之以禮是以人生孺慕之誠原通百年而無間者也人子一身承先啟後負荷甚鉅若舍生殞命於倉卒之間而忘宗社繼續之重非所以爲孝也況人子於親本乎天性儻能盡至誠純孝之實則親病雖篤呼籲請禱力省一身之過誓願爲一正人如此必能感天地動鬼神何須割肝剖股以爲回生之良劑乎家庭之行惟在至誠至敬善體親心不必以驚世駭俗之爲著奇於日用倫常之外也至若婦人從一之義醮而不改乃天下之正道而其間節婦烈婦亦有不同者烈婦以死殉夫慷慨相從於地下固爲人所難能然烈婦難而節婦尤難蓋從死者取決

於一時而守貞者必歷乎永久從死者致命而遂已守貞者備嘗
乎艱難且烈婦之殉節捐軀其閒情事亦有不同者或迫於貧窶
而寡自全之計或出於憤激而不暇爲日後之思不知夫亡之後
婦職之當盡者更多上有翁姑則當奉養以代爲子之道他如修
治蘋蘩經理家業其事難以悉數安得以一死畢其責乎是以節
婦之旌表載在典章而烈婦不在定例之內者誠以烈婦捐生與
割肝剗股之愚孝其事相類假若做倣者多則戕生者衆爲上者
之所不忍也向來未曾通行曉諭朕今特頒諭旨著地方有司廣
爲宣布務期僻壤荒村家喻戶曉俾愚民咸知孝子節婦自有常
經而保全生命實爲正理則倫常之地皆合中庸不負國家教養

矜全之德矣儻訓諭之後仍有不愛軀命蹈於危亡者朕亦不槩
加旌表以成閭閻激烈之風長愚民輕生之習也

右東華錄王先謙編

日本書紀卷之二十一

四

國朝耆獻類徵初編卷三百七十六目錄

孝友二

虞爾忘 虞爾雪 胡鹽

段正棡

鄭之洪 陸彥龍

揭恂

陳靜恪

謝獻恂 陳開運 賴用賢 李人鳳弟人彪

李人鳳弟人彪

黃向堅 顧廷琦

黃學朱

楊希皋 周炳文

毛周尹

趙希乾 朱重暉

王長祚 子璠 王國林 劉國賓

趙明徵

國朝耆獻類徵初編 卷三百七十六 孝友二 目錄

皇朝通志卷之三十三

梅有振

侯曦 子麟然

崔長生

吳璪

胡甲桂 葉增

曹超 張維德
張振旂

國朝耆獻類徵初編卷三百七十六

通奉大夫前署江西巡撫江西布政使司布政使湘陰李桓輯

孝友二

虞爾忘 虞爾雪

虞爾忘爾雪無錫膠山人父罕卿充社總 國初多盜晝殺人膠山盜胡鮑三爲之魁罕卿計團鄉勇行往白縣中途遇一村少執手罵賊罕卿意其罹毒也語以故且告姓名村少謝曰幸甚再越宿罕卿退自縣聞門外遽呼虞罕卿出見卽所遇村少也左右皆操刃立縛罕卿去是時二子方田作比婦女奔告二子急荷農械馳救父父已死圍塘橋下矣順治五年六月三日也於是二子收

父尸斂葬密求殺父者主名且泣曰團鄉勇父志也縣批故在遂
相與招徠部署立團冊二子於團首自署名曰爾忘曰爾雪警忘
仇冀雪憤也於是遠近響應鄉皆連結盜失勢纍纍見獲凡獲盜
必詰殺罕卿者乃知前村少者胡鮑三養子杜息也三走江陰斃
於獄而息謀入海與所左右二人夜治行爾忘爾雪偵知之饗壯
士使躡後而身掩至息家息就縛並縛二人牽至罕卿死所比明
爾忘歸抱罕卿木主至爾雪熱釜其旁爾忘截息舌釜炙以祭爾
雪不勝憤取心肝炙之且祭且噉眾亦爭齧食之爾忘迺斷息頭
懸腰間將刃二人其一入已膽裂死一人乞哀遂沈之河爾忘爾
雪懸息頭於父墓再拜瀝酒大慟乃歸是爲七月十六日自後邑

境亦甯

右合傳素瀛撰

卷之四十一

胡直

父病日夜視湯藥父歿一慟嘔血竟以毀卒

右杭郡詩輯張維屏錄

按直仁和人順治六年己丑進士

皇朝通志卷之三十一

三

段正杖

段正杖黔陽諸生順治六年流寇馬進忠竄境正杖負母奔避賊掠其父珖遠將加刃正杖從山上望見號泣奔求代死賊為感泣兩釋之康熙六年邑令張扶翼上其事又見正宸亦以孝行著聞

前歿扶翼復為作紀異記

紀異記投生珖遠字公亭黔陽子弟鄉人余初莅黔時所拔士也行篤而文優

生二子長正宸次正杖正杖即余前纂修黔陽孝行志所載之孝子也順治己丑邑為亂兵所據賊獲生將死之正杖從山上呼賊緩父死辭母與兄嫂與之訣疾趨賊以代父賊義之釋其父令正杖為負擔送至河與之衣與鹽釋令歸後正宸夭死正杖有子而幼生負其孫聞往宅後廟中與之嬉由宅至於廟三里為癸卯三月朔也日過午負孫歸途次生長兒正宸自後至代生負生視之正宸也言貌衣履一如其生竟不知其已死也生與之孫負以隨比至宅後正宸止不行以所負兒還付生生忽驚悟日兒已死何得至此正宸忽不見生篤行君子也為余言如是余日嗟乎是何君兒之多孝子也正杖不難捐其生以免父之死正宸且忘其身

之死以代父之負父子兄弟祖孫依依戚戚不畏夫斧鉞不問
於生死形神雖異天性自親也嗟乎是何君見之多孝子也

右傳王光電撰

鄭之洪

孝子鄭姓諱之洪字青山吳郡人卒年四十有六再娶於顧繼室
孝婦顧氏後君一年以歿同葬於長洲縣之武邱鄉其爲孝子與
孝婦以何徵曰孝子之父保御三山君諱欽諡實名之而信也傳
曰生事之以禮死葬之以禮祭之以禮孝子有此三者故全也今
鄭仲子之喪保御年七十餘矣惻惻然爲其子承衾焉下綽焉旣
封而命其孫櫛以反虞來哭若死者有知拊心蹠踵將無以卽安
地下矣於孝乎何有曰孝子之不克終其養天也緣孝子之心知
其無所不盡緣孝子之父之心知其子之無所不盡也從而名之
以孝所以慰其父而通乎孝子之窮通乎孝子之窮奈何保御之

言曰吾仲子之事我也屏氣而愉色視下而應唯寢處則扶以侍
非吾遠出未嘗宿於內也夙興燭湯實卮敬進飲已視沃盥吾飯
亦飯齋亦齋吾止飲亦止飲其視吾疾藥必嘗衣不解帶母歿執
喪致毀事後母如所生兄亡以其子子之遇寡嫂惟謹詩曰孝子
不置永錫爾類仲子有焉顧著姓也孝婦婉慈莊敬既饋而中外
交賀通詩書工箴管無違色無諛言無私蓄酒漿必潔溫清以時
妯娌稱其睦也僕御稱其仁也詩曰孔惠孔時維其盡之孝婦有
焉嗚呼保御之稱其子者盡於此乎余於鄭中表也悉其內行知
仲子之孝在乎保御之爲善而先意承志之爲大也保御爲善奈
何曰鄭氏之以術療人不收其直數十年矣里中貧無廢者喪無

樽者禍患之藁饋流離之勾貨精廬塔廟之營齋利生老人傾囊
倒庋設法勸分措措然盡氣極力唯日不足而秉家之成外則仲
子內則孝婦有無匱乏唯恐傷於心而逆於耳颺勉措挂以助之
施故保御無百畝之產而常具十人之饑雖輻輳旁午苦身爲物
而客過輒從容一笑爲樂仲子則終日蹙然懼其親之勞而欲以
身分之也吾吳徐宮詹勿齋楊孝廉維斗致命之後子孫朝夕不
給保御以己女女維斗次子以仲子之女女勿齋孫傾身收卹勿
吝保御開敏習於名義而仲子則真涓悃福體親之心急人之難
當飢忘食泣下霑膺旁觀或以爲迂且怪而不知其天性至誠爲
不可及也已鄭氏自唐宋來世有清德吾同年士敬爲保御再從

弟相與立祠堂置講舍修復其祖所南先生之家法余每過其地
羨兩君各有壯子持門戶得以餘年偕隱太息久之未幾士敬之
少子之鑑卒其年秋仲子又卒嗚呼今天下爲善者懼矣彼夫恣
睢鏗薄者之富貴長子孫而行德於鄉死喪之問狎至卽天道將
何勸焉豈仲子平生弔災恤患徭徭隱惻其夙命實近而不覺遽
巡感損歟抑其夫婦聞道有得臨終正定嗤世人之怛化而遽反
其真歟若夫所南之心史湮沒於重淵絕地之中三百年而後出
其高風灑氣旁礴太虛不屑其子孫以塵滓乎混濁君乃蟬蛻而
從之游也然則仲子之死賢於生也多已又復奚憾乎爲之銘曰
君家三杏與君同齒君生亦生君死亦死人之云亡木猶如此山

之崖水之浹墳三尺歸然峙刻日月自今始爲義門爲孝子其雷
以俟後之良史矣

右墓誌銘吳偉業撰

陸彥龍

陸子驥武者名彥龍同郡仁和人也祖振音治易舉孝廉學者號庸成先生父允同字汝錫邑茂才有長者行母鍾始娠身臨月夜夢有龍蜿蜒五色自空下繞庭戶翌日產驥武頭角嶄然家人輩環視意有非常絕愛之爰命曰夢龍已又更今名云驥武兒時早慧不好弄出口成章少長倜儻有大度既弱冠益務博學工文詞補邑諸生累試輒高等意氣爽邁饒姿致修長白皙舉止軒軒被服嫺雅甚都往酒閒談次遠近畢集驥武尋至高冠廣衷顧盼偉如音吐絡繹亡慮傾其座人矣華亭陳給事有當世名嘗一過湖上驥武偕數輩通問值臥時不起卽叱問者覆刺貽詩風之給事

接覽歡然追謁修謝爲延譽當塗彌相契重蓋談者兩賢之居平負其高才狎使儕俗或指目爲狂生載一被放益跌宕好酒及色里中抑鬱不自得歲中彊半襤被走四方所至見遲諸公聞爲治橐中裝累數千金輒散去坐是家徒四壁立亡有日晚晚不能舉火有蹙額相告者意豁然也驤武苦貧負郭窮巷然聲稱大起交游徧海內乃獨與其同郡陸圻培堦兄弟及朱革斯徐繼恩吳百朋陳廷會孫治諸子者最相友善文義劇切頗有澄清天下之志會兩都告變北兵且渡江一日十數警望風奪氣度此鄉無可爲者於是搯擊流涕啟其家大人挾策如新安郡適故御史金聲特起監軍驥武乃從口畫便宜緣與用事者牴牾大計不就當是時

唐邱稱制乃閒道去閩士大夫咸重驥武名交章薦之詔特徵令
所在有司身爲之勸駕刻日詣行在所驥武上戡亂六策其語皆
切時弊可用旣報聞令解褐授職禁苑驥武以己本儒生宿負才
望恥用口舌得官乃自陳願就制科未幾省試報罷聞事亦債乘
輿不可問郡縣悉烏獸竄驥武遯跡入武夷山中爲人窮索屢陷
於危又比歲兵燹道梗閩浙息耗斷絕其父汝錫公坐无妄被收
發憤病卒而驥武初不獲訃踰歲始聞之日驚號暴仆已仰天椎
心嘔血盈斗倉卒立就道見星而奔重趼遠里比抵舍望見靈筵
以額搏地曰龍不孝違離膝下不自意大人之坐累至此極也因
號慟扶服叩頭母夫人前握手二弟於邑勞苦俱相鄉失聲左右

國朝書林類傳卷三十一
者莫能仰視頃之力疾營葬事毀瘁萬狀血膈寢劇末由進勺飲
益聞訃踰月而還里治喪治喪又踰月而疾革以死死而亡子有
一女春秋則三十有六耳先與驥武友善者陸培以殉難歿至是
則陸圻孫治佐乃弟雲龍爲經紀其後事乃六七君子刊定遺著
如發餘藁既徵君集凡若干卷行世

論曰始驥武年少高才意不可當世乃竟隕於一第雖抱書叩闕
見警人主而時會齟齬卒用納履何其舛也旣以遭亂畱滯一哀
絕命枯魚銜索自古痛之若徵君之至性發中未遑以生養不可
謂非死孝者矣語稱不得中行必也狂狷在昔禰正平阮嗣宗之
流負俗未易要其節遜較然豈與鄙儒小拘同類而道哉悲夫今

僕於陸生亦云

右傳柴紹炳撰

皇朝通志卷之二十一 孝子又二

下

揭恂

揭恂字木男廣昌人幼聰邁力學工詩文與弟恂闔戶爲文茹精
吸華醞釀以出而文日益奇同宗重熙一見愕然曰此千里馬也
學使侯峒曾吳炳皆偉之國變棄諸生抱頭以伏時山谷竊發出
沒無常恂奉父母奔避歷七八年遷徙十餘處跣足亂髮躬自樵
汲以承歡嘗采松林呼老樵爲師得結束乃負去然亦時時爲文
以自娛所著有尙書蘭瓶園集頌讓賦會辛卯寇大掠父繫賊營
百計求之不得恂泣曰父陷吾安用生爲乃奮自入營代父父脫
恂竟死於賊時年三十九恂爲文深折峭削有類柳州而耳目所
際多不可狀其感情激傷幽咽斷絕至於無如何者讀者往往流

涕邑處士李自登曰木男者文人孝子也自登字孟雲亦棄貢士
走匿山閒酒酣輒痛哭大呼哦吟有聲清婉淒切不能卒讀云

右傳盛大謨撰

陳靜恪

人生百行莫過孝友就其造極而言之則孝爲難哀哀父母生我劬勞自非立身行道養志尊親行造其極未足以語於大孝也孔子稱大孝者舍舜之外無他焉就世俗而言之則友爲難愛父母者子也愛子者亦父母也人子能如父母之所以愛子者以愛父母則孝矣不然安常處順奉養服勞雖未爲孝亦未嘗以不孝聞至於兄弟其始也分形聯氣傳衣共食至戚也迨其後也妻子閒之財產閒之奴婢閒之始則財不相通繼則氣不相下私意一起寢以疎薄自非友悌深至外盡其和內盡其誠鮮能免此書曰克諧以孝烝烝乂不格姦解之者曰進進於善不至於姦也余聞之

師曰非也言其和孝懇至自能進進於善不格其姦也格如格君
心之格君臣以義合故積誠以格之陳善閉邪格其非心父子兄
弟以天合烝者詩所謂烝之浮浮也若以格君心者格之則有所
不合矣記曰人子之事父母也起敬起孝悅則復諫余亦曰仁人
之於兄弟也起和起誠務修其極苟以其難處也而置之是忍也
以其必不可已也而驟之是激也不激不忍起和起誠弟之至也
常則既翕而和樂變則同憂而共患誠與和之所積也余讀陳靜
恪先生傳有感壬辰海氛之亂先生仲季同圍城中仲兄以拷餉
就繫先生自詣軍門請代帥憐而義之餉得稍減事平家既落以
眼疾廢仲氏家尙饒或勸分其餘財不答此二事者余甚偉之常

人等錙銖於平日者有矣況已縑而兄饒乎稍稍於毫髮小事者有矣況遭難而冒代之乎先生之子名元麟字石民與余交最篤石民之事親也至孝與先生晨夕相隨蒔花茹茗考古談今父子之間優游怡愉樂之至也故先生兩目復明石民登鄉薦先生猶及見之先生行事李約墅先輩既爲之傳林君佶人又書而跋之石民屬余書後余嘉二事之可風也故詳論之且以見能孝者必能弟能弟者必能孝能爲悌弟者必生孝子凡百君子敬而聽之

右書傳後蔡世遠撰

--	--	--	--	--	--	--	--	--	--

謝獻恂

陳開運成珠

賴用賢

李人鳳弟人彪

余萬春 鄧

謝孝子獻恂福建甯化人事親至孝嫡母雷氏無出父客外再娶
王氏生孝子父旋卒孝子扶生母歸里奉嫡母雷克盡子道雷臥
病孝子割股和藥以進病立愈順治中邑令何鳳岐表其門爲請
旌焉時有陳賴李余諸孝子皆閩產並以卓行聞而鄧成珠者家
貧至傭力以食亦以純孝著陳孝子開運字而鈞清流人父病割
股以進兄弟八人友愛無閒言縣令賈漢儒請旌其門同邑諸
生賴用賢字鴻逵侍母痾疾十年躬調湯藥衣不解帶母歿苦寢
柩側哀毀骨立五世同居人稱陳賴云李孝子人鳳字亦凡長汀
諸生嘗爲其祖母舐癰居父喪不食七日弟人彪亦割股療親病

時稱一門兩孝子余孝子名萬春清流人邑諸生母病刲股調藥
母卒哀慟以頭觸柱絕而復甦苦次歛粥茹素三年如一日鄧孝
子成珠者泰甯人也家故貧父早卒備於廖氏距家數里日乞米
一合昧旦趨送母所疾趨反供主役亡何母日盲不能炊乃負母
依主家旁舍朝夕手自飯之久而主有微言孝子曰某自減餐奉
母不敢重累主人也晨昏弗懈便溺必親者五年母卒日夜長號
聞者皆流涕葬畢辭主人不知所之

右事略李元度撰

黃向堅

黃孝子名向堅字端木建文時殉難給事中諱鉞之裔也先世常熟人後徙家蘇州之西郊孝子之父以崇禎癸未選得雲南大姚知縣挈其室及弟之孤赴任孝子畱家已而兩京陷沒閩浙不守西南復立國江楚兩粵連年戰爭行旅斷絕雲南遠在荒徼書問不通孝子思戀晨昏日夜西南望慟哭日盡腫一旦忽自奮願獨行萬里訪親親朋謂途中險阻兵戈卽去安得達止之不可拜祖墓別妻子而行誓不得父母不歸在途半年達大姚得見父母皆無恙畱五月餘復奉父母發大姚入閩月抵家孝子一身跋涉山川歷戎馬縱橫之地往還曲折二萬餘里竟得如其志余奇之因

撥其紀行一編節而傳之孝子以辛卯年十二月朔擔一囊一蓋兩草屨啟行從吳江入嘉興至杭州渡錢塘江歷嚴州衢州入廣信之玉山歷撫州臨江渡章江歷袁州入長沙之醴陵渡湘江歷寶慶至武岡州時壬辰二月下旬也八九十日之中陸行者十九江行者十一觸冰雪風雨陷泥淖涉深溪踰峻嶺手常擎葢酸楚不能舉足重繭痛不可忍或血瘀赤腫則刺血出之復行體憊甚往往僵臥道旁人見孝子問知其故無不歎息願以爲困憊如此而前途尙遙又兵馬塞路荒山多虎不可往孝子知有父母不顧其身乃日出門時早知如此雖艱危敢不自力乃養足五日復前行由武岡而西歷靖州循沅江而上入貴州之晃州貴州自丁亥

以後北兵自楚攻其東西兵自蜀攻其北王皮兩將軍左右支大敵固守累年不下至己丑爲西兵所敗故境內遭殘滅殆無孑遺自靖州洪江驛以西至晃州驛鮎魚坡諸處不惟重巖絕澗深谷荒溝上下艱難而城郭邱墟人煙斷絕暴骨如莽又其地苗獠雜處畊者皆持矛負弩矢自衛荒茅漲沙之中往往得虎跡行過戰慄不能自保次平溪有關則帥府在焉兵衛甚嚴以孝子短髮吳音疑爲奸細執以見主帥孝子涕泣以情告得免以後凡遇官吏無不盤詰然從此所歷山川風景所見官吏人民別一氣象江南風俗變革六七載忽睹此如異國焉自平溪西南歷鎮遠偏橋一路高山排列深溪架梁幽險如鬼窟將至平越山勢益峻兩旁皆

夷落土人云往時苗常出爲行旅害今十里立一塘而塘兵又多
爲虎所食孝子聞其言心惴惴常恐不免自平越而西歷清平新
添龍里又西南至貴陽遇徽州程姓者知其父履歷告之孝子於
是知父無恙已挂冠五年矣貴陽新建王府殿宇崔嵬護衛甚肅
象馬塞道文武鵠立程姓者導孝子至前奏事明日得令票遣去
孝子乃得復前途中兵馬紛擁爭前驗票或擊破其手中蓋自是
不復能蔽雨歷威清平霸普定安住及關索嶺嶺陡絕登至半嶺
喘甚力盡而仆有老僧飲以茶久之強起踰嶺而西旣下嶺則布
帳漫山徧野人馬縱橫旌旗蔽空礮聲如雷震動山谷孝子行遠
巡一騎突前執之入營詰問驗票慰勞爲設食問之曰安西前營

也前行數里復遇後營軍容如前營孝子雖一時震炫耳目然在途已習見又知去二親不遠喜多於懼矣自嶺而西渡盤江歷安南衛普安州去普安數日程爲安隆安隆故所也今改爲府非道所經遂入雲南之平夷衛遇故陽宗知縣浙東錢士驢孝子於是知其父起居益詳今在白鹽井也西歷霑益曲靖渡楊林海子至雲南府雲南自乙酉秋遭沙土司之亂沐藩失守遠竄丁亥西兵入平土司諸寨迤東一路殘滅殆盡惟省城百姓迎降無血戰之苦今爲之改觀一如都會焉時江南人之流寓滇中及滇人之官於江浙而不得歸者聞之皆來集如桃源中人遇漁父競相叩問聒耳不休自雲南又西並滇池出碧雞關歷安甯過楚雄而抵姚

安姚安府官爲遣役送至白鹽井時五月望日也計在途一百九十五日自蘇州至此蓋萬里矣孝子至門一婢望見更熟視急走入白主人曰蘇州相公來主人不信方詰問而孝子上堂矣孝子拜父母先賀無恙後謝候起居晚父母驚喜亦拜相勞苦起而相抱號泣蓋孝子與父母隔絕十年矣所攜弟之子時從外負薪歸驚疑立門外探望其父呼進各認面目乃兄弟相拜泣問昔日僮僕無復存矣所居山舍自書麓之外無長物其父語孝子曰予自丙戌冬蒙按臺吳公薦得行取至丁亥春報至會滇西亂道阻不行誓不復仕數年以來家鄉隔絕無復歸夢今春在琅井於友人案上得李卓吾續藏書載王原尋親事歎息謂今世當不復有此

人不意汝乃能之原之父時年六十有四與吾年適合亦先兆也
久之孝子啟父母作還家計父曰吾年老頗思故鄉然途中艱阻
奈何孝子曰既可來何不可往所苦者無行資父曰苟能往資尙
不難乙酉秋滇中猶鄉試我分房校士得門生八人當以累之孝
子遂以六月初旬持父書詣諸門生家南歷楚雄遇地震城頭雉
堞皆崩孝子幾不免至南安以病日留者旬日又西北行歷賓川
過雞足山循金沙江上鶴慶尋上劍川其地漢夷雜處人皆衣羊
皮氈衫帶刀出入見之心怖還歷鄧川大理望點蒼山循西洱海
而東海水綠如柳汁方大雨水漲躡海岸行數里浪涌過膝前及
米甸聞有悍兵劫掠夜半走荒谷鸚鵡猿狖聲出樹間復尋山得

路歸白鹽井時九月杪也又奔走四月往返三千餘里矣父之門
生遇者三人皆有贖贈而行資未足其父曰歸途尙有門生在黑
鹽井孝子曰如此可行矣乃詣府遞告歸文書欲執符信以行卒
不可得諸故人謂孝子父子亂世流寓亦常耳何必故鄉因止毋
行復畱連久之孝子具籃輿與二親乘已與弟步從以十一月四
日發白鹽井次姚安過冬至而行及黑鹽井果如所望斧資得不
乏遂出祿豐至雲南時得黔楚消息知南北方相持戰爭不息父
子坐旅中恟恍累日因畱過歲詣將軍府中得給票癸巳正月十
一日發雲南出歸化第一關途遇來者云黔中雨雪四十餘日雪
深至馬腹著樹皆冰如劍戟心以爲憂而行不爲之阻尋入貴州

界則凍雲飛雪陰霾厲風祁寒偪人已而積雪漸消流潦縱橫瘴
霧蔽天如在甌中前及平壩有騎兵並輜重及所擄婦女數百千
計跨驢者策杖者相扶攜者駱驛而至問之曰從廣西來又前遇
敗兵數千擁一象踉蹌散走無復部伍則云從四川來蓋是時安
西戰勝於桂林撫南敗於保甯勝兵所擄獲者敗兵之奔還者皆
道黔中故孝子先後遇於途云自發白鹽井至平壩皆孝子來時
故道顧以爲今歸有家口非來時獨身比慮貴陽有阻乃迂道從
龍場驛而北歷養龍渡烏江入四川之遵義界由思南達思州所
歷三度關鸚鵡溪武勝關雲盤寨諸處皆險仄荒深寂無煙火惟
見黃茅白骨夜則聞鬼哭聲虎豹嗥嘯或突其前往往魄奪神駭

自思州南及清浪始復從故道入湖廣界則所在潰兵暴掠蓋是時滇兵新敗於武岡也乃多從間道行及新化方得脫險孝子爲父改裝易服前及藍田鎮始舍陸從水孝子乃得脫草鞋奉父母登舟渡湘江將出醴陵故道聞前路有警又改從北渡洞庭中流風甚水波惡柁壞前帆索絕舟欲覆者屢矣頃之船竟隨浪涌至岳州城下尋至武昌沿大江過黃州入九江自湖口入直隸之東流歷安慶池州蕪湖采石至南京望鍾山沿揚子江下鎮江歷常州而歸蘇州六月十八日也自孝子始出門至是越三年計五百三十餘日凡歷京省七府三十有三州縣衛司關驛鎮砦不可勝紀計行二萬五千里有奇若夫山川之高深靈異古蹟之名勝木

石鳥獸之奇怪天時地氣人民風俗之變不可殫述且孝子所過皆疾行又艱苦萬狀亦不遑詳也

右傳歸莊撰

黃孔昭字含美吳縣人中崇禎癸酉鄉試官雲南之大姚鼎革後兵阻不得歸子向堅字端木子身往尋之以家事付其妻曰此行不見父母決不歸也宗族鄰里皆阻之不願旣出門遇客之舊往滇者詢之告以道路之遠山川之阻戈鋌之擾潛狙虓虎之虞與盜賊剽掠猺人獯人番鬼之險惡復阻之卒奮然往一葢一笠披零丁帖走萬里外越關隘數百重將至滇滇人訝其形容衣服不類欲加以刃時兵戈未靖疑爲閒謀也向堅告以實慟哭如嬰兒

眾釋之至白鹽井遇父母及從弟向嚴俱無恙喜極而泣蠻獠感
動踰一年得歸歸時途中與弟親舁籃輿怡然無辛苦色也始順
治八年十二月訖十年六月往還二萬五千餘里吳人作樂府傳
其事

右傳沈德潛撰

黃孝子端木名向堅先世常熟人後徙家蘇州之西郊父含美舉
人以明崇禎癸未選知雲南大姚縣挈其室及弟之孤上事留端
木於家已而明亡閩浙不守西南復立國江楚西粵連年戰爭行
旅斷絕滇南遠在荒徼書問不通端木思念父母日夜西南望慟
哭目盡腫一日拜祖墓別妻子將入滇親舊以途中兵阻不得達

止之其妻亦哭而送之曰君以親故遠行豈復以妻子爲念然兒
齒稚脫君更不歸則誰復能知君者然端木終已不顧徑行時順
治辛卯十二月朔日也壬辰五月望日至姚安府是時含美已棄
官五年矣居白鹽井山舍中端木至登堂拜父母賀無恙謝起居
晚父母驚喜亦拜相勞苦起而相抱號泣含美前所攜弟之子時
從外負薪歸驚見相拜泣問昔日僮僕無復存矣居數月端木啟
父母作歸計念無以爲行資而先是含美以乙酉秋試分校得士
八人冀其資助端木持父書詣諸門生家所遇三人皆有贖贈往
返復三千餘里端木具籃輿與二親乘已與弟步從以十一月四
日發白鹽井歸吳之日癸巳六月十八日也白始出門至是越三

年計五百三十餘日凡歷京省七府三十有三州縣衛司關驛鎮
若不可勝紀計行二萬五千里有奇乃次其山川道途所經自爲
圖十二自記之

右聞見錄吳德旋撰

紀程曷爲而作吾吳孝子黃君向堅端木爲其親作也親者孰謂
謂孝子之父含美先生也先生名某崇禎癸酉舉人明末知雲南
大姚縣以兵阻不得返孝子徒步往尋之故有作也曷爲謂之紀
程孝子之行也始於順治辛卯冬十二月訖癸巳夏六月自吳入
滇復自滇奉其親歸吳爲日則五十有餘旬爲道路則二萬五千
餘里中間疾風盲雨之嗟懸崖絕壑深谿危狎之恐山妖木彪猩

貽豺虎與夫獠人獠子唯盱眙之虞烽煙戎馬營壘關隘之警
無所不紀未見其親則憂憂而思既見則喜喜而繼之以泣舉凡
家人父子淒傷款接之情亦無所不紀故謂之紀程也予受其書
於徐子禎起讀之既竟作而問客曰昔文安民王原大理民趙重
華皆嘗尋親士大夫之賢者亦嘗爲傳爲述以行矣乃今而復見
孝子然則孝子與王趙孰難一客曰王趙難予曰何謂也曰王趙
之違其親或在羈貫或在襁負而其父又細民也所執無定業所
游無定方東西南北茫茫焉俛俛焉故其尋之也難孝子則不然
雖相距萬里而含美先生顧居蠻獠中無恙也孝子又熟習其親
之音容笑貌豈必如王趙者占之以夢決之以下導之以異人與

予曰否否王趙遭逢承平其往返於道路也市不晨易犬不夜吠
海內一家雖難易也當孝子旁皇羽檄之間蒲伏無人之境辮髮
頂笠言與服俱異藪足鰲面絕無人色遠方之人視之不猜爲閒
謀卽謀爲匪類其幸脫於刀刃劍鋒者僅耳由是觀之雖易難也
蓋含美先生之意亦云爾語未旣一客笑於坐曰子失言矣彼孝
子烏問所謂難易哉大舜克諧稱孝小子胡蓋前之愆亦稱孝文
武視寢問膳稱孝小弁之子窮極而呼天亦稱孝以文武易則文
武不知也以若舜若胡若小弁之子難若舜若胡若小弁不知也
凡爲人子者知其親而已矣方且不自有夫孝也又烏問所謂難
易哉予曰善

右題萬里紀程汪琬撰

明倫彙編 家範典 卷一百一十五

子友二

三

國朝通志卷之三

三

顧廷琦

顧廷琦字佩堅長洲諸生父繩誥崇禎庚午舉人知蜀之仁壽縣張獻忠破成都不屈死天下既定廷琦徒步入蜀黧面赤踝前後閱四寒暑始扶櫬歸中間山水暴漲幾死絕粒數日幾死遇盜劫幾死臨高山嶮巖墜深淵幾死而卒不死而卒扶櫬以歸天相之也方廷琦之成都山川猶存城郭易位無有知瘞瘞處者呼號路側誓不欲生由遵義民訪之殷繼周黃珪由殷繼周黃珪訪之文運由文運訪之曾大禮始得之龍腦橋側廬墓數月往返萬四千餘里抵里門鬢髮欲白矣詳載廷琦自撰入蜀記略中

右傳沈德潛撰

國朝文獻通考卷三百一十一

十一

黃學朱

順治間土寇陳德容作亂有黃義士學朱甌甯諸生與弟俱被執
度不能兩全乃給賊曰家有薄產釋吾弟歸以其直贖我何如賊
疑之欲遣學朱曰我秀才也質重於弟賊遂釋其弟歸實無業可
售也未幾學朱竟被害聞者哀之

右事略李元度撰

楊希皋

余里中稱著姓者必曰前黃楊氏楊余母家也故君與余爲中外兄弟行君五世祖諱圻選將材官鎮江衛指揮使正德中以征江西峒賊功世襲本衛左所正千戶高祖諱鉦改業儒嘉靖乙酉舉於鄉未及仕而歿曾祖諱一珍中武科又連姻戚里得選直侍衛東宮歷遷錦衣衛鎮撫祖諱應奎父憑愚公諱啟聯皆襲世爵明制鎮撫秩五品於錦衣屬也顧得專典詔獄所統緹騎刺奸視古司隸故雖冠武冠而權勢與大僚埒仕宦者以爲榮憑愚公生五子君其長也君性孝友與人交坦易不設城府謙謹嫗煦其接人卑賤者益加禮好學攻經義爲邑諸生弟希尹倜儻負才憑愚公

奇愛之憑愚公歿君次當襲爵固以讓希尹曰吾才不如弟且父志也吾自守諸生業耳嗚虜自季札子臧之風邈俗日媮薄兄弟相尤乾餼豆箠之微往往露齷而爭奮袂而起於是韋元成劉愷丁鴻諸人之行事往往書之史冊侈爲美談而鬪牆推刃之釁尤屢見於大家世族君之讓非直乾餼豆箠比也嗚虜詎易得哉希尹當官治辦有聲後奉詔使嶺南便道過家上冢朱轡黃蓋出入里閭鄉人嘖嘖榮之以是益稱君孝友云君歿且二十年其孫肇請文其墓上之石余諾之經年肇踵門至十餘請無倦色憶余童艸時隨先孺人每歲一再至外家喜從諸長老詢訪舊事聞楊氏之先有諱浦者居五世不析箸食指千餘尊卑秩然蓋楊氏詩書

禮讓之澤望於里中者幾二百年不僅以閭閻也先孺人見背迨
今三十餘年余亦客外久蹤跡闊疏不知吾鄉風俗今視曩所聞
何如願以謂行誼如君雖微肇請當亟表以風世余故論次其大
者表之曰是爲讓君子文學楊君之墓俾過者式焉夫豈徒昭示
君之後人君諱希臯字明卿其它事行及子姓生卒宜詳誌狀中
皆不書

右墓表邵長蘅撰

日本書紀卷之六十一

三

周炳文

周孝廉炳文字文季無錫人性至孝躬耕養親非公事不入城市人稱真孝廉云孝廉喪父毀幾滅性事母四十餘年未嘗有違色兄歿號慟嘔血進則強顏歎笑慰母又嘗試京師妻倪孺人奉母惟謹母喜謂他兒子曰吾婦良苦不殊七郎在側也母八十餘孝廉病不起時母城居誠勿聞疾革謂妻子曰我生不能養母死貽之憂目不瞑矣言罷而逝不瞑母奔號拊之慟良久日直視母不瞑母曰兒死矣嗚呼幽明異路已矣連拊之須臾乃瞑孝廉與徐立齋汪鈍翁兩先生同舉於鄉四試春官不第欲就教職又註誤不得官人皆爲孝廉恨孝廉意泊如也而性忼慨好急人之難或

直請上官白其枉宗族戚友連大獄幾不測孝廉挺身出爲排解以保全者甚眾初孝廉爲文贍逸工書法而技勇絕人有賊猝入室脅以刃孝廉初不爲動忽躍起奮拳毆賊仆地下跳脫去又嘗有盜劫其村里人驚辟去孝廉誠家人毋動開門操弓矢持滿待賊不敢入旣而持槍往救其旁村夜昏黑路旁忽一人持槍突起孝廉大呼其人應聲槍墮地蒼黃蒲伏請命乃鄉人防盜者也孝廉笑曰我也若誤矣幾傷若孝廉負文武才終不見用知者惜之先是孝廉葬其父鄧尉山不吉欲改葬不果遷每埽墓傍徭嗚咽及卒諸子改卜軍障山發之蟻食楯柎且盡而孝廉殯側忽有聲大作嗚嗚如號泣舉家人人惴恐不知所爲旣窆時已夜漏二下

聲乃息人謂周君之孝死而不衰云

王源曰孝廉子廷范訪于京師持立齋鈍翁兩先生所爲孝廉誌表示予請予爲之傳兩先生誤述詳矣茲不具載載其軼事孝廉毅然篤愨君子也爲一命之良臣而不得非其命乎豈才不必爲世用歟可勝道哉

右傳王源撰

按周先生順治甲午科舉人

國朝書目類考

卷三十一

三

毛周尹

孝子名周尹子族分浙東西而浙西名族以江山遂安爲最孝子遂安族而居於小塘會祖肖環公萬厯壬辰進士官吏部有名而從兄會侯順治戊戌進士則與予同舉制科予嘗弟視之會侯每言孝子事屬予爲記未應也旣而同館官方君若韓復以其事徵詩文及予予因按其實順治十二年婺源山賊大起焚掠四出隨地結行砦而薦居不常每募人家男女以要質贖多者千金少亦數百金名爲助餉否則殺之解蔽體挂樹閒孝子父爾久謂泮塘不可居謀匿山僻使孝子涉幣而已居守寇至縛爾久去孝子聞變藏母婦婦翁家而隻身走山砦號哭叩首砦門乞釋父曰徒手

耶出其父將殺之孝子踉蹌返謀之婦翁王君介明得百金捧之
往曰是區區而思以助義餉大難收其金驅之孝子乃變產且悉
變帑中所有又得二百金捧往而賊已移砦號哭走蒺藜到砦跪
砦門求釋復不足然則請見父而返曰足卽行耳何見爲孝子已
出山中途聞官兵將至大驚念賊暴官兵至必殺質以行卽不然
火炎崑岡玉與石亦安可辨也哭曰然則吾父死矣急返給寇曰
吾年幼力至此竭矣吾父出尙可得百金盍質吾於此而贖父歸
餉可全也賊曰諾遂畱繫孝子而返其父官兵至寇大殺掠去而
孝子不歸不知其死於兵死於賊也今若干年矣康熙二十七年
孝子所遺子名超倫舉於鄉與子兄子遠公同上公車門重語其

事且乞記於此孝子死時年二十二距此三十二年或曰孝子婦
王氏其節亦不可及焉

右記事毛奇齡撰

三十一

三十一

趙希乾

予崇禎八年聞南豐趙孝子爲母疾剖其心母旣愈孝子不死而孝子腸出腹閒矢反自上出後數自會城轉歸於南豐凡五過未及悉其詳且求見其人久之孝子已由學生選補太學時罷去而以言星命術來甯都辱過始見之從得其友所爲傳孝子姓趙名希乾字仲易南豐河東人父師高游於吳而豐城李見羅先生寓吳從之學歸著浩然集良弼金鏡錢鈔議九邊屯田議等書而蚤死遭兵亂希乾盡失其書頗自爲恨希乾幼孤依其大母母皆廢婦希乾殊有篤愛家人嘗觀優爲劇見安安事卽用呼希乾希乾由是小字安安旣娶婦以不能事其姑希乾出之年十七希乾母

病瘡甚希乾念父之死以瘡也心甚惶惑詣日者卜之日者遽眴
希乾而嘻曰危矣剖心其可瘳乎聞者皆怪日者語何決至此希
乾心識日者言歸齋沐中夜起作疏告神書遺言付仲父及弟封
識之卽取刀坐牀上割其胷肉置几閒而是時天大風起衝其門
希乾輒驚爲家人知之頃之無有希乾竊捫其心不可得更反刀
剜其胷腸大出心終無所取無何引刀斷腸數寸內其餘裂絮稍
窒其穴呼弟妹起令取几上肉并腸煮進其母是時天旣明其仲
父出見以謂希乾割股也顧希乾血出處悶絕於牀乃大呼謂希
乾死矣久之而甦比創合希乾竟無恙希乾過于時去其事已二
十年方丁大母艱而其母亦無恙子怪希乾腸已斷不復屬而噉

飲如恆人求觀其胷下腸截竹一筩置腹間筩腰鼻皆有帶縣繫於頸及背承所出腸筩旣解而腸端漑濡濡下死如是不死死固洵不以刀刃哉始聞者言趙生事皆笑其愚及觀其友傳亦有取其愚者予竊以謂皆未之得希乾爲予言其大父父死時皆年三十有幾大母李有兄公之暴幾不能安其室希乾弟希元出爲從父師賓後希乾爲其大父父適子孫也又無兄弟苟如希乾意以白刃死則其父斬焉且令兩世節養何以生哉然則希乾不可不謂之愚也其得不死非獨誠孝之感抑天不令其大母母無依而已矣希乾爲人愿樸年三十有六以亂奔亡時所讀書盡佚數從予借西銘定性書諸篇鈔閱予知其學之日至也

國朝詩集卷之二十一

右述事邱維屏撰

三

朱重暉

朱重暉廣西陽朔人。生六歲，父紱以崇禎己卯貢，謁選於京師。明年庚辰，歲大凶，盜賊蠭起，秦蜀楚豫饑然成割據，粵西自是阻聲教矣。甲申，闖寇陷京師，明遂亡。大清定鼎，又十年，而西粵旋革。旋跳猺獞，伺黔楚以爲動，止卒難傳。檄重暉十餘歲，與母言輒流涕，不食。此後無日不以尋父爲志。丙申，百越稍稍通文告，然率蛇行跽伏，膜糧盭衣，而後達。重暉乃毅然揭跣，請行。春初，與母別首楚尾。吳斗析江右，浮洞庭，涉黃河，旣冬，抵太行，與父遇。遂將以歸。蓋紱以明末判深州，再遷雞澤，令改革，卽挂冠去，隱於豫州之蘇門山。是山也，晉宋以來多隱者。時容城孫鍾元、虞山許某、滄洲李

某大梁王某陽夏高某白下朱某新安張某燕京李某父子皆避地此中結為社諸子日與紱為詩酒交當重暉之來也戚親見之面黧黑手足皴繭雙目炯炯然僉曰孝子也屬王某為之傳

右傳王紫綬撰

王長祚 子璠 劉國賓 王國林

王長祚字爾昌湖南衡陽人順治丁酉歲貢父喬年明季以富名獻賊陷衡陽長祚與次子璠俱爲遊騎所獲擄掠備至終不言父所在賊怒挽長祚髮加刃於頸璠號泣碎首求代騎中有張姓者疾走叱曰此父子皆孝子也胡爲殺之遂得釋居父母喪顛沛中皆如禮主講衡山集賢書院時鎮江錢邦芑隱衡嶽與友善一夕夢邦芑來別晨興訃果至爲竭力經紀其喪葬之集賢峯下時又有劉國賓芷江人生明萬歷末自少以孝聞順治時流寇犯境國賓負母出避道遇賊劫其母衣且刃創國賓背血流至足國賓忍痛跪乞母衣語迫至賊孝而還之康熙中逆藩之變族弟國宥年

十二被擄其母汪釐也哭之喪明國寶憐之出尋踰年得借歸汪目復明其家經亂貧不自存並分田百畝以贍鄰里義之王國林字漢卿長沙人有膂力一日父被虎啣國林奮擊折虎牙虎怒爪其腹腹穿腸出尺許而父卒死國林死復甦家人納其腸縫之愈乃制火器遇虎輒殺最後獲一虎左牙折知爲啣父者遂烹之以告父墓

右傳李元度撰

趙明徵

君姓趙氏諱明徵字哲公其先吳人也明初以軍功世襲錦衣衛
管祖輅歲貢生祖光遠以醫名明神宗朝爲侍直始籍大興父士
通精於易著易圖說學者稱潛夫先生有三子君季也君自束髮
出語卽驚其長老閩門孝友人無閒言尤重交游然諾潛夫先生
慕沈青霞之爲人學其畫梅往往奪真然頗自祕惜一日寫一枝
於縑素自題絕句云桃杏色相別李柰性不同一發寒香後四子
稱下風以授君君受而藏之益自刻厲執經於藁城彭進士三益
而與宗太守彝宋戶部翔爲友甲申逆賊李自成犯京師君扶母
胡太孺人抱姪於篁避臺溪廠太孺人坐淺水中曰急則就深死

一賊馳馬過之君以身翼母而被篋於右腋賊射君中脅太孺人
蒼黃欲投深淵君忍痛拔矢曰兒無恙也力持母起匿他所以免
鼎革後潛夫卜居濟南顧謂君曰吾東西南北之人也顧西山邱
墓在焉子歸矣其代我伏臘祭祀勿缺君於是獨歸京師奉祀事
歲時集諸父昆弟祭畢而觴曰吾有親而離居爲祀先也後之子
若孫日卽於疏祀或不畢集憂喜慶弔或不相往來合族之義其
謂之何嗣是修祀事唯謹族用敦睦潛夫有兄士美業岐黃老而
貧君構室備藥物家具以娛其老如事潛夫先生友人劉國亮貧
士也病且死泣謂君曰吾母年七十吾又無子天乎奈何誰養吾
母者君撫之曰吾與君爲友子母吾母吾在子何戚卽子不言吾

已心許之古人不忘夙諾尙挂劍墓樹而況託予以母乎劉死君
葬之養母於家終其身以是君孝義之名聞都下順治甲午與兄
吉徵同舉順天鄉試明年不第省父母濟南丁酉游江甯病卒年
僅三十有七君卒後部選得容城教諭元配潘氏繼配楊氏苦節
三十年撫孤子于京于蕃皆成立巡撫中丞疏聞於 朝奉 旨
建坊旌表君可以含笑入地矣君生以天啟辛酉正月十一日未
時卒以順治十四年丁酉四月十六日辰時子三人于京康熙辛
酉山東舉人于申早卒于蕃廩生女子三人長適房俊次續嫁皆
卒次適翰林院侍讀蕭君惟豫孫二人鶴禎鼎祺以康熙己巳閏
三月初九日葬濟南玉函山之麓銘曰

骨肉復於土魂氣則無不之朝乘回風暮載雲旂裴回乎西山先
靈是依

右墓誌銘王士禎撰

梅有振

嗚呼復予先生以丁酉五月卽世也予旣造其喪哭之又辭焉哀之已又欲摺撫其行次之述之而至今未有以副也厥孤鳳銜涕徵諾焉曰鳳不天天奪吾先人以逝者奄十有五年於此也吾叔若季早夭伯也失怙亦卒于茲倏然立耳然伏枕浸沈縣使一日痼弗除而訖不獲吾師一言之辱如先人何如鳳下見先人何沈子曰予後矣予後矣作復予先生傳先生姓梅氏諱有振字思正別號復予宣城人宋聖俞都官後也都官十六傳爲養吾公可行生四子次卽先生先生又四子其三枝鳳而鳳兄若弟率後先齋志謝世去以故敘說遺事獨鳳鑿鑿爲詳鳳之言曰吾先人少

岐穎落筆溢溢氣貌動止異常兒吾從祖望雲公早器重之公故
張皇正學見推羅旰江守郡時者也先人一再紉有司輟弗應布
衣井畝無功庸顯被可稱道迺諸內行肫如外施闔如諸慕義樂
善洞洞如屬屬如潛德哉抑指屈不勝數也吾大父大母善病先
人傍徨求己病寢食醫劑遂通方書大父積苦痰痰嗚喉膈閉力
吐弗出先人舌探出之大母晚困痿痺窘臥起先人負而起臥者
十餘年吾伯父承吾公倜儻恥問家人產產旁落屢佐以資一日
大涌鱗泉流泣涕露禱請代吾叔父思幹公善病尤最大母愛憐
怔怔怳怳莫遺朝夕先人先意營治糜金錢焉罔母知也罔叔聞
也既兩公相繼死哭之慟執季父熙虞公手曰天乎降割我家至

此哉兄遺孤二弟遺女一所不俾成有立也者吾兩人不得爲大人子矣撫訓籌畫迄沒齒如初嗚呼人亦有言其懿唯親莫感唯誠言至要也夫庭序之內俯仰尺咫之前吾瞻而依者吾一體異息者也吾雁行齒者吾連氣而分形者也此而拂焉捐焉殘莫容焉等梟獍矣此而矯僞盜名譽焉鑿鬼神矣本之心率之性吾先人誠難哉且夫蕭母患風叡明冰淚庾兄劇疫叔衰獨留或一時或一遇耳日相酬乎疾痛呻吟之毒而了無人倫燕喜之驩其甚者酸辛不忍言焉安之若固然久之而彌篤愷靡倦此豈聲音笑貌爲者耶竊謬以爲先人誠難誠難先人寬質厚衷周於恩義卹里人宗人之貧不克葬餓不充腹者有舟人負金不能庚鬻兒以

庚先人憫而麾之令還兒更助之舟鄰有號泣鬻其妻者如值完
其妻諸樹德皆此類而大者敦禮師傅敎我兄弟早從游乎姑山
華陽之間蓋備知處己爲學大方及文章法度不苟隨一世云先
人享年八十四子長枝南次枝喬次不肖枝鳳也又次枝遇並守
一衿無所效矧鳳今惻惻於茲先美不彰我辜曷贖痛哉其言如
此鳳字子翔名行尤著所撰石軒詩爲時傳誦己酉夏大水漂蕩
人畜廬舍無算浮棺暴骨填壑塞葬子翔哀而收之次第來取未
盡者擇地瘞之又酌酒爲文祭之詳見掩流棺紀事仁人之澤溥
矣哉是父是子信夫

沈子曰吾聞孔子論取人矣士信惑而後求知能焉士不信惑而

多知能譬之其豺狼也不可以身通也噫至言哉吾執此律人久矣夫健焉訃焉口啞焉者鮮不變易斯須者也諸梅材甚高顧劍刺壹謹繩尺無華言無飾行復予先生導之素矣華陽者予友周鹿溪儀部也儀部忠而殫於國賊先時負笈易名而諱其師者多矣諸梅誼益堅營護其孤益篤曰某等無忘先人之命噫難矣哉誠難矣哉

右傳沈壽民撰

圖書集成醫部全錄卷之八十八

五

侯曦 子麟然

侯曦字朝賓無錫人順治十五年進士父鼎鉉令黃岡母王未赴
畱曦侍養曦聞寇警走二千里省父於危城中寇退始歸父歿遺
命葬祖塋形家言不利長子曦曰吾遵治命非邀福也父有田三
頃命諸子中得第者與之曦不專受分給其弟從弟卿塋幼孤多
難曦爲殫力保持卿塋歿又撫其子某子麟然亦以孝行著聲鄉
里

右傳秦瀛撰

漢書卷之九十四

五

崔長生

崔長生邳州人。生而瘖，性至孝。人呼爲啞孝子。云：孝子旣啞，手復
攀傭工，養其父母。出入必面。歲己亥，淮徐大祲，孝子出行，肉於市。
人憐之，予以糟糠糝糲，受而納諸簞。自掘野草，剝木皮以食。歸則
扶其跛，父病，母於茅簷盡傾，簞中物懽然進。簞日不空。父母竟，賴
以不死。途見字蹟，必拾，朔望拜燬於先聖。櫺星門下而斂其燼於
黃河。一日於故紙中得遺金，守待失者，不得而月，乃易母餒飼之。
茁壯，蓄息，遂爲父母治衣棺。先是知州事孫侯賢卒於官，歸葬交
游一無。至孝子獨拜靈輜，徒跣送百里，乃返。及其父母歿，哭之慟。
三日不食，昇柩葬於中野，遂不知所終。

消盤外史曰予聞諸幔坡老圃曰孝子之生也母夢與蓋者至門
而孝子終賤貧瘡復孽人疑之余固信其天爵之至貴而無復加
矣今士大夫日誦詩書稱說仁義而晨昏內省不知於啞孝子何
如也嗚呼可勝歎哉

右傳王潔撰

言出於口行出於身動作見於四肢而皆由乎心者也孔子曰天
下有道則行有枝葉天下無道則言有枝葉邵堯夫曰天下將治
則人必尙行天下將亂則人必尙言也是知言之於口不若行之
於身而盡之於心故言之於口人得而聞之行之於身人得而見
之盡之於心明神得而知之矣崔孝子口啞身孿廢其言動而於

其父母養生送死無缺於禮至於當爲之事視其力之可爲而不遺顧其行出於身者似於廢言動之孝子獨得其全也王汲公爲之傳其亦見邵子尙行之意者乎嗚呼其將以慨能言能行者乎其將甚慨夫衣書之儒而自言道德孝弟者乎是可傳也

右書傳後彭任撰

國朝詩林卷之三十一

三

吳璪

吳君錞庵名璪字滌元歛人也與伯兄珍魯俱太學生世方甯謚家汰侈相競君席產豐顧風雅擅文學多購古書畫唐宋以來名蹟及商周秦漢彝鼎尊匱圭璧之屬兄弟鑒賞籩豆閒雖鼎革之際摩挲燕如也已亥寇亂伯珍魯罹於難先是族有無賴子鬻獷負勇力號千斤者嘗有憾於伯陰附寇寇至村里咸空舍以避君趣伯避伯謂烏合尋撲滅耳而意殊戀戀書畫器玩不能舍屬君攜其帑以行而身自守廬不虞千斤之搆於賊也至則盡掠室中毀器玩殺伯焚其廬而去君號哭返乃殯伯灰燼中訴之有司誓必報及賊平千斤逸去君乃衣短衣躡屨重繭借一二邏卒徧大

江南北不得乃北濟河憔悴徬徨面無人色有識之者憐之告曰爾仇在流陽君則趨流陽遇族子尙木尙木者幼爲伯所厚知仇所在憤曰我願執兵以陪願夫夫勇不易繫也君曰奈何曰有六人可與俱六人者嘗因亂殺人亡命江淮聞爲駟俠子習之於是相與見六人而告之故六人弗許君出囊中金人畀之五十泣以請六人曰譬弋焉吾羅之汝繳之譬獵焉吾弇之汝牲之六人者乃佯謁千斤與納交千斤不疑也一日六人飲千斤酒酒酣猝起乘之千斤驚而仆急抽刃鞞中勿及猶踣蹴人六人者繩縛之以送君竟去勿願君告流陽令請繫諸獄流陽令曰仇耶寇耶徽之人吾何越俎焉麾之出君怒尙木謂曰不早自決徒生得失耳何

怒爲遂夜半手利刃凡所以戕伯狀悉償之焚香酌酒呼兄魂而
哭告成事千斤垂死臂縛皆裂君二子仲曰巽字申令與子善
街南生日報仇古俠烈事也非恂恂儒服所克勝況風雅執綺者
乎痛於衷激於義仁者必有勇不洵然哉往吾家文臺諱仕斥江
陵相爲同知龍宗武所斃弟仕朝爲頌冤事聞於朝詔逮訊之仕
朝齧宗武肉而咽之曰吾不手斬若以國法在也後宗武以誦死
皆兄弟之仇所處不同時勢異也

右傳吳肅公撰

百集子集卷之三十一

三十一

胡甲桂 葉增

胡甲桂廣東翁源人順治十六年父獻忠爲賊所掠甲桂時年十三涕泣辭母乞食行抵長甯縣叩賊營痛哭求以身質釋父歸辨贖賊從之大兵進勦賊竟殺甲桂時有葉增保昌諸生流寇圍烏徑村父逢焜爲賊所得增入賊巢求以身代賊不允遂抱父大哭賊並殺之逢焜門人黃自升以救逢焜父子亦被殺

右傳胡定撰

國朝三朝通志卷之三十三

三

曹超 張維德 張振祚

曹孝子超安徽和州諸生有學行順治十六年海寇鄭成功犯江甯掠及州境孝子奉親出避猝遇寇兵欲戕其父母孝子號泣請代寇聞而釋之家貧力供甘旨以養居喪負土作墳家有紫薇一株父手植也久枯孝子每對之哀慟忽復發花時人以爲孝感康熙四十二年 旌孝子以身代親死事與張孝子維德致相類維德合肥人明崇禎乙亥流寇入境執其父將見殺孝子年甫十五歲延頸就刃求代父賊義而釋之越順治丙申父卒哀毀骨立廬墓側三年又張孝子振祚廬江人也父宏任攜帑知四川嘉定州崇禎壬午流賊偏城孝子奉父命領數騎突出求援城尋陷孝子

還見父被害觸石死時弟振祺以應試回籍阻絕無音耗及順治
甲午聞信奔赴至保甯阻寇不得前巡撫李國英拔署梓潼縣三
年道始通卽辭官尋母遇之峩眉縣年七十餘矣奉以歸

右事略李元度撰

國朝耆獻類徵初編卷三百七十七目錄

孝友三

陸崑

顧鼇

劉業廣

曹廣攄

陸可宗

姜應隆

姜璜如
姜懷權

姜文樞
姜軾

姜超萃

陸起鵬

陸起鵬

孫士長

徐安世

高宿登

潘允慎

唐肇虞

蔡紫春

范洪震

程三章

胡之琳

徐爾正

孔興燦

興永

李復新

張三愛

紀元

蔣本生
宋之素
劉孔賢

李岳伯
漆文先

李之棟
子長盛
黃嘉林
嘉章

張可智
蔣之顯

國朝耆獻類徵初編卷三百七十七

通奉大夫前署江西巡撫江西布政使司布政使湘陰李桓輯

孝友三

陸崑

前代故家遺俗之盛莫有過於吾鄉者也星移物換之際其爲喬木增重者一姓之中大率四五人不止高曾規矩可以想見湖上陸氏所稱四姓之一也吾得殉國者二焉大行文虎先生死於刺觀察周明先生死於逮得殉父者一焉隱君雪樵先生死於兵又得高士者一焉則觀察之弟春明先生也嗚呼百六之厄乃反爲王謝世譜之光悲夫雪樵名崑字萬原鄞人觀察之族孫也其父

澹古翁善畫能得文章家三昧而非屑屑繪事者流雪樵幼而工詩補諸生丙戌以後自以世受國恩不肖復出試於布政使司澹古翁曰善乃放浪爲詩人時春明方舉汐社故事於湖上故錦衣青神余公生生自燕來黃山宗正庵蛟川范香谷同里董曉山葉天益皆集焉而雪樵最少觀日樓者春明之居也雪樵與五人者靡日不至以大節古誼交相勸語者默者流觀典冊者狂飲作白眼者痛哭呼天不置者皆見之詩其時評雪樵之詩者以爲吐棄一切古穆如彝尊雪樵之去春明僅一巷而與正庵爲比戶其唱酬爲尤多桐城方子畱畸士也由春明以交雪樵相得甚驩遂居其湖樓中已而奉其父僦居東皋之殷隘己亥海上師大舉游兵

至於鄞之東鄙四月諸盜亦乘間並起亂兵猝至索餉欲執漕古
翁爲質雪樵頓首請以身代其父得釋而餉終不副雪樵死之時
年二十有七嗚呼雪樵束修厲行力固逸民之操以養其父而卒
不免蘭摧玉碎可爲傷悼然而忠孝足以不朽矣前輩董丈允瑄
嘗欲爲作傳而不果其旣於今湖上七子之風流已盡而雪樵尤
爲湮晦予求其事亦有年矣卒不能得其詳聊識其大略以俟世
有杜清碧其人者

右傳全祖望撰

顧鼈

顧孝子鼈吳縣人也年二歲時父仲常爲其仇金瑞甫所殺鼈稍長知父死狀卽淬一刃挾以出入金亦避之順治辛丑鼈年十八遇金於胥口拔刃刺之金躍入水鼈從之連刺不死金逸去挾重貨誣鼈以盜兵備王紀郡丞劉瑞訊得實卒誅瑞甫

右事略李元度撰

劉業廣

戊戌吉州同成進士者七人獨劉公爾勤恬淡謹愨有道自持每
誠同籍曰官箴無他惟當小心時因子讀書中祕尤多規誨每奉
其教佩服弗忘庚子子以差竣薄暮於急帆中相邁峽江急停楫
聯舟把手論心談至夜半公之誠勉於子者無異其在京門之年
孰知逾年後公竟長逝而嗣君遽持狀函銘哉公諱業廣字爾勤
號慵庵安福城南前溪人始祖劉諱某南唐時爲吉州長史歷宋
元多顯者入明益盛登進士者十人正德丁丑進士諱模者官柱
史則公從叔祖公生有異質貌昂而豐頂間露魁文人奇之七歲
失怙稍長隨王父直軒公游諸名家讀書崇禎庚午見知於蔡忠

襄公補弟子員己卯見知於馬公素修領鄉薦越二十年以順治
戊戌始成進士公生平孝友天成每念父完中公早歲卽世常不
禁嗚咽其事王父極孝謹因世多故環地皆兵寇公奉直軒公郊
潛惟恐不測夜不解帶侍榻側者二年及直軒公辭世正干戈搶
攘瑣尾流離公且歸家治喪禮如平時明日兵突至左右俱散公
獨練冠麻裾斬經之衣抱木主於懷而逸爲兵獲強公行三十里
至夜營兵各訊所獲搜公懷中僅得木主將兵者駭而謂嘗此逃
死求活惟恐不及之時獨抱主以避此爲眞孝廉特禮貌之未旦
遣兵護出境以歸聞者以爲孝行之報公以不及事父事繼母康
孺人尤謹孺人間遘疾門內無服勞者凡煮藥進嘗起居盥漱皆

公躬親之公因貧而孤常館於外自給又以不能長侍慈幃每月所得舌田者析金爲三十日費家人日持其一侍甘旨月終必歸問安以析金爲三十日計者又如初公故鮮昆仲有二弟皆季父生各數歲蚤孤既家貧又丁時艱季母日闔門涕泣恐弗獲有成公則母事其母子視其弟衣服飲食絃誦詩書固無不與其子同遇有急必親見二弟雜家人中行公迺行長則爲締婚公孝友篤摯見於從弟者如此至其操持素履捷兩闈後謙光樸素有加誓不接俗人俗事惟鍵戶課子弟郡邑有司不輕投刺至事關利害者則又不憚觸諱以陳安福故事凡鄉達田畝例立副甲無徭役以故編戶糧少差重積年苦之辛丑編審公獨毅然以身爲倡謀

諸紳士協議遂得廢副甲均徭役此又公之居鄉而有益桑梓者
噫使天假以年俾獲展志以膺地方之寄則本其孝友以教民本
其爲法於鄉里者而爲福於蒼生當自有霖雨功業垂諸天壤而
不幸僅以一名進士終其身予以公之教誨幸告無罪於居官之
日而又悲公不能大行其志以報 朝廷一日之知其何能無一
言以譜公操履大槩以告將來哉公生萬厯丁未年月日卒順治
辛丑年月日元配孺人朱氏大橋朱伯修女子錫爵康熙八年鄉
薦第一娶大橋瀘溪尹長子文學朱益光女女二長適司寇槎江
朱公從孫銓次女適金雞侍御王公之孫王汧孫一庚生孫女未
字銘曰

造次於是大風雷雨不願乎外吾亦猶古名則成心則苦雖死如
生惟懷中主

右墓誌銘張貞生撰

皇朝詩林卷三十一

一

曹廣摭

孝子名廣摭字蘊昔今兵部侍郎曹公國柄之長子也以蔭入國
子監年二十五會其母夫人病乃割股肉爲羹以進母飲之而瘳
先是孝子亦病既割股匿其創不以告創驟受風病遂亟逾若干
日歿實順治十有八年也於是顧御史如華傳之詳矣因略其事
如有或問於子曰毀傷支體以至於死此非古聖人之訓也又非
國家之令甲所聽也孝子豈未之知邪子應之曰奚爲其不知也
當其勢危而情迫藥之不瘳禱之不應欲控額而靡所亦奚暇古
訓之避而禁令之卹邪故雖死無憾也嗟乎昔之君子效命於君
父者多矣今之君子能乎否也旣不能勉焉爲之而猿譎巧諂之

輩則又援聖賢之說以自解借令甲之似以祈逃免其罪宰相糜以虛名而相塗以文具此風俗所以益媮而急難危亡之時天下所以無臣子也論者不此之咎而顧以毀傷滅絕議孝子孝子不幸死矣然且不免於議得非其重不幸與此論者之過也

右事略注疏撰

陸可宗

吾里有陸舒白先生願而髯賢而有文當領歲薦會亂棄不就其子之瑜有父風尤好爲詩予交陸氏父子而未獲知其先世聞里中父老相傳有陸孝子不能舉其名問之瑜則戚然曰此先大父省我公也已而舒白卜葬公於某山之原出俞子所爲傳請志銘嗟乎章雖不及見公旣聞其行事敢不識其大者公弱冠爲諸生束身向學采經擷史用張其文詞試則屢困以授業生徒終其身公之志不大遂然平生藉脩脯爲養未嘗有戚容晚築一茅舍雜植蔬果手罌盎灌園客至摘蔬薦尊簋談笑不倦少病羸治導引之術旣耄而視聽不衰齒能噬乾腊卒之日年八十有六其訓諸

弟子茹實吐華弟子皆嚴憚之人有過則微詞曉譬使人人自解會國變士多佯狂憤世亡窮山峻谷中或以事扞法公笑曰若將馭羲和游於廣漠之野乎抑曳尾泥中猶視息人間世乎胡爲是揭揭者公之父諱敘嘗疾篤剗股藥之獲甦有饋粥田數畝析產之日悉讓其兄郡守金公礪崇尚風教故嘗建高齋延先大父允升公講學者也聞其事上之提學御史以孝子旌其門故至今里中人稱陸孝子云子二長履中次諸生履素卽舒白孫三人長曰之瑜餘並幼人皆謂孝子德厚其發當必大公諱可宗省我其字娶施氏勤苦相賓予從祖姑也銘曰

陸氏三世皆窮於儒喟此孝子虧體若愚生以名其閭歿以光其

幽墟於乎展如之愚兮我淚漣如

右墓誌銘施開章撰

國朝詩林類行不絕

卷三十七

二

姜應隆 姜瑣如 姜文樞 姜超萃 姜懷權 姜軾

人莫不願有賢子孫卽莫不願有孝子孫然賢難而孝益難偶得已足珍何況累代故言孝前追曾閔後仰荀何餘史傳所紀不可勝數卒未聞後人率德維肖惟蔡邕頌祖以爲世載孝友願主名無稽末由指證今乃於華亭姜氏欽望族焉姜氏孝子凡六世一世應隆字君甫再世瑣如字宏璧三世文樞字幼鈞四世超萃字勉哉五世懷權字次謀六世軾字成之生平事蹟經藝林敘述詳已茲弗贅緬懷曩昔姜之孝子二曰詩曰肱詩隸廣漢肱隸彭城其地異詩在永平間肱在熹平間其時異詩兼妻龐氏肱偕弟仲海季江其人亦異雖其昭顯蓋非同脈松之姜云出自肱抑何滄

桑頻易而流風遺韻轉能延其緒以增其盛耶孝子之配爲陸氏
顧氏沈氏夏氏陳氏雷氏並稱孝婦夏尤篤視龐氏僅一人寶遠
過之嗚呼難哉載考裔嗣繼武者首漢桓榮榮子郁孫焉曾孫鸞
元孫典與彬稟家法若合符節但桓之傳以實學而姜之傳以至
行兩者相衡似至行較勝且桓比姜尙歎一世業卓絕千古矣則
姜更如何自俗之衰也詩書教微骨肉恩薄督之易離憐之多怙
習爲故常恬不知怪間逢循謹士旨甘無虧言語不懟每籍籍人
口若夫秉性肫摯險難勿渝而堂構續承規矩重疊殆天地順氣
所感特鍾毓而一發其奇而適聚會於 本朝百數十年中疆吏
迭次上 聞建坊如例此又 聖皇本孝治天下之意將爲爲人

子者示之模楷而推衍以極乎無窮也獨松郡志列孝子孫琮陸士達王佐三人而姜未及竊疑後三世或志已成先二世何以闕漏罕覩之事於志乘爲有光補而續焉是在司牧者孝子坊旣立惜非一處余謂盍樹總碣各書名著曰旌表六世孝子坊庶觀者警目從來鄉大夫興造宮室器物必有識記用闡揚先祖之美坊亦宜然爰因其七世孫明經熙來請輒製銘詞俾鑲之上楣銘曰

古孝經傳諸聖誰守之篤其行太岳系情彌敦蒸蒸又萃一門瘵母疾股能刃脫父危齒猶齧毀成瘼愈愴神勇椿盜豈顧身啗癘斃因毒髓驚夢歸同齧指大端舉餘可該養親志胥允諧相蟬聯

世歷六緯楔榮人為鵠九峯峙三泖流石不泐垂千秋

右坊銘朱珩撰

按梓室述聞附記有華亭姜孝子應豐文闕載俟訪補

陸起鵬 陸起鵬

陸起鵬字怒飛其先世吳之崑山人國初以事成黔遂爲黔之安順人在黔十數傳至陸希武生起鵬鵬有弟曰起鵬俱好奇節負至性黔土酋安邦彥於水西諸夷號最雄悍天啟初邦彥連其黨四十八支發難龍里挾苗狃數萬爲之佐殺副總兵徐時進攻破畢節烏撒赤水永甯四衛遂鼓行薄安順城環攻安順三閱月城陷鵬一門相枕藉死者五十餘人獨希武與起鵬得脫城陷時陸氏蒼黃縱火自焚鵬從烈燄中忽忽衝出若有物翼之者鵬父子兄弟幸不死起鵬隨其父奔竄鵬雖爲賊所掠邦彥陷安順益挾苗狃寇旁郡邑乘勝進圍貴陽鵬居賊巢七月瞰其無備問道走

蜀且走且泣已復繇蜀走楚泛瞿塘浮沅湘崎嶇水陸間日夕念其父與弟咄咄自語或至寢食俱忘楚蜀人憐之貴陽圍解王師剋復安順城起鵬隨其父復入安順已希武遂被殺於羅戎方安順之圍也斗米至四十餘金及解圍斗米猶至五錢希武乃與起鵬謀就羅夷砦出安順卒遇羅戎羅戎者卽佐邦彥苗狝之屬也與其族羅虎羅三羅危偵希武就羅利其羅資遂殺希武於道起鵬伏父屍哭失聲將自殺羅急縛之賣他酋中他酋復掠得轉賣如是者七處鴟之在楚也念黔事稍稍甯戢歸求其父與弟或告以弟居某賊中鴟乃鬻田畜質衣裘得百金往贖其弟鵬出持鴟大痛具言父就羅被殺狀鴟聞一慟幾絕鵬語鴟曰弟幸得脫

賊中誓不與賊羅俱生鵬以其事泣告直指直指下於道帥時蒞
狎攻掠稍倦已就撫矣道帥畏諸羅如虎且受羅重賂寢其詞不
爲理祇議羅罰金起鵬號曰父死因以爲利古人痛之況於仇讐
之利乎亟斥去吾惟磨刃以須而已復諦視其兄唏噓曰吾斥去
羅贖是使羅知吾意必復仇也羅知吾意必復仇則仇不可復仇
不可復則是斥去其贖與因以爲利等也姑受之受其金輸之學
宮於是鵬與其兄謀復仇益力鵬饒膂力善騎射旣入賊巢益習
知諸羅伎倆陰結壯士七人時時仰天而呼曠目四顧壯士相對
飲泣羅戎以鵬兄弟之受其贖也且有道帥爲庇備益弛一日羅
戎以事入安順城諸殺希武賊俱從鵬踊躍起曰吾今日乃得報

吾父於地下矣趣其兄盟諸壯士挾彊弩毒機矢以往密令所親以好語酒諸羅諸羅大醉踉蹌出安順城壯士伏發鵬躍出射戎中肩戎愕卒無所避願其族曰嘻嘻鵬就斫之挾其頭逐餘賊壯士四面從之餘賊悉就擒鵬其剗刃於父者四人挾出其腸剖心臠肌號其父而野祭之遂染其血題其道旁樹曰陸起鵬以某日殺父仇羅戎等四人於此鵬撫鵬而泣曰若不亡賊黨聞之道帥且甘心於若若亡吾請以身當之鵬持不可鵬曰吾一門死者五十餘人若復同吾俱死非孝也鵬因遁去賊黨劉成果以殺降訴道帥道帥給鵬入營中果欲甘心於鵬鵬曰某死固快雖然某且願畢其說夫殺人者死蠻夷殺人獨不死乎羅殺人則贖之士

殺羅則殺之公之行法乃如是耶羅不知有公而殺人之父公但知有羅而且以助羅之殺也卽公不去安順之爲人父者盡危矣且公異日之議贖也以爲道險且遠賊不可得賊得矣而又爲賊報仇公何爲者道帥語塞麾之去於是鷓不敢更居安順復出游於楚楚之豪曰嗟乎是昔之咄咄自語於吾土者也聞其事大義之鷓又走吳越豫章吳越豫章多其奇節爲之詩歌傳贊者若而人

野史氏曰子遇鷓於南都鷓爲子言與其弟復仇事時在坐聽者數人皆爲鷓兄弟嗚咽相向一不知涕之何從也鷓語子殺賊者胞弟起鷓同心共事者勇敢七人鷓復何與嗟乎當鷓之抗辨於

國朝言行錄卷之三十一
道帥之前也。鷓已自誓必死，幸而不死，鷓迺欲自遜其名乎？予不
遇陸生安，知當事之所以處苗犛者如是。今之謀國事者，豈獨一
道帥也哉。

右合傳陳宏緒撰

孫士長

余擬爲士長孫君永慕圖記首旌之曰孝子永慕之孝舜以後無聞永慕其親而乞爲記尤千古無聞甚矣余之不孝也余以年二十喪先君歲歲抱難次之典東西游走館客無賢士大夫記余永慕一字者卽先君子行義至高僅載在邑志郡志而已故余聞士長事首旌之曰孝子而實未詳其他之行云何越五月門人孫鳳律始來言余士長之詳且出其繆君文碩行狀來乞余立傳狀首結銜處士意者以處士孝其一端夫子荅子貢以宗族稱孝爲士之次也鳳律又言乞夫子之傳將走都下請某相國銘其墓朱夫子謂宋時史館爲某人立傳必先行下文書至所在官司取其家

行狀墓誌銘文字奏進史院然後史館據之以立傳夫史傳非其職不當作而家傳私傳非古今迺云因余所立之傳而請銘則余所立之傳仍不離乎狀而繆狀詳矣因狀之詳不名傳也傳體簡貴有所缺遺又非孝子來致求詳之意無已剗繆狀之大者書之而回顧余作記之意爲作處士孫孝子士長君傳狀敘其世士長孫氏徽州府休甯縣人字士長號澹庵上世唐時金吾某公自山左青州樂安遷海陽又遷雲溪散而處於吳於齊於楚於越間皆代有聞人余斷以歐蘇二家譜例始自五世則養吾公諱一貫爲高祖華字公諱光庭爲曾祖環洲公諱良知爲祖環洲生元美公諱可嘉則君父也敘君之生稱其慶下五歲入塾受書如夙記兼

篤嗜書終其世寒暑未嘗釋卷遇事斷以經理而證以史記子傳
用之不盡十歲喪母吳孺人童子哭泣無節元美憐愛返淚拭面
提抱之入撫於汪太母逾時又喪汪太母哭太母如母當兩喪人
咸稱願然曰孫氏孝童云免喪元美始爲君娶婦程氏汉口著姓
爾舍公有賢女不欲與凡兒築館贅君君昏僅逾月夫婦請辭歸
里養元美公公則已續娶孺人亦姓吳氏程氏裝送甚盛君夫婦
一切莫取也歸而脫簪珥治甘澆程孺人韞韞蔽加匕上食元美
曰孝哉兒與婦居無何而亂作新安在萬山中兵燹墮突劫略無
虛日家世所積遺蕩然矣計數百指曷以餬其口元美慨然命君
改儒業買當是時君年二十餘耳以儒致困君日日在元美側不

樂也而以賈致豐君日不在元美側樂也君遠服賈奔走事厥考
歲暮休役車洗腆一上堂慶而其餘日程氏提其子文漪奉親驢
率以爲常無何而元美公之疾作君方商於江上忽怦然心動夜
不寐起呼平頭奴子速治裝吾父其不起乎抵家已蓋棺矣撞泣
毀瘠幾死者屢矣君又事後母吳氏至孝後母百方勸慰曰汝弟
與汝子待其長我家四世棺未葬得不念汝父遺言乎是專在子
君不獲已聽受命既免喪服賈如前時於是有永慕圖之記永慕
圖者卽余爲其記首旌之曰孫孝子者也孝子生不獲以儒榮其
親死又不及與於含殮於是哀其父倍於前之二母請善爲畫者
圖其父母之像而述其父母體肥瘠長短分寸面部上曰鼻額闊

狹云何頤辱已下云何問之家人曰宜稱惟不言耳哭而藏葬所至旅次如元美夫婦幄坐笑而君哭也卒以付子文漪乞余文而君不及見矣孝孰有大於此者元美在日君事後母四十年惟孝謹如漢史所稱至是議析產進曰此不腆之遺皆母節儉力也母固讓不從卒半分之而私割其所有產爲母營膳之不給君卒命文漪曰如吾約終母之世君之將卒也強起拜其母曰兒不孝不能終母之養有弟與二孫在勿以兒爲念哭絕扶反席而卒而吳孺人日夜哭泣哀傷其心不逾時亦卒君遙受元美公四世棺未葬之命歲歲挾青烏家櫛風沐雨梯山騫澗得地於篁田大聖嶺之阡惟墨食葬其高祖已下四世而元美公祔焉以子終父之畝

以孫承祖之烈綜而論之喪母吳氏孝一喪太母汪氏孝二喪元美公孝三生事後母吳氏孝四矣葬其高曾已下四世孝又五矣凡孫氏之生日家慶之圖孰謂一一非處士君永慕之圖也者今爲君作傳惟揚扞此義爲綱領而他者不書可矣狀又敘君爲人謙謙君子古風照世惇於族厚於故舊如季父仲仁之死於蘇無子歸其櫬立主於廟不廢祀從祖天與公子孫流寓常州未葬爲葬之常州以囊金贈吳五君於京師三千里外得歸同賈者方炳如暴卒逆旅曰於我乎殯積而能散儉而好施平生銖銖寸寸大抵辦扶病救死傷不給其捐樁收死製藥治患繫獄弼厥之屬不勝書詩曰孝子不匱永錫爾類處士之謂矣激而傳之無使其記

之外無聞焉

論曰孝之時義大矣哉塞天地橫四海皆是物也孔子三歲喪父然曰志在春秋行在孝經行也者此志爲實詞然則夫子一生之行皆孝經也蓋我之身一日在卽親之身一日在人生無一日死其親之日則上治內治旁治無一日死其親之心郊焉而天神格廟焉而人鬼享皆是物也余之記永慕圖曰士長抱其空然無所依之圖結而爲慕縣而爲永噫是何物也是所謂仁也仁者孝之根柢也專於親則爲孝廣於錫其類則爲仁如士長者觀他所行仁人孝子具是可爲行己有恥之士焉夫誰得而次之

右傳錢陸燦撰

徐安世

徐安世字明倩號仁寰故明相國仲弟復齋公後考諱廷錫號穀
我以長子韶階貴封中憲大夫母龔氏贈恭人繼毛氏君毛出也
穀我公生四子韶階長而君齒居季天性至孝輕財好施弱冠補
弟子員文名動鄉里以故穀我公奇愛之明天啟朝魏璫用事令
其黨崔文昇來江南名爲督漕實則乘間抵隙借以排陷搢紳家
而穀我公性嚴毅素不悅於里胥遂以官戶誤漕羅織穀我公名
以上於是文昇疏入緹騎猝至急命縣令逮人赴淮就質穀我公
不得已拂袖欲往君牽衣泣曰大人老矣奈何遠行且邇者魏璫
柄權擅作威福舉朝士大夫俱橫被刑僇官署一空而伯兄居官

四庫全書
卷一百一十一
三

久爲羣小所側目大人往知必不免兒願乞哀緹騎請以身代死
生聽之毅我強留之不可乃行抵淮文昇兀坐堂上詰責君堂下
君反覆抗辨不少屈文昇怒杖君君隨杖下斃當是時家人輿尸
出悲動行路猝遇黃冠道者從東方來熟視之曰死者尙可生也
爰取袖中末藥置創處君立醒黃冠倏不見或者歎爲神助云顧
文昇信君死事得解君扶創歸父子相抱大泣繼復引觴大笑由
是邑中無知與不知咸稱君孝子名籍甚厥後懷宗卽位魏璫伏
誅然國脈已大傷明祚駸駸不振君遂棄舉子業鍵關遜世時時
以詩酒自娛入 國朝與鄉黨二三君子唱酬往還嘯傲山水論
者謂有陶阮風致焉先是君家素饒勾貸者至其門不拒卽數至

不辭有貧不能償者歲終輒焚其券內弟吳某少失怙恃君收撫之無間親子弟後吳成進士通籍於朝君終身未嘗有德色云君丈夫子二長承宗任臨清州別駕次謨郡庠生謨與予交尤善孝友任俠有父風

論曰人孰不貪生怖死君爲至性所激出萬死不顧一生以免親於難難矣卒之惟孝格天黃冠投藥死者復生抑又奇矣語曰孝爲百行之原親親而仁民作者順施者恕也由此言之君能振貧乏撫遺孤厚施而不責報斯豈非孝子不匱永錫爾類之義耶予爲之傳附諸徐氏家譜俾後世有以考焉

右傳儲欣撰

日本書紀卷之三十一

三

高寤登

剖股之事不載令典以其近於毀傷也然其心良苦矣高君寤登
乃剖股以療母疾此安金藏之所爲幸而不死豈非天佑其節乎
吾聞君之父從軍殉難亦忠之屬也而君以孝嗣之君又隱於卜
者斯足以風世矣故綴以贊
父爲忠臣子爲孝子危身救母天相不死龜筮傳中一行足紀人
之無親不古而已

右贊尤侗撰

國朝文獻通考卷一百一十一

三十一

潘允慎

辛未九月二十一日日將暮檢架上散帙見濟甯諸生潘允慎家傳載其衝擊流寇脫祖母死地奮身蹈火出兄於燔薪而屋長吁夜參半不能寐蓋惟明之亡事與古異君非有涼德也朝非有暴政也眾非有離心也無食無兵池涇城圯梟張之賊勢如猛火而守令學官奮死守禦殺身殘家而不悔者無地無之薦紳士民廟哭巷戰戶號人厲併命於鋒鏑者無地無之其如允慎之保身與親泰然而無患者千百中無十一也蓋至懷宗愍帝嗣位而累世之忠良已盡於逆閹之斲喪矣其未罹門戶之禍如孫高陽盧象昇與孫雁門諸公復危死於奸僉之擠陷故自周延儒溫體仁得君

以後凡內服大僚外秉節鉞久安而無患者皆巧佞奸欺庸鄙忍
心之人也社稷之傾危生民之禍亂漠然不以關其慮而朋謀私
計諂附權要惟恐失意於幾微武夫則無小無大皆痛心於文臣
之節制言路之紛糾轉以養賊脅上爲自安之計是以人主孤立
於上蒸黎糜沸於下土崩魚爛一潰而不可收豈非天命遐終故
多生亡國之材使恣於民上而剛正憂勤恭儉之君亦陰奪其鑿
使嗜奸人之疾味以至於敗國殞身而不寤與嗚呼此又自古亡
國轍迹之一變也

右書後方苞撰

唐肇虞

吾吳唐孝子肇虞字順江父耀祖母戴氏父歿時孝子尚幼執喪如成人晝夜哭不絕聲母止之孝子曰母哭能禁兒勿哭耶其至性過人已如此家故貧母以女紅佐薪水費孝子見之心怛怛焉恨不得致甘毳以養母使母自勞苦也稍長治生理晨夕色養母樂而安之明政不綱四方盜賊竊發甲申歲世祖皇帝定鼎燕京而江南土寇猶未甯靖所過劫掠一空孝子奉母遁山谷中行數日倉卒遇寇失母所在孝子呼天號泣誓不獲母不獨還遂徧訪村墟邑井閒無影響旁及他郡縣僻地亦無知之者時兵燹四起孝子宵行晝伏屢與寇遇僅而獲免渡江而北復從北而南足

跡所經凡數千里再歷寒暑風餐露宿艱苦備嘗孝子體素羸至是顛頓骨立非復人形矣會天下已定避難者稍稍復城市一日孝子過金陵眾以其形之異也詢所自來孝子泣以實告有一姬前問曰君母非戴姓耶孝子曰然姬引之歸則其母在焉且喜且悲相持大慟旁觀者亦爲之墮淚嘖嘖歎羨曰此孝子也孝子侍其母歸又十餘年母以壽終孝子壽亦永歿之時年七十有三子若孫皆克有成立此天之厚孝子以昌其後嗣也論者曰同時有黃孝子向堅尋親於滇事若相類然而有不類者黃之父爲邑宰於斯土其物色也易若孝子之母蒼黃四散不知所向且內言不出於相其蹤跡也難子則謂難易之勢固有然者而論孝子之心則

惟知親之不可一日而忘烏計夫勢之難與易耶誠積於中百折不回天亦哀其志而遂其願兩孝子者其誠以格天一也予故次其事而志之俾列之家乘爲其後者庶無忘先人之美云

右傳倪承茂撰

--	--	--	--	--	--	--	--	--	--

蔡蔡春

宣城蔡蔡春字大美善屬文喜交游常自釀酒待客釀兼數種其
後家益貧不能給客至則質衣具酒大美兄弟三人相友愛少
弟季薦溺江死大美與仲玉立客姑熟徒跣江滸日夜哭募漁舟
求季屍盡解其裝不給至齧指書要約重購之又灑血籲江神極
哀明日乃得屍歸葬鬻屋以償負焉大美所著有來諭居集續宛
雅游潛水有潛水雜著陳臥子雅推重之晚與同邑施愚山相善
卒後見夢愚山索酒愚山爲詩哭之遣力齋酒漬墓上同人見者
皆嗟悼云

右聞見錄吳德旋撰

國朝文獻通考卷之六十三

--	--	--	--	--	--	--	--	--	--

范洪震

吾鄉范孝子洪震百年以來人無間言而不知孝子之大節固有
不盡以孝者則雖其家傳亦略焉偶讀董處士劍鏐集得其事爲
節略之管江杜秀才之死節也陸處士宇燦取其遺孤育之其孤
多病處士一日與買藥過孝子則問曰是何人也而爲之藥處士
以告孝子慨然起曰乃杜耶耶尊公吾同學兼以同歲又同志也
吾於尊公之死哭之者幾日時時從湖東來者問其孤莫有復者
今乃以買藥遇天也豈可使陸丈獨爲君子處士因言其三喪未
舉孝子曰不特死者當於我葬杜郎未娶我當娶之有匱乏以告
我卒爲杜氏窆其三喪而并置墓田以贍之且助之娶焉嗚呼吾

聞孝子晚年病噎凡其爲齋戒爲壇爲卜以至丙夜百叩靡神不舉者皆其平日所振之人故至今無不以長者誦孝子但好義固人所難而如杜氏之孤則畏禍者所遠避而不前者也是不得僅以長者目之矣董處士曰孝子喜飲酒醉則狂呼累舞側弁跣足凡諸嬉戲窮晝極夜無所不爲世或以此怪之不知其有所託而逃耶嗚呼孝子生平精於醫而乃以醉戕其軀不爲尊生而爲祈死斯豈漫然而忘守身之戒者乎吾於是而深悲之

右記事全祖望撰

程士章

予少時則聞族長老稱說嚴鎮程孝子云且曰吾甥也迨晚交密谷始知爲孝子子孝子之母實予族王姑密谷述孝子事未嘗不泣下浪浪懼懿行無聞也予因質之互史所載孝子合葬兩世墓誌而爲之傳孝子姓程氏名士章伯達其字世爲歙嚴鎮人生未識父父嚴註以太學生操鹽筴開種遼陽外未幾卒所交馮都司者葬之高達子阡付牒守焉語蒼頭識其地而歸訃於時孝子生六年矣母王得訃慟幾絕孝子亦踊絕如成人其祖拊之曰兒至性如是他日歸骨有望乎蓋姑語慰王耳孝子聞卽輟哭瞠立問遼陽道人噴異之厥後母一哭孝子輒數日不止母欲發聲而孝

子已顛顛不任矣母用隱痛不敢泣恐傷孝子孝子則時時察母
眉睫爲野哭聞者皆歎爲天篤云註故侗儻士挾奇走萬里將以
功名奮邊塞絕不爲家室計註旣歿二老暨王相繼厭世橐如洗
矣時孝子年十二託孤族父聞人君房氏君房多豪舉而性乖僻
孝子稍長惴惴懼不立王前已爲聘鮑氏女旣受婚乃辭君房去
謀之比鄰翁將爲父歸骨翁語孝子遼陽八千里徒御風而往乎
因言之方司徒任子以巽而投計焉以巽心重孝子嘗語人吾當
成其志孝子是用依之十四年清夜飲泣無間也適以巽暴卒孝
子大慟曰天不欲吾歸父骨而奪方公平吾所以隱忍歲月而苟
人世者凡爲吾父故公旣逝吾無以生爲矣巽子士達悅然曰父

志也論諸同志而身損其半以三百金假孝子孝子感泣遂辭行
蓋是時蒼頭可法八十猶健也挈之從孝子附舟入漕夜夢天圻
若有神謂之云覺而水發舟中眾譁莫措孝子泣禱水忽退舟眾
勿測至直沽發裝則魚苴罅競謂孝子異人不知孝子爲孝子也
歷八月始抵其地訪高達子已久下世主僕惶惶莽曠一路人睨
法不去法就詢則高子世勳故童時執役註者因相持泣出牒證
墓所孝子具棺啟窆則儼然冠服眉鬢也伏之慟再拜起遂失所
覲惟聚骨而已孝子以生未識父不敢誤萬一齧血濡之良然手
其骨諸指如或撫之者集而失一膝孝子慟曰是其安之也忽巨
蛤吠不已且若乘物焉視之卽膝在也易殮以一羸載骨南道山

海嵐躑躅不進孝子持註出關故符焚而號之曰父可入關矣餓若掣而羸從入自是道無畱凡四月抵家未至一夕孝子妻鮑夢偉衣冠丈夫偕王坐堂上明日註骨至合王葬焉

廣乘樵曰以予狹目所識昭代尋親者三劉謹王原趙重華然皆以父在孝子生未識父且旣死而骨萬里方輟哭問道察眉號野時其天厚矣彼獨知有父遑計死不死委命他人借力酬志方生錫類法勸天遣使數者不值吾知孝子必終歸之天其忍困孝子乎卒之萬里邱首尤偉三子哉人之所定天則從焉誠感魚豨無足異者至觀貌完膝掣餓夢鮑其固然矣密谷益振厥德萬石流風孝故倉浪所念要亦有本野無金管淪沒何窮亦吾黨之責也

運之降也性之失也梟獍豺虎之號召也吾於傳孝子而爲之禁集矣

右傳王煒撰

日本書紀卷之六十一

三ノ

胡之琳

胡之琳湖南沅州人祖或醇篤孝謹明末流寇充斥值其父卒冒
難營葬賊至義之不忍害之琳貢生有聲庠序至性過人祖父母
春秋高父其仁病孱不能力養之琳竭力奉事飲食起居克盡孝
思殞殮盡禮家苦貧舌耕以供菽水藥餌資晝投徒夜侍父疾達
曙十有二年極瘁弗顧父臥病久樂與里人談瑣屑之琳日拮据
治具待之以爲常可謂善養志矣值歲歉忍飢供親一日餒甚臥
地不能起父覺之撫而泣後二親俱病滯下聞麻陽山中有良醫
之琳夜走乞方顛躓墜崖得無恙弟之瑛早世遺二姪撫育備至
皆成立弟婦蕭亦以節孝全族姪錦昌窮老無依賴之琳衣食死

西華三月庚子... 卷之三十一

爲之盾其他義行不勝枚舉云

右傳朱琬次撰

三

徐爾正

徐孝子爾正者江陰縣人也其伯兄爾大當明季殉國難有弟曰玉方幼爲人所略賣其母痛幼子之亡也日夜泣喪其明爾正則請於母曰大人幸少安兒必得弟以報母母許焉遂行徧求之至金陵直其弟刈薪樵城下弟望見爾正號曰若非吾仲兄耶爾正聞之曰玉之聲也察之果是因持之泣趨告所主而以金贖之歸其母因之目復明也

吳德旋曰予聞爾正家貧資備賃以養母然好讀書晝作苦夜矻矻誦經史不少休後遂補學官弟子蓋其行事皆人之所難能者

右傳吳德旋撰

四庫全書

四

孔興燦 興永

興燦諸生六世祖承源五十九代衍聖公第四子也闖賊遣僞將軍郭升徇兗州至曲阜晉謁聖廟興燦瞋目大罵被執不屈升終以其義而釋之兄興聖亦諸生聞闖賊陷北京莊烈帝殉國乃佯狂哭泣痛不欲生踰年闖戶自經死又興永字起存先聖六十六代孫祖尙鉞明陝西鳳翔知縣時流賊蹂躪關陝殘破尙鉞撫戢瘡痍民困以蘇嘗修五丈原諸葛祠後邑人思之遂以配食武侯父衍璐隱居著述有廟庭禮樂典故等書興永爲諸生有孝行親喪廬墓哀感遠邇每學使者按部咸敬禮之

右家傳孔繼汾撰

國朝子及女有系

三

李復新

孝子李復新者襄城人也世居城之東邨崇禎十四年歲饑復新出糶於鄆土寇賈成倫劫其家執其父際春殺之復新歸痛哭絕而復甦裹刀衣縫中日夜謀所以報父讐者此時天下大亂法令不行控告無所而成倫强悍所自防衛甚備復新伺其隙不得且恐其他奔卽又謬爲懦弱狀揚言於眾以示無復讐意成倫聞之信以爲然卒安居如故 國朝定鼎復新潛之會城訴於太守逮問具服繫成倫於獄會大赦減爲徒還襄起解復新先伏道旁俟其過舉大石擊之中其腦已死復連擊之解者欲羣執之復新曰吾報父讐耳豈畏死者乃自詣縣願就死令憐其孝不忍置刑乃

手自爲狀以具白所以且曰如復新者宜表其閭以彰其孝到府
太守難之駁其議曰賈成倫事在赦前業已降罪爲徒而李復新
斃之宜如殺人之律事下令不能對縣有掾老不視事素巧詳文
案牘一出其手無能易者令強起之乃復議曰蓋聞父母之讐不
共戴天古云殺人者死未聞報讐者死也又云凡報讐者書於土
殺之無罪復新固已屢訴矣且赦罪者一時之仁復讐者千古之
義成倫之罪可赦於 朝廷復新之讐難寬於人子成倫且欲原
赦復新不免極刑平允之論似不如是父子何辜並遭大戮凡有
人心誰不共憐伏願貴以無罪且旌其孝太守不能難卒如其議
表其閭曰孝烈里人羣稱爲李孝子云

劉青藜曰余聞之先達劉珽曰復新之訟其父冤也時國初離亂甫定所在城郭郵墟人煙絕少復新隻身具糗糧以行夜露宿恐爲虎狼所阨每棲樹上艱難困阨卒能報其父讐嗚呼可不謂孝哉復新今尙在余嘗一見之時方充里役將爲言於令復新流涕曰遭家不幸不能免父於難其敢因之以爲名且里役分也義無所辭余甚善其言然卒爲請於令復其身云

右傳劉青藜撰

張三愛

張三愛歎人也年四十不妻受役於其主主貧或告曰妻之可乎
張曰否愛主在不並受他人恩也主固老縣令逋租令索租急當
予杖愛屢代主受笞至百數不少懟愛爲人修長且健筋力多種
蔬售悉以其貲歸輒充衣肉於主且曰主老不忍一日衣肉缺也
獨養母所充衣肉與主同一日母病且篤愛家貧自度力難置藥
乃乞牛糞於道路路人曰若愈母便可以肝愈之愛聞而銜之母
曰女母病而女貧母以母慮遺有餌貲畱以母身後貲愛涕泣不
止銜涕趨而禱諸神曰母病人告我以肝愈我且以肝愈母乃出
短匕自割其胷五藏皆見不見肝復默禱諸神曰久矣哉愛之不

誠也須臾肝墮出愛急伸右手以匕割肝如指許徐以左手緩緩還其破肝納於腹束以白麻愛以肝歸和羹奉母母一飲而輒愈先是愛恐自昏憤默祝於神至是不大痛苦明日其兄聞諸醫醫七日而創亦愈愛主老未受允以弟之子爲嗣嗣爲人性黠鷲數恚愛主受簣時曰若事我我且逝今我將不爲女主而胥也女可便逃去愛弗冑事兩嗣如事主且曰不敢受主遺墨輒遽齒平人自大也惟不逸其力以種蔬植售又悉給兄嫂愛嘗與其里人修荒墓之約凡里中貲乏不能以掩者更無主暴露者愛自度貧無力悉相率其鄰近荷鋤載畚以封築完固之勿令頽敗

王子曰張三愛其王褒之僮乎何天性篤樸一至此所謂禮失而

求諸野也不然公卿大夫士人白首闕然不能盡者一賤眊盡之
又怪當時公卿大夫士人無有表而出之者幾於湮沒無傳聞焉
或曰刳股剝肝非孝也吾第論天下後世人倫得天性之上責爲
王侯賤爲人役皆可以範圍持正合於聖人之徒者而止嗚呼獨
奈何汎汎焉慟江河之無本也夫

右傳王鳴雷撰

日本書紀卷之六十四

三

紀元

紀元字大歷柘城人也曾祖以上世爲儀封人祖有年徙商邱父再徙五遷始居柘元九歲失母依父化蛟以醫往來諸聚明思宗崇禎十二年盜賊羣起掠郡邑元與父相從避賊已而相失父去匿他所元求之不得號泣不肯去賊且至或呼與俱去曰勿特徒死元不去其相牽挽之終不去賊亦不至十二就學邑中經書一過皆通梗槩邑令課士香梅賦元時十八下筆莽莽數千言有奇氣邑令偉之二十爲諸生元生而願偉岸異不羣學舉子業略知其意非所好也好爲奇誕之思上窮天地所際人類所生以及方技小數器物細故靡所不留意鹿邑李子金清辨士也每與元談

反覆盡日夜卒不能屈元自以溢才命世謂古今豪傑可徙倚而
辦因負大志不欲碌碌守文作平居儒生事每讀張良周瑜陳登
李泌諸傳則悽然興懷久之曰真丈夫也因爲鐵橫笛時時佩之
於無人處則習進止攻刺亦少讀星官兵覽居常忽忽仰觀天而
俯畫地遂以可任戡亂濟時而魏鎮復獎之然卒無所用也元至
性過人父嘗病元終夜立庭中欲語輒忘所言竟病無豫色其於
異母諸弟親之一如同產卽有過治之不少卻不以異母爲嫌愛
而能教元一人而已元性愛左史及秦漢諸古文奇書家貧力不
能得其妻賢往往勤紡績佐購之卽不足輒稱貸家用稍稍有書
然率一披廢不再閱隨散去無所惜晚乃假書於人濡首沈酣不

復如向者之輕而浮矣元丰儀峻整亦與人嬉戲款曲不治外形而猥坐諠雜之中造次言動縝密不戢於度負羸疾猶能爲張鏡李元振數數具主人禮然剛直疾惡其天性也一與俗人接則數日恨不止遂閉戶不通人事慶弔卽巷中亦不往元旣世貧賤一旦無所附依能振拔以文章自貴疾凡庸過甚氣折豪貴無少容以故邑中爭忌元嫉元惡元輕易誹謗元無親元者元坦中不留未嘗以微事欺人然淺而不識物情是以交游中有怨之者而元好客便安逸衣服飲食不厭豐潔家貧不能自給魏鑽諸人常爲具酒脯元卽過飲食之亦數招至其家他人雖擊鮮供張不能致元也元以不得志於時遂放廢行歎坐愁戶庭常無人跡而獨工

於詩深雋哀淡知讀之皆感激既出入無可爲懼而諸生名復在
額外益憤甚欲棄去爲四詩擬上學憲張公天植張以遷太常去
元亦死不果上元死時年二十九瀕死惟改竄其詩一卷付其友
田蘭芳爲誦前不見古人後不見來者念天地之悠悠獨愴然而
涕下遂死無所言元簡僻不能與常人交所好皆一時畸士會葬
者纔三五人皆同志友也哀聲動路人異縣聞之有泣下者元無
子有女三人詩一卷

論曰嗚呼余烏知天道哉以元孝親篤友絕才奇情近世數千里
未見其倫比而窮苦抑鬱終身困頓於諸生中復惴惴焉慮不能
卒保其所有且無子天死抑何甚耶起視世之富貴逸樂繁衍老

壽之人行能卒未有先元者又自疑矣至讀其拜墓贈友諸篇輒不禁其泣下也元嘗爲余誦曹子桓報吳質書則流涕原其胷中意趣屈賈儔也而文亦似之嗚呼又何悲哉

右傳田蘭芳撰

日本書紀卷之三十一

三十一

蔣本生

宋之素

李岳伯

李之棟子長盛

張可智

劉

孔巖

漆文先

黃嘉林嘉章

蔣之顯

蔣本生湖南零陵人康熙癸卯舉人幼孤力學事母孝母卒廬墓三年每長號聲徹郊坵有白雁集於墓廬拊翼悲鳴歲餘不去又有宋之素字槐望衡陽人康熙初貢生明末寇亂居母喪寄柩鄉廬一夕夢母心悸急改厝之薄暮寇至焚其廬人驚爲孝感時兵寇駱驛從子錢齡四歲而孤之素攜以避亂嘗與遊兵同寓錢齡寐中誦書聲琅琅兵驚曰此何時尙有詩書之教耶乃相與保護之錢齡後爲名諸生之素家居教授手寫經史日有程卒年七十五李岳伯甯鄉人父國臣廩生吳逆肆掠國臣被劫不屈與妻戴氏同遇害岳伯憤甚糾鄉勇殺賊數十人賊懼遁合境賴以安李

之棟芷江人諸生母歿號搶幾死數日水漿不入口父勸諭之乃
勉進飲食事庶母如母里黨俱以孝稱子長盛歲貢康熙甲寅吳
逆之亂奉之棟匿黃嶺巖洞中長盛出求食忽賊至執之棟去長
盛踵往賊所乞以身代情詞哀迫賊憐其孝並釋之時年甫十八
母蚤卒事繼母如母季弟長璜繼母胡出也之棟沒長璜僅七歲
長盛爲拊教之迄於成立比析產長璜以兄老食齒較己數倍推
多取少時人兩賢之張可智亦芷江人貢生弱冠遭逆藩之亂奉
父母避高明山中日往還數十里負米供啖而自掘茅根啖之父
歿負土成墳母病劇往禱巖門岩神降乩示以方母病獲愈可智
善治生晚而豐裕然疏食布衣如常子孫或以肉帛進則愀然曰

曩吾父病求一嚮不可得死附身無尺寸帛吾何忍以自御耶嘗代人完逋賦置義田以卹宗人會同某迫積債將鬻妻以償出資全之後以孝 旌劉孔贊祁陽人值明季寇氛奉親避亂年十四被執哭告以親病無兄弟賊釋之已而賊敗奔所至殺掠孔贊奉母避兵爲賊執母義不受辱投崖死孔贊痛絕復甦解衣拭血負而趨廬墓悲號者三年康熙甲寅逆藩亂奉父匿山中而已求食於外逆黨欲授僞職孔贊力辭得脫旣而污僞命者伏誅人服其卓見父好施崎嶇兵閒嘗欲濟人急孔贊竭力以供家雖貧不苟取一錢鄉里重之漆文先字會卿亦祁陽人廩生嘗過棲禪庵拾遺金守候其人還之邑令聞其賢欲延爲子師以鄉居矢志養親

不就設館宅左里許日至家問安視膳父珪生癱每以口吮之父抱恙屆歲試不赴又患哮喘新化曾達之有奇方不憚數百里求藥而歸果獲愈母劉氏病瘋走衛郡求醫途遇吳逆兵擒至賊前詢之直以祁諸生對賊喜欲畱之仕固辭曰老母病劇不能應命賊高其行命衛送出境居父母喪三日水漿不入口既殯食粥一依朱子家禮不事浮屠前後廬墓六年深山中虎豹潛藏烏鳥環集里中化焉後請旌建坊入祀孝弟祠黃嘉林嘉章桂陽人嘉林年十四嘉章年十一隨父避兵桂陽連珠崖父歿嘉章嚙身以葬比嘉林長備資贖嘉章歸友愛彌篤嘉林子七多列庠序以詩書世其家蔣之顯字玉卿安福人廩生先是張獻忠黨屠州城負

母逃匿以免全家死之賊退獲姪其魁於山中年三歲撫以成立
之顯年六十復娶妻生子其奇後與其魁同入庠序之顯壽至九
十一有孫六人臨卒書忠孝廉節謙謹勤儉八箴以為家法

右傳李元度撰

按嗣得李之棟季子長瓚事實長瓚貢生
植品端方幼失怙奉母至孝嘗施棺助聘

建橋梁他善行尤多乾隆癸
巳年七十二舉鄉飲大賓

國朝耆獻類徵初編卷三百七十八目錄

孝友四

閔孝子

趙萬全

易富

向廷亮
金國選

周紹英
陳傑

楊枝甡

林瑋

華瓏

吳瑗

吳琦

吳璠

吳琰

蕭日曠

錢孝則

郁襄

弟廣昌
王祚昌

唐景錢

岳薦

錢美恭

冷昇

李娟

曹允昌

宋熿

楊仕

唐君秀

弟茂森

仇憲稷

四庫全書
卷三十一

孫和鼎
王洪元
王福元
顏孟和
顏中和

姜晉珪

國朝耆獻類徵初編卷三百七十八

通奉大夫前署江西巡撫江西布政使司布政使湘陰李桓輯

孝友四

閔孝子

閔孝子者湖州之南鎮人年四十餘種田爲業少未嘗讀書性粗
慙不愜於族里屋數間阡陌相望晨夕率妻子奉若父唯謹父爲
老諸生年七十有二尋病醫藥不效日益篤孝子憂之族里咸勸
孝子急治具不聽妻亦勸不聽一日父病霍然又數日受杖履矣
慰問者欲得其故孝子作謾語笑謝之人以孝子粗慙莫之畢究
其妻亦謂得祕藥活之耳旬日孝子如罹重疾臥牀第呻吟不止

狀甚苦妻曰若何爲者翁前病誠當憂今病且起憂何爲者孝子
唯唯呻吟不止如故妻復曰若亦病耶呻吟何爲者孝子唯唯復
呻吟不止如故妻以爲眞得疾祕不以示亦以乃翁病新愈懼貽
乃翁憂一日晨起猝見其捫心難堪狀妻益疑因伺其寐發所捫
處眎之見創大驚促之曰若何爲者孝子不能隱徐曰予人子不
忍父病之不可救也嘗聞人言親不可藥救者得子心片許雜饋
粥噉之可救某日因禱土神前願剖心活吾父吾父夜半呼飲時
予引刀刺胷出心割若許納飲中以進不意吾父果霍然也當刺
胷時不甚楚割畢創卽斂好如未刺時今始不復忍宜祕若勿語
其妻哀且聞傷心恐死亟白之醫醫錯愕曰吁是願安所得藥妻

長跽泣請醫不可卻妄出藥塗之去言必死妻亦以爲必死泣相
向詰朝藥忽迸落創痕俱失所在矣妻喜出望外促孝子詣醫報
謝醫復錯愕曰吁是顧安所得活殆有異醫卽里中人爲徧聞之
里中里中人美其里有孝子也具聞之郡邑大夫郡邑大夫上其
事大中丞且爲孝子旌門焉旌門日惟其父拱立閭左郡邑大夫
讓孝子出云先二日已逸去或曰孝子終粗獷人也顧安從知接
見郡邑大夫禮甲辰春予遊姑蘇同舟人有從南鎮來者爲予言
若此惜未詳其名

外史氏曰刲股療親古不深許矧割心者哉然孝子故粗獷能篤
所親至不計其生又旌門日先期逸去不欲以孝名尙得謂粗獷

哉今世之不粗蕪者大率全軀保妻子精於自爲者也拔一毛以利君親有所不爲若孝子者可以風矣

右傳吳晉撰

趙萬全

明莊烈帝時會稽人趙應麟者爲書生貧不自得託教授去游北方與其家約幾年當復還後絕無有聞知畱所者應麟有子萬全始二歲依母丁以居及年十許問父何忘返今爲何在也丁持萬全泣曰兒知憶爾父安使爾父誠得歸卒撫汝乎萬全遽大痛食飲臥夢若不甘者至十九請於丁願出求父丁勿許萬全曰母固憫兒獨兒去無奉母者雖然願卽行勿顧時月幸必以父還始應麟困敝甚走之京師冀以獲富貴久客益流落挫忤崇禎末大盜入國都天下潰沸干戈棘道路客游者多不得歸應麟自陀哭意竟轉徙趙代之間以死棄其家二十年矣萬全旣獨行求父邏淮

南北環齊魯秦豫返燕薊嘗數日乞不得食裂趺乳血髮肉脫易
朽然如斷樞然終已不遇心疑應麟死覩骸骼之殘委溝野者剗
膚血滲之堅不入乃舍去復號呼於塗萬全之始出也懼已不肖
父狀取牘書應麟鄉里名氏年歲張於背以行久之乃至馬邑馬
邑故山西邊萬全旁皇邑中不得去張文義者縣人也聞之歎曰
豈爲趙君兒乎急走來視誦所負牘良契文義趣萬全過我過我
勉具客我幸識而翁昔亡自兵中稱何從來五十餘耳顧已髦卽
無所寄食窮歸我嘗爲我主書方且哀其旅死也而柳封之手樹
之柳亦拱於原得示子矣萬全聞言擗地哭奔之隴所仆絕不能
起已太息曰吾初誓求父生迎使還天寶斲毒予雖然固甚不安

於藥痛若罪腰脊庶招魂魄歸猶或少解吾母竟裹應麟骨步負以復於其家馬邑人相聚觀少畱之不可萬全既歸極勞動養其母母亡舍於墳三年以康熙乙巳歲卒後四十年大官有廉其事者表萬全異孝爲祠之廟琢石旌其門

右書事胡天游撰

同治庚午年庚子年庚子年庚子年
卷三十一

口

易富 向廷亮 周紹英 金國選 陳傑

易富湖南黔陽人幼隨祖母唐避獠寇山中唐病倉卒中不可得藥遂割股以療時康熙五年也嘗遇盜劫其父以刃脅金富身翼父涕泣求釋盜爲之感動母病禱神願以身代母夢神感其孝而痊同邑向廷亮十齡失怙弱冠補弟子員會遭寇亂扶母走匿白梁日負米以養寇平母病疫廷亮初進藥無效遂聶股雜羹啗之母病以痊後母歿哀毀骨立孺慕終身又周紹英邑諸生吳逆之亂奉二親侍洞下日借弟市米洪江以供親饌一日弟被賊掠去紹股詣賊日夜悲號賊義釋之有李姓者因逋負鬻其子泣別於道紹股遇之爲出金贖之歸金國選七歲值吳逆亂父母俱被掠

國選牽衣痛哭求釋不許罵賊賊脅以刃不爲動復以杖擊之猶
不舍賊義釋之陳傑字瑞生亦以吳逆亂失父母奔號赴賊營求
代賊感而釋之嘗買於沅州榆樹灣拾遺金訪還其主曰吾不敢
違親訓取不義財也嘉慶十四年 旌

右傳易變堯撰

楊枝牲

文學楊君諱枝牲字德一晉階大中大夫都勻知府閱濂公之孫明經爾逢先生之次子而余叔文學振三先生之壻也君出瑞金著姓席世貴未敢以顏色驕人生而文弱蚤慧八歲時大中公試以唐伯虎花月詩過目卽能背誦三黨內外咸憐愛之丙戌間瑞邑大亂君舉家避兵陳石砦繼砦破家人死傷過半君日夜走積屍中葬死扶傷求醫貸粟跣足垢面無復人色通國無不感歎楊生眞孝子也性沈深好書其爲文容與駘蕩如晨花新月致趣非常箋注名理意入單微出經生常解外前後受知於學使廣成侯公青巖楊公訥庵趙公遜齋李公今九江太守致恭陳公駕部珥

信錢公凡得年四十有二爲諸生者二十八年餓於二十人中者
十三年六應鄉舉而卒不售以丙午赴試病歿於會城之客舍哀
哉命也乎記昔戊辰之春亡叔以送客過瑞邑與爾逢先生倉卒
遇道上目相視不去問客何來者曰長汀先生曰得非黎君振三
乎亡叔曰子必爾逢楊子歡然握手如素識邀歸作食出德一相
見遂以吾妹許之汀之與瑞通兒女媼者自楊黎兩姓始不意王
申亡叔夭歿今德一又無祿蚤世子妹痛夫之亡不欲有生也再
一歲亦死曾不三十年而其翁其壻其夫其妻皆淪胥以盡韓子
所謂人欲長年而久觀於世者亦何爲也哉德一生乙丑卒丙午
有子一方大聘庠生鍾天眷女女一許字庠生陳世逢子葬於某

地爾逢先生哭之過時而悲屬士宏爲之銘銘曰

玉則有光兮桂則有香胡子才也而竟功名之不償
肥者缺兮而剛者折胡子之良也并祈年而不得修文兮
少地下之替人司命兮亦舍舊而懷新其從而婦翁而語處兮
知來去之何因

右墓誌銘黎士宏撰

日本書紀卷之六十一

十一

林瑋

林孝子瑋字堅之閩縣人明直臣戶科都給事中庭墜五世諸孫鄉先輩右通政枝春從祖也美丰儀工文精篆隸山水父公衡以明經授廣西南甯府通判崇禎甲申春之官時瑋猶童子願侍行以幼未果丙戌丁亥後閩粵道阻音問久絕及兩粵大定客從粵西來言公衡落魄賓柳間又或傳其死黔中或傳其棄官爲僧言人人殊瑋自傷弱書生不能隻身走萬里悲憂骨立一夕慟絕見父立庭中鬢眉俱張手拍几案及甦血淚霑衣卽襍被附舟沂九龍灘而上道出豫章豐潭過東粵老龍渡孤身行盜藪陟白鶴峯出陟岵吟哭奠東坡祠下抵肇慶五羊坡阻江漲行沙中幾漂沒

亂後道荒每值淒風苦雨荒亭旅舍山鬼飛沙石撲人啾啾有聲
猿嘯豹嗥悽惋欲絕輾轉入南甯徧叩官吏父老無識者間有談
其舊事恍若隔世無從蹤跡遂由賓州循柳旁行山穴中霧氣冥
濛盛暑不見天日詢土人山僧侏僂眙莫可告訴憤痛狂走幾
欲墜崖沈淵既而金盡力疲道返南甯夜投天鏡山庵從老僧乞
剃度僧驚起曰曠昔之夜夢護法神擁戟前曰急護孝子公其是
矣乃贈十金遣行者導出山指示適郡途徑行百許步有亭半傾
入草間中一木主字明滅似可認拭去塵土蝸涎則林公南甯通
府六字也瑋狂號曰吾父在是矣抱主返庵途遇老翁修眉若雪
聞瑋語音曰子閩人耶何爲至此瑋告以故翁泣然曰吾亦閩人

客此三載亂離未得歸明季年吾閩人有官南甯者明亡棄官沒於北鄉柳坡去此五十里鄉人德而祀之其卽子尊人耶瑋伏地持翁哭走險封土隆然上疊亂石瑋擗踊痛絕諏吉啟攢公衡沒踰紀骨相猶髣髴可辨乃負遺骸謝山僧以歸計其行四閱寒暑千四百日往返踰二萬里瑋年方盛鬢髮斑斑十指半禿踵疼赤胼胝幾半寸聞者哀之瑋旣葬父如禮甫閱月復附舟出邵武於樵川中流遙望鄰舟一僧類天鏡故人越舟從之失足墜水而沒僧歛不見

論曰 國初時萬里尋親者有黃孝子所自記冒險尋親墜崖遇母於見娘堡者有朱竹垞所述劉孝子得林孝子而三矣林氏先

文恪公子世勤以孝感四瑞旌再傳復得孝子乃僅返親骨遽解
脫於水厄視黃劉兩孝子事尤可哀而其父公衡能於鼎革之際
棄官遜跡以終又能令其遺民追祀於易代去官之後其完節遺
愛亦宜因孝子以顯顧湮沒百餘年并郡乘佚之抑又何也昔計
甫草贊謁黃孝子以師禮人或疑之甫草曰人能獨身徒步萬里
蠻瘴之鄉蛇虎盜賊風波險阻飢寒疾病出萬死一生以返其親
是天地鬼神所敬也奚獨吾師世不乏甫草孝子其終無傳耶

右傳陳庚煥撰

華瓏

君姓華氏名瓏字龍叔後自號守固父自明君性至孝年十三母錢卒勺水不入口者數日父食之乃食父年老家貧君竭力進甘旨甚具尋舉父喪哀毀逾甚粥產以襄事如禮既葬而泣曰吾無以逮吾親所可不朽吾親者獨惟文章乃乞當世之鉅公以文名海內者爲志傳表又念書法不工不足以稱乃廣購歐陽率更書綴拾成編一字一畫皆有法度可傳久又編歷世譜系曰守固譜自十六世以上誌傳具存六世祖樂靜君誌獨闕君求之萬方或給以某所曾見之卽冒風雨立往尋訪不獲後竟得之族孫所遠祖栖碧君建春草軒奉節母元張潞公爲之記明文待詔徵明

八分書勒石已散失君重購之尋得之荆溪澄江或出之棺牢井
竈間石凡十九俱全至所收先世遺墨若鄭提舉元祐孝子祠記
黃文獻潛干尙書文傳危參政素貢尙書師泰曾進士堅貞節堂
記序詩銘倪侍御敬三省齋記盛邑令琦贈三省君詩及栖碧詩
畫各一卷三省春日寫意圖及八十不稱壽詩卷皆有名賢詩跋
又樂靜京邸家書一冊凡散佚他所者悉典衣質錢完致之建保
墨閣敬藏其中嘗曰吾每一展視如見列祖音容聞馨咳火齊木
難不易也歿之前語不及他唯命其子章志此世澤也汝善守之
名曰孝節傳芳冊琢石未果春草軒欲構諸旁隙地置石其間其
成吾未卒之願孝節傳芳冊者君台孝子傳貞節堂銘亦集率更

字爲之者也他所蓄古文碑誌多有雖甚愛遇其子孫必歸之曰
彼祖父遺物也吾何私焉又作世墓記志昭穆位次每春秋展墓
必虔友愛兄弟始終無間伯兄季弟死任其喪葬久而哀有餘護
其孤尤力嘗曰吾祖父遺體也吾不敢忘祖父敢薄兄弟哉伯姊
適王氏貴顯仲適鄭而寡季適亦鄭而貧君待之如一而於二鄭
有加撫鄭之子鍾禔及長而以己女字之割所居居季之無歸者
與人交一以誠生平所排難解紛甚眾而不自德其終也年六十
有二子六人章志順治己亥進士今爲中書舍人候補主事
贊曰華氏之先自宋戴公生考父食邑於華因氏焉晉義熙末諱
寶者以孝行聞南齊詔表門閭所爲孝子祠者也十八傳至都尉

榮又三傳至承事原泉扈蹕南渡爲今無錫華氏始祖七傳至都
事鉉妻陳以守志旌貞節堂所爲作也鉉生幼武栖碧君也幼武
生棕譚棕譚生興叔興叔生宗康三省君也宗康生楷楷生慈樂
靜君也慈生欽訓欽訓生玄祥君祖也自譜牒不明士大夫或莫
知其始所自出今華氏越千百年而世次可考而知可謂故家夫
好古之士收拾金石訪求殘缺斯已勤矣況先世之遺言故事手
澤存焉者乎詩曰君子有孝子孝子不匱美矣夫

右傳韓菼撰

吳琰 吳琦 吳璠 吳玟

吳自太伯十七傳而至王壽夢壽夢四傳而至太子友亡楚友七傳而至漢長沙王芮芮八傳而至大司馬廣平忠侯漢爲南陽宛人漢十三傳而至晉孝子猛爲豫章人猛八傳而至唐左臺御史少徵少徵八傳而至光在咸通中始卜居歛之西溪南爲西溪始祖自西溪又二十三傳至明天啟中有名憲者始遷於杭而居爲杭之始祖憲字叔度一字無愆初來錢塘器識偉然與其賢達長老者遊同輩皆屬目下之明制設科之法士自起家應童子試必有籍籍有儒官民軍醫匠之屬分別流品以試於其郡卽不得就他郡試而邊鎮則設旗籍校籍都會則設富戶籍鹽籍或曰商籍

山海則設籠籍士或從其父兄遠逾數千里或千里歲歲歸就其郡試不便則命各以其家所業聞著爲籍而就試於是郡杭爲南方一大都會故未有商籍也憲獨與同邑汪生文演上書當事力言杭所以當設商籍者臺臣以聞報可於是憲遂得試於杭而爲商籍諸生杭之有商籍今百餘年諸生從此應布政使試及再試禮部率顯名以去者歲歲不絕皆憲倡之憲居錢塘旣美其湖山之勝久之與其一時知名之士議曰學所以學爲人之標準也今羣居徵逐獨行固陋諸君何所學乎於是考地吳山之陽建書院以祀朱子歲時朔望則咸來登拜俎豆以習禮法以其暇日更立期會爲文章相勦錯如是以爲常今所謂紫陽書院是也方熹

宗朝閣人魏忠賢用事其黨布天下於時諸郡競爲忠賢建生祠而杭州之祠巍然與紫陽書院相偪處其黨或以爲隘也則計謀所以取書院地更拓而大之以媚忠賢憲聞之趣令長子瑗招同學諸生數百人明日會祠下旣至方籍籍相語憲慷慨曰鸞孔不與鴟鴞同巢麒麟不與狐狸同野今日是矣諸生皆慟哭旣發憤爭門而入守者不得禁則更指忠賢像大罵罵已則其擊碎之投溷中出盡撤其祠而書院賴以不動閣黨以憲名聞忠賢大恚必欲致之死時方起大獄因嗾其黨羅織之主者搆憲庭訊再三辭不服卽逮京師詔獄少子琰從行將以身殉父也明年莊烈帝卽位忠賢伏誅事得白放歸遂不仕而獨肆力於詩書及古鼎秦碑

版六代唐宋以來書畫可珍玩者既作樓以貯之又刻水晶徑寸
以小篆法書樓名名虛白室憲日日讀書則必手書書一卷書成
必取虛白室印印卷首而藏其刻本於樓中不復讀徐徐出其所
珍玩摩挲考据以辨其毫芒於古之合不合者至秉燭而罷其晚
年常居樓中凡十餘年而樓燬於火又數年憲卒憲平生磊磊尙
氣節而教子獨以醇謹有子四人伯瑗仲琦叔璠季玟瑗字伯玉
從其父毀闕祠及釋歸益勵名節好學能文章獨不喜浮屠氏曰
人不師聖賢何所不至老而怖死則口作西域語曰免我免我真
愚也順治中子鑛以進士官粵西臨行受教瑗曰牧令親民之官
無他奇公明平恕四言而已子守其訓爲良吏琦字稚圭莊烈帝

時刑部尙書閔夢得以賢良方正特薦詔授通判謝不起閉門著書日夜不釋手所著有尙書翼注行世璠字子璣天性至孝父疾革割股和藥進焉比卒哀毀骨立喪母三年泣血目爲失明康熙甲寅歲閩亂諸郡子女俘掠道路不可算璠爲傾家資贖之訪其父歸其子訪其夫歸其妻凡幾千人又以爲杭固都會也四方客死或無所歸骨乃暴於野遂搨悲智社有死者醮金殮之當事屢旌其門竟以壽終璠字秩存方父之被逮也年十四獨行從其父庭訊則代辨析在獄則屬餽藁時僉都李之方按獄左右叱去之璠泣曰吾來爲父白冤義不畏死豈畏叱耶竟從父逮京師旣釋歸在父左右無不先得其意母遘風疾臥不得起扶持牀第開衣

不解帶者年餘有兩從叔事之如父嘗曰遠祖之藏第而不治是無人後也家有餘而無田以祭是餒其祖也以故置祭田除墓道終其身不敢怠兄弟四人孝友如平生皆不仕年皆過九十歲未嘗析居異爨家庭之間怡怡相見或偕行出遊翱翔於兩峯三竺之間衣冠顏色典型儼然錢塘好事者或畫南山四皓圖以傳其事嗟乎四公之後今又四五世子孫幾至百人蓋數十年矣自琦之曾孫名祿乙字鐺閣孝友君子也爲予父執其子聞生又與予同學總角相見如昆季鐺閣先生爲予言祿乙自弱冠遠遊且四十年昔歲反錢塘避雨於市古貨器者之次買水晶小印持歸家於故書卷首合之宛然先高祖虛白室章也私念百年故物歸其

主者既甚喜他日當於家中隙地構廡一區以復虛白室之舊業而祀我先人且述先人之行事懸之室中俾伏臘家祀小大稽首咸得來觀一通以示其子若孫子其爲我文之予不獲辭謹據杭州府志錢塘縣志吳氏家譜與先生所口述者裁擇而爲之傳傳曰數典不忘其先又曰明德之後必有達者古人或表於阡或碑於廟豈不美乎今吳氏先人之德若此五世以來益以孝友詩書世其家獨其子孫未聞張大其先如古人云云吾聞善之積也不發其發必大非獨大也必久吾是以知吳氏之子孫大且久也

右家傳朱筠撰

吳瑗

吳公瑗名伯玉字其先歛人號溪南吳氏明嘉靖間有九竹公者
樂武林山水家焉傳子叔度爲杭郡學諸生故事商受齷於浙子
弟遊學者非土著不得試公請於朝立商籍今所在與試士自童
子以至立朝皆公所成就故至今士皆主而祀之以無忘公之德
有子八人世比於唐之崔漢之荀周之南宮又上之以爲吳氏當
今元凱也而伯玉公居長公秉異姿於書不過一覽學宗濂閩文
必師古大家試輒冠多士當事多賓禮焉縣校童子得公卷奇之
謂此大儒文母乃代童子欺我置不錄而公文已籍籍士林鄉先
生交爲言吳某文雖老年甚富眞英雄也柰何以捉刀人疑之哉
令大驚自以爲失天下才也秀水朱相國重公名聘爲公子師

入南畿辟雍公竟以太學生終云嘗侍親疾藥勿效割股肉以進
本草云人肉可起沈痾世有愛親者行之或不驗而公竟得愈親
疾非其天幸至性所格也公之順親友弟和閨門所以修於家皆
有可法固非求知於世者而公卒老太學未有卓然豎立於朝然
其見義必勇不以死生怵足以媿朝之辱身汗行以媿阿於時世
鮮有知之而史未之傳也天啟朝璫虐箴張毒流士大夫爲其養
子者生祠徧海內而君尊人故有書院在湖麓招同學者砥志論
文其中祠紫陽焉至是將攘爲闈祠君不可有陽好者謂吾與爾
圖此甌脫耳不棄且速禍君曰此余小子承嚴訓以昭事先賢者
也祠可攘先賢其可黜乎惕威以調邪吾不能守道以危身吾亦

不避卒不可奪而璫亦敗矣當是時愴公者慮無不須臾中危法
誚其愚豈料璫之敗哉夫於禍福爲愚者於義理爲勇孟子曰人
有不爲也而可以有爲推此以立朝決大難於危疑呼吸而不動
色言則犯顏敢諫守則固死封疆皆其素所樹立也惜終老布衣
不得有所爲而君之大節幸其時否極而泰以全其真而晦其名
世故鮮有知者然是則可傳也長公子鑛舉進士官平樂司李君
敕之曰粵西新出湯火職又司刑刑非以殺人期以生人而已由
是粵西稱廉明皆公教也司李君先公卒公之澤又未獲大施而
次君鈺文孫祖謙甲偉皆以文章行誼世其家承歡色養於膝下
蓋公八十有八諸弟與公偕臺者三人每湖山讌遊鬢眉皓潔好

事者至繪爲圖以爲生而八元老而四皓也嗚呼可謂德榮矣公
考終之明年戊申鈇次其行狀以乞於立言者而某爲之傳著其
大節之不可朽以俟 國史嗚呼是則可傳也矣

右傳唐靖撰

--	--	--	--	--	--	--	--	--	--

176-694

蕭日曠

孝子祠在江都之廣儲門外以祀蕭孝子日曠孝子世居城中年二十八以母病醫久無功因割肝自熟以進母母愈而孝子死邑人請於有司建祠而祀之蓋康熙六年事也或曰廬墓割肝非孝也祠而祀之可乎予曰孝之不貴割肝廬墓者此聖賢之言也惟聖賢之於親既已無絲粟毫髮之憾矣故無取乎割肝廬墓以爲孝今之人之待其親者曾不及其妻子甚且等之路人而乃於世所希有之孝託聖賢之說而非毀之嗚呼亦見其悖而已矣且夫割肝之必至於死而不可以僥倖於一試雖甚愚人亦知之使孝子始念不出於至誠而有一毫假借於其間則雖偶有是心而當

其抽刀自向時亦將畏而終止而孝子斷然爲之不悔者彼其視身之死有不若鴻毛而視親之生有不啻泰山者矣夫一死之不惜以求生其親則凡事之不至於死而有益於其親者從可知也吾又以見孝子他日之孝也孝子形貌不逾中人白晳而癯居常薄於飲食可謂怯弱之士矣及其不自恤以求親之生又何勇也豈非仁孝之性出於其自然者耶余與孝子同里閭而予之生後孝子二三十年常以不得見孝子爲恨然每過其祠覩其遺像未嘗不反復流涕想見其爲人也旣以解或人之疑遂書而爲之記

右祠記唐紹祖撰

蕭孝子諱日曠江都人其母朱氏病且殆孝子刲脅割肝使婦處

氏和藥進母母愈而孝子死世之學者言不敢以親遺體行危殆
爲孝是固然也抑紂之時微子去之比干死而箕子奴而皆爲仁
武王伐暴救民伯夷恥食周粟而皆爲聖君子行豈必同乎今夫
小人之爲不善非不聞有禮誼廉隅之介也出於情所不自勝則
潰藩籬蕩防檢而不可抑遏豈尋常義理辭說之所能易哉故曰
求仁而得仁又何怨孝子旣喪虞氏謂母初愈不當使聞悲慟乃
匿語姑曰日曠商出耳殯孝子他室奠則麻衰絰而哭孝子入則
常服而進食藥孝養十餘年姑死虞氏守節以終虞氏誠賢婦然
亦孝子行足感動之以成其德士患欲行道不能必於妻子者觀
於虞氏可自反矣孝子事在康熙時墓在梅花嶺東邑人祠之於

墓側鹽運使遼東朱使君至修整祠宇桐城姚鼐爲銘之曰
親吟於席子憂弗甯親偃然死子欲無生親蹶然起而坵子形猶
全九鼎碎彼缶罌何究何思一決於誠志存身滅夫豈殉名德衰
恩薄以忍爲貞千世萬世徠讀此銘

右祠記姚鼐撰

錢孝則

錢孝則桐城人田間先生子明福藩稱帝於南京阮大鍼爲兵部尙書以鉤黨逮田間甚急田間變姓名出亡孝則從自金陵抵震澤而吳中兵起孝則之母及弟妹皆赴震澤死孝則脫身走匿稻田中賊去收其母弟妹屍權厝之而從父入閩其秋閩之延平叛孝則奔汀州汀州亦破父子遂相失孝則乃間關入粵出入五嶺間數年復入閩寄居邵武之寶蓮寺前後凡十三年始得與父俱歸歸九年而孝則死於盜先是田間自閩還取徐氏以書室爲寢而居焉亡何田間復外出孝則以徐氏母不可獨居乃侍宿書室門側小室中室有夾牕臨野族人或疑徐氏厚積與盜謀毀牕入

縛孝則使俱入內室以劫徐氏孝則不許盜以斧劈其頭死孝則
婦方氏守節凡三十九年而卒

右聞見錄吳德旋撰

郁褻弟廣
王祚昌

康熙七年戊申夏四月先是浙江嘉善縣民郁之章有罪流徙尙陽堡會有認工贖罪之例其子候選知縣郁褻請修刑部衙署贖父還里至是限期將滿尙未訖工郁之章例當復徙郁褻叩闕願棄官代父之徙所郁褻弟生員郁廣亦叩闕言己當代徙畱其兄郁褻侍父疾部議子代父徙非舊例仍治以衝突儀仗罪上矜其孝友特並宥之康熙八年九月山東邱縣孝子王祚昌割肝療父父病立起特旨給旌後不爲例

右東華錄王先謙編

唐景錢

吾郡以孝謹世其家者曰唐氏其先出自荆南宋參知政事質肅
公介四世而子孫渡江僑居吳是謂授書郎裕文公自裕文下十
有七世海虞牧齋錢先生所誌晉陽唐君聚升墓諱映奎則君之
父也由聚升而上累世修儒術聚升早孤能以科舉業教其二子
而君居長君諱景錢字時若別字容齋與其弟默齋相友愛偕君
之子堯勳三人者皆諸生子讀海虞之文固已心儀其爲人且曰
吾郡之葬其親者好竊公孤名氏以爲重唐君獨知牧齋爲可傳
斯之爲好文抑亦足爲孝矣今年春堯勳衰服踏門來謁默齋尤
助之請曰吾兄之乞銘先墓也將以圖不朽今者吾兄又亡矣微

先生孰宜銘余遜謝不獲乃據堯勳自爲狀序而銘之序曰君初治經爲應舉學自以往代名賢後無以光耀前人之爲乃益攻苦於所習其制藝頗爲里中宿儒所稱許旣再試鎖院被放而又遭母喪會王師下吳郡旣定而湖寇大作老幼爭避匿君不可其父勸之走君號頓匍匐願謂弟曰父往不可莫之侍也母殯不可莫之守也行矣我必死於此無何寇至投以刃不中中庭柱刃碎於木寇執其罇不能擊愕然阻乃舍之去禮人子居喪殯必用車車必有紼所以備火災戒不虞也其祭也謂之越紼而行事夫祭尙謂之越紼可以柩在堂而不守乎火災尙備而況於兵乎古者三月葬無所用遭兵之禮然謹而防之如此若唐君者斯可謂之知

禮矣當是時部使者有徵令於吳中有司上富人籍以典織作而君之父貲不中格年老矣名乃在選中私憂之不知所出君奮曰朝廷自發金錢予服特以勞使民戶苟吏不乾沒工不惰贏而我出私財以彌縫其闕則事亦易辦耳於是辭其父常以身繇部中賦事獻功甯勤弗怠如是者五六年始遇 恩詔以免等輩大抵破家矣而君不困君天性精密既棄其經生言則彊本節用大修其先業閒出於廢舉以相濟太公得以擊鮮奏酒佚樂而終君蚤作夜興攻苦喫淡具酒食以會里黨推貲財以恤親知嘗以默齋性簡易不甚治生產曰一家之中有無必其幸處贏餘而可以弗吾告乎平居不苟訾笑從昆弟親戚飲則歡怡竟日愛其子教督

之爲延經師禮事之惟謹其爲人如此君元配黃孺人事舅姑以
孝治家以勤知詩書備婦德生子而年不永繼室以鄒氏今在養
君疾革而救其子而喪葬所以處二母者得禮之中焉君歿康熙
七年秋距其生乙卯也年五十有四黃孺人同年生先於君三十
年卒一子卽堯勳黃孺人出也娶鄭太學生泰裕君之女君女二
長許字于華爲進士扶嗣公之子次尙幼堯勳以庚戌閏二月之
九日合葬君夫婦於友字圩之舊阡從遺命弗他卜也堯勳尙未
免君之喪而其於母也生襁褓而見背故哭踊加哀葬之日行道
聞而悲之余雖未獲識君而默齋之來速銘也口述君之謦欬語
笑若可得其髣髴非其生平相愛不及此嗚呼觀君於兄弟父子

之間則躬行孝謹亦可得而推矣法當銘銘曰

有宋直臣曰維子方湖彼初授政最平江南渡建炎詔求其後道
斷不達除官未授載觀家傳迺遷此邦譜則備矣史應失詳孝謹
傳家儒生奇節苦由弗離格於金鐵長憂兵火少事詩書用其萬
一力田廢居杼軸其休徵令以息小試治家有治有則何有何無
相賙相救維兄及弟自親逮舊保有令德質諸先公胡不中壽有
子亢宗山隋水旋若堂若斧同穴茲邱爰告終古

右墓誌銘吳偉業撰

余僑寓吳中五載得與其賢豪長者游聞有唐君容齋者孝友著
於鄉閭與人交不輕然諾有古俠烈丈夫之風方欲往造其廬而

君已溘然捐館舍今年春君之孤堯勳將舉葬事奉元配黃孺人耐焉婁東吳梅村先生許爲之銘而以行狀屬予予惟狀者貌也猶畫工之作繪也衣冠劍履纍然甚都而鬢眉顴輔索索無生氣則君子無取焉夫以耳濡目染人子所不能言者而使他人代爲之言則其視誌墓之文爲尤難辭讓再三堯勳之請益勤謹按唐氏世譜其先自江陵遷也宋神宗時參知政事質肅公介以直節忠鯁有聲朝廷當時所稱眞御史唐子方也建炎初子孫渡江而南一居新安之歙縣授書郎裕文公見吳中山水而樂之遂家於吳十三傳而至鄉貢進士建中公某子南遙公相諸生不第里人稱其賢也南遙公生樹翹公某樹翹公生儀喬公映奎是爲君父

君幼而好學願嘗有清獻之疾儀喬公最憐愛之曰孺子勿過自
苦君乃不敢雜誦以傷儀喬公意夜引燈帳中臥覽而默疏之質
明視初席間血絲如絡其專且勤如此時文格日益卑經生家好
爲支離綺靡之言君獨取先輩大家之文早夜編摩鐵心指髓而
爲之每一篇出見者以爲王唐復起三數年來禮部請以釐正文
體頒示天下學宮向之荆榛險怪翕然一變於是吳人莫不服君
先見之卓而悲其不遇也乙酉春居母黃孺人喪勺漿不入口絕
而復甦者數矣是年五月王師方下江南惟太湖餘孽未殄所在
剽掠吳人一日數驚士民多亡匿山中或謂儀喬公曰郡城旦夕
且破盍去之勿父子俱屠也君泣語其弟景宋曰執干戈具糗糒

奔走以衛吾父汝職也母氏在殯吾將以死守之已而賊入殺長
吏吳人死者相枕藉君裹麻苴杖臥於喪側賊逐之環棺三匝且
泣且罵賊以刀斫君弗中中几几裂刀亦寸寸斷賊相顧驚怪稍
稍引去自是遂相誠無敢入唐孝子門者時乙酉六月也踰年丙
戌初開織局於吳以重臣臨之檄下所司句稽富民爲機戶儀喬
公名在籍中憂懼不知所爲君曰景錢在大人何憂乃棄去佔畢
趨事於公府者六年會有 詔停免事得已於是儀喬公乃大喜
曰吾產不及素封不幸乃爲怨家所搆今里中之充斯役者某某
粥田宅某某妻子填牢戶吾兒一嘆惜書生乃能彌縫支柱事歲
而不腆之廬無恙何其辨也方是時儀喬公春秋高矣君服勞奉

養凡所以娛其意者靡不至其居喪也充充如不欲生卒哭而葬
哀感路人弟默齋公卽景宋也君愛之尤篤分甘周急人以爲有
姜肱辭包之風孝友敦摯其天性然也君治家尙儉食無兼豆而
雅好賓客鳥履到門歡然握手袒裼呼盧參橫月落人有婚喪之
請未嘗以無爲解嘗築館於所居之旁招致里中子弟讀書其中
而爲堯勳選良師以傳之故堯勳能博學閑覽褒然知名於時丙
午夏君得疾遂篤呼堯勳而語之曰孺子知汝母乎汝母黃也棄
汝早繼母鄒實撫之汝母之始歸也吾方爲諸生篝鐙佐讀往往
夜分乃罷事王父母婦職以修王父母蓋亟稱之諸姑伯姊媼戚
宗黨莫不嘉其淑惠至今猶有泣下者不幸賢而早世垂三十年

而吾乃得合葬於先人之墓側當復何恨雖然我死則汝當執喪禮也稱孤不稱哀則嫌於無黃稱孤並稱哀則嫌於無鄒孺子意何居堯勳頓首悲號不能仰視曰惟大人命君咨嗟良久曰喪則稱孤葬則稱孤哀爾其識之明年戊申疾革猶以爲言堯勳泣而志之不敢忘嗚呼曾子易簣之言君子以爲知禮今唐君之告其子其可謂之治命也已君生於萬厯乙卯六月二十五日卒於康熙戊申七月二十四日享年五十有四黃孺人生於萬厯乙卯十月初八日卒於崇禎戊寅八月二十三日享年二十有四子一人堯勳長洲縣庠生身歿氏女一人許字己亥進士華公振鷺次子某孫女一未字卜以庚戌閏二月初九日合葬於祖塋之次余雖

未嘗交於唐君而識君之子因得聞其梗槩復徵之吳人而信不
辭固陋而爲之狀庶當世之君子有所採焉

右行狀宋琬撰

岳薦

岳西來名薦山陽人明季補諸生知天下之將亡也酒酣耳熱輒噫嗚欷歔罷去人皆笑以爲狂獨與劉禹慶善家苦貧食常雜糠覈然奉事父母惟謹其父性闊達喜爲豪舉西來求娛其意百端恆恐不得當也父母相繼歿每哭踊氣息不屬者數矣素壯健無疾至是以毀故病羸終其身有庶弟甫生而其生母暴死會西來亦生女令婦棄女而乳其弟弟又患瘍日夜嗥呼不止夫婦更抱撫之遂俱染瘍毒膿血淋漓被體怡然不少怨恨 國朝康熙六年劉禹慶授官岑谿西來與偕往未期年竟卒岑谿年五十有一西來無子頗嘗爲歌詩自娛門弟子欲藏弄其藁不許曰人願力

行何如耳安用區區小技爲哉又嘗爲文章發明經史之說旣成旋亦毀之終莫能閱其際也

右聞見錄吳德旋撰

錢美恭

錢美恭自敘曰先君諱士驥字房仲天啟丁卯舉人崇禎癸未授雲南陽宗知縣時有二子美恭其季也年甫八歲庶母與仲兄之官美與伯兄侍母而故鄉未幾兩京淪沒滇南道梗伯兄亦亡戊戌己亥間滇方內附美卽欲徒行老母勿許癸卯中秋老母謂美曰汝卽行貧兒何以爲萬里計乎美曰此不可計料絕處逢生未可知也遂於其月十七日依同邑范木公至江西依山右馬緒南至廣東得病幾殆畱廣東者六閱月依大賈張爾侯至南甯瘴氣方惡畱南甯月餘至廣南又病土人以草藥治之轉而爲疴扶病行山徑十步九頓抵蒙自縣宿土城旅店永夜不寐呻吟悲涕聲

達戶外有滇人楊姓者詢其始末美悉告之楊曰是故錢守兒耶
守以考最擢嵩明州乙未五月二十日卒官葬臨安府通海縣之
南山在滇復舉補子滇中兵燹頻仍官民家無不盡於剽掠君家
兄弟僮僕不知散失何所美聞此言五內崩裂我萬里尋親冀望
生父同還豈知爲不可追之泉路乎至通海詢諸途人既不知有
流寓錢氏並不知有所謂南山者徬徨計無復之有告美者曰河
西縣小街有下江人僦居盍往問之美匍匐其地亦皆茫然痛哭
於路左觀者驚訝皆來問故有老人聞之曰我爲闕氏我兄應乾
乙酉科錢公所取士也此地有童姓者君家舊僕詢之當得其詳
及往僕適他出其婦滇人詰問再三愕然曰此豈浙來小主乎有

頃僕歸不復識詳語之乃抱頭哭叩其始末與楊姓無異也僕遣
子報仲兄美與僕謁墓南山仲兄至亦不相識矣哭拜墓下與仲
兄商歸柩之計相視茫然次早探庶母幼弟頽垣敗壁不勝其慘
闕君亦僅謀朝夕脫驂之事有志未逮時甲辰十一月五日離家
一年餘三月矣夤緣入幕僅三月而所得傭值又爲土寇掠去寄
跡僧寮者一載乙巳流寓嵩明之兔兒關丙午丁未戊申三年間
往來宛轉勾貸乃藉臬司張彥珩督郵趙文叔之力得以六月四
日設奠祖道兩弟庶母畱滇仲兄與美東還九月十五日抵家往
返凡六年其自敘如此余於甲午歲在陳恭愍家見演傳奇尋親
記者哀怨動人董次公指示余曰此美恭也其父孝廉官滇中流

落不返頗似傳奇中事少年忍而爲此是無心肝者豈知美恭萬里之心卽在數尺紅氍上乎錢牧齋嘗向余痛瞿臨桂之火化也取柳子所爲趙襄陽丞誌讀之百越綦綦羈鬼相望有子而孝獨歸故鄉流涕者久之瞿氏子會錢二千金而燼其父骸美恭赤手而歸其父櫬人之相去如九牛毛豈不信哉吾友錢廉求記其事若以趙襄陽例之卽以此爲錢嵩明誌可也

右書事黃宗義撰

冷昇

益都冷孝子名昇邑諸生父植元好遠游崇禎己卯適嶺表鼎革後兵戈阻絕三十年孝子發憤依肇慶道趙韞退進美往端州冀便咨訪一日有喬某者亦山東人往西粵孝子跪請訪求閱歲喬返微聞其父沒於龍州土司孝子遂辭去溯牂牁而上歷三百七十餘灘自橫州達南甯又經遷隆思明行五千里遇那利人蔡鄭二叟詢知與其父舊爲龍州土司客乃與偕往復與葬師譚姓者遇竟得父櫬於龍州北門交帶橋側負骸骨歸孝子自敘其事爲龍州扶櫬記夫以一寒士父沒三十年竟能覓遺骸於萬里之外雖欲不謂之孝其可得乎亟書之以愧世之蔑視其親者

右記余金撰

右記余金撰

三

李焞

李孝子焞常州宜興人父用楫明進士嗣桂王永祿時爲肇慶推官游擢至肇高廉雷瓊羅巡撫而大兵已入南雄用楫知勢必不支卽以其帑屬西甯尉而去耿兵至合浦用楫逆戰於青頭營未決相持月餘總兵萬良叛降耿引其兵夜劫營師遂潰用楫單騎走之靈山自沈於勞氏之園池以死是歲順治紀元九年也後十七年焞乃詣靈山奉其骨歸宜興而葬之方公之潰於青頭也止僕楊爾成從公復舉戈麾去之眾莫知其所在屢遣人蹤之弗得也久之家屬之畱西甯者漸以物故不得已去之歸比至而家已被籍寤甚道里益遠遂更無道及公者焞旣長歎曰世固有人于

而實父母生死於弗問者乎慨然訣母兄率一僕王川壽者以出自江西入廣先取西甯諸死者柩頓之梅嶺畱季父用杖守之而銳身四出以覓父公故有肇慶吏曰王之仰而順德鄜裔者公戊子所取士也焞從公宦肇慶時夙知之仰乃先之肇慶欲因之仰識裔以得公會之仰從軍出比半載始歸遂與焞如順旣得公死問於裔卽偕裔之靈山詣勞氏勞名貞觀亦公門下士先是公至其家卽欲覓死爲貞觀力勸而止居數日楊爾成復潛來從公偶出入合墟爲土司辭威鳳一作錦文所獲辭訶知公在勞氏故縱爾成以脅公欲以居奇公遂死貞觀爲斂而厝之錮之以石旣爲焞備述其前事更引至厝所拜公焞乃發其厝篋公骨負之取道梅嶺

並挈諸柩以歸焞以康熙六年五月赴粵其歸也八年十月往返萬九千餘里爲歲二年又五月云身所攜之金兵阻江西月餘罄其貲得同邑蔣公助之金僅至廣途中屢乏絕嘗經鍋蓋嶺嶺峻如削澗深廣雷雨暴至不得渡乃取裹足繫連綴之遣川壽腰懸亂流以先己從後猱接而緣之以畢渡既渡日已暝雷雨益甚念無可宿者兩人共執蓋雨立至竟夜及曉乃行其艱苦如此而兄某內溺其婦意願弗善也焞字月蓬性迂懦數爲兄嫂諸子所虐使後不任其詢乃用老僕陳爾壽策避之僦居吳門以客授終其身

右記事毛燧傳撰

皇朝通志卷之三十一

三十一

曹允昌

曹允昌字石癖更字石霞麻城人崇禎十二年鄉試第一十六年
進士授嘉定知縣不事吏治左遷福建照磨轉入雲南順治八年
潛歸里內院洪檄至軍中佯狂謾語醉吐洪茵又以詩誚之遣歸
益放浪於佛仙父某前永昌府判卒於官順治十七年雲南始入
版圖允昌扶病奔喪甫入境有文氏四歲兒迎呼允昌名誦其闈
贖曰我汝師也已卯主試章正宸與君同行矣無何兒殤允昌奉
父母之喪並挈明滇南督學黃岡何閔中柩至昆明病劇卒家人
慮道遠寄置何柩允昌輒重不發其弟曰兄爲何公柩也耶昇何
柩至數步又止其弟曰兄爲何公先輩且客也前何柩乃發子聞

其事作後哭石霞詩康熙九年七月記

右記顧景星撰

宋熿

宋有孝子曰宋君廣生歿以康熙庚戌距今二十八年矣其族黨猶能言之當君之葬也子之塾狀君而不乞銘曰吾謀不朽吾父者將必求世之立言者而託焉甯慎之母遽後二十二年之塾繼歿其明年君配劉孺人亦歿又五年爲康熙丁丑諸子之璽等將以是年某月日啟君窆奉孺人匱合乃介子友微峯持之塾曩所爲狀來請銘予受狀讀而歎曰微獨君孝子應銘法其子亦孝子也知求文章以不朽其親而志迄未遂可哀也已蓋遲之廿有八年而乃屬子銘予其敢辭按狀君諱熿廣生其字宋之商邱人曾祖諱纁明神宗朝歷官吏部尙書諡莊敏宋故有三報祠祀包孝

肅海忠介與莊敏而三云莊敏公生治蔭生官刑部郎治生枏太學生枏四子君其仲也君幼有摯性年十二喪父哀戚如成人事母武太君步不忍離奉甘膳必腆既娶生子矣猶依依如孺子然明崇禎十五年流賊再圍汴決河灌城賊兵搜牢四出宋城亦陷君虜入賊營與母相失晝夜號哭不食賊厭且怒脅以刃君泣陳幼孤奉母狀曰母死生不可知願一見母死不憾賊惻然曰孝子也哉孝子不義釋之遣導之城中尋訪兩晝夜與母遇長跪相抱持大慟賊騎縱橫馳過者皆環駐歎息君扶母匿尼庵後數日賊去竟闔門無恙尋草寇起宋不可居將避地河北念母春秋高欲自負母度氣力不勝涕泣語其僕曰患難見人心吾母卽若母也

僕泣應曰惟命乃縛木爲兜子與僕同舁母行日百里足爲之繭君體故豐疲極喘汗被踵欣然也亂後奉母歸故居後十餘年以壽終予讀唐史孝童楊牢父遇軍亂被害牢走二千里往求父尸號伏賊壘委髮羸骸爲可憐狀賊意感憫以屍還之烏虜牢求父於死而君求母於生匍匐呼號身試豺虎之吻而至誠所動事適相類而世往往謂古今人不相及何歟豈非持論者薄歟君讀書通大義年十八補邑諸生後以例入太學性剛直遇所不可輒憤發面斥人已則懽然待諸子如嚴師稍失意則庭立譙讓久之乃已治家精心計課僮奴耕畜拓產至三百頃遂以貲豪然慷慨樂施與能振人之急人亦以此多之生於明萬厯乙巳距其卒年六

十六劉孺人明舉人金鄉縣知縣諱廣譽女淑嫗識大體能佐君
孝事其姑家居不御紈綺操作勤勤及耄猶筋力不衰後君廿三
年卒年八十有七子男五長卽之塾前卒次之壘與塾俱貢生候
選州同知次之墳之型之堡俱太學生之堡亦前卒女三諸生朱
瓚周士璧常世焜其壻也孫男十四人女若干人曾孫男若干人
女若干人墓在三陵臺西南距莊敏賜塋百餘步微峯名畧君之
從子讀書質厚人也徵其言信銘曰

窀卅年銘石缺今得之鋤以鐵孝子有後徵茲碣

右墓誌銘邵長蘅撰

楊仕

處士楊姓諱仕字廷範其先世建安人洪武初王師入閩抽良家子從軍楊氏遂以是時隸籍汀衛積七世至齊吾公公治養生家言處士爲齊吾公仲子少聰穎讀書能領大意就外傳瞻視異羣兒同里學博吳公機雅負人倫鑒深器之以女孫許處士齊吾公既恬養敕斷家事諸伯季又拓落不數問生產以故處士不復能治舉子業處士實才甚食指數百計處士皆絲分縷悉積三十年內外無閒言當齊吾公在時間有微恙處士必束衣同臥起日撫摩無倦色齊吾公止之曰獨不使他婢僕他子姓代乎處士跪請曰兒事大人能幾時言已輒泣不止齊吾公深領之曰願兒生于

如兒事父今齊吾公歿二十餘年矣處士言及猶涕不可忍先是處士費錢數千緡卜地於東郊值伯兄死不克葬處士曰願予於吾兄何如其敢吝此一坏土他日得旁一尺以從伯氏地下願足矣隨舉以畀之聞者皆難其所爲跡處士數事皆根據性情原本學問非如世俗士標一二奇節以爲名高者處士生於某年月日卒於某年月日得年七十元配吳孺人卽學博公所許配處士者孺人少修婦儀督家政不私粟縷其外家子弟過從席不二簋酒不三爵曰吾恐以飲食細故累諸子遠大也教子女奇嚴無姑息愛處家識大體類如此孺人生於某年月日卒於某年月日先處士歿三十年男五長玉暉吳孺人出某某繼配陳孺人出今將合

葬某山之原長公玉暉士宏受業師也屆期來徵銘誼不敢辭因記向讀萬石君傳石慶爲父奮浣濯帷廁至老不衰裴叔則營新宅甚麗與兄共游心欲之而口不言叔則知之便推兄住古今以爲美談以觀處士之事齊吾公及推地葬兄豈復於古人有異哉予與楊姓及同里數十家皆衛籍舊族住居不隔數武歷三百年間遷死流移者居半獨與楊姓猶得守先人廬宇長子孫誦讀聲相聞歲時慶弔率登堂拜謁行人禮不衰予猶及見齊吾公修長頤碩頤盼偉然年七十望之如三四十歲人而處士又純篤好善能繼其德今典型既遠坐使後生小子不復見前輩風流也是豈不足誌也乎銘曰

國朝文獻通考卷三百三十一

三十一

以水濟水不可食以火續火將無息以長子孫宜世德何所克相
中饋吉我用銘詩表窀穸千年萬年奠斯室

右墓誌銘黎士宏撰

唐君秀 弟茂森

松江婁縣修竹鄉有唐孝子廬云 國初某直指所表也伯氏君秀仲氏茂森兩孝子之見 旌也以割股療親故吾聞身體髮膚不敢毀傷見於經割股剖肝不列旌典著之律然亦有辨吾百無一生而不能必救其親則不爲吾百無一死而或有救於親則爲之夫剖肝百無一生者也割股百無一死者也吾百無一死而又卽以受之親者返救吾親奚忍而不爲哉孝子父曰愛山母康氏康病隔萬方不治二子各不相謀或藥或羹潛割股和以進母霍然已父復病劇二子愈之如前於是鄉黨傳之臺使者表之而孝子廬遂與鄭公鄉高陽里並峙千古凡人之情一二事可以矯持

而生平不可終掩天下未有孝而不友者也兩孝子父母歿伯甫有室家仲始弱冠季弟燮僅八齡伯以子視其弟仲季以父視其兄迄今三十餘年微獨兄若弟如足如手而室之人亦各體其夫之心以爲心燮字欽文今爲諸生有聲於時兩兄資其誦讀思光顯其父母嗚呼孝以成友友以成孝於今世僅見之矣

夏駟曰兩孝子余不及見得交於欽文學純而行端卽之藹然談及父母兄嫂則泣然求文章思表揚之松俗信方隅歲月吉凶阻葬之風最悍而孝子拮据襄事人皆感動爭爲助畚鍤夫割股以療親而親輒愈則動乎天不扞於最悍之俗而俗自化則動乎人故曰至誠而不動者未之有也大孝者必昌兩孝子俱服賈伯又

無子吾於欽文卜之

右傳夏翎撰

仇憲稷

茂才名憲稷字異渥新安人鄉書繼軒君季子也家世載季軒誌
中茂才幼岐嶷以智識先人恥與流俗伍爲文能自成一家言大
有聲於里庠間性至孝環堵蕭然菽水奉二親而中懷澹如也甲
申後以親年耄盡依戀於膝下並不赴京兆試朝夕色養有古人
風丙戌子寓居渥城茂才與王生之徵時相過從雖癯骨如不勝
衣而神情鼓勵引我忘倦繼而王生執弟子禮茂才亦與猶子量
雅約爲婚姻己丑余南徙茂才復寓書正師弟之誼蹤跡旣遠就
正益切未幾繼軒逝茂才寢苦枕塊哀毀盡禮家固赤貧襄葬後
不忍恬然家居寢處墓傍禱寺者三年憶其叔祖雪廬以孝著稱

茂才能步趨儀型更光先德矣未幾吐血數升死年僅三十有五
有志未竟嗚呼傷哉昔靜修門人三台里王綱居母喪過毀既而
父病綱朝夕憂戚致病而卒靜修爲文志其墓茂才甫終父制而
致養其母情事大類於綱之徵言茂才以父誌缺焉爲恨予旣爲
文誌之矣虞茂才懿行湮滅並題此語使後之聞幽光而採遺行
者有所憑弔焉復爲之銘銘曰

聞爾之貌不逸中士問爾之年未及強仕貧窶之家田舍之子蓬
華是居困厄以死然有遠心非關閭里不苟富貴行己有恥有懷
二人存歿中理昔之王君今之仇氏三百餘年前後同揆勁骨清
風常照渥水

右墓誌銘條奇逢撰

因內書狀頁後刀部

卷三十三 孝友四

三

孫和鼎

先生名和鼎字九實頌庵其別號中丞大東公長子也中丞以援
勦兵譁見法國論惜之先生痛父以忠勞殉王事死非其罪比晉
王哀之傷其父儀而又奉中丞遺教以伍員爲父讐君之爲非孤
憤鬱塞曠眊煩冤椎心泣血中夜起立蓋無一日釋懷抱也中丞
知兵乃其天稟而又精於西術凡衝堅陷陣制勝設伏遣謀用閒
運若神鬼至於繕城垣製器甲輸糧料舉目周知咄嗟辦治人莫
窺其際以書生贊軍事起家歷職至登萊巡撫所在有顯功爲勢
家所激忌者所撓功罪不白齋志以沒所著水一方人集其平生
英謀勝算及所歷勞績略見此書而卷帙繁重先生撮舉要領以

子美出師未捷身先死長使英雄淚滿襟分十四卷纂言紀事以類相從枯坐水亭足不踰閭橐凡數易雖子姓不敢翻閱幼爲館甥輒命校讐間以己意進質多首肯焉或遇時祭及中丞諱日先生變服承事面深墨色望之如死人氣旁人不敢近窮愁著書年未及耆病輜結以死旣彌留呼其子不及他事惟以先集不得行世爲憾嗚呼是真沒齒不忘其親者也中丞死忠先生死孝蓋亦不忝前人也己中丞事當世多有苛論謂拔用偏裨反爲戎首夫殺敵致果非爪牙之材不勝束縛之亟乃奮其搏噬耳又謂任用遼人故變生肘掖夫遼人避禍內徙土人日與爲讐戒諭不悛乘機難作中丞固知其禍及也至於叛將反戈相向其氣慄悍難

與爭鋒然事出激變非其本謀既就撫矣忽以異議中格困獸計窮思鬪官軍脆弱豈能相抗耶火攻之法剗自西人中丞在遼用有奇效我之所長轉爲厲階弧矢甲冑古聖人能預料後日而逆廢之乎蓋以出身乙科驟膺節鉞才略太高功名太盛眾怒羣猜其擠於禍敗自然之勢也身受灰滅之慘而又橫遭汙讒之謗此貞臣孝子所以抱憤泉壤而不平者也敘先生志行而追論及此者蓋先生生平疾首痛心此外更無餘事余非阿附外家乃天下後世公論所在故發抒其指以備史家參訂焉

右傳趙俞撰

四庫全書
卷三十一

臣

王洪元 王福元

丹陽之東南五十里有地名荆城港里人王國相者頗饒於貲有幹才同里虞翔尤驍傑善訟不相下始議爲婚姻旣而不果積不能平翔遂結里中羣不逞爲十三太保以劫制國相國相不爲動翔益恨乘國相醉歸與其黨伏暗中邀之殺而投諸河此順治乙未年事也時國相妻虞氏有二子一女長洪元方六歲次福元方三歲女及期而已孤寡訴於官不能直翔視二子如孤雛腐鼠不爲意已而二子年稍長家貧落力耕事寡母知父前仇期必報或欲與之婚曰吾有父仇婚則念家室誰爲復仇者遂俱不娶康熙庚戌洪元年二十一福元年十八矣母虞氏病篤呼二子曰汝父

爲仇殺汝兩人所知吾含痛不死者欲見汝兩人復仇日耳今病且死大仇未復雖歸九泉目不瞑二子泣受命願捐軀復仇成母志母曰汝苟如此吾何憂撫其女曰此弱妹幸早嫁之二子諾母遂瞑二子治母喪合葬畢卽擇配嫁其妹召工鍛二利斧懷身旁曰吾以碎仇耳辛亥二月十九日爲其父被殺之辰二子殺雞祭墓並禱於神懷斧以往時荆城方賽里社設高臺演劇男女觀者如堵翔從擄捕歸獨酌臺下伸足倨坐旁若無人二子至驟斧之翔驚起大呼二斧交下頃刻立斃旁觀者駭甚優場皆輟圍而責之曰若奈何白晝殺人二子曰若輩無恐吾爲父報仇耳仇死吾兩人卽詣官不汝累時里中父老多有知兩家事者曰若眞報仇

耳無與地方事二子遂詣官納斧自首縣令方公出聽其事爲縣尉某尉初無心見兄弟爭死且迫公論謂孝子曰若孝子以一抵罪足矣何必兩遂遣其弟攜斧歸已而諸太保懼連及嗾虞氏入縣尉金必欲並罪福元尉追福元鞠屍於場驗斧闊狹有二欲夾福元足福元曰父仇旣報死固初心無勞訊鞠乃並入福元罪時虞氏惡黨俱懷利錐欲刺二子丹陽人咸怒驛中戍卒聞之曰若孝子奈何使被困一呼而集凡數百人皆拍手譁譟諸惡黨懼不敢動城中諸紳士聞之亦咸敬二子作詩文投學博致縣令令義之具文以實情申各臺祈免死獄未具同里蔣仲初作雜劇傳其事予讀之歎曰世之復仇者多矣然出於十七年之後又爲耕農

不讀書且兄弟同志皆不娶視死如飴雖古之蘇不羣何以過焉
抑其母能教二子復父仇沒身不忘亦賢母矣因以爲記

石記陸世儀撰

孝子名洪元丹陽人其父國相以武斷豪於里中有虞庠者好持
吏短長夤緣告訐與國相同里不相能遂發國相陰事欲致之罪
國相行賄得不坐庠反以誣受杖乃僞引謝具酒食交歡而私遣
惡少年誦國相會國相被酒夜行從其後捽項反接之負以石沈
諸河里人皆心知庠所爲也莫敢問時孝子與弟某皆幼其後稍
長微聞之乃哭告其母曰殺吾父者虞庠也母急掩其口曰勿妄
言禍及矣孝子每號慟母輒訶禁之於是中夜飲泣至旦且椎牀

曰死耳母亦泣曰汝父未葬我老矣竢我死後則聽汝所爲孝子始受命兄弟其適市數市利斧藏之虞庠頗自疑更好言慰孝子曰孺子未昏吾婿女孝子陽謝曰公我丈人行也得爲公婿幸甚退而切齒曰賊奴欲以而女易吾父邪久之母死旣合葬兄弟哭拜於墓上曰兒飲血含憤十年於茲矣今日願與父母訣遂懷斧往來迹庠未得間故事春社必盛陳優戲里人觀者環集初國相亦以社時被酒遇害至是又直社時孝子見庠在社所馳歸呼其弟各挾斧往殺庠庠方上坐觀優意揚揚自得也孝子直入肩擠之字謂庠曰逸羣我送女死庠起笑曰孺子醉邪乃瞋目荅曰將醉女血援斧斫庠應手而仆眾驚二子橫斧揮其眾大呼曰去去

毋嘗我刃也皆卻立不敢動兩斧並下庠遂死於是四顧拱手謝曰某無禮倉卒乃驚父老復兄弟挾斧緩步出翌日詣縣自陳狀有司義之免其弟頌繫孝子於獄康熙十一年四月某日也後一年上官竟脫孝子罪云

汪子曰賀君瑒若孝子同縣士也善古文辭嘗傳孝子甚奇子既慕孝子且愛重賀君之文故節其事如右予又聞孝子之出獄也遂去爲浮屠易其名曰光空今方行腳諸方以精進稱

右事略汪琬撰

按此篇孝子氏黃陸記作王又虞庠作翔四月作二月未知孰是兩存俟考

顏孟和 顏中和

予既敘黃孝子事宗人昭茲因從容言顏生中和嘗復父讐其始未甚具予歎曰是又一孝子也不可使無聞焉中和本名發祥吳之楓橋人其父宏仁順治初有怨家周昌者乘亂偕其黨十餘人誘宏仁閉空舍中殺之而棄其首已顏氏得道旁尸驗之良是屢購其首無有也及物色殺者主名知其爲昌連控之於官不得直於是宏仁有長子孟和次則中和年甫十三痛其父被殺嘗取析薪斧出礪之復束橐草如人形書昌姓名其上以試斧如是者數矣鄰里知者數易中和以爲此穉子戲耳卽昌聞之頗心動然亦未暇備也逾三年中和懷斧竊告其母曰兒將往復父讐母大駭

搖手止之曰昌無藉有膂力汝弱小何能爲慎勿自速死也中和奮衣出門不顧是日值昌市中中和陰尾之行昌不知也行稍前遽自後揮斧中昌首流血被面昌方左右顧又斧之會其母趨孟和走視弟孟和趨至昌已死兄弟乃相率號於眾曰盍偕我詣官首罪乎眾如其言既至縣庭中和與孟和爭自承殺人官不能決眾從旁分別言之始下中和於獄其母蒲伏往視之且哭且撫其背詬曰騃兒豈不聞殺人者死願欲以父子兩命易人一命邪中和怡然曰父讐得復死不憾其明年巡按御史錄囚遂釋中和而周昌前所與其殺宏仁者十餘人先後皆病死臨死時皆言顏泰如守我徧體青赤色若擊者或又言泰如幸緩我泰如者宏仁別

宇也不期年十餘人無一在者而中和至今亡恙昭茲云
汪子曰顏氏聚居楓橋市中其先有佩章者中和之從祖祖父也
明天啟中與眾共訴周忠介公冤毆殺錦衣衛所遣官校被法死
佩章以義今中和以孝皆卓卓有立顏氏信多賢哉昭茲又言中
和性坦率雅好六博本不甚解書及其銳於爲父瀕死勿憚乃士
大夫讀書知道理者所弗如亦異矣

右事略汪琬撰

姜晉珪

慈谿姜君宸英詩文傾折海內士 天子知其姓字然屢赴鄉試
不見錄也既而用薦入史館支正七品俸纂修明史又分撰一統
志月給餐錢衣儒生衣雜坐公卿之次會 覃恩敕授文林郎贈
考妣如其階歲在己巳冬刑部尙書總裁官崑山徐公乾學告歸
詔許以書局自隨公上言引君自助於是君將還家其考孝潔先
生於夏家學華益山之陽妣孫孺人祔焉持狀請葬尊誌其墓誌
曰先生諱晉珪字桐侯別字卓庵先世自蜀遷於越居嶧縣再徙
餘姚復徙慈谿曾祖國華丁士美榜進士累官陝西布政使司右
參議階朝列大夫贈太僕寺少卿祖應麟中先文恪公榜進士以

戶科給事中抗疏爭鄭貴妃冊封謫典史後歷太僕寺少卿階中
憲大夫贈太常寺卿父司簡官戶部司務母向孺人妻孫孺人先
生少補儒學生員貢於鄉年三十七不復應舉研精理學工詩兼
通六書辨其源流又嫻經世之略性至孝友愛諸弟與人交愷易
然取與必以義雖勢力不能奪也太常公以廉節自勵遺產僅百
畝司務君鬻弟分受之先生鬻弟又三分之一力不能給餽粥兵後
家計益窘無以爲親養乃游學北至燕趙東浮洛西游秦蜀束脩
所入歸以養父母孫孺人曲成其孝一味不以自甘必先進舅姑
曉問寢安否庭闈燕衍靡以異先生在家也先生既遠親舍歲時
恆望鄉遙拜發爲歌詩多幽憂悱惻之言音甚酸楚今所傳泛鳧

吟嘯是已迨向孺人歿先生適在旅次訃至嘔血數升遂中矢血
證服除將之瑞州道出常山疾發卒於草坪旅舍時康熙十一年
五月日也年六十三宸英扶其柩歸先生之執友張能信林三錫
等皆泣下僉曰君之事親可謂孝矣君之高蹈可謂潔矣遂私諡
曰孝潔先生先生歿後七年孫孺人亦卒孺人國子監生之蒞之
女朝列大夫知德州事森之孫贈朝列大夫某之曾孫子男二人
宸英宸芝女一人嫁儒學生員凌瑄孫男三人女六人嗚呼自先
王制產之法廢士之貧者無以養其親於是陟岵鳩羽北山蓼莪
四月之詩作焉雖不能養與祭君子必以孝子目之蓋惜其遇而
憫其志之不得已也先生之孝終食不遺其親願以貧故適四方

國朝書局影印本
卷三十一
三
資條友縞紵之貽以供菽水是亦潔白之養矣子職未盡者孫孺人以婦道成之宸英又克繼其志然則先生可無憾於泉下而因行受名庶幾克副其實者乎於其葬也宜銘銘曰

學焉而弗措也才焉而不遇也勞人之賦也孺子之慕也有賢妻爲之助也有令子爲之嗣也子未服官而贈及其親 天子之異數也考卜於原有龜者檀有苑者枌葬先生於是殯也耐此幽宅既安斯蕃衍而孫子

右墓誌銘朱彝尊撰

國朝書獻類徵初編卷三百七十九目錄

孝友五

劉龍光

王掄春

吳贊

范鎡

房廷祥

鄧鍾雲 子梓佳
孫友仁

謝德健

從孫身耘

譚希暹

丁國望
葉啟大

金鼎保
溫世儒

何復漢

李中德

謝命爵

胡夢身

黃明德

龔自成

王廣文

程含光

王攸甯

汪灝 弟晨
日昂

楊文蔚

吳瑞鵬

顏伯瓊

國朝書獻類徵初編卷三百七十九

通奉大夫前署江西巡撫江西布政使司布政使湘陰李桓輯

孝友五

劉龍光

君諱龍光字蓼蕭遠祖曰德基自汴從宋高宗南渡官黃州統領
居建康其後曰順之仕元爲平江路權茶提舉遂家焉曰政中明
建文元年鄉試第一方公孝孺之所拔也金川門之變痛哭不食
死追諡靖節先生嗣子曰鉉歷官詹事府少詹事卒諡文恭其曰
璫者君之曾祖也祖曰衙父曰廷諤以宜黃縣丞遷益王府長史
遭亂挈家人避兵白石嶺下依其友姚肅甫以居尋卒君初以省

試還里兵後不知父母存歿日夕涕泣家故貧徒步至建昌訪益
府故舊無存者禱於張令公祠夜宿廡下夢神告曰寄居石澗覺
而詢之士人蔑有知其處者君持零丁帖彷徨道左有一尼謂曰
是在閩粵之交官路方構兵道梗塞由僻徑以往七日可達君如
其言越藤峽通仙嶺一綫天皆崇山邃谷潛狙虓虎所出入末度
白石嶺路尤險惡嶺萬仞蟻旋而上下臨絕壑又萬仞得微徑棘
荆蔽之血漬足踝力盡乃登俯視山下有村村中板屋三楹流泉
泱泱鳴石上君心動以爲石澗也叩其戶則母管孺人出焉喜劇
而哭問父所在則亡踰年矣又大哭問殯何地則在板屋中又哭
村民聞哭皆來觀曰吾鄉宋時有孝子王龍山者於此見其母故

堡以見母名今子復見母此地是亦孝子矣於是君謀歸喪肅甫
首以白金爲助村毗咸樂用力藤束其棺以百夫舁之踰嶺而下
浮江以達於里監察御史李森先巡按江南欲聞之於朝君曰
常事耳不可乃止君歸十年母卒哭葬盡禮平居好讀書研精小
學旁通醫術以及風角地辰截王遁甲之說靡不考索康熙十一
年元日筮得大過之蹇歎曰過涉滅頂吾其不免乎是年十一月
果卒年六十有四娶沈氏繼娶吳氏子男二人椿齡石齡女一人
婿俞同珩孫男女各一人石齡與子善君之葬也來請銘銘曰
孝之至通神明身雖隱名則光吾友其子銘其藏卜茲幽宅斯永
臧

右墓誌銘朱彝尊撰

始余讀柳先生襄陽丞趙君墓誌其孤來章求其親之喪柳州日
哭於野兆於卜筮果得老叟告以所嘗蒞處能完其喪以歸後見
錢受之所記丁高士鶴年明初兵亂生母馮阻絕武昌病死瘞廢
宅中鶴年痛哭行求夢其母以告齧血沁骨返葬於時烏斯道作
丁孝子傳而我吳明季時亦有黃孝子向堅者萬里勞苦迎其親
雲南尚無恙里人豔稱之演爲傳奇每廣場奏曲兒童婦女皆出
涕也嗚呼維我亡友蓼蕭劉先生之孝行實與三君子相類願事
不大顯則以先生自謂人子之不幸雅不欲自暴則其情尤可痛
也於其歿也不可以不書先生父無懷公丞宜黃後爲益王長史

先生皆從以就試歸會順治乙酉亂作道梗塞不得兩大人問則
日夜泣既疾甚而中弟又歿家故貧經紀其喪畢益自號曰吾魂
魄當依吾二人也戊子病少間卽徒行至於盱江故益王分封處
時被兵燹故人無在者禱於神張令公祠宿廡下夢中聞神有寄
居石滌之語驚而寤不知石滌何所也問其土人亦無知者旁皇
路隅忽遇一尼謂曰石滌在閩廣之交今方阻兵由徑路往七日
可達也亟如其言取閒道凌絕險所過籐峽通仙一線天皆高山
窮谷灌木蔽翳鳥獸咆哮少人行處所顛頓迷失萬狀最後至白
石嶺嶺斗絕下臨溪萬仞壯夫股慄前卻獨奮不顧足踳踳彊行
蹀血股流卒捫其嶺而下果得母管夫人於其地名石滌之空村

中母子相持大慟亟問父所在管恐驚兒也謾應之固問乃更悲
咽言而父於去年丁亥八月中歿距汝今到將一年所矣則仆絕
於地久乃甦先是無懷公避亂倉卒僅藏其先世系圖篋中自隨
先生將到篋颯颯有聲啟視無有閉則復然一日其母夫人見緋
衣神一一從篋中出而先生至矣鬼神之事非余所能知然以祖
考一氣之理推之當信其村又一名見娘堡嗚呼豈偶然哉無懷
公既歸葬管夫人每爲人言吾兒往來道里險惡扶持辛苦淚汎
瀾不止又十年而管卒先生益自痛已矣無可以逮吾二人者自
是益泊然無意於人世矣先生之歸也有爲石澌瞻雲圖歌者和
者頗眾而李御史森先按吳欲以其事聞於朝先生謝曰此恆

事耳何足言御史以此益多之先生自少攻舉子業受知太守史公時吳祭酒梅邨亦史所拔士史嘗語人劉子之才當大於吳而先生顧不肖俛仰隨時俗進取自屏爲古學尤精於爾雅蟲魚之義音切箋釋皆極其旨然亦不以自名閒以其意學醫又不拘故方揣色審意輒中以此少能具伏臘資諸公貴人邀請多弗往於窮交輒樂爲之盡其術性寡諧不爲翁翁熱遇有不可必達其意然坦中無他腸人咸安而親之以爲長者也先生諱龍光蓼蕭其字先世故河南人自黃州統領公諱德基扈從南渡居江甯再傳而遷長洲者爲平江路榷茶提舉諱順之提舉三傳而生靖節先生諱政靖節無子嗣子爲少詹事諡文恭諱鉉文恭生副使諱瀚

副使生承德郎諱霖承德生文學諱兼先生之高祖也諱璣曾祖也自曾祖以上至統領公皆有像所謂世系圖者也祖諱衛無懷公諱廷諤皆有名諸生閒無懷佐藩朝未竟其用至先生益載其德隱而弗耀人咸謂劉氏能業其家云王子春先生自筮得大過之上六歎曰過涉滅頂吾其殆矣果以其年十一月卒年六十有四娶沈氏繼吳氏皆名族有婦德子二長椿齡慧而天次石齡女一適俞同珩皆吳出石齡好學能文持身有法度以庚申十一月葬先生祖塋之次而來乞余墓上之辭初先生所與最故者爲余外舅西淵李先生與金子穀似卽壻石齡者也最後乃忘年於余三人者時過從先生談說義理以學問行誼相規切同懸難其有

無有古良友之風義先生年六十余外舅爲文以壽敘致委曲而
其歿也毅似爲詩哭之過時而悲余旣弗及臨先生之喪以爲大
感敢以不文違厥子請因舉先生立身之大節足風世之爲人子
者而略及其餘以識其梗槩俾書之石永有視於後人

右墓表韓莢撰

劉龍光字蓼蕭長洲生父廷諤官益王長史 國初道梗不通龍
光始以省試歸至是扶病往達建昌益府故人無在者禱於張令
公之神夢中若告以石滌語然不知所謂久之遇一女僧云石滌
在閩粵之交方今官道阻兵須聞道可達龍光冒死穿藤峽一綫
天踰白石嶺萬仞蟻旋而下血漬雙足過山麓果遇母於石滌空

邨中名見娘村宋孝子王龍山見母處也父先一年死矣奉母扶
檝歸孝養十餘年母歿以哭母得心疾終其身

右傳沈德潛撰

初順治乙酉五月 王師破建昌城明益王遁去長史劉君某挈
其家亡匿山中卒其伯子龍光卽孝子也爲諸生先赴試歸吳未
得父耗憂泣成疾戊子歲始決策至盱江時亂後藩府毀廢舊人
無在者邑有張令公祠宿禱焉夢中恍惚如聞神語云寄居石滌
者醒求其地不得徬徨道左遇一尼謂曰石滌在閩廣交今方阻
兵道塞有徑潛行七日可達也遂如其言取道往所過藤峽通仙
一線天皆山谷窮絕處蒲伏晝夜行數百里不見人煙最後至白

石嶺嶺陡接霄漢陔道陜者纒六七寸俯臨不測之谿捫壁絕險
既上復下履巉巖衝虎豹攢棘被膚血流殷足每仰天一號則陰
風颯然山木悲嘯瀕於阽危者數矣嶺盡得村尋得父所依姚氏
居母管孺人在焉既入門母子相持而泣已問知父喪行一年所
則號絕仆地久之始甦居數月閒關與櫬復踰嶺侍母而歸歸十
年母卒當母寢疾孝子侍湯液不解衣帶者四閱月也初長史避
難數遷獨攜先世世系圖冊一篋自隨至歲戊子母時聞有聲窸
窣出篋中啟鑄無有閉則復聞一日母見緋衣人數輩冉冉從篋
中出益大驚逾宿而孝子至矣其所居村見娘堡舊傳宋王龍山
者於此見母得名異矣哉鬼神幽明之故君子之所慎言也而父

子骨肉之間頭沛流離之際徵應巧合又往往若有陰相之者非苟然而已也其子某因婦翁金進士穀似屬余傳之余嘗慨自明季中原兵起延蔓四五十年其間父子分散各所夫妻生死異路抱忠孝節烈名填溝壑者何限其幸不相隨以沒而閒著於通臣逸士之手者又多避忌諱不出或文辭蕪漫不足以傳而表孝子之墓者有韓閣學之辭在特工又綴以余之文則所以不泯君於後世者庶在乎此也孝子字蓼蕭蘇之長洲人

右記姜宸英撰

王掄春

吾邑有高才生王之垣以文藝有聲庠序閒數年前葬其本生父文學元遴來乞余銘余未有以應也今年冬王君之壻顧雲如走數千里來京師爲之垣申前請願與余中表戚之垣又素遊吾門王君行又應銘也其何辭君諱掄春字元之改字元遴曾祖瀛洲君一恭自太倉州徙崑山爲縣人祖集虛名周緒考仲翔名雲鸞王氏故有東王西王君曾祖以上居太倉累世貴顯蓋東王也縣中之王從太倉分支爲西王科第舄繹與太倉埒惟君一支三世爲諸生未有仕者及君爲諸生當有明末造未久棄去人訝之君笑曰非公等所知也君母弟二人季弟振春早卒仲弟捷春出後

叔父霖環考仲翔君歿君悉推產與弟弟善病罄其產又以所居宅讓與之及弟卒人莫肯爲之後者君歎曰家貧眾所棄吾弟其爲若教氏鬼乎令仲子之垣嗣之爲之經紀其喪作嗣議一篇以明重宗祀不計資而存名之意比君卒其宗老增城君誅之曰迄於仲氏讓生之死方讓以產又讓以子嗚呼古者立後之法惟重爲大宗蓋以奉宗廟之祭也其他旁支庶姓絕續無所繫死則耐祭於昭穆亦未嘗乏祀自世以遺產爲意幾於人人有後至有爭立並建者是則貧而莫肯爲後亦君子之所憮然心傷矣君讓產於出後之弟又推其子以後之敦本厚施是不足以風世砥俗乎增城君名瑞國奉常麟洲之孫仕增城令於君爲近屬亦所稱東

王者也配沈氏有賢德君生於明萬厯辛丑歿於 皇清壬子享年七十有二舉鄉飲大賓沈生於萬厯戊申歿於康熙庚戌享年六十有三子二曰望曰之垣夙膳生卽後捷春者也女六俱適士族雲如其一也孫男女十二人長孫鉉學生蓋自君高祖副使公而後六世爲諸生矣康熙庚申年十月其子奉君夫婦之柩合葬於露區沈翔疇之新阡後七年邑人徐乾學始爲之誌且銘銘曰鐘鼓樂鸚車馬載颺不如深林以趨以棲獨行耶隱逸耶百世之後於吾文乎是稽

右墓誌銘徐乾學撰

國朝通志卷之八十一

八

吳贊

先生諱贊字參乙行三生於明萬厯戊午十一月辛卯享年五十有五爲諸生二十有三年卒於今康熙壬子之十二月乙巳家世爲高郵望族多儒者父漢醇公文行卓茂居心樸誠正直有古人風當世咸稱之生四子長彥乙茂才有大志年四十八而歿叔季旋乙文乙畊讀承家參乙其仲子也未冠而漢醇公歿又未幾而母王孺人歿時未婚初漢醇公之疾篤也參乙禱於天不獲瘳乃剖其左肱和羹以進爾時予妹已許字之矣先大夫聞之而喜有詩曰君家三世前婦肉當姑糜剖肱者誰子世德孝所推里中稱孝子及王孺人之繼喪也哀毀成疾嘔血數升皇皇然如不克生

子請於先太宜人延之館室與兩弟同居起讀書而參乙宿疾時發不得遂所願尋歸而迎娶室家雍睦如鼓瑟琴己丑參乙遊庠序予每喜曰妹得所天可以上慰兩家之先人矣但艱於子息時鬱鬱不樂予每寬解之因寄情於酒時或縱飲予每戒約之參乙敬厭兄愛厭弟視諸姪如己出彥乙歿撫其孤身捍大患不恤也兄子山公負雋才必欲玉之於成及山公不祿慟之時泣下霑襟焉尋染疾乃節飲日誦般若經一卷奉準提齋戒甚嚴世味逾淡蓋原非今世中人也其真率絕機智大類漢醇公至其疾惡如仇義形於色則又稟賦然也不妄取不屑爲周旋物態見世之競逐苟營者輒唾之是以隨時豐約不事生產卒之日蕭然四壁無所

求於人世僑居愛日園中蓋十有五年矣一日請歸舊廬巷中甫十日而歿易簀時予謂之曰君平生無一切罪業此時正當灑然應曰唯又謂之曰勿以無子爲憾從來仙佛家多無子爲空諸累也此時雖有子生死不可代言及此更當灑然應曰唯又謂之曰須一念向正路去何不仍念佛乃豎掌作皈依二女在側眷戀依依絕不及其他日婚嫁事唯語妹以修行無墮苦海蓋旣曠然有合於生死之故矣嗚呼如參乙者可謂順受其正者耶予因而論之曰孝者人之庸德蓋莫重於守身曾子曰如臨如履吾知免夫豈懼罹於災惟恐失德也人生天地閒貴自別於禽獸邪正之界判然兩途積慮旣邪百行皆失何以立人人道不立是謂辱親予

與參乙有僻好焉爲其言行無一不端也予每勸節飲矣參乙俛從之向使先戒酒亦未必百年即使以戒酒而百年又何益焉若參乙真能守身能百年者也予又嘗勸置媵生子矣參乙亦從之向使有子而或未必克紹於前人固不如參乙之立身能不辱其親是真能有後者也端人也孝子也

右行略孫宗彝撰

范鉉

范鉉少時屢入川予不及見也知之者曰會稽范鉉其曾祖崇明
縣令生其祖孝廉君孝廉君生其父別駕君而孝廉君死孝廉有
弟由武進士爲四川敘馬瀘總兵官崇禎八年擒奢寅獻俘京師
畱別駕君幕府而別駕君又死方別駕未死時鉉念父久在川餘
姚鄭君者授成都縣令旬爲記室尋父於瀘州江安之怡樂莊此
少時事也別駕君死鉉殯其木莊田中十四年將負木歸而賊破
瀘州殺其莊田家人二十餘口路隄不達鉉獨歸十六年再入川
李自成破成都不得前又歸及又入獻忠殺川民數百餘萬盜賊
四起塞路以屍卽又歸及其又入則甯南兵蔽江下過湖廣道士

泱剽鹵已及急取衡州道從貴州入復不前歸時鉉病鉉有兄貢
於鄉冀選投近川可隨入且鉉有祖母與母皆藉鉉養鉉扶病負
肩估入川者與偕入臨行辭祖母及母跪不能起祖母曰吾不以
生孫易死兒也牽鉉衣鉉號且行至江西西南兵大開不得前哭
曰吾三次入川而卒不得前豈非天乎嘔血而歸迄于今鉉老矣
康熙辛亥于遇鉉於汝南郡署怪其老而遠遊且備書也又明年
鉉請入川汝南金使君祖道於懸瓠樓下予曰諺有云老不入川
君入川何也鉉泣不語逮暮有同行者叩其意同行者曰鉉將以
負父木也且夫鉉之來汝南也鉉父木殞江安江安令張君爲開
封之通許人與汝南金使君善鉉之備書於金使君者且三年矣

冀爲寓意於江安君今江安君有家人信鉉懷之行且江安距越一萬餘程積傭書所直錢以爲贏糧蓋其人以入川老而非老而入川也予悲其遇而又憐其用心之委曲且摯沈毅果銳以求必得人雖老其志可爲也越一年予還里門而鉉負木歸艤舟西陵訪予於城東之故廬值予他出告家人曰殯木者三十五年不得其處矣兵荒瘞掩歷歲移易江安君給以牒遣縣吏押之搜林間凡土中無主木俱許搔視旬時得夜夢於江陽兒祠忽五搔視而得之殊木標識尙存左和江安張君夔州熊君成都錢君藩使者金君皆爲贈遺且勒石於故墓側令土人李姓者守之而屬予記其事鉉三十五年中凡四入川不達暨可達而祖母與母皆老病

其兄以候選死京師逮三畢喪而後毅然以入也故鉉入川時已
老云

右記事毛奇齡撰

房廷祥

兵部尚書郎三原房氏興公狀其季弟發公之行以屬施子曰嗟
吾季弟之不永不獲見君子也然當好君文詞願假之銘以紓吾
痛焉季弟年十三補博士弟子員學使者井公目以神童自讀書
嘯詠外無他嗜慕凡兩雋省試皆以一二字被放不爲戚且廷楨
兄弟三人而先大人患難疾病始終惟季弟侍左右其事爲獨難
當明末先大人自太原遷駕部歸里時季自成盜據關中吾父冒
鋒刃入都謀滅賊季弟請從母氏以年少不可泣對曰大人將死
國子少不從奚生爲遂衣敗絮裹餓糧爲小黃冠以往夜抵黃河
阻賊不得渡乃從涉洛水躡王屋武功太白諸山蒲伏行數千里

甲申四月聞國破君殉先大人北向號哭絕粒數日季弟亦不食
叩頭流血以死諫卽吾父子俱道死誰知者先大人始一強食隱
忍歲餘歸臥病會當路徵訪耆舊有司敦促就道嚴甚余與仲弟
奔走都會陳病狀是時母孺人已先逝吾父疾甚其奉湯藥亡廢
離惟季弟一人在與間行從患難時等向徵季弟則吾父幾不得
有子矣言及此嗚咽流涕君諱廷祥字發公生崇禎己巳二月二
十八日年四十五以康熙癸丑十月二十二日卒娶中丞焦公女
亡子仲氏孝廉廷祚以少子椿子之初喪父母葬事卽廬墓側讀
書貫穿羣籍尤喜史學餘力爲詩有手錄詩書詞賦凡二十四卷
藏於家葬在某山之原房自唐爲著姓曾祖諱時用隱德不仕祖

諱東昂以太學仕冀州考諱建極明辛未進士歷官兵部車駕司
主事賊闖陷京師憂憤卒鄉人義之私諡貞靖先生母劉孺人舉
三子君最少世稱房季子云銘曰

無位而貴不子而祀惟多艱以孝友用永章於來世

右墓誌銘施閏章撰

國朝者成爲舊初
名三百六十九

一

鄧鍾雲 子梓佳 孫友仁

鄧鍾雲湖南沅州人事父母日淺遇忌辰輒泣奠誦孝經數十過
悲念劬勞歲甲寅以逆變亂人皆遠遁祖之楫年邁行遲賊及之
脅以刃雲請以身代賊憐而釋之終身與弟鍾露不忍離析年七
十州守旌之曰德隱可風子梓佳孫友仁俱監生梓佳居心仁厚
有從弟庠生梓進早世子女幼弱爲之撫育婚嫁嘗於村中構數
椽顏曰青來書屋貧者咸許其來學李教授士藩贈以詩有曰四
時漸養芳蘭蕊百歲欣看彩鳳文友仁字效山性純孝善承父志
生母張氏病乳癰親侍湯藥聞天柱有良醫冒雨夜往求之妻剖
股和藥以進病遂愈事繼母劉氏倍加謹奉養不少倦生平好善

樂施有周某寄布四十匹越五載遇其子知周沒告以故取布還
之周子感泣一時頌其古道又倡修中楊溪下楊溪文津灘三橋
移建學宮捐地以廣基陞壽至八十子成功成泰成魁俱有聲庠
序

右傳朱琬次撰

謝德健 從孫身耘

南豐謝秋水以理學傳其家而從子德健曾孫身耘以孝聞德健
字子強少受學於秋水聞古人篤行則瞿然與父漱竹爲秋水弟
性豪邁喜遊入蜀十餘年不歸子強日夕痛戚有議昏者曰吾有
父不得侍何昏焉遂涕泣請命於秋水竟往蜀而漱竹已至打箭
鑪有室生子矣及相見父子抱大哭畱數歲漱竹又遊交阯久之
相傳已死當是時逆賊吳三桂反烽戍戒嚴水陸梗絕子強獨身
荆莽間道重趼藍縷餓渴瀕死者數矣乃卒達交阯蹤之不可得
日行野豕閒號哭哭七日夜不絕有逆旅鄰老聞哭聲指其處遂
得負骸以歸程山諸君子爲詩文以紀之身耘號植庵讀書力行

平居伺父母所欲父充之爲秋水孫好遊覽山川與賓客飲酒歌
詩連日夜每佳辰則請所之執榼飭簋以待酒後興闌老人倚杖
而歌聲琅琅出金石四座油然植庵屏息侍喜不能言已而目曠
眩藥勿已欲賦詩輒命人書植庵怒然曰父老矣目衰何以自娛
乃雞鳴起以舌舐之返液滋其目凡二十日日乃如故比卒痛哭
不輟凡數歲葬於天馬山山高數百仞路蛇盤鳥仄壯夫惴惴不
可上植庵年六十餘攀度上下且行且泣凡五日不少衰南豐人
皆稱之曰白頭孝子也

論曰儒者言性命自南宋以來其書浩渺滋蔓後先相襲謂之理
學於是天下別有其名謨嘗與植庵子鳴謙論學以五達道爲本

人之性命寓焉子貢曰性與天道不可得而聞也而後人欲以不可聞者聞之其賢於聖人與嗚呼如秋水者真理學矣

右傳盛大謨撰

譚希暹 丁國望 金鼎保 葉啟六 溫世儒

譚希暹

譚一作龔

湖南益陽人諸生明末獻賊執其父將斷手希暹兄

弟爭代賊並釋之幼弟希晟被掠希暹泣隨數月得贖歸康熙間
滇寇掠湖南誘以僞職希暹逃之山谷得免里人有負債謀嫁其
幼婦者爲代償之同邑以孝友稱者又有丁國望金鼎保葉啟六
溫世儒國望字子聖廩生年十四父立甯爲賊所執國望入賊營
泣涕請代賊感而釋之鼎保隨父母避兵鷓鴣渡值馬賊來父驚
竄鼎保懼母及禍挺身出賊逐之母乘間遁鼎保遇害祀忠孝祠
啟六幼失怙七歲值生辰母飼以雞辭曰母難日也不食母疾露
禱祈以身代夢神授藥方得愈滇寇至負母遁被執請賊殺已無

害母賊義而釋之世儒字子珍父崑來死獻賊之亂世儒甫六歲
哀毀過人兄病劇侍湯藥七十日夜不解帶康熙壬子舉人吳逆
構亂徵之逃避得免越十八年補麻城教諭未赴卒

右傳李元度撰

何復漢

何孝子諱復漢字楚玉世居廣昌明理學名臣司寇椒邱先生之孫也篤行好學博極羣書所著古今粹言四十五卷於經史子集天文地理禮樂厯數古今人物百家藝術之源流得失無不囊括縷析縱橫貫穿以折其中孝子長君名人龍官翰林時在京師余曾以後進謁得讀其書竊歎以爲粹然通儒也及余監司鹽驛於孝子之鄉則知其鄉之人至今稱之曰何孝子孝子年十五父歿哭淚成血暨長事母搗丸極孺慕母寢病孝子嘗糞甜苦衣不解帶數月如一日太君歿廋苦三月淚所漬苦左右皆血痕也葬後廬於墓側曉夜悲號聞者皆爲揮涕旣除喪孝子猶不歸適耿逆

作難於閩烽火震鄰墓旁民紛籍驚竄孝子獨守不去所親知力
勸之歸不聽羣毀其廬乃哭而返余得於其邑人賴名萼者所記
如此夫孝庸德也有可學而至者有不可學而至者生養死葬儀
數禮節此可學而至也其一往誠摯纏綿迫切而不可解則必其
得於天者獨厚不由學也當耿逆作難居民奔竄孝子獨念吾母
在此母不能去何忍獨去方慮賊箠所及孝子在慰母魂魄母恐
他何計焉鄉人稱何孝子以文學固其餘事也然如孝子之孝斯
真可爲學者矣噫鄉之先大夫孝行若此而後之鄉俗猶有以父
母墳墓專爲子孫求福計者志之以風世坊民亦備史氏之採云

右傳沈起元撰

李中德

李生中德之父京師東城驍騎校也康熙十二年從征入閩十三年中德參軍陝西攜家入秦秩滿偕母而歸其父已自閩回娶妾生子恐嫡至非妾所樂遂不許相見而休之中德涕泣蒲伏啟父曰我母少時從大人入關盥櫛於鞍馬之間炊紉於鋒鏑之下艱難險阻備嘗之矣今頭且半白男幸獲升斗祿承菽水歡方以團圓爲慶母之賢大人所知也於七出之條無所犯何忍中道棄之煢煢邁年徬徨何倚我母止生一男而勿使男終母之養乎言未既以頭搶地流血霑衣父終不聽再請別室而居亦不可中德念畱母違父非人子自靖之誼迺於東直門外營密室居母復買一

媪一儻供其汲爨之役每日下直後蚤晚侍父側視膳問寢無幾
微憾容與庶弟燕笑如常伺有聞則潛往母所定省而父不知也
如是者六年迨父病棘始告其父迎母還父深自悔咎垂淚而瞑
未幾妾亦隨歿遺有四子其母不以前事芥蒂視如己出而中德
亦撫若同生歲延師訓之其後食指漸繁不能設西席乃自爲師
位於堂列坐諸弟講誦無輟余嘗過其家書聲琅琅從戶牖聞出
長幼之服裝葛以時寒燠必備其子六齡亦在塾短襦敝縵而已
余因歎其處人倫之變而孝友不失其常可謂賢矣中德字子峻
受業於余通滿漢文能詩

右人史吳翔鳳撰

按參軍秩滿歸又每日下直當是漢軍
未悉終何官謹據赴陝年編事實於此

謝命爵

公謝姓諱命爵字仕俊舊籍揚州元時有遠祖宗元官虔之興國
遂居興國明洪武三年諱蓮者乃遷瑞金之葉坪蓮生思顯思顯
之子乾道由明經仕爲思恩知縣思恩生廩生元璇元璇生文學
長震公父也丙戌四方盜起文學以行誼名高爲人指目賊乘閒
獲文學挾取多金文學詞色不少屈遂被害學者私謚爲義烈先
生文學娶於楊生廩生命官繼娶於劉生公公少聰穎能讀書方
登第成名遂值文學變起亂後家又中落母夫人在堂公時時袖
升米歸養雖卒瘠艱苦愉色承歡懼爲死父更傷生母心也嘗授
生徒於古州方信宿東裝告歸主者錯愕問故公曰吾夜夢老親

病狀方寸亂矣安能鬱鬱居此兼程抵子舍而母夫人已抱病在
牀僅三日而母夫人隨卒至性冥通千里呼吸人皆頌公爲純孝
所致有子聘字志尹癸卯舉於鄉及上春官主籍者誤落志尹名
不得與會試 今皇上赫然震怒馳驛召志尹赴闕另開選場下
部訊註誤緣由議盡削當事籍立授志尹官時公與偕行戒志尹
宜爲好詞別白脫使僥倖得半職令諸公遷謫踉蹌人將謂我何
志尹受教惟謹當事卒得全無他今人當小利害輒反眼吹唇凡
可遂其私卽至戚交遊推刃下石有所不顧況功名相先之地乎
以故長安諸公聞公父子閒語交口稱謝公長者非是父不生是
子也公性淡泊不喜聲華撫孤姪如己出修先祠置祭田惟力是

視遭文學公變時固有血疾復發遂不起公生萬厯己未七月二十七日卒清康熙甲寅正月初六日本年四月二十六日附葬祖塋之常鄉潭屋渡富廩配鍾孺人男子一聘癸卯科舉人候選知縣娶楊氏孫男四重捷邑廩生娶楊氏重拔邑廩生娶李氏重揮邑庠生娶唐氏重揚邑庠生娶陳氏孫女二長適長汀邑庠生黎祚遠一尙幼曾孫男三衍詩衍禮捷出行易拔出曾孫女二捷出婚嫁皆名族癸卯志尹升書之日予忝爲分校官而又與予仲有婚媾之好過瑞邑曾數數見公哀哲人之既萎也故不辭而爲之

銘銘曰

蓼莪廢書甚悲而不忍卒讀也齧指心痛言歸而不可信宿也鳳

有毛麟有角捷徑逢年而恥求變化之速也前者耕後者穫爾里爾疆而毋謂乎天道之不幸復也

右墓誌銘黎士宏撰

胡夢豸

胡夢豸字去邪先世上虞人遷江都性至孝康熙甲寅夢豸年二十一歲隨父歸越省墓父過市遇山賊劫民財喚其不義賊怒將刃之夢豸從後奔至擊賊仆之市民羣起毆殺賊賊眾大至欲屠其里夢豸曰不可以我故危一鄉也入賊寨獨承之遂被殺

右聞見錄吳德旋撰

医事月表卷之八

三

黃明德 龔自成

黃明德湖南沅州人叔文道無子擇明德爲後夫婦相繼歿遺妾劉氏家苦貧明德竭力膳養旋遭寇難明德負劉氏逃避妻與子不顧也後均獲全成以壽終鄉里莫不稱其純孝又龔自成康熙三十四年貢生九歲喪父孝事母周氏後母老乃日侍側夜伴宿久而無閒及母歿廬墓悲哀人皆以孝稱又好施橋梁道路竭貲倡修五十四年選授桂陽州訓導以年老辭不赴卒年八十有二子造醇亦貢生純孝事親尙義恤貧綽有父風

右傳朱琬次撰

正字通

三

王廣文

孝子名廣文台之黃巖甯溪人農家子也年十七其父王興就母
夏氏生子三人孝子居其長康熙乙卯秋大兵恢復黃巖其母並
兩弟爲援期披甲所掠歸於杭州南新橋營中孝子赤貧乞食尋
至省識其所在計所以贖母與弟者靡厥貲乃用利錐穿其喉貫
以鐵索而鎖之羸骸露胸沿街募化血淋淋滿頭項間見者酸心
銷骨競爲酸資而解其鎖奈主者高其售三解而三穿之舊瘡再
合而再創痛哭顛連至不能進飲食一日藩臬聞諸宰官羣過而
遇於途廉其狀共相嗟歎須臾得六十金持至營缺兌者尙三金
有七執不放孝子仰天長號一慟而絕營中有義兵者不知姓名

自解腹中糞如數給之孝子乃得有其母與弟而偕歸噫嘻世固
有家庭骨肉團聚如叢花一旦壺漿箕帚德色詳言往往毛裏秦
越手足參商經小利害則閉戶鄉鄰喪心天屬棄之不啻涕唾然
厥有稱至孝者剖肝剖股從容里閭之間孺慕牀第之側亦旌獎
讚歎之不遑孰有如孝子羽毛軀命蟻視貔貅排山觸海揮日凝
霜奮蟲臂之力爭虎頰之餘割肉灑血出萬死一生俾母子兄弟
離而復合散而再聚者夫孝子僅農家者流目不識詩書爲何物
彼所稱誦法先王講六行三物之略者亦可以返然知悟矣至若
捐金解鎖停車問難好義者何所不爲願英樊絳灌未聞煦煦市
德乃戴兜鍪穿黃皮袴躍馬操戈之流咸能不靳傾囊倒囊以相

濟要知母子天性凡屬在生知之類者固不能無也已

右傳洪若皋撰

國朝書目類編

卷三十九

美

程含光

至行多奇奇必發於天性此非人力之所能爲也忽而行之鮮克有濟余所聞天都程含光少時鞭虎救弟事可謂奇矣康熙乙卯秋含光偕仲弟某自六安歸過鷲嶺嶺峻且險會日暮四顧絕人煙沈陰黯慘二人各策蹇行俄而腥風驟起飛砂疾捲木葉撲面如雨下猛虎攫其弟去含光大驚墜地持短鞭力追左手據虎頸右以鞭亂捶虎頭呼號聲震山谷虎怒力不得肆含其弟據岫而吼將以搏含光含光負弟疾奔下嶺投旅店旣息肩其弟尙一息未殊以湯灌之徐甦含光喘亦略定起視仲肩背前後十餘孔血淋漓滿地復大慟有道士謂之曰虎牙有毒深入惡血不盡出不

可救含光竭力以口徧吮之去血數升醫數十日漸平乃借歸當
是時含光仲弟甫十有五歲今年已近八旬其傷痕歷歷可數俱
寸許闕每解衣示人則淚涔涔念乃兄不置也含光大程邨望族
幼具至性借諸弟讀書因家道中落謀所以養親遂以治生爲急
奔走大江南北家少康遠近親朋重其才有重務悉資之未嘗以
勞瘁辭故不克永世又聞含光能盡孝養歸囊所有必陳於父母
前不少私其妻子與人交重然諾濟困解紛人咸賴之而竟以中
年殞命嗚呼含光至此死死亦可以無憾向使虎攫仲弟時氣餒
戰慄伏地不能起卽起欲圖所以救區區一竹鞭何足撻虎威惟
有坐視其弟糜虎口或捐軀與之同盡耳而含光當其時奮身一

往日中不知有虎並不知其爲竹鞭且不知有己惟痛弟之危難而奔赴之其死其生不暇計余故曰此非人力之所能爲也誠也至於今八十老翁一鞭撫摩時時以血淚拂拭光瑩滑澤如鑑珍藏以爲世守真千古奇行足以垂教友愛云後乙卯金壇拙存老人蔣衡客廣陵菴釐道院友人屬爲記且銘其鞭銘曰
堅多節光瑩澤仲氏血思我伯昔遇虎以此策力不敵誠能格胡不壽致夭折八十翁形影隻自摩摹染成碧請余銘友恭式

右記蔣衡撰

日本書紀卷之三十三

三

王攸甯

君諱攸甯字公遠先世氏謝以後王爲王氏初家山陰之住墅年十四隨伯兄儵新昌長潭兄命入沃洲山販炭權舟嵯南門會王師下江東江上兵從西陵來潰且奔爭門殺所居民而略其稚且艾者君已隨眾竄獨念炭在舟舍之畏兄賣已守而不去慮不免乃擇叢莽之近溪者晝伏莽際舟而夜守之時傭民被鹵自十四以上二十以下鮮遺者而君以鑿敏免且不失一炭俟稍定鬻炭會稽市利倍兄大悅使下上行販三年祖姑之子周繼芳以進士改戶部主事權北新關素愛君會君奉仲兄之禾詣關繼芳乃謂君使典商錢而令仲兄獨之禾及繼芳還部厚贈君君悉以上

兄且尋兄於禾而奉之歸時君已娶婦兄乃用君所贈貲立盡忽
挈已妻去第予君夫婦以上箸使自居當是時君痛已少孤不逮
事父母鮮所顧恃又失學昧先世所傳詩禮之緒且交游少其於
親黨士大夫乏方幅齒遇乃復以貧故不能得兩兄歡心深刻賣
入市買書執問於所親之學者久之忽有悟乃卜居南鄉之鳳凰
山環水而堵以漁以佃家稍豐卽所學亦日進乃遂與士大夫講
道論德務躬行而間爲文章以自娛當世稱君子焉久之兄復謀
合爰或曰指斷可復續乎君曰吾惟不能續故求續也豈有願續
而不聽續者又久之兄復挈妻去君痛自悔責謂事兄無狀致有
此乃事兄倍謬又久之復來然兄已病遷居於玉屏山側親執湯

藥如事父仲兄死其伯兄儼新昌者亦折閱致病挈妻子從新昌來住君宅君讓己所居居之伯兄既病又以貧不得志性燥急嘗醫君夫婦承順之朝夕婉伺竟其死無忤色康熙十四年三月十五日君卒年四十四子緒思有文章名當君卒時宗戚里黨皆會哭於社既喪言及君皆歎歎淚雨下是年州縣已薦君不及其後族弟光祿君亦孝友敦行誼多推解於世稱君子與予善因率其子請誌石而系之以銘其銘曰

孝乎孝友于兄古有之惟君陳伊稚弟銜火薪估而士敦人倫曰禮教萃厥身臂與指斷復聯彼喬者君之墳貽邁種與後賢

右墓誌銘毛奇齡撰

汪瀨 弟晨 日昂 日昇

于岐汪太翁爲休甯西城人生子八長日果次日旦次瀨四日晨
五日昇六晨七日昂八日昇康熙丙辰父年六十有六患血證醫
罔效危篤時兩長君遠服賈諸弟幼瀨十六中夜禱於天割股和
藥進血止已霽然加健越四年足患瘡多年矣發之痛晨以兄能
療父爲割左股煉末敷之愈又四載瀨食餽投徒於鄉父血證又
作晨侍疾再割右臂進又愈甲子春諸兄四七弟皆湖口他方晨
亦負米在外父疾大作瀨再割右臂以進弗瘳欲割肝母覺奪刀
泣守之父遂卒服闋晨遊泮踰三年晨忽遘疾蓋前割雙臂血流
過多故也家且貧數千里謀生養親積勞病甚日昂泣涕曰吾父

病營生於外展兄能割臂愈父吾獨不能割以愈兄乎惜地幾絕
兄稍平復危匠人治棺日昇時卜畢媼乃奮不顧身持匠斧截指
迸血淋漓調藥飲之終不治邑里驚訝遠邇含悲有司表之邑乘
書之海內名公巨卿騷人詞客咸爲詩歌以慶慶之曰一門四孝
友云

論曰昔人稱刲股療親未足云孝謂身體髮膚受之父母不敢毀
傷是矣夫人臣事君貴於致身箕子微子比干同親臣也或佯狂
爲奴或抱器歸周至今人稱之終不若少師剖心之烈也昔豫讓
嘗事智伯矣智氏亡讓爲報仇毀形變身究與同亡豈非所謂貞
士奇節耶程嬰爲趙朔客下宮之難嬰不與抱孤兒匿山中兒長

卒爲立後人並稱之亦不若公孫杵曰之慷慨赴死壯焉爾但臣
事君卽妻事夫亦惟是同衾同穴相從地下之爲表表耳何獨至
於子之於親弟之於兄而疑之噫過矣夫君恩親誼其倫臣忠子
孝固經致命遂志誓不顧身曰吾殺吾身以成吾仁耳敢求生以
害仁乎當親與兄疾篤不可藥時正百身莫贖之候也父生與生
父亡與亡以親所遺之身因而遺之於親誰曰不宜而固曰過舉
曰奇行將臣之於君妻之於夫覲顏圖存苟且偷生曰此中庸之
道從容就義之爲難也如是而尙有綱常名教天性人倫與況一
寸肉幾滴血未有生死之關也乃欲惜之曰孝不在是將焉在乎
吾卽其引刀含痛時推其一往愛親之心此實當莫可如何之時

呼天而天不應呼親而親不言故爲是莫可如何之愚想而冀幾
倖於萬萬不可救而救之一著未敢曰天地自我格也鬼神自我
動也此仁人孝子不得已之苦衷無可告語無可商量無可禱求
之瞥見也推而廣之伯夷叔齊之餓於首陽龍逢比干之泣血諫
死與夫折檻而進補牘以陳齊太史之簡晉董狐之筆甚則引頸
就戮束躬待烹豈立名延譽哉義有所不忍故也非曰凡爲子爲
弟者之必出於此也亦曰爲子爲弟者之偶出於此不可謂非孝
也弟也云爾不然何以處夫借父耜鋤慮有德色相煎過急兄弟
鬪牆之輩乎昔甯武子當衛難時元咺訟之於內晉人構之於外
俞以一身周旋其間不動聲色不計利害藥餌賂醫委曲行權卒

也保其身以濟其君孔子稱之曰其智可及也其愚不可及也然則汪氏一門四孝友孝友可及也愚不可及也吾故特標而出之以風世云

贊曰殺身成仁捐生守節濟否罔知惴忱已畢越國有孫彰山是宅至行可師一門迭出子遇父危弟逢兄疾藥餌難瘳禱祀無術其心惶惶其色墨墨割股號呼碎指啜泣父兄苟存膚髮奚惜母曰毀傷殫茲心力鄙人孝愚昌黎論刻千載而下請視貞石

右傳趙士麟撰

日本書紀卷之三十一

三十一

楊文蔚

嘗讀典例無有以割臂割肝旌孝子者故西河出遊人以割臂事屬傳必謝之或不得已稍見之雜文如題吳門沙孝子卷如新安程舉人母事狀如爲京口汪將軍記事如錢塘方氏母子五人節孝錄序而獨於上海楊孝子則不然孝子名文蔚本浙之上虞人其父榮生員在明天啟間隨其所親宦上海而家之康熙丁未父病時年八十七孝子走廁舂其糞甘號於天請身代不得竟死越十年母痢見血中死法醫者凡數輩皆前後相顧去孝子獨念父危死不救今復然生男何爲也世已無鍼石燠灼豈湯醕亦告絕者闔戶剖左臂以其肉雜漚汁漚之三漚三進母初進而體下

再進而涉滓以去三進而愈時康熙丙辰九月二十一日又二年
戊午上海令任君廉其事請告之臺將獎之孝子泣曰是欲重我
以迂德也且予何如人其敢以迂德越典例再拜固辭固強之不
受乃爲之題其門曰以身壽母而請西河爲之傳

西河氏曰予兩過上海未得訪所爲孝子者而見之也予友丁明
府曾與之游每盛稱其人謙而和恭而能容輕財好義而不自放
於俠烈人以孝稱之必變色踧踖卻不受每月吉必詣城隍祠禱
之願減年以益母年然祕不令諸兄知若惟恐以獨行傷兄意者
方母病時體羸甚又年高將彌八十耄而曠以爲不療卽療必不
能康彊如平日乃旣愈又健皆矐眙不知所爲丁明府曰孝子將

封臂夾臂以兩麻令肉填起然後迫墜之而脫之以刀故其創甚
鉅骨露凡一百二十日始合創人不知也又曰初以臂肉鉅雜淺
淺之揚其膏令竭屢淺屢竭今所餘腊肉猶有重至八銖外者嗟
乎孝已

右傳毛奇齡撰

三
月
廿
五
日
申
時
卒
年
八
十
三

三

吳瑞鵬

吳雲紳名瑞鵬歛人父以鹽筴起家而雲紳恥爲賈軼宕不治家事稍落其業無以爲親歡於是折節嗣鹽筴然頗慷慨喜負氣內收宗黨外卽閭巷親交遇其赴人之急卽質劑取母錢應之亦不自德色恆太息士不得已而賈寄耳若龔龔務封殖卽一錢靳不肯出眞賈豎矣嘗請其兄收債於楚兄許諾則敕家人視嫂薪水有無久之兄返簿所收歸之不受遽持爲兄壽曰兄病矣敢以收吾債役兄耶子楚英早慧補諸生雲紳棄賈不復事日督諸子讀書雅蓄硯墨見前人嘉言懿行輒滌硯吮墨手自書之多購書畫金石諸古物置左右間一寓目摩挲自得康熙丙辰春寒偶不憚

國朝三朝奉直學士卷之三十一

三

忽割所愛命諸子分遺親舊曰寒食前吾將逝矣諸子愕然已而果卒

右聞見錄吳德旋撰

顏伯璟

明崇禎十五年 王師再入關畿南諸郡相繼陷河間守臣顏公
允紹死之子伯璟自家奔赴所至烽火荆棘或連日不得食土賊
什伯爲羣爭鬪髮植數礪刃欲下見其晝夜哀哭皆感動不敢害
卒負父遺骸以歸會稽倪文正公過而弔之曰父忠子孝是我師
矣文正公者故戶部尚書元璐明亡從懷宗殉社稷者也當是時
顏孝子之名聞天下卽封吏部士瑩先生也方河間之破也 王
師乘勝南下先生家兗州城亦破體素肥自度不能逸麾仲弟伯
玠曰去疾走父所毋爲兄弟死此仲不忍先生給使他願粹自投
城下仲俯視大駭徘徊聞兵至遂被殺而先生墮壕間一日夜復

甦爲邏卒所得見軍帥辭忼厲不少屈帥詢知聖裔驚延之坐先生涕泣求至河閒省父帥曰竟破時河閒陷一月矣若雖往何益先生爲言父平日忠義不苟全我幸遇公得不死曷釋我去冀得收父骨帥惻然改容使人護之出壘時先生婦亦被斫傷垂死子呱呱牽衣哭先生得釋匍匐行未嘗一回視也昔東漢廉范父遭亂歿於蜀范年十五西迎父喪載船觸石破沒人前接范范抱持棺柩不動遂俱沈溺眾哀其義鉤求得之療救僅免若先生所遇之艱百倍於范而風烈過之世多謂古今人不相及豈其然哉嗚呼忠孝之理根於天性上下百千年未之易也而人往往難之者則以貪生怯死之一念迫乎其中不覺苟且而失節耳以視先生

一往不顧誼不旋踵卒其志遂而其身未嘗不存然則隱忍者豈必皆生而蹈義者又何必果死耶先生入國朝隱居不仕有六男子長翰林院編修光猷次吏部稽勳司主事光敏俱有稱於時封先生如次子官以康熙丙辰月日歿於家將卜某年月日葬某原因爲此文俾鏡諸墓後之人聞先生行事一旦臨大故知決擇無爲利害所搖奪庶幾風厲之旨於是乎在

右墓表葉方藹撰

公諱伯璟字士瑩山東曲阜人中憲大夫知河間府事諱允紹之子 贈文林郎江都縣知縣諱宏化之孫處士諱從麟之曾孫而復聖顏子六十六世孫也母曰孟孺人公少補四氏學生員讀書

卓犖自喜不治章句人或勸之銳意仕進則曰世事如炎火燎原者將入於廈處堂之燕雀吾不爲也從其父歷鳳陽江都邯鄲事無纖鉅侍對必中理河閒兵至中憲公修渠蟾爲禦城孤乏援不支衣朝衣朝冠北向拜集家人一室中舉火自焚死公暨弟伯玠時家兗州府兵亦至登陴以望鳴鏑自西來集於譙門城將陷兵民皆竄公性肥不能駛足伯玠性瘦善走手掖公以行步益窘公曰同厄無益弟亟去猶可活也伯玠不肯釋公給弟他顧自城躍下伯玠俯視慟哭矢及其身而卒公仆地傷左足極夜乃甦爲邏卒所得見公修髯廣頤狀甚偉不敢害車舁以告其帥公見帥不爲屈帥驚曰吾略地以來未嘗見有此人問之則顏子之後遂延

之坐留帳中遇復有被掠者對公偶語曰昨者見城中有婦女十數輩遇卒驅以走中一婦不肖行卒反刃擊其臂臂折猶罵不已卒殺之將下有媼過之指曰此顏氏婦也公曰得非吾婦乎語其帥同被掠者至將下果然蓋刃傷已四日矣驗其息猶未絕載之還卽今朱宜人是已帥謂公曰而日念而父然兗州破時河間之陷已一月矣公聞之長號力請於帥帥護之出軍壘公留朱宜人於曲阜足尙跛蹠跚走河間時盜賊充斥於路或積日不食每被執公慷慨與語輒得釋卒達河間哭其父甚哀路人皆泣中憲公之自焚也幼子伯珣年六歲其僕呂有年抱之出火負而走途中流矢死伯珣匿民間得免公旣拾父遺骸訪得其弟遂與俱還倪

尚書元瑒中憲公實出其門會道經河間爲文以祭曰父忠子孝
是吾師矣由是公以孝聞一時公平生坦易不沽名譽暇則抽琴
賦詩與宗邨結文酒之會取怡悅性情而已遇人甚溫而家法嚴
以肅友愛季弟同居無閒言訓子孫以博通經義恆自言吾壽止
六十一卒之歲果驗公生於萬厯丙辰年九月二十五日卒於康
熙丙辰年十二月二十五日 封奉直大夫娶朱氏 封宜人有
子七人男六人光猷翰林院編修光敏吏部稽勳清吏司主事光
政光枚光孜光敷俱四氏學生員女一人嫁孔毓燧孫十四男六
人肇雍肇育肇永肇臺肇亨肇亢女八人一嫁孔興焯餘未嫁葬
尊獲交吏部君久繼又識編修君公之卒於陋巷里也兩君咸官

京師聞親喪辟踊盡哀涕與血俱四方觀禮者有顏丁善居喪之
目既成服而後行將歸葬公於侍郎之林請爲文表諸墓嗚呼公
父死於忠公蹇而走千里白刃塞於前曾不少憚其不死於孝者
僅爾乃其配烈婦其子又孝子也以孝子之請表孝子之墓此文
之無可辭者也雖然布衣之言不足重於時久矣斯欲榮其親者
必資卿相殊階揭石於原始足動人之觀覽兩君舍彼勿求願屬
之彝尊殆以其言之質庶幾可昭信後世也故論次刻碣無溢辭

右墓表朱彝尊撰

先生諱伯璟士瑩其字復聖六十六代孫世居曲阜父允紹明崇
禎辛未進士歷官河間府知府有子三人先生其長也次伯玠次

伯珣先生生有異稟狀貌偉麗讀書不屑章句談古人忠孝事輒感激奮發河閒公令鳳陽令江都令邯鄲每以先生從時天下已亂軍書旁午郡縣吏日不暇給先生侍其父凡所區畫多中機宜河閒公以守邯鄲功累遷知河閒府會王師入關薄畿輔河閒孤城無援公衣冠北嚮再拜集家人一室中而自登陴力守城破急趨歸署闔門舉火自焚死時先生獨與仲弟伯玠居兗郡道阻不相聞未幾兗亦陷先生方與弟乘城守禦兵入守者皆潰先生體肥行不得疾伯玠掖以行先生麾之曰吾父在河閒存亡不可知汝當速去兄弟并命於此無益也伯玠持兄泣先生給使他顧遽自埤堦閒躍下伯玠遂死亂兵先生左足傷爲邏所得以見其

帥訝其狀非常人又詢知家世遽延之坐而先生念河閒公日夜
泣帥問知狀曰兗州破時河閒陷一月矣先生痛哭投地絕復甦
告於帥曰吾父素矢忠節義無苟全我幸遇公得不死曷縱我去
俾收骸骨言已復絕於地帥憐而許之因閒道入曲阜城已遂匍
匍赴河閒當是時先生室朱宜人被創甚二稚子方患痘毅然弗
顧也兵火充斥或竟日無所得食道遇盜賊數十百輩慷慨與語
聲淚俱發賊輒感動引去達河閒求父遺骸哭踊盡禮觀者莫不
泣下當河閒公自焚時僕呂有年者負幼子伯珣出走有年道中
流矢死伯珣竄民間至是先生攜與俱歸會稽倪文正公赴召入
都過河閒爲設祭且曰父忠子孝吾師也河閒公辛未舉禮部實

出文正之門其爲所推重如是先生自鼎革後絕意仕進暇輒讀書鼓琴閒亦爲詩痛弟伯玠之死與伯珣尤友愛同居三十載無間言教子以忠孝大義子六人皆有所成就長光猷康熙癸丑進士今爲翰林院編修次光敏康熙丁未進士今爲吏部稽勳司主事以 覃恩封先生如光敏官先生歿鄉人思之私謚孝靖先生論曰漢東陽顏烏有孝行致羣烏銜鼓之祥因立縣曰烏傷歷代或稱烏孝或稱義烏皆以孝子得名唐天寶河北之亂常山忠節公死之于泉明負父骨於東京行求宗屬先姑姊妹而後其子子每讀史至此未嘗不流涕嗟慕今觀先生父子閒其行事何相類也仲尼弟子達者七十二人顏氏有八人焉韓子稱儒分爲八顏

居其二顏氏之於忠孝所由來遠矣予故拾先生事蹟爲傳使史氏有考云

右傳王士禎撰

K320-48

2

1573331

大正十三年四月廿九日

大正十三年四月廿九日

四

176-848



21101000160798